

Ա. ՍՏԵՓԱՆՅԱՆ, Ռ. ՍԱՖՐԱՍՅԱՆ, Ա. ՆԱԶԱՐՅԱՆ

ՀԱՄԱՇԽԱՐՀԱՅԻՆ ՊԱՏՄՈՒԹՅՈՒՆ • ՆՈՐ ԴԱՐԵՐ

ԴԱՍԱԳԻՐԷ ՀԱՆՐԱԿՐԹԱԿԱՆ
ՀԻՄՆԱԿԱՆ ԴՊՐՈՑԻ ՀԱՄԱՐ

Ց-ՐԴ
ԴԱՍԱՐԱՆ



ԶԱՆԳԱԿ
ՀՐԱՏԱՐԱԿՉՈՒԹՅՈՒՆ

Ե Ր Ե Վ Ա Ն • 2013

Հաստատված է ՀՀ կրթության և գիտության նախարարության կողմից

ՀՏԴ 373.167.1:94/99(075)
ԳՄԴ 63.3(0) ց 72
Հ 422

ՀԵՂԻՆԱԿՆԵՐ՝

Ալբերտ Ստեփանյան. պատմագիտության դոկտոր, պրոֆեսոր
(ներածություն, §§ 1–8, 11–19, 27, 28)

Ռուբեն Սաֆրաստյան. պատմագիտության դոկտոր, պրոֆեսոր
(§§ 9, 22)

Արամ Նազարյան. պատմագիտության թեկնածու
(§§ 10, 20, 21, 23–26)

ՄԵԹՈԴԴՍ՝

Արմինե Սարգսյան. պատմաբան, մանկավարժ
(I և II բաժինների ամփոփումներ, մեթոդական ապարատ)

Հ 422 ՀԱՄԱՇԽԱՐՀԱՑԻՆ ՊԱՏՄՈՒԹՅՈՒՆ: ՆՈՐ ԴԱՐԵՐ: Դասագիրք հանրակրթական հիմնական դպրոցի 8–րդ դասարանի համար/ Ա. Ստեփանյան, Ռ. Սաֆրաստյան, Ա. Նազարյան.— Եր.: «Զանգակ» հրատ., 2013.— 176 էջ:

ՀՏԴ 373.167.1:94/99(075)
ԳՄԴ 63.3(0) ց 72

ISBN 978–9939–68–192–4

© «Զանգակ–97» ՍՊԸ, 2013

Բոլոր իրավունքները պաշտպանված են



ՆԵՐԱԾՈՒԹՅՈՒՆ

Արդյունաբերական հասարակության երկու շրջափուլերը

Պատանձի բարեկամ, այս ուսումնական տարում դու կուսումնասիրես համաշխարհային պատմության երրորդ խոշոր շրջանը՝ **Նոր դարերը**: Պատմությունն ընդհանուր առմամբ ներկայանում է որպես հասարակության առաջադիմական զարգացման գործընթաց: Անշուշտ, այդ առաջընթացը չի եղել կայուն և հավասարաչափ: Տարբեր երկրներում այն ունեցել է իր առանձնահատկությունները. երբեմն՝ արագ վերելք, երբեմն՝ տևական լճացում կամ անկում:

Առաջընթացի կարևոր չափանիշներից է տվյալ հասարակության՝ նյութական բարիքներ արտադրելու կարողությունը: Դրան համապատասխան էլ ձևավորվում են մարդկանց տնտեսական, ընկերային (սոցիալական), մշակութային և քաղաքական հարաբերությունները:

Հասարակական նոր հարաբերությունների ձևավորումը տևական գործընթաց է: Այդպիսի մի գործընթաց սկզբնավորվեց **Նոր պատմության** արշալույսին՝ XVII դ. սկզբին: Այն հանգեցրեց **արդյունաբերական հասարակության** ձևավորմանը: Նկատի ունենալով նրա ձևավորման տարածաշրջանը՝ վերջինս անվանում են նաև **եվրոպական** կամ **արևմտյան հասարակություն**, իսկ երբեմն նաև կապիտալիստական կամ բուրժուական՝ նկատի ունենալով սեփականության այն նոր ձևը (**կապիտալ**), որը հատուկ էր նրան: Արդյունաբերական հասարակության պատմությունը ներկայացվում է երեք շրջափուլով: Դրանցից երկուսը ընդգրկում են Նոր դարերը:

Առաջին շրջափուլն ընդգրկում է XVII դարից մինչև XIX դարի կեսը: Այդ ժամանակաշրջանում սկզբնավորվեց և զարգացավ արդյունաբերական արտադրությունը, ձեռքի աշխատանքին փոխարինելու եկան մեքենաներն ու սարքավորումները: Դա արդյունք էր **արդյունաբերական հեղաշրջման**: Հասարակության առաջատար դասերը դարձան **ձեռներեցները և բանվորները**: Ձևավորվեց ազգային միասնական շուկան: Խորացան տարբեր երկրների և աշխարհամասերի միջև տնտեսական կապերը: Ի հայտ եկան մեծ քաղաքներ:

Երկրորդ շրջափուլն ընդգրկում է XIX դարի կեսից մինչև XX դարի սկիզբը: Այդ ընթացքում ավարտվեց արդյունաբերական հասարակության ձևավորումը: Հասարակական կյանքում մեծացավ գիտության և տեխնիկայի դերը: Արտադրությունն ընդլայնվեց և հասավ մեծ ծավալների: Զարգացած երկրներում գերիշխող դարձավ ծանր արդյունաբերությունը: Առաջացավ համաշխարհային միասնական շուկա:

Ավելացավ խոշոր քաղաքների թիվը, բարձրացավ բնակչության կենցաղային ու կրթական մակարդակը:

Հասարակական-քաղաքական գործընթացները

Նոր դարերում տեղի ունեցան հասարակական կարգի արմատական փոփոխություններ: Ավատատիրական հասարակական հարաբերություններին փոխարինելու էր գալիս **ժողովրդավարությունը**: Միջնադարյան ժողովուրդն սկսում էր կազմավորվել որպես արդիական **ազգ**: Ազգը միասնական էր, գիտակցում էր իր շահերը և ուներ կամք՝ բարենորոգելու իր հասարակական կարգը և մասնակցելու դրա կառավարմանը: Վերացան դասերի (ազնվականություն, հոգևորականություն, գյուղացիություն) միջև առկա նախկին անջրպետները: Բոլորը օրենքի առաջ ճանաչվեցին ազատ և հավասար քաղաքացիներ: Սկսեց ձևավորվել **քաղաքացիական հասարակությունը**:

Հին կարգերը, սակայն, դժվարությամբ էին զիջում իրենց տեղը: Հաճախակի դարձան **հեղափոխությունները**: Իշխանության համար հնի և նորի կողմնակիցների միջև տեղի էր ունենում քաղաքացիական պատերազմ: Հեղափոխությունները երբեմն մեծ ազդեցություն էին թողնում նաև այլ երկրների վրա: Այդպիսին էր, օրինակ՝ Ֆրանսիական մեծ հեղափոխությունը (1789–1799):

Մակայն հեղափոխությունները առաջընթացի միակ ուղին չէին: Նորի հաստատման ճանապարհին որոշ ազգեր գերադասում էին իրականացնել նպատակալաց և աստիճանական **բարենորոգումներ**: Նրանք խուսափում էին մեծ ցնցումներից և հասնում հաջողությունների տնտեսության, պետական կառավարման, մշակույթի ասպարեզներում: Այդ ուղին ավելի հատկանշական էր Անգլիայի համար:

Նոր դարերին բնորոշ էր նաև **ճնշված ժողովուրդների ազատագրական պայքարը և ազգային պետությունների ստեղծումը**: Դրանք ուղեկցվում էին հեղափոխական շարժումներով: Ասվածի լավագույն օրինակը հյուսիսամերիկյան գաղութների ազատագրական պատերազմն էր և ԱՄՆ-ի կազմավորումը (1775–1783):

Կարևոր փոփոխություններ տեղի ունեցան նաև միջազգային հարաբերություններում: Ձևավորվեցին արդի միջազգային իրավունքի հիմնարար սկզբունքները:

Մեծ չափերի հասան **գաղութային նվաճումները Լատինական Ամերիկայում, Ասիայում, Աֆրիկայում**: Գաղութացումն ուներ երկակի բովանդակություն: Մի կողմից՝ զարգացած եվրոպական երկրները նվաճում էին հետամնաց ժողովուրդներին՝ կողոպտելով նրանց հարստությունները, ենթարկելով դաժան շահագործման, մյուս կողմից՝ հետամնաց ժողովուրդները հաղորդակից էին դառնում արդյունաբերական հասարակության նվաճումներին:

Ընդհանուր առմամբ սրանք են պատմական զարգացման այն կարևոր արդյունքները, որոնց մասին ավելի հանգամանակից կխոսվի դասագրքում:

ԱՐԴՅՈՒՆԱԲԵՐԱԿԱՆ ՀԱՍԱՐԱԿՈՒԹՅԱՆ ԱՌԱՋԻՆ ՇՐՋԱՓՈՒԼԸ

XVII ԴԱՐ – XIX ԴԱՐԻ ԱՌԱՋԻՆ ԿԵՍ



1

ԱՐՄԱՏԱԿԱՆ ՏԵՂԱՇԱՐԺԵՐ
ՏՆՏԵՍՈՒԹՅԱՆ ՄԵՋ

Տեխնիկայի առաջընթացը



Միջնադարյան արհեստանոց

Գարեր շարունակ մարդիկ ձգտել են ավելացնելու նյութական բարիքների արտադրությունը, բարելավելու իրենց կյանքի պայմանները, բարձրացնելու կենսամակարդակը: Ստեղծել են գործիքներ, սարքավորումներ՝ ֆիզիկական ծանր աշխատանքը թեթևացնելու համար: Այդ ուղղությամբ տպավորիչ նվաճումներ են արձանագրվել նոր ժամանակներում:

XV–XVI դդ. Եվրոպայում աճեց բնակչության թիվը, մեծացավ ապրանքների պահանջարկը: Արհեստավորական արտադրությունն այլևս չէր կարող բավարարել մարդկանց պահանջմունքները: Միջնադարյան արհեստանոցի փոխարեն աստիճանաբար առաջացան ավելի խոշոր արտադրական ձեռնարկություններ՝ **մանուֆակտուրաներ**: Դրանք հայտնվեցին նախ Անգլիայում, Հոլանդիայում, Ֆրանսիայում, ապա նաև Եվրոպայի մյուս երկրներում:

Մանուֆակտուրայում վարձու աշխատող բանվորներից յուրաքանչյուրը հնտանում էր արտադրական մեկ կամ մի քանի գործողության մեջ: Օրինակ՝ մահուդագործ բանվորներից ոմանք լվանում էին բուրդը, մյուսները՝ մանում, մի մասը ներկում էր, մյուս մասը՝ գործում: Աշխատանքի բաժանման արդյունքում խորացավ **աշխատանքի մասնագիտացումը**, և բարձրացավ **արտադրողականությունը**: Սակայն մանուֆակտուրաներում աշխատանքը գերազանցապես կատարվում էր ձեռքով:

Գարեր շարունակ էներգիայի գլխավոր աղբյուրը մարդու և կենդանիների մկանային ուժն էր: Աշխատանքը հեշտացնելու համար օգտագործում էին նաև բնության ուժերը՝ ջուրը, քամին, կրակը: Լայն տարածում ստացավ **ջրանիվը**, որ հայտնի էր դեռ Հին աշխարհում: Արդեն XVI դարում ջրանիվի էներգիայով էին աշխատում խառատային հաստոցները, սղոցները,



Մանուֆակտուրա

դարբնոցների փուքսերը, մահուդագործական մամլիչները և այլն:

Այսպիսով՝ մանուֆակտուրաները էապես նպաստեցին աշխատանքի արտադրողականության աճին և տեխնիկայի առաջընթացին:

Գյուղատնտեսության վերազինումը

XVII–XVIII դդ. աշխարհի բնակչության մեծ մասը զբաղված էր գյուղատնտեսությամբ: Նույնիսկ Եվրոպայում հողի մշակմամբ զբաղված էր բնակչության գրեթե 90%-ը: Սակայն տեխնիկան դեռևս հետամնաց էր:

Գյուղատնտեսությունն ամենից արագ զարգանում էր Անգլիայում: Այնտեղ մանուֆակտուրաներ էին առաջանում նաև գյուղական վայրերում: Հատկապես շատ էին գործվածքեղեն արտադրող մանուֆակտուրաները: Դա մեծացնում էր բրդի պահանջարկը, որն էլ խթանում էր ոչխարաբուծության զարգացումը: Կենդանիներին կերակրելու և պահելու նպատակով ցանկապատում էին համայնական արոտավայրերը: XVIII դ. վերջին այդ գործընթացը հիմնականում ավարտվեց. ամրագրվեց հողի մասնավոր սեփականությունը:

Ջարգացավ երկրագործությունը: Ընդլայնվեցին ցանքատարածությունները, ոռոգման ջրանցքները: Ունևոր տնտեսություններում հողը հերկում էին գութանով, ցանքսը կատարում սերմնացանով: Այս ամենի շնորհիվ 2–2,5 անգամ ավելի բերք էին ստանում:

Գյուղատնտեսության զարգացմանը խթանեց նաև խոշոր քաղաքների առաջացումը: Դրանք գյուղատնտեսական մթերքների մեծ սպառողներ էին: Ստեղծվեցին ցորենի, գարու, վարսակի, մրգերի ու բանջարեղենի նոր տեսակներ: Ներմուծվեցին նոր մշակաբույսեր՝ կարտոֆիլ, շաղգամ:

Գյուղատնտեսության կազմակերպումն սկսեց դրվել գիտական հիմքերի վրա: Միայն XVII դ. առաջին կեսին Անգլիայում լույս տեսավ գյուղատնտեսության մասին մոտ 50 անուն գիրք: Այս միտումները ժամանակի ընթացքում տարածվեցին նաև Եվրոպայի մյուս երկրներում:




ՋԵՅՄՍ ՈՒՅՏՏ
(1736–1819)

Ծնվել է Շոտլանդիայում: Պապը եղել է մաթեմատիկայի և ծովագնացության դասախոս, հայրը՝ գործարար: Վաղ հասակից սիրել է մաթեմատիկան և դրսևորել գյուտարարական հակումներ: Ի վերջո՝ Գլազգոյի համալսարանում դարձել է գործիքագործ վարպետ: 1768 թ. ստեղծել է իր առաջին շոգեշարժիչը:

Շոգեշարժիչի ստեղծումը XIX դարում Անգլիային և Եվրոպական մյուս երկրներին հնարավորություն տվեց արդյունաբերության մեջ կատարելու մեծ թռիչք:

Նրա անունով է կոչվում հզորության չափման միավորը՝ վատտը:



Առաջին շոգեմեքենայի
գծագիրը



ՋՈՐՋ ՍՏԵՖԵՆՍՈՆ
(1781-1848)

Անգլիացի ինքնու ճարտարագետ: 1814 թ. ստեղծել է շոգեքարշը, որի օգնությամբ քարածուխ է հանվել հանքից: 1823 թ. հիմնել է աշխարհում առաջին շոգեքարշների գործարանը, որտեղ ստեղծվել է «Տրոիո» շոգեքարշը՝ ժամում 50 կմ արագությամբ: Նույն թվականին նրա գլխավորությամբ կառուցվել է առաջին երկաթուղին: 1836 թ. Լոնդոնում ստեղծել է երկաթուղիների նախագծման գրասենյակ:

Արդյունաբերական հեղաշրջումը

Մանուֆակտուրան բավականին տարածված էր XVIII դ. Եվրոպայում: Մակայն արտադրության մեջ տիրապետող ձեռքի աշխատանքը այլևս չէր ապահովում արտադրության առաջընթացը: Աստիճանաբար անցում կատարվեց մանուֆակտուրայից **մեքենագործարանային** արտադրության: Այդ անցումը հայտնի է **արդյունաբերական հեղաշրջում** անունով:

Նման ուղիով առաջինն ընթացավ Անգլիան: Նրա վերագինումը տևեց XVIII դ. 60-ական թթ. մինչև XIX դ. 40-ական թթ.: Ամենից շատ և կատարյալ մանուֆակտուրաները Անգլիայում էին: Անգլիացի ձեռներեցները կուտակել էին մեծ կապիտալ, որը սկսեցին ներդնել արտադրության մեջ:

Կապիտալը ունեցվածք է, որը ձեռներեցը, ներդնելով արտադրության մեջ, նոր շահույթ է ստանում:

Ժամանակի ընթացքում կապիտալը, դառնալով սեփականության գլխավոր ձև, հիմք է դնում **նոր՝ կապիտալիստական հասարակարգի ձևավորմանը:**

Ձեռներեցները միջոցներ չէին խնայում տեխնիկական գյուտեր և գիտական հայտնագործություններ հովանավորելու գործում: Առաջին սարքերը ներդրվեցին մանածագործության մեջ, **կառուցվեցին առաջին գործարանները:** Սարքերի և մեքենաների կիրառումը մի քանի անգամ ավելացրեց աշխատանքի որակն ու արտադրողականությունը:

Ճարտարագետները ձգտում էին ստեղծելու **համընդհանուր շարժիչ:** Արդիական էր **գոլորշու ուժի** օգտագործման գաղափարը, որն իրականություն դարձրեց անգլիացի ճարտարագետ **Ջ. Ուատտը:** Նա իր շոգեշարժիչի հիմքի վրա **1784 թ.** ստեղծեց առաջին **շոգեմեքենան:**


Շոգեշարժիչի գյուտը հեղաշրջում առաջացրեց: **Ռ. Ֆուլտոնը 1803 թ.** Մենա գետում փորձարկեց իր առաջին **շոգենավը**, իսկ **1807 թ.** ԱՄՆ-ում ստեղծած նրա շոգենավով սկզբնավորվեց երթևեկության նոր տեսակը: XIX դ. առաջին կեսին հազարավոր շոգենավեր արդեն ակոսում էին ծովերն ու օվկիանոսները: 1814 թ. անգլիա-

ցի ճարտարագետ **Ջ. Ստեֆենսոնի** գլխավորությամբ ստեղծվեց առաջին շոգեքարշը, իսկ **1823 թ.**՝ առաջին երկաթուղին: Մինչև XIX դ. կեսը Անգլիայում և մյուս երկրներում կառուցվեցին հազարավոր կիրմետր երկարությամբ երկաթուղիներ:

XIX դ. առաջին կեսին կտրուկ ավելացավ թուջի (չուգունի) և պողպատի արտադրությունը: Ստեղծվեցին նոր մետաղահալոցներ, որտեղ ստանում էին պողպատի բարձրորակ տեսակներ:

Արտադրության ամենատարբեր ճյուղերի աննախադեպ զարգացումը Անգլիան դարձրեց մեկ տնտեսական ամբողջություն: Զարգացավ **համազգային շուկան**: Շուկան էր որոշում՝ ինչ արտադրել, ինչ որակի ու քանակի և ինչ գնով վաճառել:

Արդյունաբերական հեղաշրջման ավարտին Անգլիան դարձավ աշխարհի ամենազարգացած երկիրը: 1851 թ. Լոնդոնում կազմակերպվեց տնտեսական նվաճումների առաջին համաշխարհային ցուցահանդեսը: Ցուցահանդեսին մասնակցել են նաև հայ ձեռներեցներ, որոնց արտադրանքի նմուշներն արժանացել են բարձր պարգևների:



«Բյուրեղապակյա ապարանքը» Լոնդոնում, որտեղ 1851 թ. անցկացվեց տնտեսական նվաճումների առաջին համաշխարհային ցուցահանդեսը:



ՌՈՒԲԵՐՏ ՖՈՒԼՏՈՆ
(1765–1815)

Ամերիկացի գյուտարար, ճարտարագետ: Ապրել է Փարիզում: 1800 թ. ստեղծել է լողացող ական և սուզանավ: 1803 թ. Սենա գետում փորձարկվել է նրա առաջին շոգենավը, որի արագությունը 7 կմ/ժ էր: ԱՄՆ-ում 1807 թ. Հուդզոն գետում փորձարկել է իր նոր շոգենավը: Դա շոգենավային երթևեկության սկիզբն էր: Ռ. Ֆուլտոնը նաև կառուցել է ռազմական շոգենավ, որն օգտագործվել է 1812–1814 թթ. Անգլիայի դեմ պատերազմում:



Առաջին շոգենավը

Հարցեր և առաջադրանքներ

1. Ինչ է մանուֆակտուրան: Ինչո՞վ էր այն տարբերվում միջնադարյան արհեստանոցից:
2. Ո՞ր երկրներում առաջինը ստեղծվեցին մանուֆակտուրաներ:
3. Փաստերով ցո՛ւյց տվեք, որ մանուֆակտուրաների առաջացումը նպաստեց աշխատանքի արտադրողականության աճին և տեխնիկական առաջընթացին:
4. XVII–XVIII դարերում ինչ գործոններ խթանեցին գյուղատնտեսության զարգացմանը:
5. Ինչ է արդյունաբերական հեղաշրջումը: Ո՞ր երկրում և է՞րբ առաջինը տեղի ունեցավ արդյունաբերական հեղաշրջում:
6. Ե՞րբ է կառուցվել աշխարհում առաջին գործարանը:
7. Տեխնիկական ո՞ր գյուտերը և գիտական հայտնագործությունները նպաստեցին արդյունաբերական հեղաշրջման ծավալմանը:
8. Փաստերով հիմնավորե՛ք, որ Անգլիան արդյունաբերական հեղաշրջման ավարտին դարձել էր աշխարհի ամենազարգացած երկիրը:

Նոր հասկացություններ, անուններ

Տեխնիկական առաջընթաց, աշխատանքի արտադրողականություն, մեքենագործարանային արտադրություն, արդյունաբերական հեղաշրջում, կապիտալ, շոգեմեքենա, երկաթուղի, համազգային շուկա, տնտեսական նվաճումների առաջին համաշխարհային ցուցահանդես, Ջ. Ուատտ, Ռ. Ֆուլտոն, Ջ. Ստեֆենսոն:

2

ԱՐԴՅՈՒՆԱԲԵՐԱԿԱՆ
ԶԱՐԳԱՑՄԱՆ ԱՐԴՅՈՒՆՔՆԵՐԸ**Փոփոխություններ հասարակական կյանքում**

XVII դ. սկսած՝ տնտեսական առաջընթացը հանգեցրեց Եվրոպայում նոր հասարակարգի ձևավորմանը: Այն ընդունված է անվանել **արդյունաբերական հասարակություն:**

Միջնադարյան հասարակությունը, ինչպես գիտենք, կազմված էր երկու հիմնական դասից՝ ազնվականությունից և գյուղացիությունից: Կարևոր դեր էին խաղում նաև հոգևորականները, արհեստավորներն ու վաճառականները: Նոր ժամանակներում հասարակության ընկերային (սոցիալական) պատկերը հիմնովին փոխվեց: Արդյունաբերական հասարակության կարևոր դերքը դարձան **ձեռներեցները** և **բանվորները**: Ձեռներեցներին անվանում էին **բուրժուա**, իսկ ավելի ուշ նաև **կապիտալիստ**:

Բուրժուա ասելով՝ նկատի ունենին քաղաքի պատվար-ժան բնակիչներին՝ բժիշկներ, փաստաբաններ, դատավորներ, դեղագործներ, վաճառականներ, դրամատերեր (բանկիրներ): Գրանք մարդիկ էին, ովքեր ունեին կարևոր մասնագիտություն, ինքնուրույն գործ և ապրում էին բարեկեցիկ կյանքով: Իսկ «կապիտալիստ» հասկացությամբ շեշտվում էր, որ տվյալ անձն ունի կապիտալ և ձգտում է այն բազմապատկելու: Առավել արագ հարստանում էին վաճառականները, դրամատերերը, նավատերերը: Նրանք մասնակցում էին արտաքին առևտրին՝ ստեղծելով խոշոր ընկերություններ: Մասնակցում էին նաև անդրծովյան գաղութների հիմնմանը: Օրինակ՝ 1600 թ. Անգլիայում ստեղծվեց **Արևելահնդկական ընկերությունը**, որը գոյատևեց մինչև XIX դ. երկրորդ կեսը:

Նոր ժամանակներում կտրուկ մեծացավ **բանկերի** նշանակությունը: Գործարարները իրենց կապիտալը շահավետ պայմաններով պահում էին բանկերում, իսկ ուրիշները վարկեր էին ստանում: Բանկերը նպաստում



Նոր ժամանակների
ազարակատեր

էին տնտեսության զարգացմանը՝ դրամական ներդրումներ կատարելով տնտեսության տարբեր ճյուղերում:

Անգլիայում ազնվականների մի մասն իր կալվածքները վերածեց բուրդ արտադրող տնտեսության: Նրանք սկսեցին կոչվել **նոր ազնվականություն**: Ավելի ուշ նման դաս ձևավորվեց Ֆրանսիայում և մյուս երկրներում:

Նոր ժամանակներում ծանր ճակատագիր բաժին ընկավ բնակչության մեծամասնությունը կազմող գյուղացիությանը: Գյուղը ներքաշվեց շուկայական տնտեսության մեջ: Համայնական հողերի ցանկապատումն ունեզրկեց գյուղացիների մեծ մասին: Այդուհանդերձ, գյուղացիների մի փոքր մասին հաջողվեց ստեղծել սեփական տնտեսություն և դառնալ **ազարակատեր (ֆերմեր)**:

Արդյունաբերական հեղաշրջման հետևանքով կտրուկ աճեց քաղաքային բնակչության թիվը, և քաղաքներն սկսեցին վճռորոշ դեր խաղալ պետության կյանքում:

Նախ՝ ձևավորվեց ձեռներեցների դասը, որոնց շարքերում ազդեցիկ դարձան արդյունաբերողները՝ հանքահորերի, ձեռնարկությունների, փոխադրամիջոցների տերերը: Երկրորդ՝ գյուղից քաղաք տեղափոխված գյուղացիների զանգվածն աստիճանաբար վերածվեց արդյունաբերական բանվորության: **Արդյունաբերողներն ու բանվորները դարձան նոր հասարակության գլխավոր ուժը**: Նրանցից յուրաքանչյուրն ուներ իր շահերը: Ձեռներեցները ձգտում էին հասնելու իշխանության, նպաստավոր պայմաններ ստեղծելու գործարարության համար և ստանալու մեծ եկամուտներ: Իսկ բանվորները ձգտում էին բարելավելու իրենց աշխատանքային, հասարակական և կենցաղային վիճակը:

Արդյունաբերական հասարակության առաջացման կարևոր սոցիալական հետևանքներից մեկն էլ մտավոր աշխատանքով զբաղվող մարդկանց թվաքանակի կտրուկ աճն էր: **Մտավորականությունը դարձավ բազմամարդ՝ գիտնականներ, ճարտարագետներ, իրավաբաններ, ուսուցիչներ, բժիշկներ և այլն**: Զարգացած երկրներում միտում կար գրագիտությունը դարձնելու համատարած:

Քաղաքների զարգացումը

XVI դ. ի վեր Եվրոպայում քաղաքներն աննախադեպ զարգացում ապրեցին: Ձևավորվեցին արդյունագործական քաղաքներ, որտեղ կենտրոնացած էին մանուֆակտուրաները, շուկաները, պահեստները, դրամատները: Աշխուժություն էր տիրում **բորսաներում**, որտեղ ձեռներեցները հանդիպում և գործարքներ էին կնքում: Ամենահայտնին Լոնդոնի **Սիթի** կոչվող բորսան էր:

XVIII դ. կեսին Արևմտյան Եվրոպայում կար հարյուր հազարից ավելի բնակչությամբ 15 քաղաք: Իսկ արդեն XIX դ. քաղաքներում ապրում էր Անգլիայի բնակչության կեսից ավելին: Նման միտում էր նկատվում նաև Ֆրանսիայում, Հոլանդիայում, Գերմանիայում, ԱՄՆ-ում: Հատկապես արագ էին աճում Լոնդոնը, Փարիզը, Նյու Յորքը:

Փոխվեց քաղաքների ենթակառուցվածքը: Միանման նախագծերով սկսեցին կառուցվել փողոցներ, տներ, զբոսայգիներ, հիվանդանոցներ, թատրոններ, գրադարաններ, թանգարաններ, դպրոցներ: Հատուկ ուշադրություն էր դարձվում համաքաղաքային ջրնուղի և կոյուղու ստեղծմանը: XIX դ. առաջին կեսին Փարիզում և Լոնդոնում սկսեց գործել առաջին հասարակական փոխադրամիջոցը՝ **ձիաքարշ մեծ կառքը** կամ **հանրակառքը** (օմնիբուս):

Մարդկանց կենսապայմանների բարելավումը

Տեխնիկայի առաջընթացը, աշխատանքի արտադրողականության աճը նպաստեցին նյութական բարիքների



Նոր ժամանակների արդյունաբերական քաղաք

ավելացմանը: XVIII դ. անգլիացի տնտեսագետ **Ա. Սմիթը** ապացուցեց, որ ազգերի հարստության աղբյուրը աշխատանքն է:

Բարեկեցության չափանիշով անգլիացիները նույնպես առաջինն էին: Նրանց հետևեցին ֆրանսիացիները, ամերիկացիները, գերմանացիները և այլք: Սակայն ազգերն այդպիսի հաջողության հասան աստիճանաբար՝ ոչ միանգամից: Արդյունաբերական հասարակության առաջին փուլում աշխատավորությունն ապրում էր ծանր պայմաններում:

Ամենաընչազուրկ մասը ժամանակավոր վարձու աշխատանքով ապրողներն էին, որոնց մեծ մասը նախկին հողազուրկ գյուղացիներն էին: Տեղափոխվելով քաղաքներ՝ նրանք միշտ չէ, որ կարողանում էին աշխատանք գտնել: Շատերը դառնում էին շրջնովիկ, մուրացկան կամ գող:

Բարվոք չէր նաև մշտական աշխատանք ունեցողների վիճակը: Ձեռներեցները նրանց աշխատեցնում էին շատ, սակայն վճարում՝ քիչ: Աշխատում էին օրական 14-18 ժամ: Բանվորներն ապրում էին խուղերում՝ առանց կենցաղային տարրական պայմանների: Մահացությունը (հատկապես՝ երեխաների) չափազանց մեծ էր: Ձեռներեցները նաև շահագործում էին կանանց ու անչափահասների աշխատանքը: Ոմանք հուսահատված կոչ էին անում վերադառնալ գյուղ:

Սակայն կար ավելի արդյունավետ ճանապարհ: Իրենց իրավունքները պաշտպանելու համար բանվորներն սկսեցին ստեղծել **արհեստակցական միություններ**: Անգլիայում դրանք ի հայտ եկան XVIII դ. վերջին: Բան-



Լոնդոնյան հանրակառք պատկերող հին լուսանկար

վորները հաճախ **գործադուլների** միջոցով պահանջում էին բարձրացնել իրենց աշխատավարձը, կրճատել աշխատաժամանակը և այլն:

Պետությունը մշտապես փորձում էր մեղմել սոցիալական հակասությունները: Օրինակ՝ մինչև 1834 թ. Անգլիայում հարուստներից հատուկ հարկ էր գանձվում՝ հոգուտ աղքատների: Իսկ XIX դ. 30–40–ական թթ. խորհրդարանն օրենքներ էր ընդունել, որոնք արգելում էին մինչև 9 տարեկան երեխաների աշխատանքը, իսկ մինչև 14 տարեկանների աշխատանքային օրը չէր կարող գերազանցել 9 ժամը: Նրանք պարտադիր պետք է դպրոց հաճախեին: Հետագայում բանվորների համար սահմանվեց 10–ժամյա աշխատանքային օր, ճաշի ընդմիջում, կյանքի սպառնալից վագրություն և այլն: Ընդհանուր առմամբ՝ բնակչության կենսապայմանները, թեև դանդաղ, բարելավվում էին:

Հարցեր և ստուգադրանքներ

1. Ինչ անուն ստացավ նոր ժամանակներում ձևավորված հասարակարգը. ինչո՞ւ:
2. Որո՞նք էին նոր հասարակարգի գլխավոր սոցիալական ուժերը: Ձեր կարծիքով ձեռներեցն ու բանվորը ինչո՞վ էին տարբերվում միջնադարյան ազնվականից և գյուղացուց:
3. Ովքե՞ր և ինչպե՞ս էին դառնում ձեռներեց:
4. Ինչո՞ւ մտավորականության թիվը կտրուկ աճեց:
5. Նոր ժամանակներում ինչո՞վ էր պայմանավորված քաղաքների դերի և քանակի աճը:
6. Ո՞վ էր Ա. Սմիթը, ի՞նչն էր նա համարում ազգերի հարստության աղբյուրը:
7. Նկարագրե՛ք մարդկանց կենսապայմանները և դրանցում տեղի ունեցած փոփոխությունները Նոր դարերի առաջին փուլում:

Գործնական աշխատանք

«Տրամագիր» վարժության միջոցով համեմատե՛ք միջնադարյան և նոր ժամանակների եվրոպական քաղաքը:

Նոր հասկացություններ, անուններ

Արդյունաբերական հասարակություն, ձեռներեց (գործարար), բուրժուա, կապիտալիստ, բանվոր, նոր ազնվականություն, բորսա, հանրակառք, գործադուլ, Ա. Սմիթ, Արևելահնդկական ընկերություն, արհեստակցական միություն:

3

ԼՈՒՍԱՎՈՐՈՒԹՅԱՆ ԴԱՐԱՇՐՋԱՆԸ



ՋՈՆ ԼՈՎ
(1632–1704)

Համակողմանի զարգացած այս մտածողի և քաղաքական գործչի իդեալն այնպիսի հասարակության ստեղծումն էր, որտեղ առկա կլինեին բոլոր քաղաքացիների զարգացման հնարավորությունները: Բանական օրենքներ, արդարություն, մարդկանց համագործակցություն. ահա այն արժեքները, որոնցով պետք է միավորվի հասարակությունը: Այս գաղափարներն արտահայտված են հատկապես Ջ. Լոկի «Մարդկային բանականության մասին» և «Կառավարության մասին» գործերում:

Լուսավորական շարժումը

Հասարակության արմատական փոփոխությունները հեշտությամբ չէին ընթանում: Ավատատիրական վերնախավը և հոգևորականությունը կառչած էին հին կարգերից: Եկեղեցին յուրաքանչյուր էական նորամուծություն համարում էր Աստծու կամքին հակառակ: Ուստի անհրաժեշտություն առաջացավ նոր գաղափարներով հիմնավորելու առաջադիմությունը:

Շենց այդ նպատակին էր միաված **լուսավորական շարժումը**: Այն ծավալվեց հիմնականում XVIII դ., այդ պատճառով հարյուրամյակն անվանում են նաև **լուսավորության դար**: Շարժմանը մասնակցում էր առաջադեմ մտավորականությունը՝ իմաստասերներ, գրողներ, գիտնականներ, արվեստագետներ: Քիչ չէին նաև պետական ու հասարակական գործիչները:

Լուսավորականները քննադատում էին հին կարգերը, կրոնական մոլեռանդությունն ու միահեծան միապետությունը: Պահանջում էին ազատություն, իրավահավասարություն և օրենքի գերակայություն: Հասարակության զարգացման կարևորագույն նախապայմանը կրթության և նոր գիտելիքների տարածումն էր:

Գաղափարախոսությունը

Լուսավորական գաղափարները լայն տարածում գտան զարգացած երկրներում, հատկապես Անգլիայում և Ֆրանսիայում:

Նոր դարաշրջանի մարդու և հասարակության հիմնախնդիրներին են նվիրված անգլիացի նշանավոր իմաստասեր **Ջ. Լոկի** բազմաթիվ գործեր: Ըստ նրա՝ գիտելիքները մարդկության զարգացման նախապայմանն են: Դրանք կարելի է ձեռք բերել փորձառությամբ և գործնական աշխատանքով: Այսինքն՝ իմացության

աղբյուրը՝ Նա համարում էր կյանքը: Ջ. Լոկն առաջ քաշեց այն գաղափարը, որ **մարդիկ ի ծնե ազատ են, հավասար և անկախ**: Դա նրանց բնական վիճակն է, որը հնարավոր է ապահովել միայն **ազատության և սեփականության** շնորհիվ: Այդ նպատակով մարդիկ միմյանց հետ կնքում են դաշինք և ստեղծում պետություն:

Ֆրանսիացի **Շ. Մոնտեսքյոն** պնդում էր, որ հասարակության զարգացման գլխավոր խթանը **կատարյալ օրենքներն են և պետական կարգը**: Ըստ նրա՝ մարդու ազատությունը շաղկապված է կատարյալ օրենքներով ապրելու ձգտման հետ: Պատմությանը հայտնի է պետության երեք հիմնական տարատեսակ՝ **բռնապետություն**՝ հիմնված վախի, **միապետություն**՝ պատվի և **հանրապետություն**՝ առաքինության վրա: Իմաստասերը Ֆրանսիայի համար նախընտրում էր **սահմանադրական միապետությունը**, որի դեպքում օրենքները սահմանափակում են թագավորի իշխանությունը: Այդ կապակցությամբ Մոնտեսքյոն զարգացրել է **իշխանության տարանջատման գաղափարը՝ օրենսդիր, գործադիր և դատական**: Այս գաղափարը հսկայական ազդեցություն է ունեցել համաշխարհային իրավական մտքի զարգացման վրա:

Մոնտեսքյոյի ժամանակակիցն էր **Ֆ. Վոլտերը**: Նա հավատում էր մարդկային բանականությանը և ստում կրոնական հավատը: Ըստ նրա՝ հասարակության մեջ ամեն ինչ պետք է լինի բանականության պահանջներին համապատասխան: Միայն այդ դեպքում հասարակությունը կարող է առաջնորդվել արդարության, ազատության և օրենքի առաջ բոլորի հավասարության սկզբունքներով: Նա դեմ էր հեղափոխություններին: Կարծում էր, որ նպատակին կարելի է հասնել **լուսավորյալ միապետի** ջանքերով, ով տոգորված է առաջադիմական գաղափարներով և մտահոգված է ժողովրդի բարօրությամբ:

Մեծ մտածող էր **ժ.-ժ. Ռուսոն**: Նրան ամենից շատ հուզում էր մարդկանց անհավասարության հիմնախնդիրը: Նա կարծում էր, որ մարդիկ մի ժամանակ ապրել են երջանիկ, որովհետև չի եղել մասնավոր սեփականություն: Հետագայում մասնավոր սեփականության առաջացումը մարդու կողմից մարդու շահագործման



ՇԱՌԼ ՄՈՆՏԵՍԿՅՈՒ
(1689–1755)

Աշխատասեր և մեծ ընդունակությունների տեր այս ֆրանսիացին ուսումնասիրել է բազմաթիվ երկրների պատմությունը, օրենքները, հասարակարգը և տնտեսությունը: Եղել է Ֆրանսիական ակադեմիայի անդամ: Նրա գրքերը, հատկապես «Օրենքների ոգու մասին» գիրքը, միաված են ժամանակի հասարակական-քաղաքական կարգերի բարեփոխմանը:



ՊՅՈՏՐ Ի ՄԵԾ
(1672-1725)

Նրա կյանքը և գործունեությունը օրինակելի են եղել շատ թագավորների և պետական գործիչների համար: Աշխատասեր էր, ատում էր ծույլերին: Մեծ սեր ուներ գիտելիքների նկատմամբ, տիրապետում էր 14 մասնագիտության: Տաղանդավոր գործապետ էր: Քաջ էր, բայց շրջահայաց ու զգուշավոր: Պահանջկոտ էր և պաշտոններ էր տալիս միայն աշխատասեր և ընդունակ անձանց: Անաչառ էր. չխնայեց անգամ որդուն, ով դեռ էր բարեկրթումներին և փորձում էր դավադրությամբ հասնել իշխանության:

պատճառ դարձավ: Եվ ի հայտ եկան հարուստներ ու աղքատներ:

Ռուսոն հասկանում էր, որ մասնավոր սեփականությունը վերացնել հնարավոր չէ: Նա առաջարկում էր այն սահմանափակել այնպես, որ վերանան ծայրահեղ հարստությունն ու ծայրահեղ աղքատությունը: Նա մտածում էր, որ մարդիկ փոխադարձ համաձայնությամբ պետք է բարեփոխեն պետական կարգը: Ռուսոն նախապատվությունը տալիս էր **հանրապետությանը**. մի կարգ, երբ ժողովուրդն իր ձեռքն է վերցնում իշխանությունը և կառավարումն իրականացնում ընտրովի պետական մարմինների և պաշտոնյաների միջոցով:

Լուսավորչալ արքաները

Ուշ միջնադարյան Եվրոպայում ուժեղանում է հասարակության համախմբումը թագավորական իշխանության շուրջը: Պատճառն արդյունաբերության զարգացումն էր, որը պահանջում էր հասարակության կայունություն ու խաղաղություն: Այս հրամայականով գրեթե ամենուրեք դասային միապետությանը փոխարինելու եկավ **բացարձակ միապետությունը՝ միահեծանությունը**: Արքայի ձեռքում կենտրոնացան օրենսդիր, գործադիր և դատական իշխանությունները: Իսկ օրենքը արքայի կամքն էր՝ պարտադիր բոլորի համար:

XVII–XVIII դդ. լուսավորականները (հատկապես Վոլտերը) հույս էին տածում, թե բացարձակ միապետը, ունենալով համակողմանի կրթություն և կամք, կարող է իր ազգին տանել դեպի բարգավաճում: Հիրավի, շուտով երևացին **լուսավորչալ միապետներ**, որոնց գործունեությունն զգալի հետք է թողել պատմության մեջ:

Նման միապետների ամենացայտուն ներկայացիչը ֆրանսիացի **Լուի XIV-ն** էր (1643–1715): Երկրում ամեն ինչ կատարվում էր ըստ նրա կամքի: Մի առիթով նա հայտարարել է. «**Պետությունը նա եմ**»: Արքայի բացարձակ կամքով Ֆրանսիայում մտցվեցին միասնական օրենքներ, դատարաններ, հարկեր ու տուրքեր: Ջարկ տրվեց տնտեսությանը. ստեղծվեցին բազմաթիվ մանուֆակտուրաներ, կառուցվեցին ճանապարհներ և ջրանցքներ: Ֆրանսիան որդեգրեց **առևտրայնության** (մերկան-

տիլիզմ) քաղաքականությունը՝ նպատակ ունենալով ավելի շատ ապրանքներ արտահանել, քան ներմուծել:

Ռուսաստանում նման քաղաքականություն էր վարում **Պյոտր I-ը** (1682–1725), **Պրուսիայում՝ Ֆրիդրիխ II-ը** (1740–1786), Ավստրիայում՝ **Յոզեֆ II-ը** (1765–1790): Սակայն լուսավորյալ միապետները նպատակ չունեին խարխլելու ավատատիրական կարգերի հիմքերը, այլ ձգտում էին դրանք հարմարեցնելու նոր ժամանակների պահանջներին: Իսկ դա անհնար էր: Ուստի խնդիր առաջացավ հասարակության արմատական վերակառուցման համար: Նման վերակառուցումը սովորաբար իրականացվում է հեղափոխության միջոցով:



Պյոտր I-ի արձանը Սանկտ Պետերբուրգում

Հարցեր և առաջադրանքներ

1. Ինչ է լուսավորական շարժումը:
2. Ձեր կարծիքով ո՞րն է լուսավորական շարժման առաջացման հիմնական պատճառը:
3. Ո՞վ է Ջոն Լոկը: Ինչ տեսություն է նա զարգացրել:
4. ԹՎարկե՛ք ֆրանսիական լուսավորականներին և նրանց գլխավոր գաղափարները:
5. Ինչո՞ւ Մոնտեսքյոն առաջ քաշեց իշխանության տարանջատման գաղափարը:
6. Արդիական ի՞նչ նշանակություն ունեն լուսավորական գաղափարները:
7. Նոր ժամանակների սկզբին ինչո՞ւ մեծացավ միապետության դերը: Ինչ է միահեծանությունը:
8. Ովքե՞ր էին լուսավորյալ միապետները: Ինչ քայլեր ձեռնարկեց Լուի XIV-ը Ֆրանսիան բարենորոգելու նպատակով:
9. Ինչ է առևտրայնությունը: Ինչ նշանակություն ունեցավ այն:

Նոր հասկացություններ, արտահայտություններ, անուններ

Լուսավորական շարժում, լուսավորության դար, «Մարդիկ ի ծնե ազատ են, հավասար և անկախ», սահմանադրական միապետություն, իշխանության տարանջատում, լուսավորյալ միապետ, Ջ. Լոկ, Շ. Մոնտեսքյո, Ֆ. Վոլտեր, Ժ.–Ժ. Ռուսո, բացարձակ միապետություն (միահեծանություն), առևտրայնություն (մերկանտիլիզմ), «Պետությունը ե՛ս եմ», Լուի XIV, Պյոտր (Պետրոս) I, Ֆրիդրիխ II, Յոզեֆ II:

4

ՀԱՍԱՐԱԿՈՒԹՅԱՆ ՎԵՐԱԿԱՌՈՒՑՄԱՆ ՀԵՂԱՓՈԽԱԿԱՆ ՈՒՂԻՆ

Ինչ է հեղափոխությունը

Հեղափոխությունը քաղաքական երևույթ է, որի շնորհիվ պատմական կարճ ժամանակահատվածում հասարակության մեջ կատարվում են արմատական փոփոխություններ: Հեղափոխություններ տեղի են ունենում այն հասարակություններում, որոնք ճգնաժամ են ապրում: Հնի կողմնակիցները չեն ցանկանում զիջել իրենց իշխանությունը կամ դա անում են սահմանափակ չափերով: Ուստի առաջադիմական ուժերը դիմում են վճռական գործողությունների: Հեղափոխությունները ուղեկցվում են քաղաքացիական պատերազմներով, երբ իշխանության համար միմյանց դեմ զինված պայքարի են ելնում տվյալ երկրի տարբեր քաղաքական ուժերը:

Հեղափոխությունների արդյունքում ավելի հաճախ հաղթում են նորի կողմնակիցները՝ ճանապարհ հարթելով պատմական բարենորոգումների համար: Երբեմն կայանում է փոխհամաձայնություն, երբեմն հաղթում է հետադիմությունը, և հեղափոխությունն ավարտվում է պարտությամբ:

Ավելի նախընտրելի է այն ուղին, երբ ազգերն անընդ-հատ բարենորոգում են իրենց կյանքը: Այդպիսի ազգերը սովորաբար խուսափում են հեղափոխություններից: Սակայն այս ուղին պահանջում է պատմական հարուստ փորձ, կամք և գիտակցություն:

XVII–XVIII դդ. խոշոր հեղափոխություններ տեղի ունեցան Անգլիայում, Ամերիկայում և Ֆրանսիայում:

Անգլիական հեղափոխությունը

Անգլիացիները մյուս ազգերի համեմատությամբ ավելի շուտ կարողացան վերացնել առաջընթացի խոչ-ընդոտները:

Անգլիայում նույնպես հաստատվել էր միահեծանություն: XIII դարից երկրում գործում էր խորհրդարան, որը բաղկացած էր **լորդերի** և **համայնքների պալատներից**: Կարևորագույն հարցերում արքան պարտավոր էր հաշվի առնել խորհրդարանի կարծիքը:

Սակայն XVII դ. սկզբից այս կարգը խախտվեց, որի պատճառով խորացան արքայի և խորհրդարանի միջև հակասությունները: Արքային պաշտպանում էին հին ազնվականությունը և անգլիկան եկեղեցին: Խորհրդարանին սատարում էին ձեռներեցները, նոր ազնվականությունը և ժողովրդի մեծ մասը: Նրանք առաջնորդվում էին **մաքրակրոն** (պուրիտանական) գաղափարներով, պահանջում էին բարենորոգել եկեղեցին և աշխարհիկ կարգը:

Պայքարը արքայական իշխանության և խորհրդարանի միջև ավելի սրվեց **Չարլզ I-ի** (1625–1649) օրոք: Նա սահմանում էր կամայական հարկեր, խոչընդոտում ձեռներեցությանը, հետապնդում ազատախոհներին: Ի վերջո՝ արքան ցրեց խորհրդարանը:

Սակայն պարզվեց, որ արքան անկարող է կառավարել առանց խորհրդարանի: Անհրաժեշտ էր ապահովել հարկերի ու տուրքերի անխափան գանձումը, գտնել դրամական միջոցների նոր աղբյուրներ: Մինչդեռ հարկատուները հրաժարվում էին մուծումներ կատարելուց, և գանձարանը դատարկվում էր: Ուստի 1640 թ. Չարլզ I-ը հրավիրեց խորհրդարան: Այն գործեց մինչև 1653 թ. և հայտնի է **Երկարատև խորհրդարան** անունով:

Ունենալով ժողովրդի աջակցությունը՝ խորհրդարանն իրականացրեց բարենորոգումներ՝ օրինակարգեց իր գործունեությունը, արգելեց կամայական հարկերը, խրախուսեց ձեռներեցությունը, պատասխանատվության ենթարկեց մի շարք բարձրաստիճան պաշտոնյաների: Այս իրադարձություններով սկսվեց **Անգլիական հեղափոխությունը**, որը շարունակվեց մինչև 1660 թ.:

Չարլզ I-ը մերժեց խորհրդարանի նախաձեռնությունը և հեռացավ Լոնդոնից: Նա պատերազմ հայտարարեց: Խորհրդարանն էլ ստեղծեց իր բանակը՝ **Օ. Կրոմվելի** գլխավորությամբ: 1642–1649 թթ. ծավալվեց քաղաքացիական պատերազմ, որտեղ հաղթեցին հեղափո-



ՉԱՐԼԶ I
(1600–1649)

Անգլիայի արքա: Նրբաճաշակ էր ու բարեկիրթ: Ուներ գրավիչ արտաքին: Միրում էր սպորտը և արվեստները: Գրա հետ մեկտեղ թուլական էր և եսասեր: Հավատացած էր, որ իր իշխանությունն ունի աստվածային ծագում: Հակված չէր համագործակցելու խորհրդարանի հետ: Լսել չէր ուզում արմատական բարենորոգումների մասին: Չէր հասկանում, որ Անգլիայում սկսվել է հեղափոխություն: Կարծում էր, թե դա սոսկ խռովություն է: Միրում էր կրկնել. «Ես դրանց մի լավ ջարդ կտամ, և ամեն բան կլինի առաջվա պես»:



ՕԼԻՎԻԵՐ ԿՐՈՄՎԵԼ
(1599–1658)

Անգլիական հեղափոխության ղեկավար: Եղել է գյուղական ազնվական, մեծացել է մաքրակրոն ընտանիքում: Իր պայքարում սկզբունքային էր և մեծ կամքի տեր:

Քաղաքական գործունեությունն սկսել է իբրև խորհրդարանի երկրորդական դեմքերից մեկը: Առաջընթացն սկսվել է քաղաքացիական պատերազմի ժամանակ:

Ստեղծել է բանակի նոր տեսակ՝ միավորված խորհրդավարական և կարգապահությամբ: Այն ստացել է «երկաթակողերի բանակ» անվանումը: Վերջինիս օժանդակությամբ գրավել է իշխանությունը և 1653 թ. իրեն հռչակել ազգի հովանավոր՝ պրոտեկտոր: Հաղթանակներ է տունել Շոտլանդիայի և Իռլանդիայի նկատմամբ, նրանց միավորել Անգլիայի իշխանության ներքո: Երկիրն սկսել է առաջին քայլերը կատարել համաշխարհային գերիշխանության ուղղությամբ:

խականները: Արքան գերեվարվեց և մահապատժի ենթարկվեց: Անգլիան հռչակվեց հանրապետություն:

Սակայն շուտով ի հայտ եկավ մի նոր շարժում, որի մասնակիցները պահանջում էին օրենքի առաջ բոլորի հավասարություն, ընդհանուր ընտրական իրավունք: Մյուս կողմից՝ պայքարը շարունակում էին միապետականները: Հասարակության նոր պատկտունը կանխելու համար **Կրոմվելը** դիմեց վճռական քայլերի: Ջենքով ճնշեց ծայրահեղականներին, ցրեց խորհրդարանը և հաստատեց իր անձնիշխանությունը: Նա իրեն հռչակեց **պետության և ազգի հովանավոր՝ պրոտեկտոր**: Այս իրավիճակը շարունակվեց մինչև նրա մահը՝ 1658 թ.:

Սահմանադրական միապետության հաստատումը Անգլիայում

Տարիներ շարունակ հեղափոխական պիքները սեկոծում էին Անգլիան: Ժողովուրդը հոգնել էր: Մարդիկ երագում էին խաղաղություն և կայունություն: Նախկին անհաշտ հակառակորդները համաձայնեցին վերականգնել արքայական իշխանությունը՝ պայմանով, որ արքան հաշվի առնի հեղափոխության նվաճումները և ճանաչի խորհրդարանի իրավունքները: 1660 թ. գահը հանձնվեց գլխատված արքայի որդուն: Բայց նա դրժեց պայմանը և փորձեց վերադառնալ մինչհեղափոխական կարգերին: Ավելի հեռուն գնաց նրա հաջորդը՝ Ջեյմս II–ը:

Սակայն փոխհամաձայնության գաղափարը կենսական էր: Անգլիական խորհրդարանի հրավերով Հոլանդիայի կառավարիչ **Վիլհելմ Օրանացին** ժամանեց Անգլիա և զենքով վտարեց Ջեյմս II–ին: Շուտով նա օժվեց արքա: Ընդունվեց **«Իրավունքների մասին օրենքը»**: Այն իշխանության միակ աղբյուր էր ճանաչում ինքնիշխան ազգի կամքը, իսկ դրա օրինական արտահայտիչ՝ ընտրովի խորհրդարանը: **1688–1689 թթ.** տեղի ունեցած այս իրադարձությունների արդյունքում Անգլիայում հաստատվեց **սահմանադրական միապետություն**: Արքան էր հաստատում նախարարներին և հետևում նրանց գործունեությանը, սակայն հաշվետու էր խորհրդարանին: Այս շրջանը (1688–1689 թթ.) պատմության մեջ մտել է **Փառահեղ հեղափոխություն** անունով:

Ամերիկայի Միացյալ Նահանգների կազմավորումը

XVII–XVIII դդ. Հյուսիսային Ամերիկայում ձևավորվեց անգլիական 13 գաղութ: Այստեղ հաստատվեց բազմազգ բնակչություն, հիմնականում՝ անգլիացիներ: Վերաբնակիչները կրոնական հալածյալներ էին, հողագուրկներ, հասարակությունից մերժվածներ: Շուտով ի հայտ եկան ձեռներեցներ, որոնք կազմակերպում էին տնտեսությունը՝ զարկ տալով գյուղատնտեսությանը, արհեստների, առևտրին: Ամենուրեք զգացվում էր աշխատող ձեռքի պակաս: Այդ պատճառով սկսեցին Աֆրիկայից Ամերիկա բերել հարյուր հազարավոր **սևամորթ ստրուկներ**:

Գաղութները ղեկավարում էին անգլիական արքայի կողմից նշանակված նահանգապետերը: Անգլիան խոչընդոտում էր դրանց զարգացումը, որպեսզի գաղութները մնան լոկ հումքի մատակարար: Սակայն գաղութներում ժամանակի ընթացքում ձևավորվեցին միասնական տնտեսություն, յուրահատուկ մշակույթ և ազգային ինքնագիտակցություն: XVIII դ. կեսերին բնակչության մեծ մասն իրեն համարում էր **ամերիկացի**:

Անկախության հռչակագրի ստորագրումը Ֆիլադելֆիայում, 1776 թ. հուլիսի 4





ՋՈՐՋ ՎԱՇԻՆԳՏՈՆ
(1732-1799)

Ծնվել է հարուստ հողատիրոջ (պլանտատորի) ընտանիքում: Ծառայել է տեղի աշխարհագրում, ստացել գեներալի կոչում: 1775 թ. նշանակվել է հրամանատար և ստեղծել ԱՄՆ-ի կանոնավոր բանակը: Փառաբանվել է որպես զորավար: Համարվում է ԱՄՆ-ի «ստեղծող հայրերից» մեկը: ԱՄՆ-ի առաջին նախագահն է (1789-1797): 1791 թ. նրա անունով հիմնադրվեց Վաշինգտոն քաղաքը, որը 1800 թ. դարձավ ԱՄՆ-ի մայրաքաղաքը:

Ամերիկացիները սկսեցին գիտակցել գաղութային լուծը թոթափելու, ինքնիշխան պետություն ստեղծելու հրամայականը: Այդ առումով շրջադարձային եղան XVIII դ. 60-70-ական թթ.:

Ազգային-ազատագրական պայքարը վերաճեց **Անկախության պատերազմի, որն ընթացավ 1775-1783 թթ.**: Ֆիլադելֆիա քաղաքում հրավիրված գաղութների ներկայացուցիչների համաժողովը՝ **Կոնգրեսը**, հռչակեց ամերիկացիների բնական իրավունքները՝ Անգլիայից պահանջելով ճանաչելու դրանք: Սակայն մերժում ստանալով՝ սկսեց ձևավորել կանոնավոր բանակ: Այդ գործը հանձնարարվեց **Ջ. Վաշինգտոնին**:

Մինչ ընթանում էին ռազմական գործողությունները, **1776 թ. հուլիսի 4-ին** Կոնգրեսն ընդունեց **Անկախության հռչակագիրը**: Այն հիմնված էր լուսավորական գաղափարների վրա. ճանաչել ամերիկյան ազգի իրավունքը՝ ստեղծելու իր ինքնուրույն կյանքը, ազատությունը և երջանկությունն ապահովող պետություն: Կոնգրեսը հռչակեց **Ամերիկայի Միացյալ Նահանգների** կազմավորման մասին: Հուլիսի 4-ը մինչ օրս նշվում է որպես ամերիկացիների ազգային տոն:

Ամերիկյան բանակը տպավորիչ հաղթանակներ տարավ անգլիացիների նկատմամբ: Այդ գործում կարևոր էր նաև միջազգային հանրության դիրքորոշումը. Ֆրանսիան, Իսպանիան և Հոլանդիան օժանդակում էին ԱՄՆ-ին զենքով: Անգլիան ի վերջո ճանաչեց ԱՄՆ-ի անկախությունը:

1787 թ. ստեղծվեց ԱՄՆ-ի **Սահմանադրությունը**, որը գործում է առ այսօր: ԱՄՆ-ը **դաշնային հանրապետություն է**: Սահմանված է բարձրագույն իշխանության տարանջատում. **Կոնգրես**՝ օրենսդիր, **Նախագահ**՝ գործադիր, **Գերագույն դատարան**՝ դատական: 1791 թ. ուժի մեջ մտան Սահմանադրության առաջին տասը ուղղումները: Գրանք սահմանում էին ժողովրդավարական արժեքներ՝ խոսքի, կրոնի ազատություն, անձի անձեռնմխելիություն և այլն: **1787 թ.** ԱՄՆ-ի **առաջին նախագահ** ընտրվեց **Ջ. Վաշինգտոնը**:

Հարցեր և առաջադրանքներ

1. Ինչ է հեղափոխությունը: Ինչ արդյունքների կարող է հանգեցնել այն:
2. Որո՞նք են Անգլիական հեղափոխության պատճառները:
3. Ե՞րբ է գործել Երկարատև խորհրդարանը:
4. Ո՞վ էր Կրոմվելը և ի՞նչ դեր է խաղացել Անգլիական հեղափոխության ժամանակ:
5. Անգլիայում ե՞րբ և ո՞ր իրադարձությունների արդյունքում հաստատվեց սահմանադրական միապետություն: Ինչ անունով է հայտնի Անգլիայի պատմության այդ շրջանը:
6. Հյուսիսային Ամերիկայում ե՞րբ և քանի՞ անգլիական գաղութ էր ձևավորվել: Ներկայացրե՞ք դրանց բնակչության սոցիալական և ազգային կազմը:
7. Ինչո՞ւ հյուսիսամերիկյան անգլիական գաղութների բնակչությունը դիմեց ազատագրական պայքարի:
8. Ներկայացրե՛ք Ջ. Վաշինգտոնի դերը ԱՄՆ–ի ստեղծման գործում:

Քննարկման հարց

Ինչո՞ւ ԱՄՆ–ում հաստատվեց հանրապետական կարգ:

Նոր հասկացություններ, անուններ

Հեղափոխություն, Երկարատև խորհրդարան, մաքրակրոն, Չարլզ I, Օ. Կրոմվել, հովանավոր (պրոտեկտոր), Վ. Օրանացի, Փառահեղ հեղափոխություն, ամերիկացի, Անկախության պատերազմ, «Անկախության հռչակագիր», ԱՄՆ, դաշնային հանրապետություն, Ջ. Վաշինգտոն:

5

ՖՐԱՆՍԻԱԿԱՆ
ՄԵԾ ՀԵՂԱՓՈԽՈՒԹՅՈՒՆԸ

ԼՈՒԻ XVI
(1754-1793)

Թուլական արքան ավելի շատ զբաղվում էր որսով և թագուհու՝ Մարիա Անտուանետի կազմակերպած պալատական զվարճանքներով:


Նախադրյալները և սկիզբը

Հեղափոխության նախօրյակին Ֆրանսիան առավելապես գյուղատնտեսական երկիր էր: Ավատատիրական վերապրուկները խոչընդոտում էին նրա զարգացմանը: Գյուղացիները անձնապես ազատ էին, սակայն հողագուրկ էին և ավատատիրոջը բազմապիսի հարկեր էին վճարում: Ծանր էր վիճակը նաև արդյունագործության մեջ: Գետաբերուկները մենաշնորհներ և արտոնություններ էր տալիս առանձին ձեռներեցների, իսկ մնացածներին գրկում ազատ գործելու հնարավորությունից:

Վերնախավը՝ հոգևորականությունը և ազնվականությունը (առաջին և երկրորդ դասեր), անում էր ամեն ինչ՝ իր արտոնությունները պահպանելու համար: Նրանք չէին վճարում հարկեր, ապրում էին անհոգ ու շվայտ կյանքով, սինչդեռ գանձարանը դատարկվում էր, իսկ տնտեսությունը՝ քայքայվում: Իշխող վերնախավի ժամանակի մտայնությունը և գործելակերպը ակնառու ձևակերպել է Լուի XV-ը՝ «Մեզանից հետո՝ թեկուզ ջրհեղեղ» թևավոր դարձած իր արտահայտությամբ:

Ստեղծված իրավիճակից դժգոհ էր ֆրանսիական հասարակության երրորդ դասը՝ ձեռներեցները, բազմամիլիոն գյուղացիությունը, արհեստավորները և այլք: Նրանք էին ստեղծում նյութական բարիքները, սակայն պետության կառավարման գործում որևէ մասնակցություն չունեին:

Հակասությունները մեղմելու և նոր հարկեր սահմանելու նպատակով Լուի XVI-ը (1774-1793) որոշեց հրավիրել **Գլխավոր շտատներ** (Դասային համաժողով): Դա միջնադարից եկող մարմին էր, որին մասնակցում էին հասարակության երեք դասերը (հոգևորականներ, ազնվականներ, քաղաքացիներ): Վերջին անգամ այն հրավիրվել էր 1614 թ.:



1789 թ. մայիսին վերստին Գլխավոր շտապների բացմամբ նշանավորվեց հեղափոխության սկիզբը: Արքան համաժողովից պահանջեց նոր հարկեր: Սակայն մերժում ստանալով՝ փորձեց ցրել համաժողովը: Դրան ընդդիմացան երրորդ դասի պատգամավորները, որոնց օժանդակեց նաև հոգևորական և ազնվական պատգամավորների մի մասը: Ընդդիմադիր ուժերն իրենց հռչակեցին **Ազգային ժողով** (հետագայում կոչվեց Սահմանադիր ժողով): Նրանք հայտարարեցին, որ միայն իրենք են արտահայտում ֆրանսիական ազգի հավաքական կամքը և պատրաստական են ստեղծելու Սահմանադրություն:

Թագավորը և հին կարգերի կողմնակիցները չհաշտվեցին դեպքերի նման ընթացքի հետ: Զայրացած ժողովուրդը **1789 թ. հուլիսի 14-ին Փարիզում գրավեց Բաստիլ ամրոցը**՝ հին կարգերի խորհրդանիշը (այդ օրը համարվում է Ֆրանսիայի ազգային տոնը): Երկրում ծայր առավ համաժողովրդական շարժում: Սարսափած ազնվականությունը հեռանում էր երկրից: Հեղափոխությունը պաշտպանելու նպատակով կազմավորվեց

Բաստիլի գրավումը հեղափոխական զանգ- վածների կողմից

Այդ գիշեր, երբ արթնացրին Լուի XVI-ին և զեկուցեցին, որ Բաստիլը գրավել են, արքան բացականչեց. «Բայց դա խռովությունն է»: Պատասխանը եղավ. «Ո՛չ, տիրակալ, դա հեղափոխություն է»:



Մարդու և քաղաքացու իրավունքների հռչակագիրը

Ազգային գվարդիան: Այսպես սկսվեց և ծավալվեց **Ֆրանսիական սնճ հեղափոխությունը:**

Հեղափոխության սահմանադրական շրջափուլը (1789–1792 թթ.)

Սահմանադիր ժողովը 1789 թ. օգոստոսի 26–ին ընդունեց «Մարդու և քաղաքացու իրավունքների հռչակագիրը»: Դա նոր դարաշրջանի կարևորագույն իրավական փաստաթղթերից մեկն է: Հռչակագիրը հաստատուն էր քաղաքացիների հավասարությունն օրենքի առաջ: Իշխանության գերագույն աղբյուր էր ճանաչվում ոչ թե արքան, այլ **ազգի հավաքական կամքը**: Շեշտվում էր սնարդկանց ազատ լինելու, մասնավոր սեփականություն ունենալու, ցանկացած բռնաճնշման դիմակայելու, սեփական կարծիքը ազատորեն արտահայտելու, անձամբ կամ ներկայացուցիչների միջոցով պետության կառավարմանը մասնակցելու և այլ բնական իրավունքները:

1791 թ. ընդունվեց Ֆրանսիայի առաջին Սահմանադրությունը: Երկիրը հռչակվեց սահմանադրական միապե-

Քաղաքացիական պատերազմի իրավունքների հռչակագրից»

- Հոդված 1.** Մարդիկ ծնվում և ապրում են հավասար իրավունքներով: Նրանց հասարակական տարբերությունները կարող են կառուցվել միայն ընդհանուր օգուտի վրա:
- Հոդված 2.** Մարդկանց քաղաքական միավորման նպատակը նրանց բնական և անօտարելի իրավունքների պաշտպանությունն է: Դրանք են ազատությունը, ունեցվածքը, ապահովությունը և դիմադրությունը (ցանկացած) բռնաճնշման:
- Հոդված 3.** Ազգն է ամբողջ իշխանության կրողը: Ո՛չ անհատները, ո՛չ առանձին խմբերը իրավասու չեն իշխանություն գործառելու, եթե դա չի բխում ազգի շահերից:
- Հոդված 6.** Օրենքը իրավունքի (մասնակի) արտահայտությունն է: Բոլոր քաղաքացիներն իրավունք ունեն անձնապես կամ իրենց ներկայացուցիչների միջոցով մասնակցելու իշխանության ձևավորմանը: Օրենքը պետք է լինի նույնիմաստ թե՛ խրախուսանքի, թե՛ պատժի պարագայում:
- Հոդված 7.** Ոչ ոք չի կարող դատապարտվել, կալանվել կամ ձերբակալվել՝ առանց օրենքով նախատեսված դեպքի:
- Հոդված 10.** Ոչ ոք չի կարող հետապնդվել իր մտքերի և կրոնական զգացմունքների համար, եթե դրանց դրսևորումը չի խաթարում հասարակական կարգը:
- Հոդված 11.** Մտքերի և կարծիքների ազատ փոխանակությունը մարդու ամենազնահատելի իրավունքներից է:
- Հոդված 17.** Ունեցվածքը, լինելով սրբազան և անձեռնմխելի, չի կարող օտարվել առանց հասարակական անհրաժեշտության...

տություն: Արքան պահպանում էր գործադիր իշխանությունը, նշանակում էր նախարարներին և ուղղորդում նրանց գործունեությունը: Սակայն արքայի իրավունքները սահմանափակվում էին Սահմանադրությամբ:

Հեղափոխության հանրապետական շրջափուլը (1792–1799 թթ.)

Հին կարգերի կողմնակիցները, սակայն, կատաղի դիմադրություն ցույց տվին: Ազնվականությունն սկսեց խռովություններ: Արքան փորձեց երկրից փախչել և օտար պետությունների օգնությամբ վերականգնել իր իշխանությունը: Ավստրիան և Պրուսիան, վախենալով հեղափոխության տարածումից, դաշինք կնքեցին և պատրաստվում էին ներխուժելու Ֆրանսիա: Սկսվեց պատերազմ, որն աստիճանաբար ընդլայնվեց և տարածվեց ողջ Եվրոպայում:

Ֆրանսիական ժողովրդի մեջ հայրենասիրական ոգին վերելք ապրեց: Շատերը կամավոր անդամագրվում էին բանակին, մեկնում ռազմի դաշտ: Նրանց շուրթերին «Մարսելյոզն» էր՝ Ֆրանսիայի ապագա օրհներգը:



Սանկյույոտ (ֆրանսերեն «սան» – առանց, և «կյույոտ» – կարճ տարատ). ֆրանսիացի ազնվականները հեգնանքով այդպես էին կոչում քաղաքային ցածր խավի ներկայացուցիչներին, որոնք, ի տարբերություն իրենց, կրում էին երկար տարատներ: Սանկյույոտները հեղափոխության ամենաակտիվ մասնակիցներն էին:

Ժողովուրդն ապստամբեց: **1792 թ. սեպտեմբերին Ֆրանսիան հռչակվեց հանրապետություն:** Լուի XVI-ը հեռացվեց իշխանությունից և իր ընտանիքի հետ դատապարտվեց մահվան: Մոցվեց **ընդհանուր ընտրական իրավունք:** Արական սեռի բոլոր չափահաս քաղաքացիները կարող էին ընտրել և ընտրվել պետական պաշտոններում՝ առանց ունեցվածքային սահմանափակման:

Հանրապետության ստեղծումը, սակայն, ազգային համերաշխություն չբերեց: Քայքայվել էր երկրի տնտեսությունը, ամենուրեք թանկություն էր ու սով: Դրան հակառակ՝ աշխուժացել էին միապետականները: Նոր ուժով էր գործում հակաֆրանսիական դաշինքը, որին միացել էին նաև Անգլիան, Իսպանիան և այլ երկրներ:

Ֆրանսիական բանակը պարտություններ կրեց: Դա հող նախապատրաստեց ծայրահեղական տրամադրությունների համար, որոնց կրողները **յակոբիններն էին: 1793 թ. նրանք գրավեցին իշխանությունը:** Ծայր առավ **ահաբեկությունը:** Հազարավոր ֆրանսիացիներ որակվեցին «հեղափոխության թշնամի» և մահապատժի ենթարկվեցին:

Յակոբինները ճշեցին խռովությունները, ստեղծեցին մարտունակ բանակ և թշնամիներին վտարեցին Ֆրանսիայից: Սակայն նրանց ղեկավարները տարված էին համաշխարհային հեղափոխության գաղափարով և կատարում էին անհեռատես քայլեր: Եվ հասարակությունն սկսեց դժգոհել. անհնար էր ապրել վախի և կեղծիքի պայմաններում:

1794 թ. յակոբինյան բռնատիրությունը տապալվեց: Գեկավարները մահապատժի ենթարկվեցին: Իշխանության գլուխ եկան անկայունության տարիներին հարստացածները: Սակայն նրանք անկարող եղան կարգ ու կանոն հաստատելու: Մեծ տարածում ստացան կեղծիքը և կաշառակերությունը: Վատթարացավ Ֆրանսիայի արտաքին դրությունը. բանակն սկսեց պարտություններ կրել:

Հասարակության վերնախավի շրջանում հասունացավ «*ուժեղ ձեռքի*» իշխանություն ստեղծելու ծրագիրը: Այդպիսի «ձեռք» կարելի էր գտնել բանակում, որտեղ հեղափոխության տարիներին ձևավորվել էր երիտա-

սարդ և տաղանդավոր սպայություն: Դրա ներկայացուցիչն էր երեսնամյա գեներալ **Նապոլեոն Բոնապարտը: Նա 1799 թ. նոյեմբերին կատարեց պետական հեղաշրջում:** Բարձրագույն իշխանությունը հանձնվեց **երեք կոնսուլներին:** Նապոլեոնն առաջին կոնսուլն էր: Թեպետ նա և իր կողմնակիցները խոսում էին հանրապետության անունից, սակայն բոլորը հասկանում էին, որ Ֆրանսիայի պատմության մեջ սկսվում է նոր՝ **բուրժուական միապետության** շրջափուլը:

Հարցեր և առաջադրանքներ

1. Որո՞նք էին Ֆրանսիական հեղափոխության պատճառները:
2. Ինչո՞ւ Լուի XVI–ը հրավիրեց Գլխավոր շտատներ: Ովքե՞ր ստեղծեցին Ազգային ժողովը:
3. Ինչո՞վ է նշանավոր 1789 թ. հուլիսի 14–ը:
4. Նշե՛ք Ֆրանսիական հեղափոխության փուլերը:
5. Ներկայացրե՛ք հեղափոխության առաջին շրջափուլի կարևոր արդյունքները:
6. Ձեր կարծիքով ինչո՞ւ առաջացավ յակոբինյան բռնատիրությունը:
7. Ո՞րն էր «ուժեղ ձեռքի» իշխանության ստեղծման գլխավոր նպատակը: Երբ հաստատվեց այն, ո՞ւմ գլխավորությամբ:
8. Օգտվելով դասագրքում տրված քաղվածքից՝ ցույց տվե՛ք «Մարդու և քաղաքացու իրավունքների հռչակագրի» նշանակությունը և արդիականությունը:

Քննարկման հարց

Ինչո՞ւ են Ֆրանսիական հեղափոխությունն անվանում «Մեծ»:

Նոր հասկացություններ, արտահայտություններ, անուններ

Մեծ հեղափոխություն, Լուի XV, «Մեզանից հետո՝ թեկուզ ջրհեղեղ», Ազգային ժողով, ազգային գվարդիա, «Մարդու և քաղաքացու իրավունքների հռչակագիր», «Մարսելյոզ», Լուի XVI, Բաստիլ, յակոբին, ահաբեկություն, «ուժեղ ձեռքի» իշխանություն, Նապոլեոն Բոնապարտ, բուրժուական միապետություն:

6

ՆԱՊՈԼԵՈՆԻ ԴԱՐԱՇՐՋԱՆԸ (1799–1815)



ՆԱՊՈԼԵՈՆ ԲՈՆԱՊԱՐՏ
(1769–1821)

Զորավար և պետական գործիչ: Ծնվել է Կորսիկյա կղզում, ռազմական կրթություն ստացել է Ֆրանսիայում: Մասնակցել է Մեծ հեղափոխությանը, 24 տարեկանում դարձել է գեներալ: 1796–1797 թթ. գլխավորել է իտալական հաղթական արշավանքը, 1798 թ.՝ եգիպտական արշավանքը: 1799 թ. հեղաշրջումից հետո ստեղծել է մի նոր վարչակարգ՝ կառուցված Մեծ հեղափոխության գաղափարների հիման վրա: Վարել է նվաճողական քաղաքականություն, որոնց նպատակն էր Եվրոպայում հաստատել Ֆրանսիայի գերիշխանությունը: Նվաճված երկրներում բազմաթիվ բարենորոգումներ է իրագործել: Ֆրանսիայի և Եվրոպայի պատմության նրա գործունեության տարիներն անվանում են «Նապոլեոնի դարաշրջան»:

Նապոլեոնի վարչակարգը

1799 թ. հեղաշրջումից հետո հանրապետությունը շարունակեց ձևականորեն գոյություն ունենալ մինչև 1804 թ.: Գալով իշխանության՝ Նապոլեոնը հայտարարեց. «Հեղափոխությունը հասել է այն նպատակներին, որոնց համար սկսվել էր: Հեղափոխությունն ավարտված է»: Նա խոստանում էր պահպանել հեղափոխության նվաճումները և դրանք զարգացնել միայն բարենորոգումների ճանապարհով:

1804 թ. անցկացվեց հանրաքվե, և Նապոլեոնը հռչակվեց «բոլոր ֆրանսիացիների կայսր»: Փարիզի Ս. Աստվածամոր տաճարում տեղի ունեցավ նրա շքեղ թագադրությունը: Այսպես հիմնադրվեց **Առաջին կայսրությունը**, որը գոյատևեց մինչև 1814 թ.:

Բարենորոգումները

Նապոլեոնի բարենորոգումները վերաբերում էին հասարակական կյանքի բոլոր ասպարեզներին: Նա անձամբ էր հետևում դրանց ընթացքին:

Տնտեսություն: Կայսեր ջանքերով զարկ տրվեց ծանր արդյունաբերությանը: Տասը տարվա ընթացքում հիմնվեց հարյուր խոշոր ձեռնարկություն՝ հանքահարստացման, մետաղաձուլության, զինագործության, նավաշինության, սարքաշինության: Բուռն ճանապարհաշինության արդյունքում կայուն կապ հաստատվեց երկրի տարբեր շրջանների միջև:

Աշխուժացան տնտեսական կապերն ինչպես երկրի ներսում, այնպես էլ երկրից դուրս: Տնտեսության զարգացման նպատակով հիմնվեց **Ֆրանսիական բանկը**: Շրջանառության մեջ դրվեց դրամական նոր միավոր՝ **ֆրանկը**:

Արդյունաբերության ցուցանիշներով Ֆրանսիան զբաղեցրեց երկրորդ տեղը աշխարհում՝ զիջելով միայն Անգլիային:

Օրենսդրություն: Մեծ հեղափոխությունից հետո Ֆրանսիայում հաստատվել էին հասարակական նոր հարաբերություններ: Հարկ էր դրանց տալ իրավական ձևակերպում: Կայսրը կազմեց «**Քաղաքացիական օրենսգիրքը**», որը տարածվեց նաև Եվրոպայում: Այն ամրագրում էր մարդկանց բնական իրավունքները: Առանձնակի ուշադրություն էր դարձվում ընտանիքի և սեփականության խնդիրներին: Ընտանիքը ճանաչվում էր որպես հասարակության կարևորագույն բջիջ: Կարգավորվեցին նաև տնտեսական, քրեական, դատական բնագավառները:

Վարչական համակարգ: Հեղափոխության տարիներին Ֆրանսիայում ձևավորվել էր նոր վարչական կառույց: Երկիրը բաժանվել էր **դեպարտամենտների** (նահանգ)՝ յուրաքանչյուրն իր ընտրովի վարչակազմով: Նապոլեոնը պահպանեց դրանք: Նրա նշանակած պաշտոնյաները (պրեֆեկտ) տնօրինում էին նահանգների բոլոր կարևոր գործերը: Այս կերպ պետության կառավարումը խիստ կենտրոնացվեց:

Մշակութային ձեռնարկումներ: Կայսրը՝ իրեն համարելով լուսավորականների հետևորդ, ձգտում էր նրանց

**Նապոլեոն I կայսրը
«Քաղաքացիական
օրենսգրքի» մասին**

Իմ իսկական փառքն այն չէ, որ հաղթել եմ քառասուն ճակատամարտերում: Վաթեղոն կջնջի այդ բոլոր հաղթանակների մասին հիշողությունները: Բայց այն, ինչը չի կարող մոռացվել, ինչը կապրի հավերժ, իմ «Քաղաքացիական օրենսգիրքն» է:



Գրվազ Ժակ-Լուի Գավիդի «Նապոլեոնի թագադրությունը» կտավից



Եվրոպյան Նապոլեոնի նվաճումների ժամանակաշրջանում

գաղափարներով ձևավորել ազգային նոր վերնախավ: Բոլոր դեպարտամենտներում ստեղծվեցին պետական վարժարաններ, որոնք տալիս էին միջնակարգ կրթություն: Այնուհետև բացվեցին բարձրագույն բժշկական, իրավաբանական և ռազմական դպրոցներ: Այդ բոլորի պատկեր դարձավ **Կայսերական համալսարանը**:

Նապոլեոնը հովանավորում էր գիտությունը և արվեստը: Ձևավորվեց կայսերական նոր ազնվականությունը, որի շատ ներկայացուցիչներ դուրս էին եկել ստորին խավերից:

Կրոնական հանդուրժողականություն: Հեղափոխության տարիներին պայքար էր ծավալվել կաթոլիկ եկեղեցու դեմ: Բայց Նապոլեոնը հասկանում էր, որ դա վիրավորում է միլիոնավոր կաթոլիկների կրոնական զգացմունքները և պառակտում ազգը: Հետևելով խղճի ազատության սկզբունքին՝ նա կաթոլիկությունը ճանաչեց «**Ֆրանսիացիների մեծ մասի կրոն**»:

Հարկավ, ամեն բան այսչափ հարթ չէր: Հին կարգերի կողմնակիցները շարունակում էին պայքարը: Կայսրը երբեմն դիմում էր խստությունների: Անգամ մտցրեց գրաքննություն, փակեց որոշ թերթեր ու ամսագրեր: Սակայն Նապոլեոնի վարչակարգի անկումից հետո էլ բարենորոգումները պահպանեցին իրենց ուժը: Մեծ էր դրանց ազդեցությունը նաև այլ երկրների վրա:

Պատերազմները և «Մեծ տերության» կազմավորումը

Բարենորոգումների ուղիով ընթացող Ֆրանսիան արագորեն հզորանում էր: Դա սարսափեցնում էր հարևան երկրներին, այդ թվում՝ Անգլիային և Հոլանդիային: Նրանց ընդհարումն անխուսափելի էր:

Հեղափոխության ընթացքում Ֆրանսիայում ձևավորվել էր նոր բանակ: Դրա շարքերում աճել էին այնպիսի տաղանդավոր զորավարներ, ինչպիսիք էին **Նեյթ, Գավուս, Մյուրատը** և այլք: Նորություն էր **սպայակույտի** (ռազմական շտաբ) ստեղծումը, որը կոչված էր մշակելու մարտական գործողությունների ծրագրեր:

Սկզբում Ֆրանսիան վարում էր պաշտպանողական պատերազմ, բայց հետո անցավ հարձակման և հասավ հաջողությունների: Պատերազմները հեղափոխական էին՝ միտված տապալելու ավատատիրական կարգերը: Նրանք ողջ Եվրոպայում տարածում էին ժամանակի առաջավոր գաղափարները՝ մարդու և քաղաքացու ազատությունները, ազգերի ինքնորոշման իրավունքը:

Այդ պատերազմները նպաստում էին Ֆրանսիայի տիրապետության տարածմանը: Շուտով Եվրոպայի առաջատար երկրները հայտնվեցին Ֆրանսիայի տիրապետության կամ ազդեցության ներքո՝ Իտալիան, Իսպանիան, Ավստրիան, Պրուսիան: Բացառություն էին Ռուսաստանը և Անգլիան:

Տերության կործանումը

Ռազմական ուժի վրա հիմնված «Մեծ տերությունը» անընդհատ ծավալման միտում ուներ: Նապոլեոնը երագում էր հասնել համաշխարհային տիրապետության:



Նապոլեոնի բանակի սպա



Տեսարան Լայպցիգի՝ 1813 թ. հոկտեմբերին տեղի ունեցած ճակատամարտից. անվանվել է «Ժողովուրդների ճակատամարտ»

Այդ նպատակով նա ստեղծել էր **Մեծ բանակը**, որի կազմում հավաքագրված էին նաև դաշնակից երկրների ուժերը: **1812 թ.** Մեծ բանակը մտավ Ռուսաստան: Օգոստոսին **Բորոդինոյի դաշտում** տեղի ունեցավ գլխավոր ճակատամարտը: Ռուսական բանակը պարտվեց և հանձնեց Մոսկվան:

Ռուսաստանի համար պատերազմն ընդունեց համաժողովրդական բնույթ. բանակը համալրվում էր և գորանում: Այրված և կողոպտված Մոսկվայում Նապոլեոնն իրեն զգում էր թակարդում: Ռուսական զորքերն անցան հակահարձակման և ստիպեցին ֆրանսիացիներին նահանջել: 1812 թ. դեկտեմբերին Մեծ բանակի մնացորդները լքեցին Ռուսաստանը:

Ֆրանսիայի դեմ ձևավորվեց նոր ռազմական դաշինք՝ Ռուսաստան, Անգլիա, Պրուսիա, Ավստրիա և այլ երկրներ: **1813 թ. Լայպցիգի ճակատամարտում** դաշնակիցները հաղթանակ տարան և մտան Փարիզ: Նրանք Նապոլեոնին աքսորեցին և Ֆրանսիայում վերականգնեցին տապալված արքայատոհմը:

Հին վարչակարգի վերականգնումը մեծ դժգոհություն առաջացրեց Ֆրանսիայում: Օգտվելով դրանից՝ **1815 թ. մարտին Նապոլեոնը փախավ աքսորից, վերադարձավ** և վերականգնեց կայսրությունը: Սակայն նրա իշխանությունը տևեց ընդամենը հարյուր օր: Դաշնակիցներն արագ վերամիավորվեցին: Նապոլեոնը պարտություն կրեց և այս անգամ աքսորվեց Ատլանտյան օվկիանոսի հեռավոր կղզիներից մեկը, որտեղ էլ կնքեց իր մահկանացուն:

Հարցեր և առաջադրանքներ

1. Ներկայացրե՛ք Նապոլեոն Բոնապարտի՝ կոնսուլից կայսր դառնալու հաջորդական քայլերը:
2. Թվարկե՛ք Նապոլեոնի իրականացրած բարենորոգումները: Ինչ նշանակություն ունեցան դրանք Ֆրանսիայի համար:
3. Ինչո՞ւ Նապոլեոնը մղեց «հեղափոխական պատերազմներ»: Ինչի՞ շնորհիվ Ֆրանսիան ռազմական հաջողություններ ունեցավ:
4. Ե՞րբ սկսվեց և ի՞նչ ավարտ ունեցավ ֆրանս-ռուսական պատերազմը:
5. Ո՞ր երկրները միավորվեցին Ֆրանսիայի դեմ:
6. Ներկայացրե՛ք Առաջին կայսրության անկման ընթացքը:

Գործնական աշխատանք

Աղյուսակի տեսքով ներկայացրե՛ք Նապոլեոնի բարենորոգումները և դրանց արդյունքները:

Բնագավառը	Ռազմական	Օրենսդրական	Վարչական	Մշակութային	Կրոնական
Բարենորոգումները					

Քննարկման հարց

Ինչո՞ւ Նապոլեոնի կայսրությունը կործանվեց:

Նոր հասկացություններ, անուններ

«Բոլոր ֆրանսիացիների կայսր», «Քաղաքացիական օրենսգիրք», դեպարտամենտ, պրեֆեկտ, Առաջին կայսրություն, Կայսերական համալսարան, Նեյ, Դավու, Մյուրատ, հեղափոխական պատերազմ, Մեծ բանակ, Բորոդինոյի և Լայպցիգի ճակատամարտեր:

ԵՎՐՈՊԱՆ 1815–1850–ԱԿԱՆ ԹՎԱԿԱՆՆԵՐԻՆ (ՀԵՏԱԴԻՄՈՒԹՅՈՒՆ, ՓՈԽՀԱՄԱՁԱՅՆՈՒԹՅՈՒՆ)

Հետնապոլեոնյան դարաշրջանը Եվրոպայում նշանավորվեց հասարակական տարաբնույթ ուժերի բախումներով: Երբեմն գերակայում էր **հետադիմությունը**, երբեմն՝ **բարենորոգումների** ոգին: Իսկ հաճախ էլ հասարակական զարգացումը մտնում էր փակուղի: Ստեղծվում էին ճգնաժամային իրավիճակներ, որոնք ավարտվում էին նոր **հեղափոխություններով**:

Վիեննայի վեհաժողովը

1814–1815 թթ. Ավստրիայի մայրաքաղաք Վիեննայում Նապոլեոնին հաղթած պետությունների ղեկավարները հրավիրեցին վեհաժողով: Նպատակը ոչ միայն հաշտություն կնքելն էր պարտված Ֆրանսիայի հետ, այլև Եվրոպայում «կայուն խաղաղություն» հաստատել: Բոլորը խոսում էին «արդարության և խախրված օրինականության» վերականգնման մասին:

Վիեննայի վեհաժողովը

Իր ընդգրկմամբ նախադեպը չունեցող այս վեհաժողովին մասնակցում էին 2 կայսր, 4 թագավոր, 2 թագաժառանգ և 215 իշխանական տների ղեկավարներ: Այստեղ հավաքվել էր 450 դիվանագետ: Առաջին անգամ ողջ Եվրոպան հավաքվել էր բանակցելու: Չկար մի նիստ, որին բոլորն անխտիր մասնակցեին: Բանակցությունները հաճախ ընդհատվում էին պարահանդեսներով, ներկայացումներով, որսով: «Պարող վեհաժողով». այդպես է այն մնացել բոլորի հիշողության մեջ: Պայմանագրերը մշակվում էին առանձին աշխատանքային խմբերում:



Ավստրիան և Պրուսիան: Համատեղ ջանքերով նրանք 1820–1830–ական թթ. ճնշեցին հեղափոխական շարժումներն Իտալիայում, Իսպանիայում, Լեհաստանում:

Բարենորոգումների ուղին (փոխհամաձայնություն)

Բարենորոգումների ուղիով զարգացող երկրի բնորոշ օրինակ էր Անգլիան: Արդեն գիտենք, որ XVII դ. հեղափոխությունից հետո այստեղ ձևավորվեց **սահմանադրական միապետություն**: Հետագայում Անգլիան խուսափեց հեղափոխական նոր ցնցումներից:

Այս խաղաղ ընթացքին նպաստում էր նաև մեծ չափերի հասնող **արտագաղթը**: Տարեկան ԱՄՆ, Կանադա, Ավստրալիա և այլ երկրներ էին հեռանում հարյուր հազարավոր անգլիացիներ:

Այնուամենայնիվ, XIX դ. առաջին կեսին Անգլիան ևս կարիք ուներ բարենորոգումների: Արդյունաբերական հեղաշրջման հետևանքով մեծապես փոխվել էր հասարակության տնտեսական և ընկերային (սոցիալական) կառուցվածքը: Առաջացել էին ձեռներեցների և բանվորների դասակարգերը, որոնք ունեին բազում չլուծված հիմնախնդիրներ:

Բանվորների աշխատանքային ու կենսական պայմանները ծանր էին: Իրենց շահերի համար նրանք պայքարում էին դեռ XVIII դ. վերջերից՝ ստեղծելով **արհմիություններ** (արհեստակցական միություններ): **1824 թ.** խորհրդարանն օրինականացրեց արհմիությունների գործունեությունը: Կառավարության, ձեռներեցների և արհմիությունների փոխհամաձայնությամբ XIX դ. 20–40–ական թթ. կատարվեցին առաջին լուրջ բարենորոգումները: Օրենքով արգելվեց անչափահասների գիշերային աշխատանքը, կրճատվեց աշխատանքային օրը:

Ձեռներեցները և բանվորները ձգտում էին մասնակցություն ունենալու պետական կյանքին: Համառ պայքարից հետո խորհրդարանը **1832 թ.** ընդունեց նոր ընտրական օրենք, որը զգալիորեն ընդլայնեց ընտրողների թիվը՝ ի հաշիվ անշարժ գույք ունեցող անձանց: Սակայն բանվորները չստացան ընտրական իրավունք, և պայքարը շարունակվեց:



ՉԱՐՏԻՍՏԱԿԱՆ ՇԱՐԺՈՒՄԸ

Անգլիական աշխատավորների գանգվածային ելույթը 1830-1840 թթ. խնդիր ուներ ժողովրդավարացնելու երկրի կյանքը: Շարժման ղեկավարները մտածում էին լուծել աշխատավորների խնդիրները՝ ապահովելով նրանց մասնակցությունը խորհրդարանի աշխատանքներին: Օգտագործում էին պայքարի թե՛ խաղաղ, թե՛ բռնի միջոցները: Կառավարությունը ճնշեց շարժումը: Սակայն հետագա տարիներին նրա շատ պահանջներ իրագործվեցին: Ժամանակակիցներն ասում էին. «Դա պարտվածների անվիճելի հաղթանակն է հաղթողների նկատմամբ»:

1837 թ. բանվորները կազմեցին **պահանջագիր (չարտեր)** և ներկայացրին խորհրդարան: Փաստաթղթի անունով շարժումը կոչվեց **չարտիստական**: Չարտիստները պահանջում էին ընդհանուր ընտրական իրավունք, գաղտնի քվեարկություն, պատգամավորների աշխատավարձ և այլն: Պահանջագիրը երեք անգամ ներկայացվեց խորհրդարան, բայց մերժվեց: Այնուամենայնիվ, պայքարն անհետևանք չմնաց: Հետագայում կրճատվեց ընտրական իրավունքի համար սահմանված ունեցվածքի չափը, և ընտրողների թիվն աստիճանաբար ավելացավ:

Բարենորոգումների մյուս ասպարեզը **տնտեսության ազատականացումն** էր, այսինքն՝ ազատ ձեռներեցությանը և տնտեսական մրցակցությանը խոչընդոտող գանազան արգելքների վերացումը: Այդ ճանապարհին կարևոր էր խորհրդարանի ընդունած որոշումը այսպես կոչված **հացի օրենքները** վերացնելու մասին: Սեփական հաց արտադրողներին պաշտպանելու համար կառավարությունը ժամանակին սահմանել էր արտերկրից ներմուծվող հացահատիկի բարձր մաքսատուրք: Ժողովուրդը ստիպված գնում էր սեփական թանկ հացը: Հացի գներն ազատականացվեցին: Անգլիան աշխարհի

տարբեր երկրներից սկսեց ներմուծել էժան հաց: Փոխարենն այդ երկրներն իջեցրին անգլիական արդյունաբերական ապրանքներից գանձվող բարձր տուրքերը: Գրանից Անգլիան շահում էր, քանի որ արտահանումն ավելի շատ էր, քան ներմուծումը: Դա հնարավորություն էր տալիս փոխհատուցելու գյուղատնտեսության կորուստները:

Այս ճանապարհով **Անգլիան դարձավ աշխարհի ամենաազատական տնտեսություն ունեցող երկիրը**: Բազմաթիվ երկրներ հեղեղված էին անգլիական էժան և բարձրորակ արդյունաբերական ապրանքներով: Անգլիան չէր վախենում մրցակցությունից, քանի որ ուներ հզոր արդյունաբերություն: Նա պաշտոնապես վարում էր **ազատ առևտրի** քաղաքականություն:

Այսպես՝ փոխզիջումային բարենորոգումներով Անգլիան ուրք դրեց արդյունաբերական հասարակության նոր շրջափուլ: Պարսությունը ցույց տվեց, որ անգլիական ուղին առավել արդյունավետ էր:

Հարցեր և առաջադրանքներ

1. Ովքեր էին գումարել Վիեննայի վեհաժողովը և ինչ նպատակով:
2. Ինչ վերաձևման ենթարկվեց Եվրոպայի քաղաքական քարտեզը:
3. Ովքեր և ինչ նպատակով ստեղծեցին Սրբազան դաշինքը:
4. XVII դարի վերջերից սկսած՝ ինչո՞ւ Անգլիային հաջողվեց խուսափել նոր հեղափոխություններից:
5. Ինչ բարենորոգումներ իրականացվեցին Անգլիայում XIX դարի առաջին կեսին:
6. Երբ է սկսվել չարտիստական շարժումը: Ներկայացրե՞ք անգլիացի բանվորների պայքարի արդյունքները:
7. Տնտեսության ազատականացման նպատակով ինչ բարենորոգումներ արվեցին Անգլիայում: Ինչ արդյունքներ տվեցին դրանք:

Նոր հասկացություններ, անուններ

Հետադիմություն, Վիեննայի վեհաժողով, «արդարության և խախտված օրինականության» վերականգնում, Սրբազան դաշինք, արտագաղթ, պահանջագիր (չարտեր), չարտիստական շարժում, տնտեսության ազատականացում, «հացի օրենքներ», ազատ առևտուր:

8

ՀԵՂԱՓՈԽՈՒԹՅՈՒՆՆԵՐԸ ԵՎՐՈՊԱՅՈՒՄ 1830–1840–ԱԿԱՆ ԹՎԱԿԱՆՆԵՐԻՆ

Հեղափոխությունները XIX դ. առաջին կեսի եվրոպական պատմության անբաժանելի մասն էին: Դրանք դրսևորվեցին հիմնականում երկու ձևով՝ **սոցիալական հեղափոխության** և **ազգային հեղափոխության**: Առաջին դեպքում գերակայում էին հասարակական հիմնախնդիրները՝ իշխանության գրավում, քաղաքական և սոցիալական ազատությունների ընդլայնում, տնտեսության ազատականացում և այլն: Երկրորդ դեպքում գերակայում էին սան ազգային հիմնախնդիրները՝ ազատագրություն, վերամիավորում, անկախ պետության ստեղծում կամ վերականգնում:

1848 թ. հեղափոխությունը Ֆրանսիայում

Ֆրանսիայում 1830 թ. հաստատվեց սահմանադրական միապետություն՝ **Լուի Ֆիլիպի** գահակալությամբ: Իշխանության եկավ բուրժուազիայի վերնախավը՝ խոշոր դրամատերերն ու վաշխատուները: Նրանք աշխատում էին ժողովրդավար երևալ. խոսում էին քաղաքական ազատություններից, աշխարհիկ կրթությունից: Սակայն դրանից կառավարման բովանդակությունը չէր փոխվում: Պետական հովանավորության շնորհիվ (արտոնություններ, մենաշնորհներ) հարստանում էին դրամատերերը և վաշխատուները: Երկրում բացակայում էր ազատական տնտեսությունը: Ծաղկում էր կաշառակերությունը, տարածված էր աղքատությունը: Ֆրանսիացիների մեծ մասը զրկված էր ընտրության իրավունքից:

Դրությունը հատկապես սրվեց 1845–1847 թթ., երբ անբերրիության հետևանքով սով և համաճարակ սկսվեց: **1848 թ. փետրվարին** ժողովուրդը Փարիզում ապստամբեց: Լուի Ֆիլիպը փախավ երկրից: Հեղափոխությունը տարածվեց: Կազմվեց ժամանակավոր կառավարություն, և Ֆրանսիան հռչակվեց հանրապետություն:



ԼՈՒԻ ՖԻԼԻՊ
(1773–1850)

Նրան կոչում էին «բուրժուա թագավոր»: Անվանի գրող Ստենդալը նրան համարում էր ամենախորամանկ թագավորը:

1848 թ. ժողովրդին ուղղված հեղափոխական կոչեր Ֆրանսիայում

Քաղաքացիներ

Դուք մեկ անգամ ևս ձեր հերոսությամբ հաղթահարեք բռնապետությունը: Դուք արդեն հաղթել եք նրան 1789 թ. հուլիսի 14-ին, 1792 թ. օգոստոսի 10-ին, 1830 թ. հուլիսի 29-ին, և ամեն անգամ ձեզնից լվել են ձեր հաղթանակի պտուղները...

Թող այս օրինակները ձեզ դաս լինեն... Վերջին անգամ դրոշմում կայացրեք: Շտապեք Թյուիլրի (Ֆրանսիայի թագավորների նստավայրը Փարիզում — հեղ.): Գրավեք այն: Մի վստահեք խաբեբաներին, մարդկանց, որոնք ցույց են տվել իրենց վախկոտությունը կամ քաղաքական անկարողությունը...

Ի գն: Դեպի Թյուիլրի:

1848 թ. փետրվարի 24

Երկրորդ հանրապետությունը գոյատևեց մոտ չորս տարի՝ 1848–1852 թթ.: Մտցվեց ընդհանուր ընտրական իրավունք, ընդլայնվեցին քաղաքական ազատությունները, վերացվեց մահապատիժը, ինչպես նաև ստրկությունը գաղութներում:

Հեղափոխության մասնակիցների հիմնական զանգվածը բանվորներ էին: Նրանց շրջանում մեծ ազդեցություն ունեին **սոցիալիստները** (ընկերվարները), որոնց նպատակն էր արագ փոփոխությունների միջոցով ստեղծել մի նոր հասարակություն՝ առանց աղքատության և շահագործման:

Երկրորդ հանրապետության Սահմանադրությամբ Ֆրանսիան հռչակվեց **նախագահական հանրապետություն**: Կառավարման լծակները լինելու էին ընտրովի նախագահի ձեռքում:

Երկիրը, սակայն, մնում էր պառակտված: Շարունակվում էր սուր պայքարը միապետականների և հանրապետականների միջև: Անհրաժեշտ էր «ուժեղ ձեռքի» իշխանության և ազգային համերաշխության հաստատում: Իրավիճակը հիշեցնում էր 1799 թվականը: Այն ժամանակ այդպիսի «ուժեղ ձեռք» դարձավ Նապոլեոն Բոնապարտը: Նա չկար, բայց ապրում էր նրա հերոսական անունը, որը ֆրանսիացիների մեջ արթնացնում էր ազգային հպարտություն: Դրանից էլ օգտվեց Բոնապարտի եղբորորդի **Լուի Նապոլեոնը**:

1848 թ. նա ընտրվեց հանրապետության նախագահ և ձեռնամուխ եղավ տերության վերականգնմանը: Նա

հայտարարում էր, որ ինքն արտահայտում է բոլոր ֆրանսիացիների շահերը: Կատարելով պետական հեղաշրջում՝ **1852 թ.** իրեն հռչակեց «բոլոր ֆրանսիացիների կայսր»: Ստեղծվեց **Երկրորդ կայսրությունը**, որը գոյատևեց մինչև 1870 թ.:

Հեղափոխությունը գերմանական պետություններում

Վիեննայի վեհաժողովը պահպանել էր Գերմանիայի քաղաքական մասնատվածությունը: Ավստրիայի գլխավորությամբ ստեղծվել էր **Գերմանական միությունը**, որը թույլ էր և անկարող: Մանր պետությունները շահագրգռված չէին միասնական պետության ստեղծմամբ: Նրանք չէին ցանկանում հրաժարվել իրենց ինքնիշխանությունից: Սակայն կյանքն ընթանում էր իր հունով: Արդյունաբերական հեղաշրջման, շուկայական հարաբերությունների զարգացման հետևանքով XIX դ. առաջին կեսին Գերմանիայի առանձին շրջանների միջև հաստատվեցին տնտեսական սերտ հարաբերություններ: Երկիրն սկսեց տնտեսապես միավորվել: Միավորման գործը միջոցներից էին նաև միասնական կրթական համակարգը և մշակույթը:

Նման պայմաններում **1848–1849 թթ. Գերմանիայում ծավալվեց հեղափոխություն**, որի կարևորագույն նպատակը ազգի քաղաքական միավորումն էր: Այն սկսվեց **Պրուսիայում**: Այստանը ժողովուրդը թագավորին ստիպեց ընդունել սահմանադրություն:

Շուտով **Մայնի Ֆրանկֆուրտ** քաղաքում հրավիրվեց **Ազգային ժողով**: Այն ընդունեց **համագերմանական Սահմանադրություն**, որը նախատեսում էր միասնական Գերմանական տերության ստեղծում: Սակայն հետադիմությունը համախմբեց ուժերը և հաղթեց: Համագերմանական Ազգային ժողովը ցրվեց:

Չնայած պարտությանը՝ հեղափոխության ընթացքում ավելի խորացավ գերմանացիների ազգային ինքնագիտակցությունը: Դա արագացրեց երկրի միավորման գործընթացը հաջորդ տասնամյակներում:



ՆԱՊՈԼԵՈՆ III
(1808–1873)

Ֆրանսիայի նախագահ, ապա՝ կայսր (1852–1870): Կառավարումը բաժանվում է մի քանի փուլի: Նախապես խոսում էր ընդհանուր բարօրության և ազատության մասին: Սակայն հաստատվելով գահին՝ սկսեց կառավարել միահեծան կերպով. հետապնդում էր այլախոհներին, փակում ընդդիմադիր թերթերը:

1860–ական թթ. ընդդիմության ճնշման տակ անցկացրեց ազատական բարենորոգումներ: Սակայն դրանք ավելի շատ ցուցադրական էին, քան իրական: Արտաքին քաղաքականության մեջ հետամուտ էր Եվրոպայում Ֆրանսիայի տիրապետության հաստատման անիրական նպատակին: Պրուսիայի դեմ պատերազմում (1870–1871) ֆրանսիական բանակը կրեց խայտառակ պարտություն: Նապոլեոն III-ը գերի ընկավ և ընդմիջտ հեռացավ քաղաքական ասպարեզից:



ՋՈՐՋ ԲԱՅՐՈՆ
(1788–1824)

Անգլիացի գրող: Նրան մեծ հռչակ բերեց «Չայլդ Հարոլդի ուխտագնացությունը» պոեմը: Հարոլդն ազնվական է, որը հիասթափվել է դաժան կյանքից: Դառնալով ճանապարհորդ՝ նա մերթ հիանում է իսպանացիների ազատասիրությամբ, մերթ հույներին կոչ է անում կովելու թուրքերի դեմ, երբեմն էլ սգում է Իտալիայի դառը ճակատագիրը: Ընթերցողի առջև հանում է նրա ազատասեր, երազկոտ, զգայուն ու զարմանահրաշ կերպարը:

Ջ. Բայրոնը նաև հայերի ջերմ բարեկամն էր: Վենետիկի Մխիթարյան միաբանությունում սովորել է հայերեն, կատարել թարգմանություններ:

Ազգային հեղափոխությունները Եվրոպայում

Ազգերը միշտ էլ ձգտել են սպրելու սեփական ազգային կյանքով, ստեղծելու կամ վերականգնելու սեփական անկախ պետությունը: Դրան հասնում էին երկարատև պայքարի, հաճախ՝ ազգային հեղափոխությունների շնորհիվ:

Եվրոպայում այդ ուղիով առաջինը **Հունաստանը** ձեռք բերեց ազատություն: XIV–XV դդ. ի վեր հույները տառապում էին օսմանյան լծի ներքո: Նրանց մեջ հասունանում էր հեղափոխության ճանապարհով ազատագրվելու գաղափարը: **1821 թ.** սկսվեց հույների ապստամբությունն ընդդեմ Օսմանյան կայսրության: Պայքարը վայելում էր առաջադեմ Եվրոպայի համակրանքը. չէ՞ որ Հունաստանը նրա քաղաքակրթության բնօրրանն էր: Հունաստան էին գալիս բազում կամավորներ: Նրանց թվում էր անգլիացի մեծ բանաստեղծ և մարդասեր **Ջ. Բայրոնը**:

Հույները հասան հաջողության, երբ ի պաշտպանություն նրանց հանդես եկան Անգլիան, Ռուսաստանը և Ֆրանսիան: **1830 թ.** նրանք ճանաչեցին Հունաստանի անկախությունը: Երկու տարի անց երկիրը հռչակվեց թագավորություն:

Հաղթանակով ավարտվեց նաև 1831 թ. հեղափոխությունը **Բելգիայում**: Բելգիացիներն ազատագրվեցին Հոլանդիայից և ստեղծեցին անկախ պետություն: Նույն թվականին ազգային հեղափոխություն սկսվեց նաև **Լեհաստանում**, սակայն ռուսական զորքերն այն արյան մեջ խեղդեցին:

1848–1849 թթ. ազգային հեղափոխություններ տեղի ունեցան նաև Իտալիայում և Հունգարիայում՝ ավստրիական տիրապետությունից ազատագրվելու նպատակով: Ստանալով Ռուսաստանի օգնությունը՝ Ավստրիան կարողացավ ճնշել իտալական և հունգարական ազգային հեղափոխությունները:

Հարցեր և առաջադրանքներ

1. Թվարկե՛ք հեղափոխությունների դրսևորման երկու ձևերը և բնորոշե՛ք դրանք:
2. Նշե՛ք 1848 թ. ֆրանսիական հեղափոխության պատճառները:
3. Որքա՞ն ժամանակ է գոյություն ունեցել Երկրորդ հանրապետությունը: Ո՞վ ստեղծեց Երկրորդ կայսրությունը Ֆրանսիայում:
4. Փորձե՛ք ապացուցել, որ Ֆրանսիան, այնուհանդերձ, զարգանում էր Մեծ հեղափոխության մատնանշած ուղիով:
5. Բնութագրե՛ք գերմանական հեղափոխությունը: Ո՞րն էր նրա գլխավոր արդյունքը:
6. Ինչո՞ւ են բոլոր ազգերը ձգտում ունենալու անկախ պետություն: Ի՞նչ նշանակություն ունի անկախությունը:
7. Ե՞րբ է անկախացել Հունաստանը: Որո՞նք են հույների ազատագրական պայքարի հաջողության պատճառները:
8. XIX դ. առաջին կեսին եվրոպական դժբերություններում են տեղի ունեցել ազգային հեղափոխություններ: Ինչո՞վ են ավարտվել դրանք:

Քննարկման հարց

Զարգացման դժուր ուղին է նախընտրելի՝ հեղափոխական, թե՛ բարենորոգումների:

Նոր հասկացություններ, արտահայտություններ, անուններ

Սոցիալական և ազգային հեղափոխություններ, Երկրորդ հանրապետություն, նախագահական հանրապետություն, սոցիալիստ (ընկերվար), Լուի Ֆիլիպ, Լուի Նապոլեոն III, Երկրորդ կայսրություն, Գերմանական միություն, 1848–1849 թթ. գերմանական հեղափոխություն, Հունաստանի անկախացում, Ջ. Բայրոն, Բելգիա:

ԱՐԵՎԵԼՔԻ ԱՎԱՆԴԱԿԱՆ ՀԱՍԱՐԱԿՈՒԹՅՈՒՆՆԵՐԸ (ՕՍՄԱՆՅԱՆ ԿԱՅՍՐՈՒԹՅՈՒՆ ԵՎ ԻՐԱՆ)

Ինչ է ավանդական հասարակությունը

Նոր ժամանակներում Արևելքի երկրները իրենց զարգացման մակարդակով բավական հետ մնացին եվրոպական առաջատար երկրներից: Գլխավոր պատճառը մինչարդյունաբերական դարաշրջանում ստեղծված հասարակության բնույթն էր: Նոր դարաշրջանում երկար ժամանակ այդ հասարակությունը մնաց անփոփոխ, այդ պատճառով էլ ստացել է **ավանդական հասարակություն** անվանումը: Նրան բնորոշ են պետության բացառիկ դերը, մարդկանց՝ սովորույթների և ավանդույթների վրա հիմնված հոգևոր կյանքը, ապրելակերպը և հարաբերությունները: Այդպիսի հասարակություններ գոյություն ունենին ամենից առաջ Արևելքի երկրներում՝ Օսմանյան կայսրություն, Իրան, Հնդկաստան, Չինաստան, Ճապոնիա:

Ավանդական հասարակությունում պետության գլուխ կանգնած էր **միահեծան ղեկավարը** (սուլթան, արքա, շահ, կայսր և այլն): Նրա կամքը պարտադիր էր բոլորի համար: Կառավարումն իրականացվում էր մեծաքանակ պետական ապարատի միջոցով: Սովորույթային և ավանդական նորմերի, հասարակական կարգ ու կանոնի պահպանումը վերահսկվում էր բանակի, ոստիկանության և դատարանի կողմից:

Գյուղատնտեսությունը շարունակում էր մնալ երկրի տնտեսության գլխավոր հատվածը: Պետությունն էր երկրի հողերի գերագույն սեփականատերը: Արտադրության մեջ գերիշխում էր ձեռքի աշխատանքը: Գյուղացիությունն ապրում էր համայնքներով՝ կիսազատ կամ ճորտային վիճակում: Արհեստավորները և առևտրականները միավորված էին համքարությունների մեջ:

Հասարակությունն ուներ հստակորեն ընդգծված **դասային կառուցվածք**: Հիմնական դասերն էին՝ ազնվականությունը, հոգևորականությունը, պաշտոնեությունը,



գյուղացիությունը, արհեստավորները, վաճառականները: Յուրաքանչյուր դասի վերապահված էին որոշակի իրավունքներ և պարտականություններ: Նրանց միջև կային լուրջ անջրպետներ: Մեծ էր նաև ընտանիքի և ազգակցական կապերի դերը այս հասարակություններում:

Հասարակական կյանքում, հատկապես՝ մշակութային, մեծ դեր էր խաղում **կրոնը**: Կրթությունը հասանելի էր միայն վերնախավին (բացառությամբ Չինաստանի): Ընդհանուր առմամբ բնակչությունն անգրագետ էր:

Նոր դարերում ավանդական հասարակությունների համար հրատապ դարձավ **արդիականացման** խնդրի լուծումը: Առանց դրա անհնար էր հաղթահարել արդյունաբերական երկրներից հետ մնալը և ապահովել պատմական առաջընթացը:

Օսմանյան կայսրությունը
1683 թ.

Օսմանյան կայսրությունը

Նոր դարերի սկզբին Օսմանյան կայսրությունը դեռևս տիրում էր առեղի տարածքի: Նրա վերահսկման տակ

էին Արևմուտք–Արևելք կարևորագույն ռազմավարական և առևտրական ուղիները: Սակայն երկիրը տնտեսապես հետամնաց էր:

Պետությունը միահեծան կառավարում էր **սուլթանը**: Նա միաժամանակ բոլոր մուսուլմանների հոգևոր առաջնորդը՝ **խալիֆան** էր: Երկիրը բաժանված էր **վիլայեթների** (սակ՝ փաշայություն), որոնք կառավարում էին փաշաները: Սակայն օսմանյան սուլթաններին այդպես էլ չհաջողվեց ստեղծել ամուր վարչական, տնտեսական և մշակութային կառույց: Տերության միասնականությունը պահպանվում էր միայն խոշոր բանակի միջոցով:

Օսմանյան տերության կազմում ապրում էին բազմաթիվ ժողովուրդներ, որոնք դաժանորեն շահագործվում էին տիրապետող թուրք տարրի կողմից: Չնայած դրան՝ տերության հիմնական արտադրող և ստեղծագործող ուժը ոչ թուրք ժողովուրդներն էին: Արտադրության, առևտրի և մշակույթի ոլորտներում առավելապես զբաղված էին **հույները, հայերը, հրեաները, արաբները, բալկանյան ժողովուրդները, ասորիները**:

Օսմանյան կայսրության դերը միջազգային ասպարեզում սկսեց նվազել: Տերության գլխավոր հակառակորդներն էին Ավստրիան և Ռուսաստանը: Թուրքերը հատկապես անհաջողություններ կրեցին XVIII դ. երկրորդ կեսին Ռուսաստանի դեմ մղած պատերազմներում:

Այս իրավիճակից հաջողությամբ օգտվում էին Անգլիան և Ֆրանսիան, որոնք ամրապնդում էին իրենց ազդեցությունը սուլթանի վրա:

Օսմանյան տերությունում ազդեցություն ստանալու, նրա տարածքների համար մեծ տերությունների միջև ծավալված պայքարը միջազգային դիվանագիտության մեջ XVIII դ. երկրորդ կեսին ձևակերպվեց **Արևելյան հարց** անունով: Աստիճանաբար մեծացավ տերության կախվածությունը եվրոպական պետություններից: Վերջիններս լայնորեն օգտագործում էին տերության հպատակ ժողովուրդների, հատկապես քրիստոնյաների ազատագրական պայքարը:

Տերության անկումային ընթացքից թուրքական վերնախավը ձգտում էր դուրս գալու բարենորոգումների

Հպատակ ժողովուրդներին օսմանցիները վերաբերվում էին իբրև կրոնական համայնքների (միլլեթներ): Կոստանդնուպոլսի գրավումից հետո՝ 1453 թ., սուլթանական հրովարտակներով հիմնվեցին հունական և հայկական պատրիարքությունները: Պատրիարքներն ունեին ոչ միայն հոգևոր, այլև աշխարհիկ իշխանություն: Նրանք էին ղեկավարում իրենց համայնքների ներքին ազգային գործերը:

ճանապարհով: Փորձ արվեց եվրոպական օրինակով ուժեղացնել բանակը, կառավարման համակարգը և զինջումների միջոցով թուլացնել հպատակ քրիստոնյա ժողովուրդների պայքարը:

XVIII դ. վերջին դրվեց բարենորոգումների սկիզբը: Ստեղծվեցին նոր զինվորական ստորաբաժանումներ, հիմնվեցին ռազմական ուսումնարաններ: Իսկ սուլթան **Մահմուդ II-ը** 1826 թ. վերացրեց օսմանյան բանակի ենիչերիական ստորաբաժանումները: Սակայն 1828–1829 թթ. ռուս–թուրքական պատերազմում Օսմանյան կայսրությունը նորից պարտվեց և ստիպված էր ճանաչել Հունաստանի անկախությունը:

Որոշ ժամանակ անց՝ **1839 թ.**, սկսվեց արևմտամետ բարենորոգումների նոր փուլ: Այն ստացավ **թանզիմաթ** (բարենորոգում) անվանումը: Նախատեսվում էր ապահովել ոչ մուսուլմանների իրավահավասարություն մուսուլմանների հետ, նրանց կյանքի և ունեցվածքի անձեռնմխելիություն և այլն: Սակայն դրանք չհասան իրենց նպատակին:

Իրան

Նոր ժամանակների սկզբին Իրանը Ասիայի խոշոր երկրներից մեկն էր: Բուն իրանական հողերից բացի՝ նրա կազմի մեջ էին մտնում Աֆղանստանի և Միջին Ասիայի մի մասը, Ատրպատականը, Արևելյան Հայաստանը, Այսրկովկասի արևելյան մասը: Պետության կազմում կային տասնյակ ժողովուրդներ և ցեղեր: XVII դ. կեսերից Իրանը մտավ անկման ժամանակաշրջան:


Իրանական պետությունը ղեկավարում էր **շահը**: Պետությունը վարչականորեն բաժանված էր **խանությունների**, որոնք ղեկավարում էին **խաները**: Երկրի կյանքում հսկայական էր իսլամ հոգևորականության դերը: Իրանը գլխավորապես գյուղատնտեսական երկիր էր: Երկրում զարգացած էր նաև արհեստագործությունը: Միջազգային առևտրում հռչակված էին իրանական գորգերն ու գործվածքեղենը:

1722 թ. անկում ապրեց Սեֆյան արքայատոհմը: Հենց այդ ժամանակ Արցախում և Մյունիքում կազմակերպվեց



ՄԱՀՄՈՒԳ II
(1785–1839)

Օսմանյան սուլթան: Բարենորոգումների միջոցով փորձել է կանգնեցնել տերության անկումը, բայց հաջողություն չի ունեցել: Ոչնչացրել է ենիչերիների գործը և հիմք դրել նոր բանակի: Նրա օրոք բացվել են դպրոցներ, լույս է տեսնել առաջին պաշտոնաթերթը, որն ուներ նաև հայերեն տարբերակ:



ԱՂԱ ՄՈՀԱՄՄԱԳ ԽԱՆ
(1741-1797)

Թուրքմենչայի պայմանագրի
ստորագրումը

հայկական բանակ, ծավալվեց զինված պայքար և փորձ արվեց վերականգնելու հայկական պետությունը:

Իրանին անկայուն վիճակից դուրս բերեց, կարճ ժամանակով միավորեց և ուժեղ պետություն ստեղծեց **Նադիր շահը**: Սակայն նրանից հետո երկիրը կրկին թուլացավ:

1796 թ. Իրանում հաստատվեց **Ղաջարների** թյուրքական ցեղի հարստությունը: Հիմնադիրը **Աղա Մոհամմադ** խանն էր՝ այդ ցեղի առաջնորդը: Սակայն նա չհասցրեց ուժեղացնել երկիրը. մեկ տարի անց Շուշիում նրան բնած ժամանակ դավադրաբար սպանեցին:

Իրանը XIX դար թևակոխեց տնտեսապես հետամնաց վիճակում: Նրա և Ռուսաստանի միջև շարունակվեց պայքարը Կովկասի համար, որն ավարտվեց Ռուսաստանի հաղթանակով: **1828 թ. Թուրքմենչայի պայմանագրով** Այսրկովկասը, այդ թվում նաև Արևելյան Հայաստանի հիմնական հատվածը միացվեցին Ռուսաստանյան կայսրությանը:

Փորձելով վերականգնել հզոր տերության իր կարգավիճակը՝ ղաջարական Իրանը Միջին Արևելքում սկսեց վարել նվաճողական քաղաքականություն: Սա-



կայն դրա պատճառով սրվեցին հարաբերությունները Անգլիայի հետ: Ի վերջո, 1841 թ. ստորագրված առևտրական պայմանագրով հաստատվեց անգլիացիների հսկողությունը Իրանի տնտեսության վրա:

Իրանը, կորցնելով իր երբեմնի հզորությունը, արդեն Նոր դարերի երկրորդ փուլում վերածվեց Անգլիայի և Ռուսաստանի կիսագաղութի:

Հարցեր և առաջադրանքներ

1. Ինչ է ավանդական հասարակությունը: Որո՞նք են դրա բնորոշ կողմերը:
2. Թվարկե՛ք ավանդական մի քանի երկրներ: Ձեր կարծիքով Հայաստանը մտնո՞ւմ էր այդ երկրների շարքը:
3. Ներկայացրե՛ք Օսմանյան կայսրության վիճակը նոր ժամանակների սկզբին: Ինչպիսի՞ն էր հայերի դրությունը կայսրությունում:
4. Փաստերով հիմնավորե՛ք, որ Օսմանյան կայսրությունը Նոր դարերում գնալով թուլանում էր: Տվե՛ք Արևելյան հարցի բացատրությունը:
5. Երբ սկսվեցին բարենորոգումներ իրականացվել Օսմանյան կայսրությունում: Ինչ է թանգիմաթը, ինչո՞ւ այն հաջողություն չունեցավ:
6. Ներկայացրե՛ք Իրանի կառավարման համակարգը: Երբ անկում ապրեց Մեֆյան արքայատոհմը: Ինչո՞վ է հայտնի Նադիր շահը: Երբ և ո՞ւմ կողմից է հաստատվել Ղաջարների հարստությունը:
7. Ներկայացրե՛ք ռուս–իրանական հակամարտության արդյունքները XIX դարի առաջին կեսին: Վերհիշե՛ք Հայոց պատմությունից ռուս–պարսկական պատերազմների մասին ձեր սովորածը:
8. Երբ կնքվեց անգլո–իրանական առևտրական պայմանագիրը և ի՞նչ հետևանք ունեցավ:

Գործնական աշխատանք

Կազմե՛ք աղյուսակ և համեմատե՛ք Օսմանյան կայսրությունն ու Իրանը. ի՞նչ նմանություններ և տարբերություններ կարող եք նշել:

Նոր հասկացություններ, արդիաօրինակություններ, անուններ

Ավանդական հասարակություն, միլլեթ, Արևելյան հարց, Մահմուդ II, թանգիմաթ, Նադիր շահ, Աղա Մոհամմադ խան, Ղաջարական հարստություն, Թուրքմենշայի պայմանագիր, անգլո–իրանական առևտրական պայմանագիր:

ԱՐԵՎԵԼՔԻ ԱՎԱՆԴԱԿԱՆ ՀԱՍԱՐԱԿՈՒԹՅՈՒՆՆԵՐԸ (ՀՆԴԿԱՍՏԱՆ ԵՎ ՉԻՆԱՍՏԱՆ)

«Բրիտանական թագի մարգարիտը»

XVI դարից ի վեր Հնդկաստանում սկսեցին առաջանալ հայկական համայնքներ: Հնդկահայ գաղութները մարդաշատ դարձան XVII-XVIII դդ. հատկապես Նոր Զուղայից ներգաղթածների հաշվին: Հայերը հաստատվում էին ծովափնյա քաղաքներում:

1690 թ. անգլիացիները Կալկաթան վերածեցին նավահանգստային քաղաքի, որին մասնակցեցին նաև հայերը: Անգլիացիները սկզբում սիրաշահում էին հայերին, սակայն հետո առաջացավ մրցակցություն: Ահա թե ինչու տեղի հայերը մասնակցեցին գաղութարարների դեմ հնդիկ ժողովրդի պայքարին: Միաժամանակ հնդկահայ ազգային-քաղաքական ուժերի մոտ ամրապնդվեց սեփական պետություն ունենալու գաղափարը:

Միջնադարի պատմությունից գիտեք, որ XVI դարում Հնդկաստանի հյուսիսային և կենտրոնական մասում առաջացել էր **Մեծ Մողոլի կայսրությունը**: Նոր դարերում այն սկսեց թուլանալ: Երկիրը միասնական չէր, ինչը հեշտացրեց եվրոպացիների ներթափանցումը և Հնդկաստանի գաղութացումը:

Տեղի բազմաթիվ ժողովուրդներն ապրում էին իրենց ավանդական կենցաղով և հոգևոր կյանքով, ստեղծել էին ուրույն մշակույթ: Հասարակությունը ավանդաբար բաժանված էր **կաստաների**: Արգելված էր անցումը մի կաստայից մյուսին, ինչպես նաև չէր թույլատրվում նրանց միջև ամուսնությունը: Տարածված կրոններն էին **հինդուիզմը** և **մահմեդականությունը**:

Տնտեսության մեջ տիրապետող էր գյուղատնտեսությունը: Երկրի տարբեր մասերի միջև, սակայն, թույլ էին տնտեսական կապերը: Կային մեծ թվով խոշոր քաղաքներ, հատկապես՝ ծովափերին. օրինակ՝ **Բոմբեյը**, **Մադրասը**, **Կալկաթան**: Գրանք արհեստի և առևտրի կենտրոններ էին: Հնդիկ արհեստավորների արտադրանքը մեծ հռչակ էր վայելում շատ երկրներում:

Նոր դարերի առաջին փուլում Հնդկաստանում դեռևս պահպանվեց ավանդական հասարակությունը: Այդ պատճառով նա բավականին հետ մնաց եվրոպական առաջատար երկրներից: Սակայն դեռ հին ժամանակներից եվրոպացիների մոտ ձևավորվել էր համոզմունք Հնդկաստանի հեքիաթային հարստությունների մասին: Պատահական չէ, որ աշխարհագրական հայտնագործությունների մեծ մասը կատարվեց այս երկիր տանող ճանապարհը որոնելիս:

Առաջինն այստեղ գաղութներ ստեղծեցին պորտուգալացիները՝ XV դարում, հետագայում նաև Հոլանդիան, Ֆրանսիան, Անգլիան, Գանիան: Գաղութացման գործըն-



Անգլիական
Արևելահնդկական
ընկերության գրասենյակը

թացն իրականացնում էին այդ երկրների կողմից Հնդկաստանում հիմնված առևտրական ընկերությունները: Գրանք կրում էին **Արևելահնդկական ընկերություն** անվանումը:

Եվրոպայի գաղութատեր երկրներից յուրաքանչյուրը պայքարում էր իր մասնաբաժինը մեծացնելու կամ Հնդկաստանին ամբողջովին տիրելու համար: Ի վերջո հաղթեց Մեծ Բրիտանիան: Հնդկաստանի նվաճումն իրականացրեց անգլիական **Արևելահնդկական ընկերությունը**: Այն հիմնադրվել էր **1600 թվականին** և ուներ սեփական բանակ ու նավատորմ: Անգլիացիները երկարատև պատերազմներ մղեցին տեղի պետությունների դեմ: Հրահրում էին երկպառակություններ, արհեստական սով: Միլիոնավոր հնդիկներ զոհվեցին գաղութացման շրջանում:

Հնդկաստանի նվաճման երկարատև գործընթացն իր ավարտին հասավ միայն XIX դարի կեսին: **1857 թ.** անգլիացիների դեմ հզոր ապստամբություն սկսվեց, որը Հնդկաստանում հայտնի է **Անկախության համար առաջին պատերազմ** անունով: Այն գլխավորում էր մողոլական վերջին կայսրը: Մեկ տարի անց ապստամբությունը ճնշվեց, Մեծ մողոլի հարստությունը դադարեց գոյություն ունենալուց: Արդյունքում ամբողջ Հնդկաստանը դարձավ բրիտանական գաղութ և դրվեց բրիտանական

Անգլիական Արևելահնդկական ընկերությունը ստեղծվել է 1600 թ.՝ արքայական հրովարտակով: Գործունեությունը կենտրոնացրել է Հնդկաստանի առափնյա շրջաններում՝ Բենգալ, Մադրաս, Կալկաթա, հետագայում՝ ողջ երկրում: Հաղթահարել է իր բոլոր մրցակիցների՝ ֆրանսիացի, հոլանդացի, հայ վաճառականների դիմադրությունը: Ընկերությունն ուներ իր բազմաբանակ վարչակազմը, զինված ուժերը և նավատորմը:

Հնդկաստանից արտահանում էր մետաքս, բամբակ, համեմունք, ոսկի, արծաթ, թանկարժեք քարեր: Ստանում էր առեղի շահույթներ: XVIII դ. կեսերից ընկերության դիրքերն ավելի ամրապնդվեցին: Այն փաստորեն վերածվել էր ինքնուրույն պետության: Գա էլ ստիպեց Անգլիայի կառավարությանը սահմանափակել նրա իրավունքները, սպա՝ լուծարել:

թագի անմիջական կառավարման ներքո: Իսկ Արևելահնդկական ընկերությունը, որը դարձել էր գրեթե ինքնուրույն պետություն, լուծարվեց: Հնդկաստանում հաստատվեց անգլիացիների **գաղութային վարչակազմ՝ գեներալ-նահանգապետի գլխավորությամբ**: Անգլիացիներն անխնա շահագործում էին երկրի հարստություններն ու տեղի ժողովուրդներին: Այս գաղութի նշանակությունն այնքան մեծ էր անգլիական կապիտալի և տերության համար, որ այն պատկերավոր անվանում էին **«բրիտանական թագի մարգարիտ»**:

Չսայած դաժան շահագործմանը՝ անգլիացիները Հնդկաստան ներմուծեցին արդյունաբերական հասարակության տարրեր: Լուսավորական գաղափարների ազդեցությամբ սկսեց ձևավորվել հնդիկ մտավորականությունը, որը հակված էր դեպի եվրոպական արժեքները: Այդ ամենն աստիճանաբար ճանապարհ հարթեց Հնդկաստանի արդիականացման համար:

Չինաստանի «բացվելը»

Նախորդ տարվա դասընթացից գիտեք, որ XVII դ. կեսերին Չինաստանի հյուսիս-արևելքում բնակվող մանջուրները, 1644 թ. գրավելով Պեկինը, ստեղծեցին Ցին կայսրությունը: Ամբողջ Չինաստանը հայտնվեց նրանց գերիշխանության ներքո: Ցին արքայատոհմը կառավարեց երկիրը մինչև XX դարի սկիզբը:

Նոր դարերում շարունակվեց Չինաստանի **ինքնամեկուսացումը արտաքին աշխարհից**, հատկապես եվրոպացիներից: Պետությունը խիստ վերահսկողություն էր սահմանել արտադրության և շուկայի նկատմամբ, սահմանափակել էր արտաքին առևտուրը: Նույնիսկ արգելված էր մեծ նավերի կառուցումը: Այս իրավիճակը մեծապես խանգարում էր երկրի տնտեսության զարգացմանը:

Չինաստանում պահպանվեցին հասարակական կյանքի կազմակերպման ավանդական ձևերը, մարդկանց կենցաղն ու հոգևոր կյանքը: Չինացիների զգալի մասը դավանում էր բուդդայականություն, մյուսները՝ իսլամ կամ դաոսականություն: Սակայն պաշտոնական գաղափարախոսությունը նախկինի պես մնում էր **կոնֆուցիականությունը**:



XVIII դարի չինական ապակե սրվակներ՝ պատկերազարդված ներսից



Չինաստանը
Նոր ժամանակներում

Եվրոպացիների գաղութային նկրտումներն ուղղվեցին նաև դեպի Չինաստան: Նրանք փորձում էին ստանալ ազատ առևտրի և ձեռներեցության իրավունք: Առաջինը չինական նավահանգիստներ մուտք գործեցին պորտուգալացիները: Նրանց հետևեցին ֆրանսիացիները և անգլիացիները:

Չինական կողմը անվստահությամբ էր վերաբերվում եվրոպացիներին: Աստիճանաբար կաթոլիկ միսիոներները վտարվեցին երկրից, փակվեցին քրիստոնեական եկեղեցիները: Իսկ XVIII դ. կեսին կայսերական հատուկ հրովարտակով բոլոր նավահանգիստները, բացի մեկից՝ **Գուանչժոու**, փակվեցին նրանց առջև: Չինաստանում քաջատեղյակ էին հարևան երկրներում եվրոպացիների վարած գաղութային քաղաքականությանը:

XVIII դ. վերջերին սկսեց աճել Ցին կայսրության առևտուրը արտաքին աշխարհի հետ: Չինական մետաքսը, ճենապակին, թեյը և այլ ապրանքներ մեծ պահանջարկ ունեին Եվրոպայում: Սակայն չինացիները եվրոպացիներից ոչ մի ապրանք չէին գնում:

Այդժամ անգլիացիները դիմեցին նախադեպը չունեցող քայլի. սկսեցին Հնդկաստանից մաքսանենգ ճանապարհով Չինաստան ներմուծել ափիոն: Դրա ներկրումը շարունակ աճում էր՝ հսկայական եկամուտներ ապահովելով անգլիացիներին: Ահռելի չափերի հասավ թմրամոլությունը, երկիրը կանգնեց աղետի առջև: Չինաստանն արգելեց թմրանյութի ներկրումը, որի պատճառով Մեծ Բրիտանիան պատերազմ սկսեց: **Ափիոնի առաջին պատերազմն ընթացավ 1839–1842 թթ.** և ավարտվեց անգլիացիների հաղթանակով: Կնքված **անխրավահավասար պայմանագրով** Չինաստանը բացեց հինգ նավահանգիստ, Մեծ Բրիտանիային զիջեց Հոնկոնգ կղզին և վճարեց մեծ ռազմատուգանք: Շուտով Չինաստանի հետ նման պայմանագրեր կնքեցին նաև Ռուսաստանն ու Ֆրանսիան:

Չինական մարտական առագաստանավերի ոչնչացումը Ափիոնի պատերազմի ժամանակ, 1841 թ.

Այսպես կատարվեց Չինաստանի «բացումը» արտաքին աշխարհի առջև: Սակայն, ի տարբերություն Հնդկաստանի, եվրոպացիներին չհաջողվեց նվաճել Չինաստանը: Երկիրը հնարավորություն ստացավ նախապատրաստվելու և որոշ ժամանակ անց իրականացնելու հասարակության արդիականացում:



Հարցեր և առաջադրանքներ

1. Ինչ կատաներ կային Հնդկաստանում հնուց ի վեր: Փորձե՛ք նկարագրել հնդկական հասարակությունը:
2. Ինչո՞ւ եվրոպացիների միջև դաժան մրցակցություն ծավալվեց Հնդկաստանը նվաճելու համար: Ո՞ր երկրները և ինչ ընկերություններ ստեղծեցին Հնդկաստանում: Ինչ դեր էին խաղում հայերը Հնդկաստանի կյանքում Նոր ժամանակների առաջին փուլում:
3. Ե՞րբ է տեղի ունեցել անկախության համար հնդիկների առաջին պատերազմը: Ինչո՞վ այն ավարտվեց:
4. Ձեր կարծիքով ինչո՞ւ անգլիացիներին հաջողվեց նվաճել Հնդկաստանը: Ինչ նշանակություն ուներ Հնդկաստանը Մեծ Բրիտանիայի համար:
5. Ներկայացրե՛ք Նոր դարերի սկզբի Չինաստանը: Ինչո՞ւ էր երկիրը փակվել եվրոպացիների առջև:
6. Ե՞րբ է տեղի ունեցել Ափիոնի առաջին պատերազմը, ո՞րն էր դրա գլխավոր պատճառը: Ինչ պայմանագիր կնքվեց պատերազմի ավարտին. ներկայացրե՛ք դրա հիմնական պայմանները:
7. Ո՞ր երկրները Չինաստանի հետ նման պայմանագրեր կնքեցին: Չինաստանի «բացվելը» ունեցավ դրական նշանակություն նրա համար:

Նոր հասկացություններ, արտահայտություններ, անուններ

Անգլիական Արևելահնդկական ընկերություն, Հնդկաստանի գաղութացում, անկախության համար հնդիկների առաջին պատերազմ, գաղութային վարչակազմ, «բրիտանական թագի մարգարիտ», Ափիոնի առաջին պատերազմ, անիրավահավասար պայմանագիր, Չինաստանի «բացում», Բոմբեյ, Մադրաս, Կալկաթա, Գուանչժոու, Հոնկոնգ:

Միջազգային հարաբերություններն ընդգրկում են պետությունների և ազգերի միջև կապերն ու առնչությունները: Դրանք կառուցվում են տվյալ դարաշրջանում գործող կամ հաստատված չափանիշների համաձայն: Ժամանակի ընթացքում միջազգային հարաբերությունները կարգավորող այդ չափանիշները փոփոխվում են:

Փոփոխություններ միջազգային հարաբերությունների կարգավորման գործում

Միջնադարյան Եվրոպայում միջազգային հարաբերությունները կարգավորվում էին առավելաբար աստվածաշնչյան պատվիրաններով: Այն պատերազմները, որոնք նպաստում էին պատվիրանների հաստատմանը, համարվում էին **արդարացի**, իսկ խոչընդոտողները՝ **անարդարացի**:

Արդյունաբերական հասարակության առաջին շրջափուլում աստվածընծա արքաներին (և արքայատներին) փոխարինելու եկան պետություններ, որոնք հանդես էին գալիս ողջ ազգի անունից: Ազգի հավաքական կամքը համարվում էր օրենքի և ինքնիշխանության աղբյուր: Այս առումով լավագույն օրինակը Նապոլեոնն էր՝ **«բոլոր ֆրանսիացիների կայսրը»**:

Յուրաքանչյուր **ազգային պետություն** ներկայացնում էր իր շահերը՝ տարածքային, քաղաքական և տնտեսական: Դրանք հաճախ բախվում էին՝ տեղի տալով պատերազմների: **Արդարացի պատերազմ** հասկացությունը իր կրոնական և բարոյական բովանդակությամբ դարձավ անցյալ: Այժմ պատերազմի արդյունքներին համապատասխան (հաղթանակ կամ պարտություն)՝ դրանք ընդունում էին նոր ձև ու բովանդակություն: Պարտվող կողմը վճարում էր ռազմատուգանք, զիջում տարածքներ, հրաժարվում տնտեսական շահավետ գործարքներից:



Իր երկարատև պատերազմների ընթացքում Նապոլեոնը հանդես էր գալիս հեղափոխության, առաջադիմության, ազգերի ինքնորոշման կարգախոսներով: Իհարկե, դրանք նպաստում էին ֆրանսիական ազդեցության և տիրապետության տարածմանը, սակայն անժխտելի էր նաև առաջընթացը:

Գրան հակառակ՝ Եվրոպական միապետները հանդես էին գալիս «հին աստվածընծա կարգերի» և սահմանների պաշտպանությամբ: Երկու հակամետ մոտեցումները բխվեցին Վիեննայի 1814–1815 թթ. վեհաժողովում: Հաղթեց հետադիմությունը, և ազգերի ինքնորոշման իրավունքը գոհաբերվեց մեծ տերությունների շահերին: Անտեսվեց իտալացիների, գերմանացիների, բելգիացիների, նորվեգացիների, լեհերի ինքնուրույն պետություն ունենալու իրավունքը:

Սակայն հետադիմությունը ժամանակավոր էր: Ուժերի հավասարակշռությունն արագ փոխվում էր: Հետագա տասնամյակների ընթացքում վերը նշված ազգերը հասան իրենց նպատակին: Այսինքն՝ Եվրոպայում հիմնականում հաղթանակեց **ազգերի ինքնորոշման իրավունքը:**

Գրվագ Շիպկայի լեռանցքի (Բուլղարիա) ճակատամարտից՝ 1877–1878 թթ. ռուս–թուրքական պատերազմի ժամանակ

Շիպկայի ճակատամարտում զոհված ռուս հերոսների հիշատակին նվիրված հուշակոթող





ՍԻՄՈՆ ԲՈՒԼԻՎԱՐ
(1783–1830)

Լատինական Ամերիկայի ազատագրական պայքարի առաջնորդ: Ականավոր ռազմական և պետական գործիչ: Լուսավորական գաղափարների ազդեցության տակ էր: Համոզված էր, որ գաղութաբնակներն ունեն բնական իրավունքներ՝ ապրելու ազատ, ինքնիշխան կյանքով: Հանրապետական էր, բայց կարծում էր, որ նախագահը պետք է ունենա մեծ լիազորություններ: 1810–1820-ական թթ. ղեկավարեց գաղութների ազատագրական պայքարը: Երազում էր միավորել ազատագրված երկրները և ստեղծել Լատինական Ամերիկայի միացյալ նահանգներ: Սակայն ծրագիրը չիրագործվեց, մեծ էին հակասությունները նորանկախ պետությունների միջև:

Տնտեսական հարաբերությունների զարգացմանը զուգընթաց անհրաժեշտություն առաջացավ կարգավորելու նաև երկրների միջև առևտրական հարաբերությունները: Կնքվեցին **ձեռնարկատիրության** և **ծովագնացության** վերաբերյալ պայմանագրեր: XIX դ. 40–ական թթ. նախ Անգլիայի և Ֆրանսիայի, իսկ ապա նաև այլ պետությունների միջև հաստատվեցին հստակ կարգավորված ազատ առևտրի հարաբերություններ: Գա մեծապես նպաստեց Եվրոպայի տնտեսական միավորմանը:

Գաղութային համակարգի ձևավորման սկիզբը

Նոր տարածքների նվաճումը դարձավ զարգացած երկրների արտաքին քաղաքականության անբաժանելի կողմը: Նրանք սկսեցին հաստատվել Ամերիկայում, Ասիայում, Աֆրիկայում՝ ստեղծելով **գաղութներ**՝ նահանգապետներով, վարչակազմով, ոստիկանությամբ, դատարաններով, զորքով: Շահագործվում էին գաղութների բնական պաշարները և տեղի ժողովուրդները:

Բնակչության կազմով և կարգավիճակով գաղութները նույնական չէին: Այսպես՝ Հյուսիսային Ամերիկայում XVII դ. սկզբից հաստատվել էին եվրոպացիների հոծ խմբեր՝ անգլիացիներ, ֆրանսիացիներ, հոլանդացիներ, գերմանացիներ: Դրանք ունեին ներքին ինքնավարություն՝ նահանգապետ, տեղական օրենսդրական մարմին, ոստիկանություն, դատարաններ: Սակայն տեղացիներն այլևս չէին ցանկանում մնալ Անգլիայի տիրապետության ներքո: Արդեն ասվել է՝ սկսվեց ազգային հեղափոխություն, և կազմավորվեց ԱՄՆ-ը:

Ինչ վերաբերում է Կենտրոնական և Հարավային (Լատինական) Ամերիկային, ապա այստեղ տիրապետում էին իսպանացիներն ու պորտուգալացիները: Ժամանակի ընթացքում նրանցից շատերը ձուլվեցին տեղաբնիկների հետ: Ձևավորվեց ուրույն ազգային ինքնագիտակցություն, որն էլ 1810–1820 թթ. հանգեցրեց ազգային հեղափոխությունների: Դրանց հետևանքով քարտեզի վրա հայտնվեցին այսօրվա **Վենեսուելան, Կոլումբիան, Բոլիվիան, Արգենտինան, Բրազիլիան, Մեքսիկան** և այլն:

Կային երկրներ, որտեղ թեպետ գերակշռում էին եվրոպական վերարձակները, բայց ազգային ինքնագիտակցությունը թույլ էր: Օրինակ՝ **Կանադայում** և **Ավստրալիայում** հաստատվածներից շատերն իրենց շարունակում էին համարել անգլիացի՝ ապրելով անգլիական կառավարման ներքո:

Միանգամայն այլ էր պատկերը **Աֆրիկայում**: Հիմնված գաղութներում եվրոպացիները երբեք մեծամասնություն չեն կազմել: Ավելին՝ մինչև XIX դ. կեսերը նրանք դեռ չէին թափանցել նայրցամաքի խորքերը: Ինչ վերաբերում է բազմազգ աֆրիկացիներին, ապա նրանք դեռևս ապրում էին տոհմացեղային կամ ավատատիրական հասարակությունների պայմաններում:

Նայրցամաքի առափնյա շրջաններում ստեղծելով **ռազմական և առևտրական հենակետեր**՝ եվրոպացիներն արտահանում էին ոսկի, արծաթ, ադամանդ, փայտանյութ, ստրուկներ: Այլ էր իրավիճակը հյուսիսում (Եգիպտոս, Ալժիր, Թունիս և այլն), որտեղի արաբ բնակչությունը դիմադրում էր եվրոպացիների ներթափանցմանը:

Իսկ **Ասիայում** եվրոպական պետությունները (Անգլիա, Ֆրանսիա, Պորտուգալիա, Հոլանդիա) տեղի երկրներին ստիպում էին կնքել ստորացուցիչ պայմանագրեր, զիջել տարածքներ, խառնվում էին նրանց ներքին գործերին և թելադրում իրենց կամքը: Անվանապես անկախ այս պետությունները վերածվում էին կիսագաղութի: XIX դ. առաջին կեսին նման իրավիճակում էին հայտնվել Օսմանյան կայսրությունը, Իրանը, Չինաստանը: Ինչ վերաբերում է Հնդկաստանին և հարակից երկրներին, ապա դրանք վերածվեցին գաղութի:

Արևելքի գաղութացմանը շուտով սկսեց մասնակցել նաև **Ռուսաստանը**: 1826–1828 թթ. պատերազմում հաղթանակ տանելով Իրանի նկատմամբ՝ նա ավարտեց Այսրկովկասի գրավումը: Երկրամասը (դրա կազմում և Արևելյան Հայաստանը) միացվեց կայսրությանը և վերածվեց գաղութի: Դրանից հետո Ռուսաստանն իր ուշադրությունը սևեռեց դեպի Միջին Ասիա:

Այս ամենով հանդերձ գաղութացման գործընթացն ուներ նաև դրական հետևանքներ: Եվրոպացիները հեռավոր երկրներ էին բերում արդյունաբերական հասա-



Գաղութացման շրջանի Աֆրիկայի բնակիչներ

րակության նվաճումները. կառուցում էին նավահան-
գիստներ, ճանապարհներ, հանքահորեր, ձեռնարկու-
թյուններ: Տարածում էին եվրոպական գիտությունն ու
մշակույթը: Մյուս կողմից՝ տեղական մշակութային ար-
ժեքները ներմուծվում էին Եվրոպա:

Այսպես՝ դարերով մինյանցից տարանջատված ժողո-
վուրդները ստնում էին բազմապիսի կապերի մեջ:

Հարցեր և առաջադրանքներ

1. Միջազգային հարաբերությունները ինչի՞ հիման վրա էին կարգավորվում միջ-
նադարյան Եվրոպայում:
2. Եվրոպական ազգային պետությունների միջև հարաբերությունների կարգա-
վորման ինչ սկզբունքներ էին գործում արդյունաբերական հասարակության
առաջին շրջափուլում:
3. Փաստերով հիմնավորե՛ք, որ Եվրոպայում գործնականում հաստատվեց ազ-
գերի ինքնորոշման իրավունքը:
4. Եվրոպայում ինչո՞ւ անհրաժեշտություն առաջացավ տնտեսական հարաբերու-
թյունները կարգավորելու առանձին պայմանագրերով: Ինչն էր նպաստում
Եվրոպայի տնտեսական միավորման գործին:
5. Որո՞նք էին գլխավոր գաղութատեր երկրները:
6. Ինչպիսի՞ անկախ պետություններ ձևավորվեցին Լատինական Ամերիկայում:

Քննարկման հարց

Գաղութացման գործընթացն ուներ բացասական և դրական կողմեր: Ձեր կարծի-
քով ո՞րն էր գերակշռում:

Նոր հասկացություններ, անուններ

Արդարացի և անարդարացի պատերազմներ, ազգերի ինքնորոշման իրավունք,
ձեռնարկատիրության և ծովագնացության պայմանագրեր, գաղութացման գոր-
ծընթաց, Ս. Բոլիվար, Լատինական Ամերիկա, Կոլումբիա, Վենեսուելա, Բոլի-
վիա, Արգենտինա, Մեքսիկա, Բրազիլիա, Կանադա, Ավստրալիա:

12

ԿՐԹՈՒԹՅՈՒՆԸ ԵՎ ՀԻՄՆԱՐԱՐ ԳԻՏՈՒԹՅՈՒՆՆԵՐԸ (XVII ԴԱՐ – XIX ԴԱՐԻ ԱՌԱՋԻՆ ԿԵՍ)

Կրթական համակարգը

Եվրոպայում արդյունաբերական հասարակության կայացմանը համընթաց կրթության և գիտության ոլորտներում արձանագրվեցին մեծ տեղաշարժեր: Էսպես փոխվեց մարդկանց վերաբերմունքը գիտելիքի նկատմամբ: Միջնադարում գիտելիքը առավելապես տեսական էր, կյանքից կտրված, գործնական նպատակներից հեռու: Աստիճանաբար այդ մոտեցումը փոխվեց: XVII–XVIII դդ. գիտության նվաճումները սկսեցին ավելի ու ավելի ներդրվել առօրյա կյանքում:

Նոր գիտելիքների արմատավորման համար մեծ կարևորություն ուներ նոր դպրոցների և բարձրագույն ուսումնական հաստատությունների գործունեությունը: **Պարտադիր տարրական կրթություն** ներդրվեց Պրուսիայում, ապա՝ Ավստրիայում, Շվեդիայում և այլուր: Բացվեցին նաև միջնակարգ ուսումնարաններ՝ **գիմնազիաներ, լիցեյներ, քոլեջներ**: Ուսուցանում էին լեզուներ, մաթեմատիկա, բնագիտություն, պատմություն և այլն:



Օքսֆորդի համալսարանը



ՌԸՆԵ ԳԵԿԱՐՏ
(1596-1650)

Ֆրանսիացի նշանավոր մաթեմատիկոս, ֆիզիկոս և իմաստասեր, որի հայացքներն ընկած են արդի հիմնարար գիտությունների հիմքում: Տիեզերքը դիտարկում էր իբրև ներդաշնակ ամբողջություն, որը կարելի է ուսումնասիրել տրամաբանության ճշգրիտ օրենքներով: «Ես ստածում եմ, հետևաբար գոյություն ունեն»․ ասա նրա գիտական հավատամքը:

Նոր պայմաններին համապատասխան՝ իրենց գործունեությունը վերակառուցեցին միջնադարյան համալսարանները՝ **Քեմբրիջը**, **Օքսֆորդը** (Անգլիա), **Սորբոնը** (Ֆրանսիա), **Վիեննայի** համալսարանը: Նոր դարերի առաջին փուլում հիմնվեցին **Հարվարդի** (ԱՄՆ), **Բեռլինի**, **Մոսկվայի** և **Մանկտ Գետերբուրգի** (Ռուսաստան) համալսարանները:

Այդ ամենի հետևանքով կրթությունը սկսեց մեծ տարածում գտնել: Եվրոպայում ձևավորվեց մտավորականության մի ստվար խավ, որի գործունեությունը ուղղված էր մտավոր արժեքների ստեղծմանը:

Հիմնարար գիտությունները

Հիմնարար գիտություններն են մաթեմատիկան, ֆիզիկան, քիմիան, կենսաբանությունը, աշխարհագրությունը և այլն, որոնք ուսումնասիրում են բնության կարևորագույն օրինաչափությունները: Նոր դարաշրջանում դրանք բուռն զարգացում ապրեցին: Այդ գործում, բացի համալսարաններից, մեծ դեր ունեին նաև ակադեմիաները և գիտական ընկերակցությունները՝ Արքայական գիտական ընկերությունը (Անգլիա), գիտությունների ակադեմիաները Ֆրանսիայում, Պրուսիայում, Ռուսաստանում, Շվեդիայում և այլուր:

XVII դ. հաճախ անվանում են մաթեմատիկայի դար: Ֆրանսիացի մաթեմատիկոս և իմաստասեր **Ռ. Դեկարտն** ասում էր, որ նյութական աշխարհի բոլոր երևույթները հնարավոր է բացատրել մաթեմատիկայի և մեխանիկայի օրենքներով: Նման մոտեցմամբ աշխարհը ներկայանում է իբրև կարգաբերված մի միջավայր, որը կարելի է հասկանալ և բացատրել «առանց Աստծու միջնորդության»: Դեկարտյան տեսությունը բացառիկ ազդեցություն է ունեցել մաթեմատիկայի և բնագիտության զարգացման վրա:

Ասվածը հաստատում է անգլիացի մեծ հետազոտող **Ի. Նյուտոնի** գործունեությունը: Նա առաջինն էր, ով տիեզերական ձգողության, երկնային և երկրային մարմինների շարժման հիմնարար օրենքները ձևակերպեց ճշգրիտ մաթեմատիկական բանաձևերով:

XVIII դ. վերջից ստեղծվեցին առաջին **գիտական աշխատանոցները (լաբորատորիա)**: Նշանակալի արդյունքներ գրանցվեցին հատկապես քիմիայի և ֆիզիկայի բնագավառներում:

Գիտափորձերի միջոցով հնարավոր դարձավ նյութի մինչ այդ անհայտ հատկանիշների ուսումնասիրությունը: Այդ առումով մեծ են ֆրանսիացի հետազոտող **Ա. Լավուազիեի** ծառայությունները:

Տպավորիչ էին **էլեկտրականության** բնագավառի նվաճումները: Այդ ասպարեզում բացառիկ է անգլիացի ֆիզիկոս **Մ. Ֆարադեյի** ներդրումը: Նա հայտնաբերել է էլեկտրամագնիսական մակաձման (ինդուկցիա), էլեկտրատարրալուծման (էլեկտրոլիզ) երևույթները: Դրա շնորհիվ մարդկությունը ստացավ էներգիայի նոր աղբյուր, որին մեծ ապագա էր սպասվում:

Գիտական նվաճումների օգտագործմամբ ստեղծվեցին կենցաղային կարիքների բավարարման նյութեր, գործիքներ, սարքեր, փոխադրամիջոցներ և այլն: Նախորդ դասերից գիտեք շոգեշարժիչի, շոգեքարշի, շոգենավի գյուտերի մասին:

Ճարտարագետները նախագծեցին և կառուցեցին **օդապարհիկը՝** առաջին քայլն անելով **օդագնացության** ասպարեզում: 1839 թ. ստեղծվեց **առաջին լուսանկարչական սարքը**: Քիմիական համադրմամբ ստացան **ռետին** և **անջրանցիկ գործվածք**, որոնք սկսեցին օգտագործվել տնտեսության ամենատարբեր ճյուղերում: Ստեղծվեց նաև **Մորզեի սարքը**, որը հատուկ մշակված ծածկագիր-այբուբենի օգտագործմամբ մեծ հեռավորությունների վրա տեղեկություններ էր հաղորդում էլեկտրական ազդանշանների միջոցով: Դրանով սկիզբ դրվեց հեռահաղորդակցությանը:

Մարդկանց ապրելակերպը

Գիտության մեծ թռիչքը և հատկապես կիրառական նվաճումները հսկայական փոփոխություններ առաջացրին մարդկանց կյանքում և կենցաղում: Միջնադարից մարդկությունը ստացել էր բավականին ծանր ժառանգություն: Նրան հետապնդում էին պարբերաբար



ԲՄԱՀԱԿ ՆՅՈՒՏՈՆ
(1642–1727)

Անգլիացի խոշորագույն գիտնական: Արդի հիմնարար գիտությունների հիմնադիրներից մեկը: Հայտնաբերել և բանաձևել է մեխանիկայի, տիեզերագիտության, օպտիկայի, բարձրագույն մաթեմատիկայի կարևորագույն օրենքներ: Նրա շնորհիվ աշխարհում շատ բան հասկանալի դարձավ: Սակայն բնությունն անսպաս է: Ասում են՝ մահից առաջ մեծ գիտնականը բացականցել է. «Իմ դիմաց ծփում է ճշմարտության ճիտագոտված օվկիանոսը»:



1839 թ. ֆրանսիացի նկարիչ և ֆիզիկոս Լ. Դագերը ստեղծեց առաջին լուսանկարչական սարքը:



ԱՆՏՈՒԱՆ ԼԱՎՈՒԱԶԻԵ
(1743-1794)

Գասական քիմիայի հիմնադիրներից: Բացահայտել է օքսիդացման և այրման գործընթացների շատ օրինաչափություններ: Շարունակելով ռուս գիտնական Մ. Լոմոնոսովի միտքը՝ ձևակերպել է կյոլթի զանգվածի պահպանման օրենքը: Ստեղծել է քիմիայի առաջին դասագիրքը: Մեծ հեղափոխության ժամանակ եղել է սահմանադրական միապետության կողմնակից: Յակոբինների դատարանը նրան դատապարտել է մահապատժի: Նրան ազատելու խնդրանքին իշխանությունները պատասխանել են. «Հանրապետությունը քիմիկոսների կարիք չունի»:



կրկնվող սովն ու համաճարակները: Կյանքի միջին տևողությունը 50-55 տարի էր:

Արդյունաբերական հասարակությունն աստիճանաբար փոխեց իրադրությունը: Նրան անհրաժեշտ էր մեծ աշխատուժ՝ օրավուր բացվող հանքահորերի, գործարանների պահանջարկը բավարարելու համար: Ժամանակի ընթացքում դա առաջ բերեց ծնելիության աննախադեպ աճ: Օրինակ՝ Անգլիայում XVII-XVIII դդ. ազգաբնակչությունը եռապատկվեց, իսկ Ֆրանսիայում կրկնապատկվեց: Հետագայում այդ գործընթացը ծավալվեց նաև Պրուսիայում, Ավստրիայում, Ռուսաստանում:

Ցանքատարածությունների և արոտավայրերի ընդարձակումը, նոր մշակաբույսերի և գյուղմեքենաների ներդրումը հարստացրին բնակչության կերակրացանկը: Այն դարձավ ավելի բազմազան: Բացվեցին հասարակական սննդի բազմաթիվ կետեր՝ ճաշարաններ, թեյարաններ, պանդոկներ: Փոխվեց նաև մարդկանց հագուստը: Այն դարձավ ավելի հարմար՝ տաբատ, բաճկոն, գլխարկ, կոշիկներ: Օճառի տարածումն էականորեն բարելավեց մարդկանց անձնական հիգիենան:

Բարելավվեց նաև առողջապահությունը: Հայտնաբերվեցին բազմապիսի դեղամիջոցներ, և շատ անբուժելի հիվանդություններ սկսեցին բուժվել: XIX դ. առաջին կեսին զարգացած երկրներում ստեղծվեցին հանրային առողջապահության համակարգեր: Եթե նախկինում գործում էին անհատ բժիշկներ, որոնք բուժում էին առանձին հիվանդների, ապա այժմ բացվում էին

Օդազնացության սկզբնավորումը

1783 թ. Մոնգոլֆիե եղբայրները պատրաստեցին օդապարիկ՝ լցված ծղոտի և բրդի այրումից առաջացած ծխով: Այդ օդապարիկով նրանք կարողացան օդ բարձրանալ: Եղբայրներից մեկը նաև ստեղծեց անկարգելը (պարաշյուտ)՝ օդապարիկից վայրէջք կատարելու համար:

Փարիզի գիտությունների ակադեմիայում պատրաստեցին ամուր թաղանթ ունեցող օդապարիկներ՝ լցված ջրածնով: Փարիզի մոտ կար օդազնացության դպրոց, որտեղ պատրաստված օդապարիկներով Մեծ հեղափոխության տարիներին կատարում էին մարտական թռիչքներ: Դրանք մեծ տարածում ստացան XIX դարում:

հիվանդանոցներ, որոնց աշխատանքը վերահսկվում էր պետության կողմից:

Հարստացավ բնակավայրերի ճարտարապետական պատկերը՝ սալապատված փողոցներ, ջրմուղ, կոյուղի, զբոսայգիներ, հրապարակներ, հասարակական շենքեր և այլն: Գործարկվեցին հասարակական փոխադրամիջոցներ: Բնակավայրերը միմյանց կապվեցին երկաթուղային ցանցով:


Հարցեր և ստուգադրանքներ

1. Նոր ժամանակներում ինչո՞ւ անեց գիտության և կրթության դերը հասարակության կյանքում:
2. Կրթության համակարգում ի՞նչ փոփոխություններ տեղի ունեցան: Թվարկե՛ք նոր շրջանի հայտնի համալսարանները:
3. Որո՞նք են հիմնարար գիտությունները: Նշե՛ք գիտական գլխավոր նվաճումները:
4. Դասանյութում նշված գիտնականներից ովքե՞ր են ձեզ ծանոթ և ո՞ր առարկաներից:
5. Ինչո՞ւ ենք ասում, որ գիտությունն ազգային սահմաններ չի ճանաչում:
6. Որո՞նք են մարդու առօրյա կյանքում կատարված փոփոխությունների պատճառները:
7. Փորձե՛ք ներկայացնել Նոր դարերի մարդկանց՝ աշխատանքը, հագուստը, անունը, բնակարանը, առօրյա հոգսերը:

Նոր հասկացություններ, անուններ

Պարտադիր տարրական կրթություն, գիմնազիա, քոլեջ, լիցեյ, հիմնարար գիտություն, գիտական աշխատանոց (լաբորատորիա), Ի. Նյուտոն, Ա. Լավուազիե, Մ. Ֆարադեյ, օդապարիկ, լուսանկարչական սարք, ռետին, անջրանցիկ գործվածք, Մորզեի սարք:

ՀՈՒՄԱՆԻՏԱՐ ԳԻՏՈՒԹՅՈՒՆՆԵՐԸ, ԳՐԱԿԱՆՈՒԹՅՈՒՆԸ ԵՎ ԱՐՎԵՍՏԸ (XVII ԴԱՐ – XIX ԴԱՐԻ ԱՌԱՋԻՆ ԿԵՍ)



ԱԳԱՄ ՍՄԻԹ
(1723–1790)

Տնտեսագիտության հիմնադիրներից է: Ստացել է հիմնավոր իմաստասիրական կրթություն: Ի վի բերելով լուսավորականների գաղափարները՝ ստեղծել է իր հիմնարար աշխատությունը՝ «Ուսումնասիրությունն ազգերի հարստության բնույթի և պատճառների մասին»: Դրանում համակողմանի վերլուծել է արդյունաբերական հասարակության տնտեսական կյանքը՝ արտադրություն, կապիտալ, առևտուր, ազգային շուկա, գնագոյացում և այլն: Միրում էր կրկնել «Բարեկեցության հասնելու համար պետությունը պետք է ապահովի խաղաղություն, թեթև հարկեր և նպատակասլաց զարգացում»:

Ի տարբերություն հիմնարար գիտությունների, որոնք հետազոտում են բնությունը, հումանիտար գիտությունների և գեղարվեստական մշակույթի խնդիրը մարդն է և նրա հասարակական միջավայրը: Դա է վկայում նաև նրա անվանումը. լատիներեն նշանակում է մարդուն վերաբերող, մարդկային: Հումանիտար գիտությունները սկզբնավորվել են ուշ միջնադարում, սակայն նոր դարաշրջանում ստացան նոր բովանդակություն և արժեք:

Հումանիտար գիտությունները

XVII դ. մինչև XIX դ. առաջին կեսը նշանակալի հաջողություններ արձանագրվեցին իմաստասիրության (փիլիսոփայություն), տնտեսագիտության և պատմագիտության բնագավառներում:

Նոր դարերի իմաստասիրության հիմնական խնդիրը մարդու ներաշխարհի և հասարակական կյանքի իրողությունների բացահայտումն էր: Այդ առումով ակնառու էին լուսավորականների ձեռքբերումները:

Արդյունաբերական հասարակության պահանջներին համապատասխան՝ ձևավորվեց **տնտեսագիտությունը**: Դրա խոշոր ներկայացուցիչներն էին անգլիացի **Ա. Սմիթը** և **Գ. Ռիկարդոն**: Նրանք մշակեցին արդյունաբերական արտադրության, կապիտալի, շուկայական հարաբերությունների տեսությունները, որոնք դարձան տնտեսության կառավարման հիմքը:

Բարձր մակարդակի հասավ նաև **պատմագիտությունը**: Անհատի, ժողովրդի, պետության, կրոնի, մշակույթի դերը ինչպես անցյալում, այնպես էլ ներկայում դարձավ պատմագիտական ուսումնասիրությունների հիմնախնդիրը: Ազգերը սկսեցին նորովի գնահատել սեփական և այլոց նվաճումները, որը դարձավ նրանց ինքնաճանաչման կարևոր խթանը:

Գրականությունը և թատրոնը

Արդյունաբերական դարաշրջանի լուսավորյալ գաղափարներն իրենց արտահայտությունը ստացան նաև գրականության տարբեր ժանրերում: Դրանց հերոսը նոր ժամանակի մարդն էր՝ իր մտքերով ու հույզերով, ստեղծագործական ծրագրերով ու գործողություններով: Նա ձգտում էր տնօրինելու անձնական ճակատագիրը՝ այն ծառայեցնելով ազգի, հայրենիքի և մարդկության շահերին:

XVIII դ. և XIX դ. առաջին կեսին ի հայտ եկան մեծ բանաստեղծներ գերմանացի **Յ. Վ. Գյոթեն**, անգլիացի **Ջ. Բայրոնը**, ռուս **Ա. Պուշկինը** և այլք: Նրանք ստեղծեցին համաշխարհային գրականության գլուխգործոցներ:

Մեծ նվաճումներ ունեցավ արձակը: Այստեղ նույնպես նկատելի էր տարբեր ազգությունների գրողների «համատեղ գործը»: Նրանցից խոշորագույններն էին անգլիացի **Չ. Գիքենսը**՝ քաղաքի հետնախորշերում ապրող, բայց հոգու մաքրությունը պահպանած «փոքր մարդկանցով», ֆրանսիացի **Վ. Հյուգոն**՝ ազատատենչ և աննկուն ճակատագրերի նկարագրությամբ, **Օ. Բալզակը**՝ բուրժուական բարոյականության (կեղծիք, ստորություն, ընչաքաղցություն) քննադատությամբ:

Թատրոնը դարձավ նոր հասարակության հոգևոր կենտրոններից մեկը: Նրա զարգացման ելակետը անգլիացի մեծ թատերագիր **Վ. Շեքսպիրի** ստեղծագործությունն էր: Դրանում տարբեր հոգեբանության ու հասարակական դիրքի մարդիկ (արքաներ, ազնվականներ, ծառաներ) կերպավորված են սահմանային վիճակներում՝ սիրուց, հավատարմությունից ու արդարությունից մինչև ատելություն, խարդավանք և ստորություն: Շեքսպիրը մարդ էակի «ճշմարիտ հետազոտողն էր»: Նույնը կարելի է ասել նաև XVII դ. ֆրանսիացի թատերագիր **Ճ. Մոլիերի** մասին:



ՕՆՈՐԵ ԳԸ ԲԱԼԶԱԿ
(1799-1850)

Ֆրանսիական ռեալիզմի հիմնադիրը: Վ. Հյուգոն նրա մասին ասել է. «Բալզակը առաջիններից մեկն էր մեծագույնների մեջ, լավագույններից մեկը՝ ընտրյալների մեջ»:



ՃԱԿ ԼՈՒԻՒ ԳԱՎԻԳ
(1748-1825)

Ֆրանսիացի հայտնի գեղանկարիչը Մեծ հեղափոխության մասնակից էր: Նշանավոր գործերից են «Հորացիոսների երդումը», «Մարատի մահը», «Թագադրում»:



ՎՈՒՏԳԱՏԳ ԱՄԳԵՆՈՒՄ
ՄՈՑԱՐՏ
(1756–1791)

Ապրել է Վիեննայում: Սկսել է ստեղծագործել հինգ տարեկանից: Առ այսօր աշխարհի բեմերից չեն իջնում նրա «Ֆիգարոյի ամուսնությունը», «Դոն Ժուան», «Կախարդական սրինգ» օպերաները: Նրա վերջին ստեղծագործությունը «Ռեքվիեմն» է:



ՋՈՒԿԻՆՈ ՌՈՍԻՆԻ
(1792–1868)

Իտալացի երգահան, օպերային արվեստի մեծագույն վարպետ: Գրել է նաև քաղնաթիվ երգեր, երաժշտական պատկերներ, հոգևոր խմբերգեր: Առավել հայտնի է «Սևիլյան սափրիչը» երգիծական օպերայով:

Գեղանկարչությունը և ճարտարապետությունը

Նոր դարաշրջանի գեղանկարչությունը նույնպես զգայուն էր հասարակության մեջ ընթացող տեղաշարժերի նկատմամբ: XVII–XVIII դդ. այն սևեռված էր առավելաբար մարդկանց առօրյա կյանքին՝ աշխատանք, ընտանեկան միջավայր, հագուստ, ճաշկերույթներ, զբոսանքներ և այլն: Այդ ամենը ճիշտ արտահայտելու համար արվեստագետից պահանջվում էր նուրբ ճաշակ և հոգեբանություն: Այդպիսիք էին իսպանացի **Գ. Վելասկեսը**, ֆրանսիացի **Ա. Վատտոն** և այլք:

Հեղափոխությունների դարաշրջանը տեղիք տվեց մարդկային խոր և հակասական ապրումների՝ տառապանքից, զրկանքից ու թշվառությունից մինչև հերոսացում ու վեհացում: Դրանք մեծ արվեստով արտացոլել է գեղանկարիչների մի ամբողջ աստղաբույլ՝ իսպանացի **Ֆ. Գոյան**, անգլիացի **Ու. Քլըքսոնը**, ֆրանսիացիներ **Ժ. Դավիդը**, **Է. Գելակրուան** և այլք:

Նոր դարաշրջանում երևացին խոշոր ճարտարապետներ, որոնք նախագծում ու կառուցում էին ոչ միայն առանձին շինություններ, այլև ճարտարապետական համալիրներ: Այլ խոսքով՝ նրանք զբաղված էին քաղաքաշինությամբ: Նրանց մտահղացմամբ է, որ գոյություն ունեն Փարիզի, Լոնդոնի, Բեռլինի, Սանկտ Պետերբուրգի արդի ճարտարապետական համալիրները:

Երաժշտությունը և օպերային արվեստը

Աննախադեպ էր նաև երաժշտական արվեստի զարգացումը: Տարբեր ուղղությունների ու դպրոցների ներկայացուցիչներ մշակեցին արդի երաժշտական գրեթե բոլոր ժանրերը՝ երգ, գործիքային երաժշտություն, սիմֆոնիա, օպերա և այլն: Այդ գործում հատկապես մեծ էր գերմանացի երգահանների ներդրումը՝ **Յ. Բախ**, **Լ. Բեթհովեն**: Իրենց մեղեդայնությամբ և խոր ապրումներով առանձնանում են ավստրիացի երգահան **Վ. Մոցարտի** ստեղծագործությունները:

Օպերան համադրական արվեստ է: Դրանում միավորված են թատրոնը, պարը և երաժշտությունը՝ կենսա-

կան տարբեր իրադրություններ, գործողություններ, զգացմունքներ, մտքեր: Այն ձևավորվել է Իտալիայում XVI դ. վերջին և XVII դ. սկզբին: Նրա խոշորագույն ներկայացուցիչներն են **Ջ. Ռոսինին, Ջ. Վերդին** և այլք: Օպերային արվեստը զարգացավ նաև այլ երկրներում՝ Ֆրանսիա, Գերմանիա, Ավստրիա:

Հարցեր և առաջադրանքներ

1. Ո՞րն է հումանիստար գիտությունների հետազոտության առարկան:
2. Ի՞նչ հարցերի ուսումնասիրությամբ էին զբաղվում՝ ա) իմաստասերները, բ) տնտեսագետները, գ) պատմաբանները:
3. Թվարկե՛ք XVII դարից մինչև XIX դարի առաջին կեսն ընկած ժամանակաշրջանի հայտնի գրողների անուններ. նրանց ո՞ր ստեղծագործություններին եք ծանոթ:
4. Որո՞նք են գեղանկարչության և ճարտարապետության մեջ տեղ գտած բովանդակային հիմնական նորոյթները: Թվարկե՛ք հայտնի գեղանկարիչների:
5. Ինչո՞վ է նշանավորվել նոր ժամանակների երաժշտական արվեստը:

Գործնական աշխատանք

Տեսրոմ լրացրե՛ք գրականության և արվեստի հիմնական նվաճումներին վերաբերող աղյուսակը՝ օգտվելով նաև լրացուցիչ նյութերից:

Ուղղությունը	Նշանավոր հեղինակները	Ստեղծագործությունները
Գրականություն		
Թատրոն		
Գեղանկարչություն		
Երաժշտություն		

Նոր հասկացություններ, անուններ

Հումանիստար գիտություններ, Ա. Սմիթ, Դ. Ռիկարդո, Յ. Վ. Գյոթե, Չ. Դիքենս, Օ. Բալզակ, Դ. Վելասկես, Ա. Վատտո, Ֆ. Գոյա, Ու. Թրրներ, Ժ. Դավիդ, Է. Դելակրուա, Վ. Շեքսպիր, Ջ. Բայրոն, Ա. Պուշկին, Վ. Հյուգո, Լ. Բեթհովեն, Վ. Մոցարտ, Յ. Բախ, Ջ. Վերդի, Ջ. Ռոսինին:

ԱՌԱՋԻՆ ԲԱԺՆԻ ԱՄՓՈՓՈՒՄ

1. XVII դարից մինչև XIX դարի կեսերը արդյունաբերական հասարակության պատմության առաջին շրջափուլն է: Արևմտյան Եվրոպայի երկրներում աստիճանաբար ձևավորվեց նոր հասարակությունը, արմատական փոփոխությունների ենթարկվեց մարդկանց հասարակական և անձնական կյանքը:
 - *Ինչ է արդյունաբերական հեղաշրջումը: Որո՞նք էին դրա նախադրյալները: Տնտեսական և սոցիալական ինչ հետևանքներ ունեցավ այն: Առաջին շրջափուլում ո՞ր երկիրն էր ամենազարգացածը աշխարհում:*
2. XVII–XVIII դարերում Եվրոպայում և Ամերիկայում ծավալվեց մի հուժկու գաղափարական շարժում, որը պատմության մեջ հայտնի է «լուսավորություն» անունով:
 - *Ինչո՞ւ է շարժումն այդպես կոչվել: Թվարկե՞ք նշանավոր լուսավորական գործիչների: Որո՞նք են լուսավորականների հիմնական գաղափարները: Ինչ հայ լուսավորականների գիրքեր: Ներկայացրե՞ք շարժման նշանակությունը:*
3. Լուսավորության դարաշրջանի կարևոր առանձնահատկություններից էր լուսավորյալ միապետների ի հայտ գալը: Նրանք փորձում էին կատարել վերափոխումներ՝ պահպանելով ավատատիրական կարգերի հիմքերը:
 - *Բացարկե՞ք «լուսավորյալ միապետ» հասկացությունը: Ո՞ր երկրներում կային լուսավորյալ միապետներ, երբ են նրանք կառավարել: Համեմատե՞ք նրանց: Ո՞ւմ կերպարն է ձեզ համար նախընտրելի: Հիմնավորե՞ք ձեր մտրեցումը:*
4. Նոր դարերի առաջին փուլում մի շարք երկրներում տեղի ունեցան հեղափոխություններ: Հեղափոխությունը ձերբազատեց ազգերի ստեղծագործ ներուժը և մղեց կենսական խնդիրների լուծման նպատակին: Միշտ չէ, որ հեղափոխությունները հասնում էին իրենց նպատակին, սակայն այդ ընթացքում ազգերը հասունանում էին և ինքնահաստատվում: Դրանք ունեցան պատմական մեծ նշանակություն:
 - *Ինչ է հեղափոխությունը: XVII դ. մինչև XIX դ. կեսը ո՞ր երկրներում և երբ են տեղի ունեցել հեղափոխություններ, նշե՞ք հայրնի գործիչներին, ներկայացրե՞ք այդ հե-*

դափնոխոյությունների արդյունքներն՝ ըստ երկրների: Կազմե՛ք համապատասխան աղյուսակ: Դրանցից ո՞րը և ինչո՞ւ է պատմության մեջ մտել Մեծ հեղափոխություն անունով:

5. Նապոլեոնի բարդ ու հակասական դարաշրջանը միավորում էր լուսավորչյալ մի-սպետությունների և հեղափոխությունների փորձն ու նվաճումները: Այն հզոր խթան դարձավ արդյունաբերական հասարակության կայացմանը ոչ միայն Ֆրանսիայում, այլև եվրոպական մյուս երկրներում: Մարդու բնական իրավունք-ներն ու ազատությունները դարձան եվրոպական արժեքների անբաժանելի մասը: Ազգերն սկսեցին ըմբռնել իրենց ինքնորոշման և ինքնիշխանության իրա-վունքը:

- *Ո՞ր թվականներն է ընդգրկում Նապոլեոնի դարաշրջանը: Ներկայացրե՛ք Նապո-լեոնի պատմական կերպարը: Նա համաշխարհային պատմության ամենահայտնի դեմքերից է. ձեր կարծիքով ո՞րն է դրա գլխավոր պատճառը:*

6. Հետադիմությունն ու բարենորոգումը XIX դ. առաջին կեսի եվրոպական կյանքի երկու հակադիր դրսևորումներն էին: Առաջինը ձգտում էր գեների ուժով կասեց-նելու հասարակական առաջընթացը և վերականգնելու իրենց դարն սպրած կարգերը: Երկրորդը նպատակ ուներ հասարակությունը տանելու անընդհատ ինքնանորոգման ճանապարհով:

- *Ե՞րբ է տեղի ունեցել Վիեննայի վեհաժողովը: Ներկայացրե՛ք դրա ընդունած հիմ-նական որոշումները: Ովքե՞ր և ինչ նպատակով սրտեղծեցին Սրբազան դաշինքը: Բարենորոգումների ուղիով ընթանալով՝ Անգլիան ինչ արդյունքներ արձանագ-րեց XIX դ. առաջին կեսին:*

7. Նոր դարերում ավանդական հասարակական հարաբերությունները խոչընդո-տում էին Արևելքի երկրների առաջընթացը: Դա ակնառու էր Օսմանյան կայսրու-թյունում և Իրանում: Այս երկրները XIX դարում վերածվեցին կիսագաղութի:

- *Պարզաբանե՛ք ավանդական հասարակության բնորոշ կողմերը: Թվարկե՛ք ավան-դական համարվող երկրներ: Ինչո՞ւ թանգլիմաթի քաղաքականությունը Օսմանյան կայսրությունում ձախողվեց: Բնչ է Արևելյան հարցը: Կառավարման ինչ համա-կարգ էր գործում Իրանում: Ձեր կարծիքով ո՞րն էր Իրանի հեղափոխության գլխավոր պատճառը:*

8. Հնդկաստանի և Չինաստանի ավանդական հասարակությունները, միջնադա-րում հասնելով տնտեսական և մշակութային նշանակալի հաջողությունների,

Նոր ժամանակներում զարգացման առումով բավականին հետ մնացին արդյունաբերական երկրներից:

- *Նոր դարերում ինչո՞ւ Հնդկաստանն ու Չինաստանը հեղափոխեցին: Ուլքեր էին մրցակցում Հնդկաստանին տիրանալու համար, և, ի վերջո, ո՞ւմ գաղութը դարձավ նա: Ե՞րբ և ո՞ր իրադարձություններից հետո Չինաստանը «բացվեց» եվրոպացիների առջև: ԲՆՀ հեղափոխությունը դա ունեցավ:*

9. Նոր դարերի առաջին փուլում փոփոխություն կրեցին նաև միջազգային հարաբերությունները: Առավել կարևորվեցին առանձին ազգային պետությունների տնտեսական և քաղաքական շահերը: Հաճախակի դարձան նվաճողական պատերազմները: Զարգացած երկրների անդրծովյան ծավալման հետևանքով տարբեր աշխարհամասերում ձևավորվեցին գաղութներ ու կիսագաղութներ:

- *Ի տարբերություն միջնադարի՝ ինչի՞ հիման վրա սկսեցին կարգավորվել միջազգային հարաբերությունները Նոր ժամանակներում: ԲՆՀ է ազգերի ինքնորոշման իրավունքը, և ինչ արդյունքներ տվեց դրա իրականացումը: Թվարկե՞ք գաղութատեր երկրներ: Ներկայացրե՞ք գաղութացման հեղափոխությունները:*

10. Արդյունաբերական հասարակության առաջին շրջափուլում զարգացած երկրներում ձևավորվեց ժամանակի պահանջներին համապատասխան կրթական համակարգ, իսկ գիտությունը բռնեց բուռն վերելքի ուղին: Աստիճանաբար բարելավվում էին մարդկանց կենսապայմանները:

- *Որո՞նք էին կրթության և գիտության զարգացման պատճառները: Այս ժամանակաշրջանի ինչ համալսարաններ են հայտնի: Դրանցից որո՞նք են գործում նաև մեր օրերում: Ներկայացրե՞ք գիտության զլխավոր նվաճումներն այս փուլում: Փորձե՞ք նկարագրել Նոր ժամանակների մարդուն, նրա սարելակերպը:*


11. Ի տարբերություն միջնադարի՝ ճյուղավորվեցին հումանիտար գիտությունները, բազմաբովանդակ դարձան գրականությունը և արվեստը: Ստեղծագործության հիմնական թեմաներն էին մարդը, նրա ներաշխարհը, հասարակական ամենատարբեր հարաբերությունները:

- *Թվարկե՞ք հումանիտար գիտությունները և դրանց հեղափոխող հարցերը: Այս ժամանակաշրջանի ինչ նշանավոր հեղինակների գիրք գրականության և արվեստի բնագավառներում: Նրանց ստեղծագործություններից որո՞նք են ձեզ հայտնի:*

ԲԱԺԻՆ ԵՐԿՐՈՐԴ

ԶԱՐԳԱՑԱԾ
ԱՐԴՅՈՒՆԱԲԵՐԱԿԱՆ
ԵՐԿՐՆԵՐԸ ԵՎ ԱՇԽԱՐՀԸ

XIX ԴԱՐԻ ԵՐԿՐՈՐԴ ԿԵՍ – XX ԴԱՐԻ ՍԿԻԶԲ



Ընդհանուր ձեռքբերումները

XIX դ. երկրորդ կեսին և XX դ. սկզբին աշխարհում կատարվեցին հսկայական տնտեսական, հասարակական-քաղաքական և մշակութային փոփոխություններ: Արդյունքում՝ **ավարտվեց արդյունաբերական հասարակության ձևավորումը**: Շարունակվեցին նախորդ շրջափուլի նվաճումները և կյանքի կոչվեցին նորերը: Դրանք են՝

- արտադրության վերագինում՝ ըստ գիտության նորագույն նվաճումների, և համաշխարհային տնտեսության ձևավորում,

- բնակչության թվաքանակի կտրուկ աճ, կենսամակարդակի բարձրացում, աղքատության նվազում, միջին ունեցվածքի հասարակական խավի ձևավորում,

- ընդհանուր ընտրական իրավունքի հաստատում և ժողովրդավարության հետագա զարգացում, այսինքն՝ ընտրությունների միջոցով ժողովրդի շարունակ ընդլայնվող մասնակցություն պետական կյանքին,

- հանրակրթության համակարգի ձևավորում, գրագիտության լայն տարածում,

- գիտության և տեխնիկայի մեծ թռիչք:

Այս ամենով հանդերձ՝ զարգացումն ուներ դժվարին, երբեմն ճգնաժամային ընթացք: Ուղեկցվում էր հասարակական ցնցումներով՝ ընդդիմադիր ուժերի պայքար, գործադուլներ, հեղափոխություններ, ազգային-ազատագրական պատերազմներ:



ՓԱՐԻՋԻ ԷՅՖԵԼՅԱՆ
ԱՇՏԱՐԱԿԸ

Բարձրությունը 306 մետր է:
Կառուցվել է պողպատից՝
ֆրանսիացի ճարտարագետ
Գյուստավ Էյֆելի նախագծով:

Եվրոպայի պատմական դերը

Արդյունաբերական հասարակությունը ավելի արագ ձևավորվում էր Եվրոպայում: Նվաճումների կարևորությունը գիտակցվում էր ամենուր: Այդ առումով Եվրոպայի դերն աշխարհում աննախադեպ մեծացավ: Սա-

կայն Ատլանտյան օվկիանոսից մինչև Ուրալյան լեռներ ձգվող այդ աշխարհամասը միակերպ չէր զարգանում:

Անգլիայում (Մեծ Բրիտանիա), Ֆրանսիայում, Գերմանիայում, Իտալիայում արդյունաբերական հասարակությունն առավել արագ էր զարգանում: XIX դ. 50–60–ական թվականները դարձան Անգլիայի տնտեսական զարգացման գագաթնակետը: Երկիրը համարվում էր **«աշխարհի արհեստանոցը»**: Մակայն դարավերջին նրա տնտեսական զարգացումը դանդաղեց: Վերամիավորված **Գերմանիան XX դ. սկզբին** նրանից առաջ անցավ և դարձավ **Եվրոպայի տնտեսապես ամենահզոր երկիրը**: Հույժ տպավորիչ էր Ֆրանսիայի զարգացումը տնտեսության ամենատարբեր ասպարեզներում:

Զարգացման ճանապարհ բռնեց նաև միավորված Իտալիան: Արդյունաբերական հասարակության կայացումը բնորոշ էր նաև Հոլանդիային, Բելգիային, Շվեդիային և այլն:

Գրանց կողքին Եվրոպայում կային երկրներ, որտեղ արդյունաբերական հասարակության կայացումն ընթանում էր դանդաղ: Այդ երկրներում՝ Ռուսաստան, Ավստրո-Հունգարիա, Իսպանիա, տիրապետող էին **ավատատիրական կարգերի վերապրուկները**: Ամենահետամնաց երկրները Բալկանյան թերակղզում էին՝ Հունաստան, Բուլղարիա, Ռումինիա, Սերբիա:

Աշխարհի անհավասարաչափ զարգացումը

Այս դարաշրջանի առանձնահատկություններից էր **տարբեր մայրցամաքների և երկրների անհավասարաչափ զարգացումը**:

Եվրոպական առաջավոր ազգերին հաջողությամբ հետևում էին Ամերիկյա աշխարհամասի երկրները: Գա նախ և առաջ վերաբերում է Ամերիկայի Միացյալ Նահանգներին: Անկախության նվաճումից ի վեր (1783 թ.) բնական հարուստ պաշարներ ունեցող այդ երկիրն առաջադիմում էր: Զարգանում էր տնտեսությունը, ընդլայնվում էին տարածքները, աճում՝ բնակչությունը: Միլիոնավոր մարդիկ Եվրոպայից և աշխարհի մյուս մասե-



Աշխարհում առաջին երկնաքերը: Կառուցվել է 1885 թ. Չիկագոյում (ԱՄՆ)՝ որպես ապահովագրական ընկերության գրասենյակի շենք: Ունեցել է 12 հարկ և 55 մ բարձրություն: Ճարտարապետ՝ Ուիլյամ Լե Բարոն Ջեննի:



Ամերիկայի սևամորթ ստրուկների ընտանիք՝ իրենց խրճիթի մոտ

րից վերաբնակվում էին ԱՄՆ-ում: Զարգացման լուրջ խոչընդոտ էր սևամորթների ստրկությունը, որին վերջ դրեց **Ամերիկյան երկրորդ հեղափոխությունը (1861-1865)**: Դրանից հետո երկիրն աներևակայելի թոփչք կատարեց: **XX դ. սկզբին արդյունաբերական զարգացման մակարդակով ԱՄՆ-ն աշխարհում գրավում էր առաջին տեղը:**

ԱՄՆ-ից հյուսիս՝ Կանադայում, XVIII դ. ի վեր հաստատվել էր Անգլիայի տիրապետությունը: Չնայած գաղութային պայմաններին՝ այն XIX դ. առաջադիմում էր՝ ձգտելով բարձրացնել իր կարգավիճակը: **1867 թ. Կանադան ստացավ ինքնավարություն** Բրիտանական թագի ներքո և ճանաչվեց **դոմինիոն** (տիրույթ): Դրանից հետո առաջընթացն անհամեմատ արագացավ:

Կենտրոնական և Հարավային Ամերիկայի երկրների զարգացումն ավելի դանդաղ էր ընթանում: Դրանք (բացառությամբ պորտուգալական Բրազիլիայի) Իսպանիայի նախկին գաղութներն էին՝ Մեքսիկա, Չիլի, Արգենտինա, Վենեսուելա, Կոլումբիա և այլն: Սակայն նորանկախ երկրներում սուր պայքար էր ընթանում ազատական և պահպանողական ուժերի միջև: Դրանք


ուղեկցվում էին քաղաքացիական պատերազմներով, բռնատիրությունների հաստատումով և օտարերկրյա միջամտություններով: Բարենորոգումները դժվարությամբ էին իրագործվում: **Կողք կողքի գոյատևում էին նախնադարյան համայնքը, ստրկությունը, ավատատիրությունը և կապիտալիզմը:** Արդյունաբերական հասարակության ձևավորումն այս տարածաշրջանում արագացավ միայն XIX դ. վերջին և XX դ. սկզբին:

Արդյունաբերական հասարակության երկրորդ շրջափուլում շարունակվում էր Ասիայի երկրների՝ Օսմանյան կայսրության, Իրանի, Հնդկաստանի, Չինաստանի ընդհանուր հետամնացությունը: Դրանք վերածվել էին եվրոպական տերությունների գաղութների կամ կիսագաղութների: Սակայն նկատելի էր նաև արդյունաբերական առաջընթացը:

Ուրույն ուղիով զարգացավ Ճապոնիան: 1870-ական թթ. այստեղ կատարվեցին բարենորոգումներ, որոնց շնորհիվ երկիրն աստիճանաբար **դարձավ Ասիայի ամենազարգացած և հզոր երկիրը:**

Նոր դարաշրջանում համաշխարհային զարգացումից շատ էին հեռ մնում **Աֆրիկայի** երկրները: Այստեղ կարելի էր հանդիպել ամենատարբեր կացութաձևերի: Մայրցամաքի հյուսիսային երկրները (Եգիպտոս, Թունիս, Ալժիր, Մարոկկո) ապրում էին միջնադարյան կյանքով: Սահարա անապատից հարավ՝ Արևադարձային և Հարավային Աֆրիկայի ժողովուրդների զարգացման մակարդակն ավելի ցածր էր (նախնադարյան):

XIX դ. կեսերից եվրոպացիները (անգլիացիներ, ֆրանսիացիներ, հոլանդացիներ, պորտուգալացիներ, գերմանացիներ) սկսեցին Աֆրիկա **մայրցամաքի գաղութացումը:** Բաժանումն ավարտվեց միայն XIX դ. վերջին: Մարդկային և բնական պաշարների անխնա շահագործումը երկարաձգեց Աֆրիկայի հետամնաց վիճակը:



Աֆրիկա մայրցամաքի գաղութային բաժանումը եվրոպական պետությունների կողմից

Հարցեր և առաջադրանքներ

1. Ո՞ր ժամանակաշրջանն է ընդգրկում արդյունաբերական հասարակության զարգացման երկրորդ շրջափուլը:
2. Ձեր կարծիքով ինչո՞ւ Եվրոպան դարձավ արդյունաբերական հասարակության ձևավորման բնօրրան:
3. Մեկնաբանե՛ք «Անգլիան աշխարհի արհեստանոց» արտահայտությունը:
4. Ինչո՞ւ Գերմանիան և ԱՄՆ–ը կարողացան XX դարի սկզբին առաջ անցնել Անգլիայից:
5. Օգտվելով նաև դասագրքի բառարանից՝ բացատրե՛ք՝ ինչ է նշանակում դոմինիոն: Կանադան է՞րբ դարձավ դոմինիոն:
6. Որո՞նք էին XIX դարի վերջի և XX դարի սկզբի զարգացած արդյունաբերական երկրները:
7. Թվարկե՛ք արդյունաբերական հասարակության զարգացման երկրորդ շրջափուլի հիմնական նվաճումները:

Քննարկման հարց

Ինչո՞վ էր պայմանավորված աշխարհի տարբեր երկրների և մայրցամաքների անհավասարաչափ զարգացումը:

Նոր հասկացություններ, անուններ, արտահայտություններ

Արդյունաբերական հասարակության զարգացման երկրորդ շրջափուլ, «աշխարհի արհեստանոց», աշխարհի անհավասարաչափ զարգացում, տնտեսապես ամենահզոր երկիր, դոմինիոն:

15

ՓՈՓՈԽՈՒԹՅՈՒՆՆԵՐ ՏՆՏԵՍՈՒԹՅԱՆ ՄԵՋ ԵՎ ՍՈՑԻԱԼԱԿԱՆ ԿՅԱՆՔՈՒՄ

Գիտության և տեխնիկայի դերի մեծացումը

XIX դ. երկրորդ կեսին և XX դ. սկզբին Եվրոպայի և Ամերիկայի առաջավոր երկրներում կատարվեցին արձանատական տեղաշարժեր: Գրանք նախ և առաջ պայմանավորված էին գիտության և տեխնիկայի նվաճումներով: **Հայտնագործություններն ու գյուտերը զանգվածաբար ներդրվում էին արտադրության մեջ:** Այլ խոսքով՝ **գիտությունը** դառնում էր **արտադրողական ուժ:** Միայն ԱՄՆ-ում XIX դ. վերջին արտոնագրվել է ավելի քան **600 000 գյուտ:** Պատկերը նույնն էր նաև Եվրոպայում:

XX դ. սկզբին արդեն գործում էր **ավտոմատացված** (ինքնաշխատ) և **հոսքային արտադրությունը** (կոնվեյեր): Գրա արդյունքը չափաբերված և միօրինակ սպարանքներն էին: Նման արտադրությունն առաջինը հաջողությամբ կիրառվեց ԱՄՆ-ում՝ **Հենրի Ֆորդի** ավտոմեքենայի ձեռնարկությունում:

Եժան և որակյալ պողպատի, պղնձի, ալյումինի ստացման նոր եղանակները հնարավորություն տվեցին զարգացնելու հաղորդակցության միջոցները, ընդլայնելու արտադրությունը: Գրա շնորհիվ աշխարհում կտրուկ ավելացավ երկաթուղիների ցանցը: Շոգենավերը փոխարինեցին առագաստանավերին: Ստեղծվեց **ներքին այրման շարժիչը**, որը կյանքի կոչեց նոր տիպի փոխադրամիջոցներ՝ **ավտոմեքենա և ինքնաթիռ:** Քաղաքներում հայտնվեց տրամվայը, կառուցվեց առաջին **մետրոպոլիտենը:** XIX դ. 50–60–ական թթ. աշխարհի տարբեր հատվածների միջև արդեն կար հեռագրակապ: Մինչև դարավերջ տարածվեցին **հեռախոսը և ռադիոկապը:**


Մեծագույն առաջընթաց արձանագրվեց էլեկտրակապության ասպարեզում: Մետաղալարի միջոցով հոսանքը հաղորդում էին հեռավոր վայրեր: **Կառուցվեցին առա-**



ՀԵՆՐԻ ՖՈՐԴ
(1863–1947)

Ամերիկացի հանրահայտ ճարտարագետ-գյուտարար, արտադրության կազմակերպիչ: 1903 թ. հիմնել է ավտոմեքենայի արտադրության սեփական ընկերությունը: Ձեռնարկություններում սկսել է կիրառել հարահոսը (կոնվեյեր): Գրա բարձրացրել է արտադրանքի որակը և քանակը, իջեցրել է վաճառքի գինը: Եվ ավտոմեքենան հասու է դարձել նաև միջին խավի մարդկանց: Իր շուրջն է համախմբել տաղանդավոր ճարտարագետների և ստեղծել ավտոմեքենաների նորանոր տեսակներ: Շեշտակի բարձրացրել է բանվորների աշխատավարձը: Բարելավել է նրանց կենցաղային պայմանները: «Ֆորդ» ընկերությունը գոյություն ունի նաև մեր օրերում: Այն ավտոմեքենաների արտադրության առաջատարներից է:

Ներքին այրման
առաջին շարժիչներից



ջին էլեկտրակայանները: Էլեկտրաէներգիան մուտք գործեց ինչպես արդյունաբերություն, այնպես էլ կենցաղ:

Տեսական զարգացման հիմնական միտումները

Գիտության և տեխնիկայի նվաճումները մեծ փոփոխություններ առաջացրին տնտեսության մեջ: Արտադրանքի տեսականին դարձավ ավելի բազմազան: Ձևավորվեց առաջատար երկրների **ներքին միասնական շուկան**: Նրանցից յուրաքանչյուրն սկսեց ներկայանալ իրրև միասնական տնտեսական միավոր:

Դրա հետ մեկտեղ ի հայտ եկան նաև նոր միտումներ: Մինչև XIX դ. կեսը տնտեսության մեջ **գերակշռում էր թեթև արդյունաբերությունը**, այսինքն՝ մարդու անմիջական սպառման ապրանքների՝ հագուստ, սնունդ, կենցաղային իրեր և այլն, արտադրությունը: Շուտով պատկերը փոխվեց: Սկսեց զարգանալ **ծանր արդյունաբերությունը**՝ տարբեր տեսակի մետաղների, աշխատանքի գործիքների, մեքենաների, սարքավորումների, էներգիայի արտադրությունը:

Այս ամենը պահանջում էր խոշոր կապիտալի ներդրում: Հումքի աղբյուրների, ապրանքների իրացման շուկաների համար կատաղի պայքար ծավալվեց ձեռներեցների միջև: Նրանցից շատերն այդ պայքարում սնան-




Ամերիկացի նշանավոր գյուտարար և ձեռներեց Թ. Էդիսոնի ստեղծած՝ աշխարհում առաջին շիկացման էլեկտրական լամպը: Այս թանգարանային և մուշն ամերիկյան գիտու պահեստներից մեկում անխափան աշխատել է 1890-ից մինչև 1926 թ.:

կանում էին: Ունանք միավորվում և ստեղծում էին **բաժնետիրական ընկերություններ`** իրենց **մենաշնորհը** դարձնելով արտադրության այս կամ այն բնագավառը: Միավորվում էին նաև դրամատները: Արդյունաբերական հասարակության առաջին շրջափուլին բնորոշ ազատ մրցակցությունը դարձավ անցյալ: Տնտեսության բոլոր բնագավառներում ստեղծվեցին **մոնոպոլիաներ (մենատիրություններ):** Դրանք էին որոշում արտադրանքի քանակը, գինը, տեսականին: Գերիշխող դիրք էին զբաղեցնում արտադրության, նաև իրացման և ֆինանսների տնօրինման գործում:


Ձևավորվեցին նաև **միջազգային մոնոպոլիաներ:** Տարբեր երկրների խոշոր ձեռներեցներն իրենց ձեռքն էին վերցնում համաշխարհային արտադրության այս կամ այն բնագավառը: **Կապիտալն այլևս ազգային սահմաններ չէր ճանաչում:** Իր հերթին դա հանգեցրեց **համաշխարհային շուկայի և տնտեսության ձևավորմանը:**

Սոցիալական տեղաշարժերը

Գիտության, տեխնիկայի և տնտեսության թռիչքը նկատելի կերպափոխեց հասարակության կյանքը: Արդյունաբերական քաղաքների աճը կատարվում էր գյուղական բնակչության հաշվին: Դրան համընթաց` գյուղական վայրերում կտրուկ աճեց ազարակների քանակը: Դրանցում ներդրվող տեխնիկայի նոր միջոցների կիրառմամբ գյուղատնտեսական ապրանքների քանա-



Ամերիկացի գյուտարարներ Ռայթ եղբայրներ Օրվիլը և Վիլբուրը 1903 թ. ստեղծեցին առաջին լիարժեք ինքնաթիռը:



ՎԵՐԵՐԻ ՄԻՄԵՆՍ
(1816–1892)

Գերմանացի հանրահայտ գիտնական, ճարտարագետ, գյուտարար, արտադրության կազմակերպիչ։ Հիմնել է մինչ օրս գործող և իր անունը կրող ընկերությունը։

Կառուցել է առաջին հեռախոսակայանը, էլեկտրական երկաթգիծը և էլեկտրական վերելակը։ Նրա անունն է կրում նաև էլեկտրահաղորդականության չափման միավորը։

կը շեշտակի աճեց։ Այդ առումով հատկանշական էր ԱՄՆ-ը։ Կարճ ժամանակաշրջանում այն դարձավ ցորենի ամենամեծ արտահանողը և էժան հացով ողողեց եվրոպական շուկան։

Կտրուկ փոխվեց նաև մարդկանց ունեցվածքային վիճակը։ Ձևավորվեց գերհարուստ մարդկանց մի փոքր խավ՝ ձեռնարկատերեր, դրամատերեր։ Պատմությունը պահել է նրանցից խոշորագույնների անունները՝ Ա. Կրուպ, Վ. Սիմենս (Գերմանիա), Հ. Ֆորդ, Ջ. Ռոկֆելլեր, Ջ. Մորգան (ԱՄՆ)։

Մյուս միտումը բազմամարդ **միջին խավի** ձևավորումն էր։ Ձեռներեցության տարածման, օրենսդրության կատարելագործման շնորհիվ ավելի ու ավելի շատ մարդիկ էին կարողանում ստեղծել մանր ու միջին ձեռնարկություններ և ապրել բարեկեցիկ կյանքով։ Այդ խավին պատկանում էին նաև մտավորականները՝ ճարտարագետներ, բժիշկներ, իրավաբաններ և այլն։ Գարի վերջին նրանց շարքերը համալրեցին նաև որակյալ և բարձր վարձատրվող բանվորները։

Միջին խավի կազմավորումը զգալիորեն մեղմեց հակասությունները և կայունություն հաղորդեց հասարակական կյանքին, նպաստեց ժողովրդավարության զարգացմանը։

Երրորդ կարևոր միտումը **բնակչության կրթական և մշակութային մակարդակի բարձրացումն էր**։ Կրթությունն ընդունեց զանգվածային բնույթ։ XIX դ. վերջին զարգացած երկրներում մինչև 12 տարեկան երեխաների կրթությունը դարձավ պարտադիր։ Կտրուկ աճեց միջնակարգ դպրոցների և բարձրագույն ուսումնական հաստատությունների թիվը։ Միայն ԱՄՆ-ում XX դ. սկզբին արդեն կար շուրջ 1000 բուհ։

Խորացավ կրթության աշխարհիկ բովանդակությունը։ Կրթական համակարգում նվազեց կրոնի ազդեցությունը։ Գերակա նշանակություն ձեռք բերեցին գործնական գիտելիքները։ Մտավորականությունը դարձավ բազմամարդ և սկսեց ակտիվորեն ներազդել հասարակական կյանքի վրա։

Հարցեր և առաջադրանքներ

1. Գիտության և տեխնիկայի ինչ նվաճումներ ներդրվեցին արտադրության մեջ արդյունաբերական հասարակության երկրորդ շրջափուլում:
2. Որտեղ և ո՞վ առաջինը կիրառեց ինքնաշխատ և հոսքային արտադրությունը:
3. Նշե՞ք գիտության և տեխնիկայի ներդրման շնորհիվ տնտեսության մեջ առաջացած փոփոխությունները:
4. Ձեր կարծիքով տնտեսության մեջ ինչո՞ւ գերակշռող դարձավ ծանր արդյունաբերությունը:
5. Ինչ է նշանակում մենաշնորհ:
6. Ինչ փոփոխություններ կատարվեցին հասարակության ընկերային կյանքում:
7. Պարզաբանե՞ք, թե ինչու երկրորդ շրջափուլում կտրուկ աճեց զարգացած երկրների կրթական և մշակութային մակարդակը:

Նոր հասկացություններ և անուններ

Գիտությունը՝ արտադրողական ուժ, ինքնաշխատ և հոսքային արտադրություն, թեթև արդյունաբերություն, ծանր արդյունաբերություն, բաժնետիրական ընկերություն, մենատիրություն (մոնոպոլիա), կապիտալի արտահանում, համաշխարհային շուկա, միջին խավ, զանգվածային կրթություն, Ա. Կրուպ, Վ. Սիմենս, Հ. Ֆորդ, Ջ. Ռոկֆելեր, Ջ. Մորգան:

**Պահպանողականներ
և ազատականներ (լիբերալներ)**

Արդյունաբերական հասարակության գլխավոր նվաճումներից մեկը ժողովրդավարական կարգերի կայացումն էր: Իսկ դա հնարավոր է միայն **քաղաքացիական հասարակության** պայմաններում: Հասարակություն, որի բոլոր քաղաքացիներն իրավահավասար են, **հստակ սահմանված են նրանց իրավունքներն ու պարտականությունները:**

Զարգացած երկրներում ժողովրդավարության առաջընթացն ապահովվում էր առավելաբար խաղաղ բարենորոգումների ճանապարհով: Պետություններն ավելի հակված էին լուծելու ներքևից եկող պահանջները: Ժողովուրդն ավելի ու ավելի շատ էր մասնակցում պետական–հասարակական կյանքին: Առաջինն այդ ուղիով ընթացավ Անգլիան: Ինչ վերաբերում է հեղափոխական ցնցումներին, ապա դրանք հիմնականում տեղի էին ունենում թերզարգացած երկրներում՝ Ռուսաստան, Օսմանյան կայսրություն, Իրան, Չինաստան:

Բարենորոգումները դարձան մարդկության առաջընթացի առավել արդյունավետ ուղին: Սակայն դա չի նշանակում, թե դրանք իրագործվում էին առանց պայքարի: Պայքարն ընթանում էր հասարակական տարբեր հոսանքների և դրանց գաղափարախոսությունների միջև: XIX դ. երկրորդ կեսին և XX դ. սկզբին ավելի ազդեցիկ էին **պահպանողական** և **ազատական** հոսանքները:

Պահպանողականությունն առաջացել է արդյունաբերական հասարակության առաջին շրջափուլում: Սկզբնապես պահպանողականությունը համարյա նույնական էր հետադիմությանը: Պայքարում էր ինչպես հեղափոխական, այնպես էլ բարենորոգչական փոփոխությունների դեմ: Արդյունաբերական հասարակության երկրորդ շրջափուլում այն էապես փոխվեց: Հասարակության նո-

րացման խնդրին մոտենում էր՝ ելնելով բանական չափանիշներից. պահպանել դարերով կուտակված ազգային արժեքները, հասարակությունը վերակառուցել անընդհատ և աստիճանական բարենորոգումներով:

Ազատականության գաղափարները սերտորեն առնչվում էին XVII–XVIII դդ. լայն տարածում գտած բնական իրավունքի տեսության հետ: Այն պահանջում էր հասարակական առաջադիմության հիմքում դնել մարդու, հասարակության և պետության շահերի համադրումը:

Կուսակցությունների ձևավորումը

Կուսակցությունները բնորոշ են զարգացած հասարակություններին: **Դրանք համախոհ մարդկանց քաղաքական կազմակերպություններ են, որոնց խնդիրը հասարակական կյանքի բարելավումն է՝ ըստ իրենց գաղափարների և գործողության ծրագրերի:**

Նպատակին հետամուտ՝ նրանք ձգտում են խորհրդարանական ընտրություններում հաղթելու կամ հեղափոխության միջոցով հասնելու իշխանության: Վաղ շրջանում առաջացած կուսակցությունները գործում էին միայն խորհրդարանների շրջանակներում: Հետագայում իրենց գործունեությունը ծավալեցին ողջ երկրում: Այդպիսի ճանապարհ անցան, օրինակ, անգլիական **Թորի** և **Վիգ** կուսակցությունները: XIX դ. երկրորդ կեսին դրանք վերածվեցին պահպանողական և ազատական կուսակցությունների: Նրանց պայքարը շատ կողմերով պայմանավորեց երկրի քաղաքական կյանքի զարգացումը:

Նման երկկուսակցական համակարգ ձևավորվեց նաև ԱՄՆ-ում: **Ժողովրդավարական** և **Հանրապետական** կուսակցությունները սկզբում խիստ հակադիր էին: Ժողովրդավարները ներկայացնում էին հարավի ստրկատեր հողատերերի շահերը, իսկ հանրապետականները՝ հյուսիսի արդյունաբերողների: Սակայն ստրկատիրության վերացումից հետո վերացավ նաև դրանց հիմնական հակասությունը: 1870-ական թթ. այդ կուսակցությունները դարձան ամերիկյան քաղաքական կյանքի բևեռները: Երկրի արտաքին և ներքին հիմնա-

Ժողովրդավարական և Հանրապետական կուսակցություններն ԱՄՆ-ում

Ավելի հինը ժողովրդավարական կուսակցությունն է. ստեղծվել է 1792 թ. Թոմաս Ջեֆերսոնի կողմից: Նրա խորհրդանիշն ավանակն է՝ իբրև աշխատասիրության, ուղղամտության և համեստության մարմնացում:

Հանրապետական կուսակցությունը հիմնվել է 1854 թ., երբ սրվել էին երկրի հարավի և հյուսիսի հարաբերությունները: Նրա կայացման գործում մեծ էր Աբրահամ Լինկոլնի դերը: Կուսակցության խորհրդանիշը փիղն է՝ ուժի, մեծահոգության և համատության մարմնացումը:

Այսօր էլ այս երկու կուսակցությունները գերիշխում են ԱՄՆ-ի քաղաքական կյանքում:



**Ֆրանսիա.
Երրորդ
հանրապետության
Սահմանադրություն
(1875 թ.)
Բաժին առաջին**

Հոդված 12. Ֆրանսիան ազատ, ժողովրդավարական երկիր է, որի գերագույն իշխանությունը պատկանում է ֆրանսիական ազգին՝ կազմակերպված իբրև ընկերային անխախտ միասնություն:

Հոդված 13. Ֆրանսիական ազգը բաղկացած է ազատ և ինքնաբավ քաղաքացիներից, որոնք իրավունք ունեն տարբեր ձևերով ու մակարդակներով մասնակցելու նրա ընկերային-քաղաքական կյանքին:

Հոդված 14. Յուրաքանչյուր քաղաքացու իրավունքն է իր մասը բերելու ընկերային կյանքին և իշխանական կառույցին ազատ, հավասար և ուղղակի ընտրությունների միջոցով:

Հոդված 23. Քաղաքացու սահմանադրական իրավունքների խախտումը համարվում է քրեորեն հետապնդելի արարք:

Հոդված 27. Քաղաքացու իրավունքները երաշխավորվում են Սահմանադրությամբ և Ֆրանսիայի պետական և իրավական ողջ համակարգի անխափան գործառույթով:

խնդիրների վերաբերյալ դրանց պայքարը մեծապես նպաստեց ամերիկյան ժողովրդավարության զարգացմանը:

Ինչ վերաբերում է Ֆրանսիային, ապա այստեղ XIX դ. կեսերին կուսակցությունները ձևավորվում էին հակամիապետական պայքարի պայմաններում: Նպատակը Նապոլեոն III-ի վարչակարգի տապալումը և ժողովրդավարության հաստատումն էր: Այդ առումով իր գործունեությամբ առանձնանում էր **Հանրապետական միությունը**, որի հիմքի վրա հետագայում առաջացան տարբեր ուղղությունների կուսակցություններ:

Այլ էր իրավիճակը Գերմանիայում: Այստեղ գերակա էր միապետական կարգը, և իշխող կուսակցությունները հիմնականում պահպանողական էին: Ռուսաստանում կուսակցություններն սկսեցին կազմավորվել միայն XIX դ. վերջին և XX դ. սկզբին:

Պետք է նկատի ունենալ, որ քաղաքական պայքարում կուսակցությունները հաճախ պտակտվում էին կամ միավորվում: Առաջանում էին նաև նորերը: Այդ գործընթացը նպաստում էր հասարակական առաջընթացին:

Ընտրական իրավունքի ընդլայնումը

Արդյունաբերական հասարակության երկրորդ շրջափուլում ներքաղաքական պայքարի հիմնախնդիրներից մեկն էլ ընտրական իրավունքի ընդլայնումն էր: Այդ ժողովրդավարական պահանջը կար նաև նախորդ դարաշրջանում: Այժմ դրա շուրջ պայքարն ավելի թեժացավ:

Մինչև XIX դ. կեսերը տիրապետող էր այն մոտեցումը, թե ընտրական իրավունք կարող են ունենալ միայն սեփականություն ունեցող անձինք: Սակայն ժողովրդավարության ծավալմանը համընթաց՝ իրավիճակը փոխվեց: Քաղաքական պայքարի գլխավոր խնդիրներից մեկը դարձավ ընդհանուր ընտրական իրավունքի հաստատումը: Արդյունքում՝ ընտրական իրավունք ունեցողների շրջանակն աստիճանաբար ընդլայնվում էր: Անգլիայում, օրինակ, դա սկսվեց 1832 թ. և ավարտվեց միայն 1918-ին: Ընդհանուր ընտրական իրավունքը (միայն

տղամարդկանց համար) Գերմանիայում օրինադրվեց 1871 թ., իսկ Ֆրանսիայում՝ 1875 թ. Սահմանադրությամբ:

Համընդհանուր ընտրական իրավունքը (ներառյալ կանանց) զարգացած երկրներում հաստատվեց միայն Առաջին աշխարհամարտից հետո:

Ժողովրդավարացման գործընթացի անբաժան մասն էր նաև տեղական ինքնակառավարման մարմինների ստեղծումը: 1870–1880–ական թթ. դրանք կազմավորվեցին Ֆրանսիայում, Անգլիայում, Գերմանիայում, անգամ Ռուսաստանում: Ստեղծվում էին ընտրովի խորհուրդներ, որոնք հոգում էին տեղական կարիքները: Այդ կերպ ընդլայնվեց նաև քաղաքների ինքնակառավարումը:

Հարցեր և առաջադրանքներ

1. Փորձե՛ք բացատրել «քաղաքացիական հասարակություն» հասկացությունը:
2. Թվարկե՛ք պահպանողականների և ազատականների հիմնական գաղափարները:
3. Ի՞նչ է կուսակցությունը:
4. Ո՞ր երկրներում է ձևավորվել երկկուսակցական համակարգ:
5. Ի՞նչ է ընդհանուր ընտրական իրավունքը:
6. Գերմանիայում և Ֆրանսիայում է՞րբ է հաստատվել ընդհանուր ընտրական իրավունքը (տղամարդկանց համար):
7. Ի՞նչ եք հասկանում տեղական ինքնակառավարում ասելով: Այդ մարմինները ի՞նչ խնդիրներ են լուծում:

Քննարկման հարց

Համընդհանուր ընտրական իրավունքը ժողովրդավարության պարտադիր պայման է. ինչո՞ւ: Խմբային քննարկման միջոցով հիմնավորե՛ք ձեր տեսակետը:

Նոր հասկացություններ

Պահպանողականություն, ազատականություն, քաղաքացիական հասարակություն, կուսակցություն, Թորի և Վիգ, Ժողովրդավարական և Հանրապետական կուսակցություններ, ընդհանուր ընտրական իրավունք, տեղական ինքնակառավարում:



ՄԵՐԻ ՄԵՆ–ՄԻՄՈՆ
(1760–1825)

Ֆրանսիացի մեծ մտածողին մշտապես հուզել է հասարակության բարեփոխման հիմնախնդիրը: Ջանասպիրաբար ուսումնասիրել է լուսավորականների գաղափարները և Մեծ հեղափոխությունը: Հանգել է այն հետևության, որ հասարակությունը կարելի է բարեշրջել գիտության և արդյունաբերության զարգացման շնորհիվ: Այդ նպատակով պետք է վերակառուցել հասարակությունը և պետությունը: Մտածում էր, որ այդ ճանապարհով կյանքն արմատապես կբարեփոխվի: Ունեցել է բազմաթիվ հետևորդներ: Սոցիալիզմի (ընկերվարության) գաղափարի հիմնադիրներից է:

Ջանգվածային հասարակական շարժումները

Ժողովրդավարության կայացումը երկարատև ու բարդ գործընթաց է: Ինչպես գիտենք, XIX դ. երկրորդ կեսին և XX դ. սկզբին այն նպատակաուղղված էր ընտրական իրավունքի ընդլայնմանը: Գործընթացն ուղեկցվում էր քաղաքական կուսակցությունների ի հայտ գալով:

Դարաշրջանին բնորոշ էին նաև բազմաբնույթ հասարակական միությունների ստեղծումը և գործունեությունը: Հատկապես առանձնանում էին **արհմիությունները**, որոնք միավորում էին աշխատավորներին ըստ մասնագիտությունների: Դրանք պայքարում էին աշխատանքային, կենցաղային, հասարակական պայմանների բարելավման համար: Ժամանակի ընթացքում զարգացած երկրներում արհմիությունների կարգավիճակն ամրագրվեց օրենքով: Արդեն XX դ. սկզբին կային միլիոնավոր անդամներ ունեցող արհմիություններ, որոնք մեծ ազդեցություն ունեին հասարակական կյանքում:

Հասարակության մեջ կարևոր դեր էին խաղում նաև լուսավորչական, մշակութային, գիտական, կրոնական տարաբնույթ միությունները: Դրանք հատկապես շատ էին Գերմանիայում և ԱՄՆ–ում: Լայն տարածում ստացավ կանանց շարժումը, որը պայքարում էր նրանց շահերի և իրավունքների համար:

Ժողովրդավարության կայացման պայմաններում ավելի ու ավելի մեծ դեր էին ստանում **խոսքի ազատությունը** և **հասարակական կարծիքը**: Սկսեցին ձևավորվել **գանգվածային լրատվության միջոցները** (ՋԼՄ)՝ թերթեր, ամսագրեր, տարեգրքեր: Դրանք լույս էին տեսնում հարյուր հազարավոր օրինակներով:

Հասարակական շարժումների դրսևորումներից էին նաև փողոցային երթերը, ցույցերն ու հանրահա-

վաքները: Մարդկանց այդ իրավունքները նույնպես ամրագրվեցին օրենքներով:

Բանվորական շարժումները

Բանվորությունը արդյունաբերական հասարակության **ամենամեծ դասակարգն էր**: Նա էր նյութական բարիքների անմիջական արտադրողը: Նոր դարերում նրա հասարակական դերը կտրուկ աճեց:

Սակայն բանվորությունն ուներ բազում հիմնական դիրքեր՝ իրավագրկություն, ցածր աշխատավարձ, երկար աշխատօր, աշխատանքի և կենցաղի վատ պայմաններ, ցածր կրթական մակարդակ և այլն: Գրանց բարելավման համար նրանք համատ և տեական պայքար էին մղում: Այդ պայքարը հասարակության ժողովրդավարացման գործընթացի անբաժանելի մասն էր:

XIX դ. երկրորդ կեսին և XX դ. սկզբին բանվորների պայքարը տվեց շոշափելի արդյունքներ: Նրանք նախ և առաջ ձեռք բերեցին ընտրական իրավունք: Ավելին՝ երբեմն ընտրապայքարում կարողանում էին հասնել հաջողության և իրենց ներկայացուցիչներին ուղարկել խորհրդարան: Գրա շնորհիվ հօգուտ բանվորների սկսեցին ընդունվել բազմաթիվ օրենքներ. բարձրացավ աշխատավարձը, աշխատանքային օրը կրճատվեց՝ հասնելով 10 ժամի, սահմանվեցին հանգստյան օրեր, ընդմիջում և այլն: Ստեղծվեց կյանքի ապահովագրության համակարգ: Որոշ երկրներում սահմանվեց ծերության կենսաթոշակ:


Բանվորների պայքարի հիմնական ձևերից էր **գործադուլը**: Իրենց շահերը պաշտպանելու համար բանվորները ստեղծում էին արհմիություններ, ակումբներ, կիրակնօրյա դպրոցներ և այլ կազմակերպություններ:

Զարգացած երկրներում բանվորները ստեղծեցին իրենց կուսակցությունները: Հատկապես մեծ ազդեցություն ունեին գերմանական, ֆրանսիական, իտալական բանվորական (սոցիալիստական և սոցիալ-դեմոկրատական) կուսակցությունները: Քայլեր էին ձեռնարկվում միավորելու աշխարհի բոլոր բանվորներին:



ՇԱՌԷ ՖՈՒՐԻԵ
(1772-1837)

Ֆրանսիացի նշանավոր մտածող: Նրան մտահոգել են արդյունաբերական հասարակությունում աշխատավորների տառապանքները և թշվառ վիճակը: Համոզված էր, որ պետք է ստեղծել նոր ներդաշնակ հասարակարգ: Գրա համար նա առաջարկում էր ստեղծել աշխատանքային համայնքներ: Գրանք պետք է լինեին ինքնավար՝ բաղկացած 1500-1800 մարդուց: Աշխատանքը պետք է լիներ գրավիչ, հետաքրքիր և բավարարեր բոլորի պահանջները: Նրա գաղափարները բնութագրվում են իբրև «ուտոպիական սոցիալիզմ», այսինքն՝ ոչ գիտական, երևակայական, անիրագործելի սոցիալիզմ:



ԿԱՐԼ ՄԱՐԺՍ
(1818-1883)

Գերմանացի իմաստասեր, տնտեսագետ, համայնավար: Նրա գաղափարները հսկայական ազդեցություն են թողել ժամանակակիցների և հետագա սերունդների վրա: Նրա հիմնական գաղափարն այն է, որ արդյունաբերական հասարակությունն անկատար է, հետևաբար դրա փոխարեն պետք է ստեղծվի սոցիալիստական և ապա կոմունիստական հասարակարգ: Այդ գաղափարը հիմնավորելու համար գրել է տասնյակ հատորներ: Առավել հայտնի է նրա «Կապիտալը»: Մարքսը չարիքի աղբյուր է համարել մասնավոր սեփականությունը: Ուստի առաջարկել է ստեղծել համաժողովրդական սեփականություն: Նա և նրա հետևորդները (մարքսիստները) համոզված էին, որ անցումը սոցիալիստական հասարակարգին հնարավոր է իրագործել միայն բռնի, հեղափոխական ճանապարհով:

Բանվորական շարժման գաղափարախոսները

Բանվորների վիճակը հուզում էր շատերին: XIX դ. առաջին կեսին կային մտածողներ, որոնք երազում էին իդեալական հասարակական կարգերի մասին: Նրանցից էին **Ֆրանսիացիներ Ա. Սեն-Սիմոնը, Շ. Ֆուրիեն, անգլիացի Ռ. Օուենը**: Բանվորների վիճակի բարելավման համար նրանք ծրագրեր կազմեցին: Եվ նույնիսկ փորձում էին իրագործել դրանք: Սակայն այդ փորձերն **անիրական էին** (ուտոպիական), ուստի ձախողվեցին:

XIX դ. կեսերին բանվորների պատմական դերը յուրովի գնահատեցին **գերմանացի մտածողներ Կ. Մարքսը և Ֆ. Էնգելսը**: Իրենց աշխատություններում նրանք փորձում էին ապացուցել, որ բանվորները հասարակության կարևորագույն հատվածն են: Ուստի պետք է կատարեն հեղափոխություն, ստեղծեն բանվորական պետություն, վերացնեն կապիտալիստական հասարակարգը և կառուցեն նորը: Այդ նոր հասարակարգը նրանք անվանեցին **սոցիալիստական՝** ընկերվարական (լատիներեն «ընկեր, դաշնակից» բառից): Նրանց տեսակետի համաձայն՝ սոցիալիզմի ժամանակ մարդիկ պետք է միավորվեն համընդհանուր շահերով: Համաժողովրդական սեփականությունը կարող է պայմաններ ստեղծել ավելի շատ նյութական բարիքներ արտադրելու, առատություն և բարեկեցություն ապահովելու համար:

Ավելի ուշ Կ. Մարքսը և Ֆ. Էնգելսը շեշտը դրին **կոմունիզմի՝** համայնավարության (լատիներեն «ընդհանուր» բառից) գաղափարի վրա: Մի հասարակություն, որտեղ պետք է վերանան պետությունը և մարդկանց հասարակական տարբերությունները: Բոլորը պետք է աշխատեն և օգտվեն բոլոր բարիքներից:

Կ. Մարքսի և Ֆ. Էնգելսի շատ հետևորդներ հետագայում վերանայեցին նրանց հայացքները՝ ասելով, որ սոցիալիզմին կարելի է հասնել տևական, խաղաղ բարենորոգումների ճանապարհով: Գործողության այդ ձևը որդեգրեցին եվրոպական զարգացած երկրների (Գերմանիա, Ֆրանսիա, Անգլիա, Շվեդիա) բանվորական

Մայիսի 1-ի շարժման առաջացումը

XIX դ. 80-ական թթ. ԱՄՆ-ում բանվորների գլխավոր պահանջը 8-ժամյա աշխատանքային օրն էր: Չիկագո քաղաքում 1886 թ. մայիսի 1-ին նշանակվեց ընդհանուր գործադուլ՝ ի պաշտպանություն այդ պահանջի: Այն վերջացավ ողբերգությամբ: Անհայտ սաղրիչը թու՛մը պայթեցրեց, զոհվեց մեկ ոստիկան: Ի պատասխան՝ ոստիկանները կրակ բացեցին, որին զոհ գնացին տասնյակ բանվորներ: Դատարանը գործադուլի կազմակերպիչներից 5-ին դատապարտեց մահապատժի, 2-ին՝ ցմահ բանտարկության: ԱՄՆ-ում նրանց արդարացման համար շարժում սկսվեց, որը տարածվեց նաև Եվրոպայում: 1889 թ. Սոցիալիստների միջազգային համաժողովը որոշեց ամեն տարի մայիսի 1-ը նշել որպես աշխատավորների համերաշխության օր:

կուսակցությունները: Եվ պատմությունը ցույց տվեց նրանց ուղու ճշմարտացիությունը:

Հակառակ դրան՝ կոմունիզմի անհրապակյա (ուտոպիական) գաղափարները պարարտ հող էին գտնում հատկապես թերգարգացած երկրների բանվորության շրջանում: Դրանց շարքում էր Ռուսաստանը: Ռուսական մարքսիստների ծայրահեղ թևը՝ բոլշևիկները, երկիրը տարավ դասակարգային անհաշտ պայքարի և հեղափոխության ուղիով:

Հարցեր և առաջադրանքներ

1. Հասարակական ինչ միություններ էին գործում զարգացած երկրներում XIX դարի երկրորդ կեսին և XX դարի սկզբին:
2. Ինչի՞ համար էին պայքարում բանվորները արդյունաբերական հասարակության երկրորդ շրջափուլում: Ի՞նչ արդյունքներ տվեց այդ պայքարը:
3. Ներկայացրե՛ք ուտոպիստ-սոցիալիստների հայացքները:
4. Նոր հասարակության ստեղծման գործում Կ. Մարքսը և Ֆ. Էնգելսն ինչ դեր էին հատկացնում բանվոր դասակարգին: Նրանց հետևորդները հետագայում ինչ երկու ուղղություն որդեգրեցին:

Նոր հասկացություններ, անուններ

Հասարակական կարծիք, ԶԼՄ, հանրահավաք, գործադուլ, սոցիալիզմ (ընկերվարություն), կոմունիզմ (համայնավարություն), Ա. Սեն-Սիմոն, Շ. Ֆուրիե, Ռ. Օուեն, Կ. Մարքս, Ֆ. Էնգելս:

18

ՀԱՍԱՐԱԿԱԿԱՆ–ՔԱՂԱՔԱԿԱՆ ՇԱՐԺՈՒՄՆԵՐԸ ԱՄՆ–ՈՒՄ ԵՎ ԵՎՐՈՊԱՅՈՒՄ



ԱԲՐԱՀԱՄ ԼԻՆԿՈՆՆ
(1809–1865)

ԱՄՆ–ի տասնվեցերորդ նախագահը: Ծնվել է ագարակատիրոջ ընտանիքում: Ֆիզիկապես ուժեղ էր, աշխատասեր, սկզբունքային և հետևողական: Ինքնակրթությամբ կարողացել էր դասնալ փաստաբան և քաղաքական գործիչ: Համոզմունքներով ժողովրդավար էր: Հանրապետական կուսակցության ստեղծողներից է: Փառաբանվել է իր ազնվությամբ, բացառիկ հմայքով, նրբանկատությամբ: Կարողացել է ամենադժվարին իրավիճակներում լավագույն լուծումներ գտնել: Սպանվել է թատրոնում մի մոլեռանդ դերասանի ձեռքով:

Ստրկության վերացումը ԱՄՆ–ում

ԱՄՆ–ի ձևավորումից հետո ստրկությունը չվերացվեց: Այն խոչընդոտում էր երկրի բնականոն զարգացմանը:

Երկրի արդյունաբերապես զարգացած հյուսիսային նահանգներում խնդիրը լուծվեց բարենորոգումների ճանապարհով: Այլ էր պատկերը հարավում: Այստեղ տարածված էին ստրկական աշխատանքի վրա հիմնված խոշոր տնտեսությունները՝ **պլանտացիաները**: Դրանք արտադրում էին թեյ, կակաո, շաքարեղեգն, բրինձ: Տերերը գերշահույթ էին ստանում և դեմ էին ստրկության վերացմանը: Ավելին՝ ցանկանում էին այն տարածել նաև արևմուտքում յուրացվող նոր հողերում:

ԱՄՆ–ի առաջադեմ ուժերը պայքար սկսեցին հանուն ստրկության վերացման: Դրա գաղափարները թափանցեցին արվեստի և գրականության մեջ: **Պայքարի ընթացքում ստեղծվեց Հանրապետական կուսակցությունը**: Հանրապետականները դեմ էին ստրկությանը: Իսկ ավելի վաղ ստեղծված **Ժողովրդավարական կուսակցությունը** դրա ջատագովն էր:

1860 թ. հանրապետական **Ա. Լինկոլնն** ընտրվեց ԱՄՆ–ի նախագահ: Հարավի նահանգները, չհաշտվելով այդ փաստի հետ, խռովություն բարձրացրին և ստեղծեցին իրենց կառավարությունը: Լինկոլնը փորձեց կանխել պատակտումը, սակայն հաջողություն չունեցավ: Սկսվեց **քաղաքացիական պատերազմ**, որը տևեց չորս տարի (**1861–1865**): Այս իրադարձությունը շրջադարձային էր ԱՄՆ–ի պատմության մեջ: Ուստի այն հաճախ անվանում են նաև **Ամերիկյան երկրորդ հեղափոխություն**:

Լինկոլնն իր շուրջը համախմբեց առաջադեմ բոլոր ուժերին: Ի վերջո՝ կոտրվեց հարավի դիմադրությունը: Սևամորթները ստացան իրավունքներ, բայց նրանց նկատմամբ խտրականությունը դեռ երկար ժամանակ պահպանվում էր:

Քաղվածք ԱՄՆ-ի Սահմանադրության 13-րդ ուղղումից

Միացյալ Նահանգներում կամ նրանց իշխանությանը ենթակա ցանկացած վայրում չի կարող գոյություն ունենալ ո՛չ ստրկություն, ո՛չ հարկադիր աշխատանք, բացի հանցագործության դիմաց պատժի դեպքերից, երբ անհատը դատապարտված է՝ ըստ սահմանված կարգի:

Երկրորդ հեղափոխության հետևանքով ԱՄՆ-ում տեղի ունեցան դրական խոր տեղաշարժեր:

Ամրապնդվեց ժողովրդավարությունը, կատարելագործվեց պետական կառավարումը: Վերակառուցվեցին արդյունաբերությունը, գյուղատնտեսությունը, տրանսպորտն ու հեռահաղորդակցությունը: Ներդրվեցին գիտության և տեխնիկայի նորագույն նվաճումները: Արդյունքները երկար սպասել չտվին: XX դ. սկզբին ԱՄՆ-ը տնտեսական զարգացմամբ աշխարհում գրավեց առաջին տեղը:

Ճգնաժամը Ֆրանսիայում և դրա հաղթահարումը

Երկրորդ կայսրության տարիներին (1852–1870) Ֆրանսիան տնտեսական առաջընթաց ապրեց: **Ավարտվեց արդյունաբերական հեղաշրջումը:** Գիտության և տեխնիկայի նորագույն նվաճումներով վերազինվեցին արդյունաբերության տարբեր ճյուղեր: Արտադրանքի ծավալը եռապատկվեց:

Սակայն Նապոլեոն III-ի անձնիշխանությունը խոչընդոտում էր Ֆրանսիայի հետագա զարգացմանը: Ձևական էին դարձել Սահմանադրությունը և խորհրդարանը: Չկար ազատ մամուլ: Ի պատասխան դրա՝ ծավալվեց ազատական շարժում:

Իր դիրքերն ամրապնդելու համար Նապոլեոն III-ը վարում էր նվաճողական պատերազմներ: Գրանք, սակայն, հաճախ ձախողվում էին: Եզրափակողը եղավ Ֆրանս-պրուսական պատերազմը: Ֆրանսիան խոչընդոտում էր Գերմանիայի վերամիավորմանը, քանի որ չէր ցանկանում զորեղ հարևան ունենալ: Այդ հողի վրա **1870–1871 թթ. պատերազմ ծավալվեց նրա և Պրուսիայի միջև:** Ֆրանսիական բանակը խայտառակ պար-

Ամերիկայի հայկական գաղթավայրը

Առաջին հայերն Ամերիկայում հայտնվել են XVII դարում: Նրանք հիմք դրեցին շերամապահությանը: Հայ վերաբնակիչները հիմնականում Արևմտյան Հայաստանից էին: XIX դարի սկզբից հայերի ներհոսքն Ամերիկա ավելացավ: Առաջինը, ով փորձել է հայերին համախմբել Ամերիկայում, Խաչատուր Ոսկանյանն էր: 1854 թ. ի վեր նա մամուլում շատ հողվածներ է հրապարակել հայերի մասին: Մեկ այլ վերաբնակիչ՝ Խաչատուր Մերոբյանը, ստեղծել է կայուն կանաչ գույնի ներկ, որով ներկվել է ամերիկյան թղթադրամը՝ դուլարը:



Բարիկաղ Փարիզի կոնունայի օրերին

տություն կրեց: Կայսրը գերի ընկավ, և միապետությունը տապալվեց:

Երկիրը կրկին հռչակվեց հանրապետություն (թվով՝ Երրորդ): Սակայն ճգնաժամը շարունակվեց: Գերմանացիները պաշարեցին Փարիզը, սկսվեց սով: Հանրապետական կառավարությունը, վախենալով ժողովրդի հուզումներից, ձգտում էր շուտափույթ հաշտություն կնքելու: Վիճակն օրեցօր վատանում էր: **1871 թ. մարտի 18-ին** ապստամբություն բռնկվեց: Կառավարությունը փախավ: Ժողովուրդն ստեղծեց իր իշխանությունը՝ **Փարիզի կոնունան**: Այն տևեց 72 օր: Կառավարական ուժերն արյան մեջ խեղդեցին ապստամբությունը:

Սուր պայքար ծավալվեց միապետականների և հանրապետականների միջև: Հաղթեցին հանրապետականները: **1875 թ. ընդունվեց Երրորդ հանրապետության Մահմանադրությունը**: Այն պայմաններ ստեղծեց Ֆրանսիայի հետագա զարգացման համար: Երկիրը բռնեց բարգավաճման ուղին: Արդեն XX դ. սկզբին այն աշխարհի առաջավոր և զարգացած երկրներից էր:

1905–1907 թթ. հեղափոխությունը Ռուսաստանում

XIX դ. երկրորդ կեսին և XX դ. սկզբին Ռուսաստանյան կայսրությունն իր տարածքով աշխարհում ամենամեծն էր: Չնայած հզոր ներուժին՝ այն իր զարգացմամբ զիջում



էր առաջավոր երկրներին: Պատճառը միահեծանությունը և ավատատիրության վերապրուկներն էին: Չկար ո՛չ սահմանադրություն, ո՛չ խորհրդարան: **Ճորտությունը վերացվեց միայն 1861 թ.** Ալեքսանդր II ցարի կողմից: Այդ և այլու բարենորոգումները իրագործվում էին մեծ դժվարությամբ:

Արդյունաբերությունը դանդաղ էր զարգանում: Ձեռներեցների դասը թույլ էր: Ինչ վերաբերում է բանվորությանը, ապա նրա որակավորումը ցածր էր: Բանվորներն ապրում էին կենցաղային ծանր պայմաններում: Չկային աշխատանքի, առողջության, ծերության ապահովագրության համակարգեր: Բարվոք չէր նաև գյուղացիության վիճակը՝ սակավահողություն, ծանր հարկեր, պարբերաբար կրկնվող սով: Հակասություններն առանձնակի սրվեցին 1904–1905 թթ.: Ընթանում էր ռուս–ճապոնական պատերազմը, որն ավարտվեց ռուսների պարտությամբ:

1905 թ. հունվարի 9–ին Ս. Պետերբուրգում խաղաղ ցույցի գնդակծմամբ սկսվեց Ռուսաստանյան առաջին հեղափոխությունը: Այն աստիճանաբար տարածվեց տերության բոլոր ծագերում: Հեղափոխականների և կառավարական զորքերի միջև արյունալի ընդհարումներ էին տեղի ունենում: Զոհվեցին հազարավոր մարդիկ:

Սակայն հեղափոխությունը հանգեցրեց նաև դրական արդյունքների: **1905 թ. հոկտեմբերի 17–ին Նիկոլայ II**

Հեղափոխականների երթ
Սանկտ Պետերբուրգում,
1905 թ.



ՆԻԿՈԼԱՅ II
(1868–1918)

Ռուսաստանի վերջին միապետը: Նրա կառավարումը նշանավորված է Ռուսաստանի զարգացմամբ, միևնույն ժամանակ սոցիալ-քաղաքական հակասությունների և հեղափոխական շարժման աճով, ինչը վերաճեց 1905–1907 և 1917 թվականներին հեղափոխությունների:

Նիկոլայ II–ը հրաժարվեց գահից 1917 թ. Փետրվարյան հեղափոխության ժամանակ, ապա արտրվեց Տոբոլսկ: 1918 թ. բոլշևիկների կողմից տեղափոխվեց Եկատերինբուրգ, որտեղ նույն թվականի հուլիսին գնդակահարվեց ընտանիքի և մերձավորների հետ:

Հատվածներ Նիկոլայ II ցարի՝ 1905 թ. հոկտեմբերի 17–ի «Պետական կարգի կառարելագործման մասին» հրովարտակից

1. Շնորհիվ բնակչությանը քաղաքացիական ազատության անսասան սկզբունքները՝ անձի իրական անձեռնմխելիություն, խղճի, խոսքի, հավաքների և միությունների ազատություն:
2. ...Դումային մասնակցությանը ներգրավել... բնակչության այն դասերը, որոնք ներկայումս բոլորովին զրկված են ընտրական իրավունքից...
3. Որպես անսասան կանոն հաստատել՝ ոչ մի օրենք չի կարող ուժ ստանալ առանց Պետական դումայի հավանության: Կոչ ենք անում Ռուսաստանի բոլոր հավատարիմ գավակներին՝ հիշել իրենց պարտքը հայրենիքի աջակցության, օգնել այս չսոված խռովությունը դադարեցնելու և մեզ հետ միասին լարել ողջ ուժերը՝ հարազատ հողի վրա հանգստությունն ու խաղաղությունը վերականգնելու համար:

ցարը հրապարակեց հրովարտակ, որով տերության բոլոր քաղաքացիներին խոստանում էր ժողովրդավարական ազատություններ՝ անձի, խոսքի, հասարակական կազմակերպությունների, կրոնի: Հրավիրվում էր Խորհրդարան՝ **Պետական դումա**: Այսինքն՝ Ռուսաստանը բռնում էր սահմանադրական միապետության ուղին:

Սակայն կային ուժեր, որոնք ավելին էին ուզում: **Դրանց ղեկավարում էին ծայրահեղ մարքսիստները (բոլշևիկներ)՝ Վ. Լենինի գլխավորությամբ**: Իշխանությունը գրավելու նպատակով նրանք ապստամբություն բարձրացրին, բայց պարտվեցին:

1907 թ. կեսերին հեղափոխությունն ավարտվեց: Ռուսաստանում սկսվեցին բարենորոգումներ, որոնք ընթանում էին շատ դանդաղ ու անհետևողականորեն:

Հարցեր և ստուգադրանքներ

1. Զարգացման ինչ ուղիով էին ընթանում ԱՄՆ-ի հյուսիսային և հարավային նահանգները:
2. Որո՞նք էին ԱՄՆ-ի քաղաքացիական պատերազմի պատճառները:
3. Ներկայացրե՛ք ԱՄՆ-ի քաղաքացիական պատերազմի արդյունքները:
4. Ե՞րբ սկսվեց ֆրանս-պրուսական պատերազմը և ինչ հետևանքներ ունեցավ: Ինչո՞ւ տապալվեց Նապոլեոն III-ի անձնիշխանությունը:
5. Ի՞նչ էր Փարիզի կոնուսան: Ե՞րբ է ընդունվել Երրորդ հանրապետության Սահմանադրությունը:
6. Որո՞նք էին Ռուսաստանի հետամնացության պատճառները:
7. Ե՞րբ է սկսվել ու որքան է տևել Ռուսաստանյան առաջին հեղափոխությունը: Ի՞նչ նպատակ էին հետապնդում բոլշևիկներն այս հեղափոխության ժամանակ: Ներկայացրե՛ք հեղափոխության արդյունքները:
8. Փորձե՛ք ինքնուրույն պարզել՝ արդի աշխարհում գոյություն ունի արդյո՞ք ստրկություն:

Գործնական աշխատանք

Աղյուսակի միջոցով ներկայացրե՛ք ԱՄՆ-ի, Ֆրանսիայի և Ռուսաստանի զարգացման ընթացքն ու արդյունքները XIX դարի երկրորդ կեսին և XX դարի սկզբին:

Նոր հասկացություններ, անուններ, արտահայտություններ

Պլանտացիա, Ա. Լինկոլն, ԱՄՆ-ի քաղաքացիական պատերազմ, Նապոլեոն III-ի անձնիշխանություն, 1870-1871 թթ. ֆրանս-պրուսական պատերազմ, Երրորդ հանրապետություն, Փարիզի կոնուսան, ճորտատիրության վերացումը Ռուսաստանում, Ռուսաստանյան առաջին հեղափոխություն, Նիկոլայ II, մարքսիստներ (բոլշևիկներ), Պետական դումա:



ՕՏՏՈՒ ԲԻՍՄԱՐԿ
(1815–1898)

Գերմանիայի նշանավոր պետական գործիչ և դիվանագետ, երկրի միավորման գլխավոր դերակատարը: Նա համոզված էր, որ Գերմանիայի միավորումը պետք է կատարվի ամենաուժեղ գերմանական պետության՝ Պրուսիայի շուրջը: Ուներ երկաթյա կամք: Սկզբունքային էր և համառ իր նպատակների մեջ: Ըստ նրա՝ միասնական Գերմանիայի պետությունը վեր է ամեն ինչից:

Միացյալ Գերմանիայի ստեղծումը


Ինչպես գիտեք, Վիեննայի վեհաժողովի որոշմամբ Գերմանիան մնացել էր պատակաված, իսկ 1848–1849 թթ. հեղափոխությունը չլուծեց նրա վերամիավորման խնդիրը: Սակայն ակնառու դարձավ, որ առանց դրա անհնար է երկրի հետագա զարգացումը:

Վերամիավորման նախադրյալներն առկա էին: Նախ՝ 1850–1860–ական թթ. Գերմանիայում ավարտվեց արդյունաբերական հեղաշրջումը: Աշխուժացել էին տնտեսական կապերը առանձին շրջանների միջև, ձևավորվել էր համագգային շուկա: Այսինքն՝ **Գերմանիան տնտեսապես միավորված էր**: Բուռն ծաղկում էին ապրում համագերմանական մշակույթն ու գիտությունը: Դրանցով էր պայմանավորված գերմանացիների համագգային ինքնագիտակցության ձևավորումը: Գերմանացիները համոզված էին, որ ունեն նույն հայրենիքը, լեզուն, մշակույթը և ազգային շահերը:

Վերամիավորման նախաձեռնողը **Պրուսիան** էր: Պրուսական թագավորությունը դարձել էր գերմանական հողերի սիրտը: Այստեղ շարունակվեցին բարենորոգումները: Հակառակ Ավստրիայի՝ Պրուսիան ձգտում էր բարենորոգել նաև Գերմանական միությունը: Ոգեշնչողը Պրուսիայի վարչապետ **Օ. Բիսմարկն** էր: Նա կարճ ժա-

Հատված Օ. Բիսմարկի «Մտքեր և հուշեր» գրքից

Գերմանական ժողովուրդը և նրա ազգային կյանքը չեն կարող բաժանվել առանձին իշխանությունների միջև՝ որպես մասնավոր սեփականություն... Գերմանական պատմության մեջ առանձին տիրակալ իշխանների տարածքային անկախությունը ձեռք է բերել անընդունակ նշանակություն: Առանձին իշխանատոհմեր, չբացառելով Պրուսիան, գերմանական ժողովրդի նկատմամբ երբեք չեն ունեցել պատմական իրավունք, սեփական շահի համար այն բաժանել են մասնավոր տիրույթների, տիրել ազգային մարմնի առանձին մասերին...



Գերմանիայի միավորումը 1866–1871 թթ.

մանակում Եվրոպայում դարձավ հայտնի քաղաքական դեմք: Բիսմարկը կարծում էր, որ Գերմանիան պետք է վերամիավորվի զենքի միջոցով՝ ասպարեզից հեռացնելով բոլոր հակառակորդներին: «Գարաշրջանի հիմնահարցերը վճռվում են ոչ թե ճառերով և քվեարկությամբ, այլ երկաթով և արյամբ». ահա նրա հավատամքը: Դա ուղղված էր առաջին հերթին Ավստրիայի և Ֆրանսիայի դեմ:

1866 թ. պրուսական բանակը ջախջախեց Ավստրիային: Ստանալով գործելու ազատություն՝ Բիսմարկը ստեղծեց Հյուսիսգերմանական միությունը՝ բաղկացած 22 պետությունից: Դա Գերմանիայի փաստացի վերամիավորումն էր: Սակայն դեռ անհրաժեշտ էր հաղթահարել Ֆրանսիայի դիմադրությունը:

1870–1871 թթ. ընթացավ Ֆրանս-պրուսական պատերազմը: Այս անգամ ևս պրուսական բանակի հաղթանակը կատարյալ էր: Կնքված հաշտությամբ Ֆրանսիան ճանաչեց Գերմանիայի վերամիավորումը և վճարեց մեծ ռազմատուգանք:

1871 թ. հունվարի 18-ին Փարիզից ոչ հեռու գտնվող Վերսալի դղյակում հանդիսավորությամբ հռչակվեց



Գերմանական տերության խորհրդանիշերից մեկը՝ Բրանդենբուրգյան դարպասները, մայրաքաղաք Բեռլինում



ՋՈՒՋԵՊԵ ԳԱՐԻԲԱԼԻԻ
(1807-1882)

Իտալիայի ազատագրական պայքարի նշանավոր գործիչ, ազգային հերոս: 1833 թ. դառնում է «Երիտասարդ Իտալիա» կազմակերպության անդամ: 1834 թ. ապստամբությանը մասնակցելու համար դատապարտվում է մահապատժի: Մակայն կարողանում է փախչել:

1848-1849 թթ. ազգային հեղափոխության հերոսն էր: Հեղափոխության պարտությունը նրան չի ընկճում:

1860 թ. նրա «կարմիր շապկավորների հազարյակը» կարողանում է ազատագրել Իտալիայի հարավը, ինչը բեկումնային է լինում երկրի միավորման գործում: Գաբիբալդին ոչ միայն իտալացիների, այլև բոլոր ճշված ժողովուրդների, այդ թվում՝ հայերի համար հերոսի կերպար էր և լեգենդ: Նրան մեծարել են Մ. Նալբանդյանը, Ա. Իսահակյանը և այլք:

Գերմանական կայսրության ստեղծումը: Հետագայում ընդունվեց **Սահմանադրություն**, որով ամրագրվում էր նրա **դաշնային** կառուցվածքը՝ 22 պետություն և երեք ազատ քաղաք: Դրանցից յուրաքանչյուրն ուներ իր տեղական սահմանադրությունը: Համագերմանական գործադիր իշխանությունը պատկանում էր կայսրին: Նա երկիրը ղեկավարում էր համագերմանական միակ նախարարի՝ **կանցլերի** միջոցով: Տերության բարձրագույն օրենսդիր մարմինը խորհրդարանն էր՝ **Ռայխստագը**: Այլ խոսքով՝ **Գերմանիան դարձավ սահմանադրական միապետություն**:

Գերմանական միասնական պետության ստեղծումը մեծապես նպաստեց երկրի զարգացմանը: Ընդունվեցին բազմաթիվ օրենքներ, որոնք ամրապնդում էին երկրի ազգային և պետական միասնությունը: Բարելավվեց հասարակական կյանքը: Մտցվեց ընդհանուր ընտրական իրավունք (չափահաս տղամարդկանց համար): Գործում էին բազմաթիվ կուսակցություններ և հասարակական կազմակերպություններ: Կրճատվեց աշխատանքային օրը: Աշխարհում առաջինը Գերմանիայում մտցվեց ապահովագրություն ծերության, հիվանդության և դժբախտ պատահարների համար:

Վերամիավորումն առաջ բերեց տնտեսության աննախընթաց զարգացում հատկապես ծանր արդյունաբերության մեջ: Ներդրվում էին գիտության նորագույն նվաճումները: 1913 թ. արդյունաբերական զարգացմամբ Գերմանիան աշխարհում զբաղեցնում էր երկրորդ տեղը՝ ԱՄՆ-ից հետո:

Իտալիայի վերամիավորումը

Վիեննայի վեհաժողովի որոշմամբ Իտալիան նույնպես մնացել էր մասնատված: Նրա հյուսիսային շրջանները Ավստրիայի տիրապետության տակ էին: Ուստի Իտալիայի վերամիավորման պայքարն ուներ նաև ազգային-ազատագրական բովանդակություն:

Երկրում ստեղծվել էին գաղտնի ընկերություններ, որոնք ղեկավարում էին պայքարը: Դրանցից էր **Երիտասարդ Իտալիան**: Ինչպես գիտեք, 1848-1849 թթ. իտալա-

կան ազգային հեղափոխությունը պարտվեց: Սակայն ազգային վերամիավորման և առաջադիմության համար պայքարը չմարեց:

1850–1860–ական թթ. երկրի վերամիավորման նախադրյալներն ակներն էին: Իտալիայում ծավալվում էր արդյունաբերական հեղաշրջումը: Տնտեսության տարբեր բնագավառներում նկատվում էին արմատական տեղաշարժեր: Աշխուժանում էին կապերը երկրի տարբեր շրջանների միջև: **Կազմավորվում էր համազգային շուկան:** Ավելի տպավորիչ էին նշակութային ձեռքբերումները՝ երաժշտություն, գրականություն, գեղանկարչություն: Ամրապնդվում էր ազգային ինքնագիտակցությունը: Իտալացիները այդ ամենն անվանում էին **Վերածնություն (Ռիսորջիմենտո):** Այս բոլորն անխուսափելի դարձրին միասնական պետության ստեղծումը:

Ազգային վերամիավորման դրոշակակիրը դարձավ **Սարդինական թագավորությունը**, որը, դաշինք կնքելով Նապոլեոն III–ի հետ, պատերազմ սկսեց Ավստրիայի դեմ: Դա առաջ բերեց համազգային խանդավառություն: Իտալական մյուս պետությունները միացան պայքարին: Սկսվեց կանավորական մեծ շարժում:

Ազգային հերոս **Ջ. Գարիբալդին** 1860 թ. իր գորաջուկատու ավի իջավ Սիցիլիայում և կարճ ժամանակում ազատագրեց Իտալիայի ողջ հարավը:

1861 թ. հրավիրվեց համաիտալական խորհրդարանը, որը **հռչակեց Իտալական թագավորության ստեղծումը:** Սակայն Հռոմը և Վենետիկը դեռևս դրա կազմում չէին: Առաջինի վերամիավորմանը խոչընդոտում էր Հռոմի պապը, իսկ երկրորդը շարունակում էր մնալ Ավստրիայի տիրապետության ներքո:

Ավստրիայի՝ Պրուսիայից կրած պարտությունը (1866 թ.) նպաստավոր պայմաններ ստեղծեց Վենետիկի ազատագրման համար: Իսկ **Հռոմն Իտալիային միացավ և մայրաքաղաք հռչակվեց** ֆրանս–պրուսական պատերազմից հետո՝ **1871 թ.:** Դա Իտալիայի վերամիավորման հարյուրամյա պայքարի ավարտն էր:

1871 թ. իտալական պետությունը ճանաչեց պապին՝ իբրև աշխարհի կաթոլիկների հոգևոր առաջնորդ: Նրա նստավայր **Վատիկանը** ստացավ ինքնիշխանություն:



ՎԱՏԻԿԱՆ

Տարածքով ամենափոքր պետությունն է (44 հա): Տեղակայված է Իտալիայի մայրաքաղաք Հռոմի շրջագծում: Գերագույն իշխանությունը պատկանում է աշխարհի բոլոր կաթոլիկների հոգևոր առաջնորդ Հռոմի պապին: Պետության կարգավիճակը վերջնականորեն հաստատվել է 1929 թ. հատուկ հրովարտակով: Հարուստ է ճարտարապետական հուշարձաններով՝ կերտված Վերածննդի խոշորագույն վարպետների մտանդացմամբ՝ Ռաֆայել, Միքելանջելո, Բեռնինի: Կենտրոնը Պապական պալատն է և Ս. Պետրոսի կաթողիկե տաճարը:

Իտալիան նույնպես **սահմանադրական միապետություն էր**: Գործադիր իշխանությունը ներկայացնում էին թագավորը և նախարարների խորհուրդը, իսկ օրենսդիր իշխանությունը՝ համաիտալական Խորհրդարանը: Հռչակվեցին ժողովրդավարական ազատություններ՝ քաղաքացիների իրավահավասարություն, սեփականության անձեռնմխելիություն, մամուլի և ժողովների ազատություն:

Վերամիավորումից հետո Իտալիան նույնպես բռնեց զարգացման ուղին: Ավարտվեց արդյունաբերական հեղաշրջումը: Զարգացան տնտեսության զանազան ճյուղեր: Իտալական ապրանքներն արտահանվում էին աշխարհի շատ երկրներ: XX դ. սկզբին երկրում արդեն առկա էր զարգացած արդյունաբերական հասարակություն: Միջազգային հարաբերություններում Իտալիան ազդեցիկ դեր ուներ:

Հարցեր և առաջադրանքներ

1. Ի՞նչ նախադրյալներ կային Գերմանիայի միավորման համար:
2. Գերմանական պետություններից ո՞րը գլխավորեց նրա միավորումը: Ի՞նչ միջոց ընտրվեց դրա համար: Ներկայացրե՞ք Օ. Բիսմարկի պատմական կերպարը:
3. Ինչո՞ւ է անհրաժեշտ ազգային պետության ստեղծումը: Փաստարկե՞ք Ձեր պատասխանը Գերմանիայի օրինակով:
4. Ի՞նչ է Վերածնությունը:
5. Իտալական ո՞ր պետությունը գլխավորեց ազգային միավորման գործընթացը: Ներկայացրե՞ք Ջ. Գարիբալդիի դերը Իտալիայի միավորման գործում:
6. Ե՞րբ ավարտվեց Իտալիայի միավորումը: Ի՞նչ նշանակություն ունեցավ այն:

Գործնական աշխատանք

Համեմատե՞ք Գերմանիայի և Իտալիայի միավորման գործընթացները և արդյունքները:

Նոր հասկացություններ, անուններ, արտահայտություններ

Հյուսիսգերմանական միություն, Օ. Բիսմարկ, կանցլեր, «երկաթով և արյամբ», Գերմանական կայսրություն, Ռայխստագ, Վերածնություն (Ռիսորջիմենտո), Երիտասարդ Իտալիա, Ջ. Գարիբալդի, Իտալական թագավորություն, Վատիկան:

20

ԱԶԳԱՅԻՆ ՊԵՏՈՒԹՅՈՒՆՆԵՐԻ ԱՌԱՋԱՅՈՒՄԸ ԲԱԼԿԱՆՅԱՆ ԹԵՐԱԿՂԶՈՒՄ

Բալկանյան ժողովուրդները Օսմանյան կայսրության կազմում

Նոր դարերի առաջին փուլում Բալկանյան թերակղզու ժողովուրդների մեծ մասը շարունակում էր մնալ օսմանյան դաժան տիրապետության տակ: Մնացած մասը Ավստրիայի տիրապետության ներքո: Բռնի ուժի և իսլամի գաղափարախոսության վրա հենվող հետամնաց Օսմանյան կայսրությունը կասեցրեց բալկանյան ժողովուրդների՝ **սերբեր, հույներ, բուլղարներ, ալբանացիներ, ռումիններ** և այլն, զարգացումը: Նրանք ենթարկվում էին ազգային և կրոնական հավաճանքների: Բազմաթիվ հարկեր էին վճարում, ծանր էր հատկապես գյուղացիության վիճակը: Խզվել էին այդ ժողովուրդների բազմաթիվ կապերը հավատակից քրիստոնյա եվրոպայի հետ: Այնժամ, երբ եվրոպական առաջատար երկրներում ձևավորվում էր արդյունաբերական հասարակություն, Օսմանյան կայսրության հպատակ ժողովուրդները գրկված էին առաջադիմելու և արժանապատիվ կյանքով ապրելու հնարավորությունից:

Ահա թե ինչու թուրքական նվաճման պահից սկսած՝ բալկանյան ժողովուրդները պայքարում էին իրենց անկախության վերականգնման և ազգային պետության ստեղծման համար: Նրանք հերոսաբար կռիվներ էին մղում թուրքական տիրապետությունը թոթափելու համար, սակայն մինչև XIX դարի սկիզբը էական հաջողությունների չհասան: Ժողովուրդների ազատատենչ ոգին բարձր էր պահում մեծ տարածում գտած **հայդուկային շարժումը**: Հայդուկները այն մարդիկ էին, ովքեր միայնակ կամ փոքր խմբերով, սարերում ու անտառներում պատսպարվելով, կռվում էին իրենց հայրենիքի թշնամիների դեմ: Նրանք վրիժառուական գործողություններ էին իրականացնում հատկապես թուրք պաշտոնյաների



Հունաստանի ազատագրության համար պայքարող «Ֆիլիկի հեռերիա» կազմակերպության զինանշանը

հանդեպ: Հայդուկային շարժումը, ինչպես գիտեք, տարածվեց նաև հայկական միջավայրում:

Բալկանյան ժողովուրդները, հատկապես սլավոնները, իրենց ազատագրական պայքարում աջակցություն ստացան հզորացող Ռուսաստանից: Վերջինս XVIII դ. երկրորդ կեսից հաղթական պատերազմներ էր մղում Օսմանյան կայսրության դեմ և նպատակ ուներ ամրապնդվելու այս տարածաշրջանում: Լուսավորական գաղափարների և Ֆրանսիական մեծ հեղափոխության ազդեցությունը շուտով հասավ Բալկանյան թերակղզի, ինչը նույնպես նպաստեց տեղի ժողովուրդների ազատագրական պայքարի վերելքին: Պայքարի բովում ամրապնդվում էին նրանց ազգային ինքնագիտակցությունը և հավատը հաղթանակի հանդեպ: Մոտենում էր նրանց ազատության ժամը:

Սերբիայի, Ռումինիայի և Բուլղարիայի անկախության նվաճումը

Նախորդ բաժնից իմացաք, որ Բալկանյան թերակղզում առաջինն իր անկախությունը վերականգնեց եվրոպական քաղաքակրթության բնօրրան Հունաստանը (1830 թ.): Դա ոգևորեց թուրքական տիրապետության տակ գտնվող բալկանյան մյուս երկրներին:

Անկոտրում կամք և հավատ ցուցաբերեցին սերբերը: XIX դ. սկզբի հաղթական ապստամբության արդյունքում **Սերբիան** 1830 թ. դարձավ **ինքնավար իշխանություն**՝ Օսմանյան կայսրության կազմում: Դրանից հետո ավելի կազմակերպված բնույթ ստացավ անկախացման



1878 թ. Բեռլինի վեհաժողովը

գործընթացը: Ռուսաստանի պահանջով թուրքական կայսզորները դուրս բերվեցին Սերբիայից: Երկրի ժողովրդավարացման համար կարևոր նշանակություն ունեցավ 1869 թ. ընդունված Սահմանադրությունը:

Օսմանյան տերության սահմանները հասնում էին Դանուբ գետի ձախափնյա տարածքները: Այստեղ վաղուց ձևավորվել էին երկու ինքնավար իշխանություններ՝ **Վալախիան** և **Մոլդովան**: Նրանց իրավունքները, սակայն, մշտապես ոտնահարվում էին թուրքական սուլթանների կողմից: Համառ պայքարի շնորհիվ այս երկու իշխանությունները 1859–1861 թթ. միավորվեցին և ստեղծեցին նոր պետություն՝ **Ռումինիան**: Նա դեռ լիովին անկախ չէր՝ մի որոշ ժամանակ մնաց սուլթանի գերիշխանության տակ:

Անկախության ուղին մեծ դժվարություններով անցավ **Բուլղարիան**: Այստեղ ուժեղ էր հայդուկային շարժումը: Բուլղարները ժամանակին օգնել էին հույներին: 1869 թ. ստեղծվեց պայքարի հեղափոխական կոմիտե, որի ազդեցությունը շուտով տարածվեց ամբողջ երկրում: **1876 թ.** բռնկվեց բուլղարների խռչող ապստամբությունը: Մեծ տերությունները սուլթանից պահանջեցին ինքնավարություն տալ Բուլղարիային: Սուլթանը մերժեց: Այդ նույն ժամանակ ոտքի էին կանգնել նաև սերբերը, չեռնոգորիացիները և բոսնիացիները: Թուրքական իշխանությունները ճնշեցին այդ ապստամբությունները՝ իրականացնելով նաև ցեղասպանական գործողություններ սլավոնների նկատմամբ:

Ռուսաստանը, որ համարվում էր թուրքերի գլխավոր թշնամին և սլավոնների գլխավոր պաշտպանը, **1877 թ. ապրիլին** պատերազմ հայտարարեց Օսմանյան կայսրությանը: Ռուս–թուրքական այս պատերազմը մեծ նշանակություն ունեցավ բալկանյան երկրների ազատագրման գործում:

Ռազմական գործողություններն ընթացան երկու ճակատներում (վերիիշե՞ք նաև Հայոց պատմության համապատասխան դասը): Ռուսական բանակը **Բալկանյան** ճակատում ջախջախեց թշնամուն, ազատագրեց Բուլղարիան և ընդհուպ մոտեցավ Կոստանդնուպոլսին: Իսկ



ՄԿԳՏԻՉ ԽՐԻՄՅԱՆ
(1820–1907)

Եկեղեցական–քաղաքական գործիչ, 1892 թ. ընտրվել է Ամենայն հայոց կաթողիկոս: Պայքարել է հայոց ազգային վերածննդի և ինքնիշխանության համար: Դիմել է պայքարի տարբեր միջոցների՝ լուսավորության տարածում, գինյալ խմբերի կազմակերպում, դիվանագիտական բանակցությունների վարում: 1877–1878 թվականներին պատերազմում թուրքերի պարտությունից հետո դիվանագիտական առաքելությամբ այցելել է Հռոմ, Փարիզ, Լոնդոն: Այնուհետև ժամանել է Բեռլին՝ վեհաժողովին մասնակցելու մտադրությամբ, բայց ապարդյուն:

Բուլղարիայի տարածքը երկատվեց: **Հյուսիսային Բուլղարիան** դարձավ ինքնիշխան պետություն: Հարավային մասը ստացավ ինքնավարություն և մնաց սուլթանի գերիշխանության տակ: Ռուսաստանին անցավ Հայաստանի մի մասը՝ Կարս կենտրոնով, ինչպես նաև Բաթում նավահանգստային քաղաքը:

Բալկանյան երկրների անկախության գործընթացի ավարտը

Բեռլինի վեհաժողովից հետո շարունակվեց բալկանյան ժողովուրդների անկախության գործընթացը: Մի քանի տարի անց միավորվեց երկատված Բուլղարիան: Ավստրո-Հունգարիան Օսմանյան կայսրությունից **1908 թ.** բռնազավթեց Բոսնիայի և Հերցեգովինայի տարածքը: Բուլղարիան, օգտվելով հարմար պահից, հայտարարեց իր լիակատար անկախության մասին:

Բալկանյան նորանկախ պետությունների միջև շուտով ի հայտ եկան տարածքային հակասություններ: Սակայն Հունաստանը, Սերբիան, Բուլղարիան և Չեռնոգորիան ստեղծեցին ռազմական դաշինք ու **1912 թ. հոկտեմբերին** պատերազմ սկսեցին Օսմանյան կայսրության դեմ: Գլխավոր նպատակն էր թուրքերին դուրս վճռել Եվրոպայից: Այսպես կոչված **Բալկանյան առաջին պատերազմում** նրանք ջախջախեցին թշնամուն և հասան իրենց գլխավոր նպատակին: Կարևոր արդյունքներից մեկն այն էր, որ պաշտոնապես ճանաչվեց **Ալբանիայի** անկախությունը:

Սակայն դաշնակիցների միջև լուրջ խնդիրներ ծագեցին թուրքերից խլված տարածքների բաժանման ժամանակ: Արդյունքում՝ **1913 թ. ամռանը** սկսվեց **Բալկանյան երկրորդ պատերազմը**՝ Բուլղարիայի և նրա երեկվա դաշնակիցներ Հունաստանի ու Սերբիայի միջև: Վերջիններին միացան նաև Ռումինիան և Թուրքիան: Բուլղարական բանակը մի քանի օր միայն կարողացավ դիմադրել: Արդյունքում՝ տարածքային ձեռքբերումներ ունեցան Հունաստանը, Սերբիան և Ռումինիան: Իսկ թուրքերին հաջողվեց կառչած մնալ Եվրոպային՝ պահելով մի փոքր տարածք՝ Ադրիանուպոլիս կենտրոնով:

Հայկական «Մշակ» թերթը Բալկանյան ժողովուրդների ազատագրական պայքարի մասին

Արդեն մի ամբողջ տարի է, ինչ Բալկանյան թերակղզու քրիստոնյա ազգը գենքը ձեռքին պայքարում է իր ազատության համար... Նրանք գերադասում են մեռնել կրվի դաշտում, քան նորից ընկնել թուրքական տիրապետության լծի տակ, ուր մարդը գրկված է անենատարրական իրավունքներից: Դա մի պատերազմ է, որ մղվում է ոչ միայն ապստամբ քրիստոնյա ժողովուրդների գոյության պաշտպանության համար, այլ քաղաքակրթության պատերազմ բարբարոսության դեմ:

1876 թ. հուլիսի 1

Բալկանյան ժողովուրդների **անկախության գործընթացն իր լիակատար ավարտին հասավ** միայն Առաջին աշխարհամարտից հետո:

Բալկանյան երկրներն անկախության շնորհիվ կրկին Եվրոպայի մաս կազմեցին: Աշխուժացան և զարգացան նրանց հասարակական կյանքի տնտեսական, քաղաքական, սոցիալական և մշակութային ոլորտները: Աստիճանաբար ծավալվեց արդիականացման գործընթացը:

Այսպես՝ ազգային այդ նոր պետություններում սկսեց ձևավորվել արդյունաբերական հասարակություն:

Հարցեր և առաջադրանքներ

1. Վերհիշե՛ք, թե երբ և ինչպես բալկանյան երկրները հայտնվեցին Օսմանյան կայսրության կազմում: Ներկայացրե՛ք դրա հետևանքները:
2. Ովքե՛ր էին հայդուկները:
3. Որո՞նք էին բալկանյան ժողովուրդների ազատագրական պայքարի վերելքի պայմանները XIX դարում:
4. Ե՛րբ են օսմանյան լծից ազատագրվել Սերբիան, Ռումինիան և Բուլղարիան: Նրանցից որի՞ անկախացումն էր ավելի տևական ու դժվար:
5. Որո՞նք էին 1877–1878 թթ. ռուս–թուրքական պատերազմի պատճառները: Ներկայացրե՛ք դրա հիմնական արդյունքները:
6. Ե՛րբ են տեղի ունեցել Բալկանյան առաջին և երկրորդ պատերազմները: Նշե՛ք դրանց պատճառները և արդյունքները:
7. Ե՛րբ է ավարտվել Օսմանյան կայսրությունից բալկանյան ժողովուրդների անկախացումը: Ի՞նչ նշանակություն ունեցավ ազգային պետությունների ստեղծումը նրանց համար:

Քննարկման հարց

Ինչո՞ւ վերանայվեց Սան Ստեֆանոյի պայմանագիրը:

Նոր հասկացություններ, անուններ

Հայդուկ, Ռումինիա, Չեռնոգորիա, 1877–1878 թթ. ռուս–թուրքական պատերազմ, Սան Ստեֆանոյի և Բեռլինի պայմանագրեր, Հայկական հարց, Ալբանիա, Բալկանյան առաջին և երկրորդ պատերազմներ:

21

ԱԶԳԱՅԻՆ ՀԻՄՆԱԽՆԴԻՐԸ
ԲԱԶՄԱԶԳ ՏԵՐՈՒԹՅՈՒՆՆԵՐՈՒՄ

Բազմազգ պետություն

Միջնադարի պատմությունից գիտեք, որ Եվրոպայում ստեղծվեցին առաջին ազգային պետությունները՝ Անգլիա, Ֆրանսիա և այլն: Նոր դարերում այս գործընթացը ծավալվեց ոչ միայն Եվրոպայում, այլև Ամերիկայում, առաջացան բազմաթիվ **նոր ազգային պետություններ** (վերհիշե՛ք Նախորդ դասերը): Ազգերի գիտակցության մեջ անրակայվում էր **հայրենիքի** գաղափարը: Հայրենիքը ոչ միայն հոգևոր իմաստ ուներ, այլև ներկայանում էր որպես որոշակի պատմաաշխարհագրական տարածք: Ազգերը այն ժամանակներում, ինչպես և մեր օրերում, ձգտում էին իրենց հայրենիքում ապրելու անկախ և ազատ օտարի տիրապետությունից ու ճնշումներից: Նրանք ուզում էին ինքնուրույն տնօրինել իրենց կյանքը, իրենց հայրենիքում ստեղծել սեփական պետություն ու զարգանալ: Եվ դա բնական երևույթ էր, այնպիսին, ինչպիսին որ նարդիկ պայքարում էին ժողովրդավարական իրավունքների և ազատ ու արդար հասարակությունում ապրելու համար: Ազատության և անկախության ազգերը հասնում էին համատ պայքարի, հավաքական կամքի դրսևորման ու հաճախ մեծ զոհողությունների գնով:

Նոր ժամանակներում ազգային պետությունների կողքին գոյություն ունեին նաև **բազմազգ պետություններ**: Բազմազգ տերության բնորոշ կողմն այն էր, որ տիրապետող ազգի գերիշխանության ներքո կային տասնյակ նվաճված ազգեր և ժողովուրդներ: Ճիշտ է, նրանք ապրում էին իրենց հայրենիքներում, սակայն ենթարկվում էին ազգային ու կրոնական խտրականության: Բնականաբար, ճնշված ազգերը պայքարում էին իրենց իրավունքների համար և գլխավոր նպատակ դնում անկախության հասնելը:

Բազմազգ պետությունները սովորաբար կոչվել են կայսրություններ կամ տերություններ: Նոր դարերում այդ-



ՖՐԱՆՑ ՅՈՋԵՖ I
(1830-1916)

Ավստրիայի ամենաերկար կառավարած կայսրը՝ Հաբսբուրգների տոհմից: Իշխանության է եկել 1848 թ., երբ սողեցնում էր հեղափոխությունը: Գնացել է զինամեծան կերպով: Մեկը մյուսին հետևեցին արտաքին քաղաքական անհաջողությունները: Ավստրիան կարիք ուներ բարենորոգումների, և 1860-1870 թվականներին կայսրը ծավալուն բարենորոգումներ ձեռնարկեց:

պիսի տերություններ էին **Ռուսաստանը, Ավստրո-Հունգարիան և օսմանյան Թուրքիան:**

Ավստրո-Հունգարիա երկմիասնական պետության առաջացումը

Նոր դարերում Ավստրիական բազմազգ միապետությունը դասվում էր հզոր պետությունների շարքին: **1804 թ.** այն հռչակվեց **կայսրություն՝** ի հակակշիռ Նապոլեոնի կայսրության: Երկրում տիրապետող ազգը ավստրիական **գերմանացիներն** էին՝ Հաբսբուրգների հարստության կայսրերի գլխավորությամբ: Բուն Ավստրիայից բացի՝ նրա կազմի մեջ էին **Հունգարիան, Չեխիան, Խորվաթիան, Սլովակիան,** ինչպես նաև իտալական, լեհական և սերբական որոշ տարածքներ:

Հաբսբուրգների տիրապետության տակ գտնվող ազգերը ձգտում էին անկախության: Պայքարի տոն տվողները հունգարները և իտալացիներն էին, որոնք 1848-1849 թթ. ազգային հեղափոխություն ծավալեցին: Ռուսաստանի ռազմական օգնության շնորհիվ միայն Ավստրիան չտրոհվեց: Սակայն կայսրությունը զգալիորեն թուլացավ: Երկրում չդադարեցին ազգային շարժումները: Միջազգային ասպարեզում նա հայտնվեց մեկուսացված վիճակում, իսկ 1866 թ. Պրուսիայի դեմ պատերազմում ջախջախիչ պարտություն կրեց:

Այս իրավիճակում Հաբսբուրգները կայսրությունը փրկելու նպատակով համաձայնության եկան հունգարական վերնախավի հետ: **1867 թ.** ընդունվեց **Սահմանադրություն,** որով Ավստրիական կայսրությունը վերածվեց երկմիասնական կայսրության՝ **Ավստրո-Հունգարիա** անունով: Այն սահմանադրական միապետություն էր, ուներ դաշնային կառուցվածք՝ բաղկացած **Ավստրիա** և **Հունգարիա** մասերից: Տերության գլուխ կանգնած էր ավստրիական կայսրը, որը միաժամանակ նաև Հունգարիայի թագավորն էր: Ընդհանուր էին միայն համակայսերական բանակը, ֆինանսների և արտաքին գործերի նախարարությունները: Մնացած հարցերում նրանք ինքնուրույն էին, յուրաքանչյուրն ուներ իր խորհրդարանը և կառավարությունը:

Ավստրիական իշխող վերնախավը հույս ուներ այդ քայլով պահպանելու կայսրության ամբողջականությունը: Որոշ իրավունքներ տրվեցին նաև ենթակա մյուս ազգերին, հատկապես՝ մշակութային և կրոնական հարցերում: Սակայն հունգարներին արտոնյալ կարգավիճակ տալը խթանեց սլավոնների ազատագրական պայքարը:

XIX դ. վերջերին երկմիասնական կայսրությունը մեծ առաջընթաց ունեցավ տնտեսական և սոցիալական ոլորտներում: Ձևավորվում էր արդյունաբերական հասարակություն, բարելավվում էին մարդկանց կյանքի պայմանները, փոխվում էր նրանց ապրելակերպը: Սակայն ազգային հիմնախնդիրը այդպես էլ չլուծվեց, շարունակվեց ճնշված ազգերի անկախության համար պայքարը: Առաջին աշխարհամարտի ավարտին երկմիասնական կայսրությունը դադարեց գոյություն ունենալուց:



Ավստրո-Հունգարիայի
1867 թվականի զինանշանը

Ռուսաստանյան կայսրությունը

Ռուսաստանը կայսրություն էր հռչակվել Պյոտր Մեծի կողմից դեռ **1721 թ.**: Դրանից հետո այն, շարունակաբար ընդարձակվելով, դարձավ աշխարհում ամենամեծ կայսրությունը: Ռուսաստանի սահմանները XIX դ. վերջին Արևելյան Եվրոպայից հասնում էին մինչև Խաղաղ օվկիանոս, Սառուցյալ օվկիանոսից մինչև Իրան և



Ալեքսանդր III կայսեր արձանը Սանկտ Պետերբուրգում՝ որպես ռուսական կայսերական հզորության մարմնացում



Ռուսաստանյան կայսրությունը 1796-1914 թթ.

Հնդկաստան: Այստեղ ապրում էին հասարակական զարգացման տարբեր մակարդակ ունեցող բազմաթիվ ազգեր ու ժողովուրդներ:

Տիրապետող ազգը **ռուսներն** էին, որոնք կազմում էին կայսրության **բնակչության շուրջ 43 տոկոսը**: Սլավոնական մյուս ժողովուրդները՝ ուկրաինացիները և բելառուսները, զարգացման համեմատաբար տանելի պայմաններում էին: Ճիշտ է, նրանք չունեին ինքնավարություն, բայց ռուսների հետ միասին կազմում էին բնակչության գերակշիռ մասը:

Իրենց հասարակական զարգացմամբ նրանք, սակայն, զգալիորեն հետ էին եվրոպական ազգերից: Դրա գլխավոր պատճառը **անսահմանափակ միապետությունն** էր: Երկար ժամանակ պահպանվում էր ճորտատիրությունը, և արդյունաբերական հասարակություն սկսեց ձևավորվել միայն XIX դ. վերջերից: Տերության տարբեր մասերի, հատկապես ծայրամասային շրջանների միջև թույլ էին տնտեսական կապերը, անբավարար էին հաղորդակցության արդիական միջոցները: Ահա թե ինչու կայսրության միասնականությունը պահպանվում էր ահռելի չափերի հասած պետական ապարատի և ռազմական ուժի շնորհիվ: Մշտական էին դարձել ազգային ու կրոնական ճշումները:

XIX դարում սկսեց ծավալվել ենթակա երկրների ու ազգերի ազատագրական պայքարը: Անկախության վերականգնման համար բազմիցս ապստամբեց երբեմնի հզոր **Լեհաստանը**, ինքնավարության համար տևական պայքար սղեցին **Ֆինլանդիան** և **Ուկրաինան**:

Ինչպես գիտեք, XIX դ. սկզբներին Ռուսաստանը դուրս մղեց Իրանին և ավարտեց Այսրկովկասի նվաճումը: **Արևելյան Հայաստանը**, **Վրաստանը** և **մահմեդական խանությունները** (ներկայիս Ադրբեջանի տարածքում) դրվեցին ռուսական վարչակարգի անմիջական կառավարման ներքո: Ազգային գործոնը անտեսելով՝ կատարվեց **անարդար սահմանաբաժանում**, ստեղծվեցին նահանգներ և մարզեր: Դրանցից կազմավորվեց **Կովկասի փոխարքայությունը**՝ Թիֆլիս կենտրոնով: Այն ազգային ինքնավարություն չէր, այլ կայսրության վարչական առանձին միավոր: Առավել զարգացած էին Թիֆլիսը և Բաքուն: Դրանցում ապրում էին մեծ թվով հայեր, ովքեր լուրջ հաջողությունների հասան տնտեսության և մշակույթի տարբեր ասպարեզներում, ամենամեծ ներդրումն ունեցան այդ քաղաքների զարգացման գործում:

Ցարական կայսրության կազմում էր նաև **Միջին Ասիան**, որի նվաճումն ավարտվեց միայն XIX դ. երկրորդ կեսին: Տեղի մահմեդական ժողովուրդները՝ դազախները, ուզբեկները, թուրքմենները, դրդըզները, տաջիկները, ապրում էին ավանդական ներփակ ապրելակերպով և դուրս էին մնացել արդիականացման գործընթացից:

Կայսրության նվաճած ազգերը չունեին իրենց ներքին կյանքի (լեզու, մշակույթ, դպրոց, կրոն) կառավարման անխափստ իրավունքներ: Եթե մշակութային կամ կրոնական որոշ իրավունքներ էին տրվում, ապա դրանք պարբերաբար ոտնահարվում էին կամ վերացվում, ինչպես, օրինակ՝ հայերի պարագայում: Ռումանովների մեծապետական վարչակարգը շարունակաբար վարում էր ոչ ռուս ազգերի ռուսացման քաղաքականություն: Ռուսաստանը, ինչպես նաև Ավստրո-Հունգարիան պատկերավոր անվանում էին **«ժողովուրդների բանտ»**: Այդ պատճառով ավելի ուժեղացավ ճնշված ազգերի անկախության ձգտումը:

Այդուհանդերձ, ռուսական գերիշխանությունն ունեցավ նաև որոշ դրական արդյունքներ: Շատ ժողովուրդ-



ԱԼԵԿՍԱՆԴՐ ՄԱՆԹԱՅԱՆՑ
(1842-1911)

Հայ խոշոր ձեռներեց և բարերար էր: Հարստության հիմքը Բաքվի սավթահորերն էին և սավթամշակման գործարանները: Զբաղվել է բարեգործությամբ, միջոցներ է տրամադրել ազգային, եկեղեցական, մշակութային, կրթական հաստատություններին: Նրա կյոթական օժանդակությամբ բարձրագույն կրթություն են ստացել հարյուրավոր հայ երիտասարդներ: Նախատեսում էր հիմնել ազգային համալսարան և հայագիտական ակադեմիա: 1895 թ. ընտրվել է «Կովկասի հայոց բարեգործական ընկերության» պատվավոր նախագահ: Սիրում էր կրկնել. «Իմ ունեցվածքը վերջին հաշվով ազգիս ունեցվածքն է»:

ներ Ռուսաստանյան կայսրության արդիականացման գործընթացի միջոցով ծանոթացան արդյունաբերական հասարակության ձեռքբերումներին՝ երկաթուղի, ավտոմեքենա, էլեկտրականություն, տրամվայ, հեռահաղորդակցում և այլն:

Բազմազգ կայսրության ժողովուրդներն իրենց ազատագրության հույսերը կապում էին Ռուսաստանի ժողովրդավարացման հետ: Կայսրության ներքին կյանքի հիմնախնդիրները, այդ թվում՝ ազգայինը, ժամանակին չլուծվեցին: Այդ պատճառով Ռուսաստանյան կայսրությունը 1917 թվականի փետրվարին անկում ապրեց:

Այսպիսով՝ ազգային հարցը բազմազգ կայսրությունների համար մնաց անլուծելի հիմնախնդիր, և նոր դարերի ավարտին նրանք կործանվեցին:

Հարցեր և առաջադրանքներ

1. Վերհիշե՛ք, թե ինչ է ազգային պետությունը: Ինչո՞ւ են բոլոր ազգերը ձգտում ունենալու անկախ պետություն:
2. Ընդհանուր կողմերով բնութագրե՛ք բազմազգ պետությունը: Նշե՛ք Ձեզ հայտնի մի քանի բազմազգ պետություն:
3. ԹՎարկե՛ք Ավստրիական կայսրության կազմում մտնող երկրներն ու ժողովուրդներին:
4. Ո՞րն էր Ավստրո-Հունգարիա երկմիասնական տերության ստեղծման պատճառը: Ե՞րբ է այն առաջացել և ի՞նչ կառուցվածք ուներ:
5. Ե՞րբ է ստեղծվել Ռուսաստանյան կայսրությունը: ԹՎարկե՛ք այդ կայսրությունում ապրող ազգերի և ժողովուրդների:
6. Ներկայացրե՛ք ռուսական գերիշխանության բացասական և դրական կողմերը Ռուսաստանում ապրող ազգերի և ժողովուրդների համար:
7. Ի՞նչ տեղ էին զբաղեցնում հայերը Ռուսաստանյան կայսրությունում:

Քննարկման հարց

Ինչո՞ւ են բազմազգ կայսրությունները փլուզվում:

Նոր հասկացություններ, անուններ, արտահայտություններ

Բազմազգ պետություն, Հարստորգների հարստություն, երկմիասնական կայսրություն, Ավստրո-Հունգարիա, Ռուսաստանյան կայսրություն, «ժողովուրդների քանտ», Կովկասի փոխարքայություն:

Օսմանյան կայսրության բարեփոխումների ճախողումը

Օսմանյան տերությունում իրականացվող արևմտամետ բարենորոգումները, ինչպես ասվել է, ստացան **թանգիմաթ** անունը: Այդ բարենորոգումները, որ սկսվել էին իրականացվել 1839 թ., ի վիճակի չեղան հաղթահարելու երկրի հետամնացությունը: Չհաջողվեց նաև թուլացնել հպատակ քրիստոնյա ժողովուրդների ազգային-ազատագրական շարժումները:

Ռուսաստանը 1853 թ. պատերազմ սկսեց Օսմանյան կայսրության դեմ: Անգլիան ու Ֆրանսիան աջակցեցին Օսմանյան կայսրությանը: Սկիզբ առած **Ղրիմի պատերազմը** ավարտվեց 1856 թ. Ռուսաստանի պարտությամբ: Արդյունքում՝ Օսմանյան կայսրությունում ուժեղացավ Անգլիայի ու Ֆրանսիայի ազդեցությունը:

Գժգոհությունը համակել էր նաև իշխող թուրքական տարրին, որի արդյունքում առաջացավ «**Նոր օսմանցիներ**» ընդդիմադիր շարժումը: Ըստ նրանց ծրագրի՝ կայսրության տարածքային ամբողջականության պահպանման միակ միջոցը սուլթանի իշխանության սահմանափակումն էր և սահմանադրության հռչակումը:

1876 թ. Օսմանյան կայսրության ճգնաժամը սուր բնույթ ընդունեց: Նոր գահ բարձրացած **Աբդուլ Համիդ II-ը** իր հրովարտակով ազդարարեց սահմանադրության ընդունումը: Սա թանգիմաթի շրջանի (1839–1876) վերջին բարենորոգումն էր:

Ընտրվեց օսմանյան խորհրդարան: Սակայն Աբդուլ Համիդը 1878 թ. ցրեց խորհրդարանը և հաստատեց իր միանձնյա կառավարման բռնատիրական համակարգը: Կասկածամիտ և վախկոտ սուլթանը ստեղծեց հզոր ոստիկանական գաղտնի ծառայություն և հաստատեց խիստ գրաքննություն:



ԱԲԳՈՒԼ ՀԱՄԻԳ II
(1842–1918)



Օսմանյան կայսրությունը
1914 թ. դրությամբ

Նրա գործունեությունը շատ դեպքերում վերածվում էր զավեշտի: Այսպես, օրինակ՝ արգելված էր օգտագործել H_2O բանաձևը, քանի որ այն կարող էր հասկացվել որպես «Համիդ II-ը հավասար է զրոյի»: Պատահական չէ, որ ժամանակակիցներն Արդուլ Համիդ II-ի կառավարման շրջանը բնութագրում էին որպես «գուլյուն», որը կարելի է թարգմանել որպես զանգվածային ահաբեկում և կոտորած: Իսկ նրան անվանում էին «արյունարբու» կամ «կարմիր սուլթան»:

Սուլթանը, վերջ դնելով արևմտամետ բարենորոգումների քաղաքականությանը, որդեգրեց **համախառնականության** (պանիսլամիզմ) քաղաքականությունը: Դրա նպատակն էր համախմբել աշխարհի մուսուլման ժողովուրդներին Օսմանյան կայսրության ղեկավարության ներքո: Նրա օրոք ակնառու դարձավ կայսրության հետամնացությունը, ուժեղացավ երկրի կախվածությունն արտասահմանյան կապիտալից:



Երիտթուրքերի
հանրահավաք
Կոստանդնուպոլսում

XIX դարի 70–ական թթ., արդեն գիտեք, միջազգային բնույթ ձեռք բերեց Հայկական հարցը: Աբդուլ Համիդը հայ ժողովրդի ազգային–ազատագրական շարժումը կասեցնելու նպատակով ստեղծեց քրդերից կազմված «համիդիե» հրոսակախմբերը: Վերջիններս, ահ ու սարսափ տարածելով հայ խաղաղ բնակչության շրջանում, ստիպում էին նրանց արտագաղթել հայրենի հողերից:

Սակայն դա դեռ բոլորը չէր: 1894–1896 թթ. թուրքական իշխանությունները սկսեցին հայ ժողովրդի ցեղասպանական ծրագրի իրագործումը: Նրանց նպատակը հայերին ֆիզիկապես ոչնչացնելն էր իրենց պատմական հայրենիքում, ինչը «կլուծեր» Հայկական հարցը: Զանգվածային կոտորածներին զոհ գնաց շուրջ 300 հազար հայ:

Երիտթուրքական շարժումը, 1908 թ. պետական հեղաշրջումը

Աբդուլ Համիդ II–ի բռնատիրական քաղաքականությունը դժգոհություն էր առաջացրել նաև թուրքական միջավայրում: **1889 թ.** ստեղծվեց գաղտնի կազմակերպություն՝ «Միություն և առաջադիմություն»: Դրա նպատակն էր գահընկեց անել սուլթանին և վերականգնել սահմանադրությունը: Այդ կազմակերպությունը վերածվեց նույնանուն կուսակցության, որի անդամներն իրենց անվանում էին **երիտասարդ թուրքեր**:

Երիտթուրքերի գաղտնի խորհրդակցություններից անկում դոկտոր Նազրմի Ելույթից

...Ես ձեր ընկերը, զինակիցը և եղբայրն եմ դարձել, որ վերածնենք թրքությունը: Ուզում եմ, որ այս հողի վրա ապրի ու լիակատար տեր ու տնօրեն լինի թուրքը և միայն թուրքը: Թող անհետանան բոլոր ոչ թուրք տարրերը, ինչ ազգության և կրոնի էլ որ նրանք պատկանեն: Մեր երկիրը պետք է մաքրել ոչ թուրք տարրերից: Կրոնն ինձ համար իմաստ և նշանակություն չունի: Իմ կրոնը թուրանն է:



ՄԱԼՔՈՍ ԽԱՏ
(ՀՈՎՍԵՓ ՄԵԼՔՈՒՄՅԱՆ)
(1833-1908)

Իրանի նշանավոր պետական գործիչ, լուսավորական, հրապարակախոս և գրող: Ծնվել է Նոր Ջուղայում: Սովորել է Թեհրանում և Փարիզում, ստացել իրավաբանի մասնագիտություն: Եղել է հմուտ դիվանագետ, Իրանի դեսպանը Կ. Պոլսում, Փարիզում և Լոնդոնում: Բեռլինի վեհաժողովում Իրանի շահերը պաշտպանելու համար շահը նրան շնորհել է «Մեծ դեսպանի» և իշխանի տիտղոսներ: Լոնդոնում հրատարակել է «Կանոն» պարբերականը, որը մեծ դեր է խաղացել Իրանում ազգային գաղափարների տարածման գործում: Տաղանդավոր գրող էր: Գրել է ժողովրդին մատչելի պարսկերենով: Նրա նպատակն էր Իրանը դուրս բերել հետամնացությունից և դարձնել հզոր երկիր:

Երիտթուրքերը **1908 թ. հուլիսին** կատարեցին հեղաշրջում և ստիպեցին սուլթանին հռչակել սահմանադրության վերականգնումը: Օսմանյան կայսրությունն իրավական առումով դարձավ **սահմանադրական միապետություն**: Հաղթելով խորհրդարանական ընտրություններում՝ երիտթուրքերը եկան իշխանության: Սկզբում նրանք Աբդուլ Համիդ II-ին թողեցին գահին, սակայն երբ մեկ տարի անց վերջինս փորձեց կազմակերպել հեղաշրջում, գահընկեց արին:

Չկարողանալով լուծում տալ հասարակական բազմաթիվ խնդիրների՝ երիտթուրքերը, 1911 թ. սկսած, պաշտոնական գաղափարախոսություն հռչակեցին **պանթյուրքիզմը**: Ազգայնամոլական այդ ուսմունքը քարոզում էր կայսրության ոչ թուրք ժողովուրդների բռնի թուրքացման անհրաժեշտությունը: Արտաքին քաղաքականության ոլորտում պանթյուրքիզմը որպես գլխավոր նպատակ էր հռչակում աշխարհի թյուրքալեզու ժողովուրդների միասնական պետության ստեղծումը օսմանյան Թուրքիայի ղեկավարության ներքո:

Երիտթուրքերի կառավարման տարիներին, սակայն, ազգային-ազատագրական շարժումը ներառեց նաև մուսուլման ժողովուրդներին՝ ալբանացիներին և արաբներին: Շարունակվեցին նաև ռազմական պարտությունները և տարածքային կորուստները: Մասնավորապես թուրք-իտալական և երկու Բալկանյան պատերազմներն ակնառու դարձրին Օսմանյան կայսրության սնանկությունը:

1905–1911 թթ. հեղափոխությունն Իրանում

Իրանի տնտեսական, քաղաքական և ռազմական թուլությունը մեծ հնարավորություններ ստեղծեց ժամանակի հզոր տերությունների, հատկապես Մեծ Բրիտանիայի և Ռուսաստանի համար: Նրանք կարողացան «խաղաղ» մուտք գործել այդ երկիր և հաստատել իրենց հսկողությունը:

Անգլիացիներն ստեղծեցին **Անգլո-պարսկական նավթային ընկերությունը** և իրենց վերահսկողության տակ վերցրին իրանական նավթը:

Օտար պետությունների գաղութային քաղաքականությունը խոչընդոտում էր բնական հարստություններով առատ երկրի սոցիալ-տնտեսական զարգացումը: Իրանի առաջադեմ մտավորական շրջանակները գիտակցում էին իրենց հայրենիքի անմխիթար վիճակը և փորձում էին գտնել դրանից դուրս գալու ուղիներ: Նրանք հակվեցին դեպի արևմտամետ բարենորոգումները:

XIX դ. երկրորդ կեսի բարենորոգիչների կարկառուն ներկայացուցիչներից էր հայազգի **Մալքում (Մելքոն) խանը** (Հովսեփ Մելքումյան): Նա հանդես էր գալիս հասարակությունն արդիականացնելու և սահմանադրություն հռչակելու օգտին:

1905 թ. Թեհրանում իշխանությունների դեմ տարերայնորեն ծագեցին զանգվածային ընդվզումներ: Դրանց մասնակիցները պահանջեցին հռչակել սահմանադրություն ու գումարել մեջլիս (խորհրդարան): Այսպես սկսվեց իրանական հեղափոխությունը: Շահը ստիպված էր զիջումների գնալ. հրապարակվեց նրա հրովարտակր՝ **սահմանադրություն** ընդունելու և **մեջլիս** հիմնադրելու վերաբերյալ:

Սակայն երկրի հետադիմական ուժերը շահ **Մոհամմադ Ալիի** գլխավորությամբ անցան հակահարձակման: Նրանց օգնեցին նաև օտարերկրյա պետությունները: Ռուսաստանը և Մեծ Բրիտանիան, օգտվելով հեղափոխական իրավիճակից, ամրապնդեցին իրենց դիրքերն Իրանում նաև ռազմական ներկայությամբ: 1907 թ. կնքված ռուս-անգլիական համաձայնագրով երկրի հյուսիսում տեղակայվեցին ռուսական, իսկ հարավում՝ անգլիական զորքեր:

Երկրում սուր պայքար ծավալվեց սահմանադրականների և շահի կողմնակիցների միջև: Իրանի սահմանադրական ուժերին աջակցում էին նաև Հայ հեղափոխական դաշնակցության ներկայացուցիչները: Առավել աչքի ընկավ հայազգի տաղանդավոր գորավար **Եփրեն խանը**: Ստանալով ժողովրդի աջակցությունը՝ հեղափոխական ուժերին հաջողվեց վերականգնել սահմանադրական կարգերը:

Սակայն Ռուսաստանը, **1911 թ.** գրավելով հյուսիսային Իրանը, պարտադրեց առաջադեմ ուժերին հեռանալ



ԵՓՐԵՄ ԽԱՆ
(ԵՓՐԵՄ ԳԱԿԹՅԱՆ)
(1868–1912)

Հեղափոխական և ռազմական գործիչ, ՀՅԴ կուսակցության անդամ: 1880-ական թթ. վերջին միացել է գործող հայ հայրուկային խմբերին: Նրա հեղափոխական և ռազմական գործչի տաղանդը փայլուն կերպով դրսևորվեց իրանական հեղափոխության ժամանակ: Շահի տապալումից հետո՝ 1909 թ., սշանակվեց Թեհրանի ոստիկանապետ, ապա Իրանի նոր կառավարությունը նրան շնորհեց սարդարի (գերագույն գորահրամանատար) կոչում: Հեղափոխության պարտությունից հետո շարունակեց պայքարը Իրանի առաջընթացի համար, զոհվեց շահական ուժերի դեմ մղած կռիվներից մեկում: Իրանական պատմագրությունը նրան գնահատել է որպես ժամանակի առաջադեմ գործիչ, ժողովրդական հերոս և տաղանդավոր գորավար:

իշխանությունից և այն հանձնել շահի կողմնակիցներին: Այդպիսով՝ սահմանադրական շարժումը պարտություն կրեց: Այնուհանդերձ, հեղափոխությունը նպաստեց երկրի ազգաբնակչության քաղաքական և ազգային գիտակցության վերելքին:

Հարցեր և առաջադրանքներ

1. Երբ է տեղի ունեցել Ղրիմի պատերազմը, ինչ հետևանք ունեցավ այն Օսմանյան կայսրության համար:
2. Ովքեր էին «նոր օսմանցիները» և ինչ նպատակ ունեին: Ո՞րն էր թանգիմաթի շրջանի վերջին բարենորոգումը:
3. Ձեր կարծիքով ինչո՞ւ ձախողվեց Օսմանյան կայսրության բարեփոխման քաղաքականությունը:
4. Բնութագրե՛ք սուլթան Աբդուլ Համիդին:
5. Ովքեր էին երիտթուրքերը, ինչպես էր կոչվում և նրբ էր հիմնադրվել նրանց կուսակցությունը:
6. Երիտթուրքերը նրբ իրականացրին պետական հեղաշրջում: Ինչո՞ւ նրանք որդեգրեցին ազգայնամոլական քաղաքականություն:
7. Բացատրե՛ք «պանիսլամիզմ», «զուլյում» և «պանթուրքիզմ» հասկացությունները:
8. Ո՞ր երկրները հաստատեցին իրենց ազդեցությունը Իրանում: Ինչ հետևանքներ ունեցավ դա Իրանի համար:
9. Ո՞վ էր Մալքոմ խանը: Ինչ բարենորոգումներ էին ձգտում իրականացնելու Իրանի առաջադեմ ուժերը:
10. Ներկայացրե՛ք 1905–1911 թթ. իրանական հեղափոխության ընթացքն ու նշանակությունը:

Քննարկման հարց

Ինչո՞ւ Աբդուլ Համիդը սկսեց իրականացնել հայերի ցեղասպանության քաղաքականություն:

Նոր հասկացություններ, անուններ

«Նոր օսմանցիներ», երիտթուրքեր, «Միություն և առաջադիմություն», պանիսլամիզմ, «զուլյում», պանթուրքիզմ, Անգլո-պարսկական նավթային ընկերություն, 1905–1911 թթ. իրանական հեղափոխություն, մեջլիս, Աբդուլ Համիդ II, Մալքոմ խան, Մոհամմադ Ալի, Եփրեմ խան:

Արևելքի առաջին արդիականացած երկիրը

Միջնադարի ավարտին Ճապոնիան նույնպես ինքնամեկուսացել էր արտաքին աշխարհից և դարձել «փակ պետություն»: XVIII դ. վերջերից ճապոնական ծովափերի մոտ սկսեցին հաճախակի երևալ Մեծ Բրիտանիայի, Ռուսաստանի, ԱՄՆ-ի և Ֆրանսիայի նավերը: Երկրում իշխող Տոկուգավա սյոգունները ամեն կերպ խոչընդոտում էին նրանց մուտքը երկիր, սակայն օտարերկրյա ճնշմանը երկար դիմանալ չէին կարող:

ԱՄՆ-ը պատերազմի սպառնալիքով Ճապոնիային հարկադրեց **1854 թ.** պայմանագիր կնքել, որով ամերիկացիներին տրվեցին առևտրային արտոնություններ և բացվեցին երկու նավահանգիստներ: Շուտով **անիրավահավասար պայմանագրեր** կնքվեցին նաև ռուսների, անգլիացիների և ֆրանսիացիների հետ: Ճապոնիան զրկվեց որոշակի ինքնուրույնությունից:

Ճապոնիայում գնալով աճում էր բնակչության տարբեր խավերի դժգոհությունը Տոկուգավաների իշխանությունից: Նրանք, ինչպես գիտեք, 1603 թ. սկսած՝ կայսեր անունից կառավարում էին երկիրը: Ընդդիմադիր շարժումը հանգեցրեց **1867-1868 թթ. հեղափոխությանը**: Երկրի կառավարումը վերադարձվեց կայսերական ընտանիքին, և 15-ամյա **Մուցուլիտոն** հռչակվեց կայսր: Նա ստացավ **Մեյձի** («Լուսավորյալ կառավարիչ») անունը: **Տոկիոն** դարձավ մայրաքաղաք:

Ճապոնիան կտրուկ շրջադարձ կատարեց իր զարգացման մեջ՝ հիմքում դնելով քաղաքական, տնտեսական, դատական և ռազմական ոլորտներում արևմտաեվրոպական նվաճումները:

Ճապոնիան **1889 թ.** ընդունված հիմնական օրենքով դարձավ **սահմանադրական միապետություն**: Կայսրը, ըստ Սահմանադրության, համարվում էր սրբազան և անձեռնմխելի: Նա ավելի մեծ իրավունքներ ուներ, քան

երկատյան խորհրդարանը: Կայսրն էր հրավիրում և արձակում խորհրդարանը, պատերազմ հայտարարում, հաշտություն կնքում և այլն: Իսկ Ճապոնական ազգային կրոնի՝ **սինտոյականության** ուսմունքի համաձայն՝ կայսրն իր իշխանությունը ստացել էր արևի աստծուց: Ուստի բոլորը, որպես հայրենասիրության գերագույն դրսևորում, պետք է նվիրված լինեին կայսրին:

Սահմանադրությունը, չնայած իր պահպանողական բնույթին, նպաստեց հասարակական կյանքի աշխուժացմանը: Քաղաքացիներն ստացան ժողովրդավարական ազատություններ: Առաջացան կուսակցություններ, արհմիություններ և բազմազան հասարակական կազմակերպություններ:

XIX դ. վերջերին և XX դ. սկզբին իրականացված բարեփոխումների շնորհիվ Ճապոնիան **թռչքաձև զարգացում** ապրեց: Երկրի տնտեսությունը և հասարակական-քաղաքական կյանքը արդիականացվեցին: Ստեղծվեց միասնական ազգային շուկա: Առաջացան մենաօրություններ, դրամատներ, ճապոնական ապրանքներն սկսեցին արտահանվել տարբեր երկրներ: Ճապոնիան սկսեց արտաքին շուկաներում հաջողությամբ մրցակցել արևմտաեվրոպական զարգացած երկրների հետ: Առաջին աշխարհամարտի նախօրյակին Ճապոնիան նույնիսկ իր **զարգացման արագությամբ առաջ էր անցել ԱՄՆ-ից և Գերմանիայից:**

Երկրում ձևավորվեց արդյունաբերական հասարակություն: Զարգացան երկաթուղային և հեռագրային հա-

Ռուսական «Վարյագ» հաժանավի անհավասար մարտը ճապոնական հզոր նավախմբի դեմ 1904-1905 թթ. ռուս-ճապոնական պատերազմում: Ռուս ծովայինները, տեսնելով, որ պարտվում են, նախընտրեցին խորտակել սեփական ռազմանավը, բայց անձնատուր չլինել:



Ճապոնական «Միցուի» մենատիրական միավորման մասին

Ձեռնարկությունը ստեղծվել է դեռևս XVI դարում: Հետագայում այն ծաղկում է ապրել վաշխառության շտրեիվ: XVIII դարում մենատիրությունն ուներ բազում հանրախանութներ, որոնց համար սահմանել էր այսպիսի կարգ. անձրևի ժամանակ խանութ մտած գնորդը կամ պատահական այցելուն անվճար ստանում էր անձրևանոց:

Ուշադրություն էր դարձվում գովազդին: Նույնիսկ կազմակերպվում էին թատերական ներկայացումներ՝ սեփական արտադրանքը գովազդելու համար: XIX դարի վերջին և XX դարի սկզբին այն վերածվեց հզոր մենատիրական միավորման: Մի ճանապարհորդ վկայում է. «Ինք կարող եք ճապոնիա գալ Միցուիին պատկանող շոգենավով, որն աշխատում է նրա հանքերից ստացված քարածխով: Նավահանգիստ մտնել, որը սարքավորել է Միցուիին, նրա կառուցած հյուրանոցը հասնել Միցուիին պատկանող տրամվայով: Հյուրանոցում պառկել Միցուիի պատրաստած մահճակալին, կարդալ նրա հրատարակած գիրքը լամպի լույսի տակ, որն արտադրվել է Միցուիին պատկանող գործարանում»:

դորդակցությունը, մեքենաշինությունը և այլն: Պետությունը հովանավորում էր տեղական ձեռներեցներին: Ստեղծվեց ազգային տարադրամը՝ ճապոնական իենը:

Փոխվեց հասարակության սոցիալական կառուցվածքը, հաստատվեց դասային հավասարություն: Մարդկանց կենսամակարդակի կտրուկ բարձրացման արդյունքում բնակչության թիվը գրեթե կրկնապատկվեց՝ հասնելով ավելի քան 72 միլիոնի: Կազմավորվեցին դարաշրջանին բնորոշ խոշոր քաղաքներ՝ Տոկիո, Օսակա և այլն: Եվրոպականի օրինակով զարգացավ կրթական համակարգը: Ճապոնացի հազարավոր երիտասարդներ կրթություն էին ստանում նաև արևմտյան առաջավոր համալսարաններում:

Միջազգային ասպարեզում Ճապոնիան հասավ լուրջ հաջողությունների: Մինչև XX դարի սկիզբը երկիրն ազատվեց նախկինում կնքված 15 անիրավահավասար պայմանագրերից: Ստեղծելով մարտունակ բանակ՝ Ճապոնիան սկսեց վարել **ծավալապաշտական քաղաքականություն**: Գլխավոր թիրախներն էին Կորեան և Չինաստանը: Հատկապես տպավորիչ էին հաղթանակները 1894-1895 թթ. չին-ճապոնական և 1904-1905 թթ. ռուս-ճապոնական պատերազմներում: Արտաքին նվաճումների արդյունքում պետության տարածքը կրկնապատկվեց: Այդպես Ճապոնիան դարձավ նաև գաղութային տերություն:

Չինաստան. պայքար արդիականացման համար

Չինաստանը, ինչպես ասվել է, XIX դ. կեսերին դուրս եկավ ինքնամեկուսացման վիճակից: Արևմուտքի զարգացած երկրների հետ տարաբնույթ կապերի հաստատումը հնարավորություն տվեց հաղորդակցվելու արդյունաբերական հասարակության նվաճումների հետ: Աստիճանաբար Չինաստանը բռնեց արդիականացման ուղին:

Ժամանակի հզոր տերությունները իրենց գաղութային ներթափանցումը դյուրացնելու նպատակով սղեցին բազմաթիվ պատերազմներ, որոնցում Չինաստանը գրեթե միշտ պարտվում էր: Կնքված անիրավահավասար պայմանագրերով նրանք Չինաստանում բազմաթիվ արտոնություններ էին ստանում: Օտարերկրյա բանկերը փոխառություններ էին տրամադրում պետությանը, վերահսկում նրա եկամուտները, ձեռք բերում երկաթուղիներ, գործարաններ կառուցելու և հանքերը շահագործելու իրավունքներ:

Ճիշտ է, Չինաստանի տարածքը ռազմական առումով չնվաճվեց, սակայն բաժանվեց **ազդեցության գոտիների** Մեծ Բրիտանիայի, Ռուսաստանի, Ֆրանսիայի, ԱՄՆ-ի, Գերմանիայի և Ճապոնիայի միջև:

Ձերբակալված ապստամբ
չին «բռնցքամարտիկները»



Ռազմական անհաջողությունները Չինաստանի իշխող վերնախավում առաջացրին համոզում, որ եվրոպացիները ռազմական ասպարեզում ուժեղ են: Ուստի որոշվեց հրաժարվել մեկուսացումից և յուրացնել Արևմուտքի տնտեսական և ռազմատեխնիկական փորձը:

Չինական ավանդական հասարակության բարեփոխման հիմնավորմամբ հանդես եկավ առաջադեմ գործիչ **Կան Յուվեյը**: Նրա գաղափարների հիման վրա ձևակերպվեցին հետևյալ կարևոր նպատակները՝ կրթական նոր համակարգի ստեղծում, ազգային արդյունաբերության և առևտրի զարգացում, գյուղատնտեսության արդիականացում, բանակի բարեփոխում, պետական ապարատի մաքրում: Սակայն **1898 թ.** ամռանը սկսված արմատական բարեփոխումների շրջանը տևեց ընդամենը 100 օր: Հին կարգերի կողմնակիցները պետական հեղաշրջում կատարեցին և չեղյալ համարեցին բարեփոխումները:

Չին ժողովրդը բազմիցս ոտքի ելավ պաշտպանելու իր հայրենիքը և ազգային ավանդույթները: **1898–1901 թթ.** տեղի ունեցավ հուժկու ելույթ, որն ուղղված էր ոչ միայն օտարերկրյա ներթափանցման, այլև ներքին բարեփոխումների դեմ: Այն հայտնի է **Բոնցքամարտիկների** կամ **Իխետուան ապստամբություն** անունով (իխետուան՝ արդարության և խաղաղության ջոկատներ): Սակայն ժամանակի ութ հզոր տերությունները միացյալ ուժերով դաժանորեն ճնշեցին ապստամբությունը:

Այսպես՝ XIX դ. վերջին և XX դ. սկզբին Չինաստանը վերածվեց մեծ տերությունների կիսագաղութի: Չսպառնալիք էր կրելու ձևավորվեց տեղական ձեռներեցների խավը, առաջացավ արդյունաբերական տնտեսություն:

Երկրի արդիականացման գլխավոր խոչընդոտը շարունակում էր մնալ ավատատիրական միապետությունը և հին ազնվականությունը: Ահա թե ինչու նրանց դեմ սկսվեց հեղափոխական պայքար: Գլխավոր նպատակն էր իրականացնել հասարակության ամբողջական արմատական նորացում: Այդ պայքարը գլխավորում էր **Սուն Յաթսենը**:

Չինաստանում **1911–1912 թթ.** տեղի ունեցավ **հեղափոխություն**: Ցին արքայատոհմը տապալվեց և հռչակվեց



ՍՈՒՆ ՅԱԹ ՍԵՆ
(1866–1925)

Չին նշանավոր հեղափոխական: Պայքարել է Ցին արքայատոհմի տապալման և ժողովրդավարական հանրապետության հաստատման համար: Ստեղծել է «Չինաստանի վերածնության ընկերությունը»: Եղել է 1911–1912 թթ. հեղափոխության ղեկավարներից մեկը: Սահմանել է Չինաստանի նորացման երեք սկզբունքները. ա) ազգայնականություն, որը մեկնաբանում էր որպես օտար տիրապետության վերացում, ազգային վարչակարգի հաստատում, բ) ժողովրդապետություն, որը հասկացվում էր որպես միապետության տապալում, ժողովրդավարական հանրապետության ստեղծում, գ) ժողովրդական բարեկեցություն, որը նշանակում էր օտար կապիտալի ազգայնացում, հողի նկատմամբ համազգային սեփականության հաստատում:

Չինական հանրապետությունը: Սակայն ժողովրդավարության և ազգային ինքնիշխանության հաստատման համար չին ժողովրդի պայքարը շարունակվեց նաև պատմության հաջորդ՝ Նորագույն շրջանում:

Հարցեր և առաջադրանք

1. Ինչո՞ւ Ճապոնիային չհաջողվեց պահպանել «փակ պետության» կարգավիճակը:
2. Ճապոնիայում էրբ սկսեց հեղափոխությունը, ինչ նշանակություն ունեցավ այն: Ո՞վ դարձավ կայսր, ինչ անունով է հայտնի:
3. Ընդհանուր կողմերով ներկայացրե՞ք XIX դարի վերջերին և XX դարի սկզբներին Ճապոնիայի արդիականացման գլխավոր արդյունքները:
4. Ճապոնիայում էրբ է ընդունվել սահմանադրություն: Ինչպիսի՞ պետություն դարձավ նա ըստ Սահմանադրության: Ինչպե՞ս էին վերաբերվում ճապոնացիները կայսրին:
5. Թվարկե՞ք արտաքին քաղաքականության բնագավառում Ճապոնիայի ունեցած հաջողությունները: Կարո՞ղ եք նշել դրանց պատճառները:
6. Ինչպե՞ս Չինաստանը բաժանվեց ազդեցության գոտիների տերությունների միջև: Ինչ արտոնություններ ստացան մեծ տերությունները Չինաստանում:
7. Ո՞վ էր Կան Յուվեյը: Նրա գաղափարների հիման վրա ինչ բարեփոխումներ ձևակերպվեցին հասարակության արդիականացման նպատակով: Երբ է ընթացել և ինչո՞ւ է չեղյալ համարվել արմատական բարեփոխումների 100 օրը:
8. Արևմտականացման և օտարերկրյա ազդեցության դեմ ուղղված ինչ ապստամբություն տեղի ունեցավ և էրբ: Ինչո՞վ այն ավարտվեց:
9. Ո՞վ էր Սուն Յաթսենը: Ներկայացրե՞ք 1911–1912 թթ. չինական հեղափոխության գլխավոր արդյունքները:

Գործնական աշխատանք

Համեմատե՞ք Ճապոնիայի և Չինաստանի XIX դ. վերջի և XX դ. սկզբի զարգացման արդյունքները՝ կատարելով «Տրամագիր» վարժությունը:

Նոր հասկացություններ, անուններ

«Փակ պետություն», 1867–1868 թթ. հեղափոխությունը Ճապոնիայում, Մուցուլիտո կայսր, Մեյձի (Լուսավորչալ կառավարիչ), թռիչքաձև զարգացում, ազդեցության գոտիներ, Կան Յուվեյ, «արմատական բարեփոխումների 100 օր», Բոնցքամարտիկների կամ Իխետուան ապստամբություն, Սուն Յաթսեն, 1911–1912 թթ. չինական հեղափոխություն, Չինական հանրապետություն:

Աշխարհի գաղութային բաժանման ավարտը

Նոր դարերի երկրորդ շրջափուլում ավարտվում է աշխարհի գաղութային բաժանումը խոշոր տերությունների միջև: Իրենց տնտեսությունը զարգացնելու համար նրանք հումքի աղբյուրների և սպառման շուկաների կարիք ունեին: Բացի այդ՝ **մայր երկրում (մետրոպոլիս)** կուտակվում էր մեծ կապիտալ, որի մի մասը ներդրվում էր հետամնաց և գաղութային երկրներում: Հենց այս պատճառներով է բացատրվում զարգացած տերությունների ձգտումը ձեռք բերելու նորանոր գաղութներ:

XX դ. սկզբին գաղութները և կիսագաղութները կազմում էին երկրագնդի բնակելի տարածքի 2/3-ը և բնակչության կեսից ավելին: Գաղութացված երկրները հիմնականում գտնվում էին Աֆրիկայում և Ասիայում: Հետաքրքրական է այն փաստը, որ 1876 թ. դրությամբ եվրոպացիները զավթել էին Աֆրիկայի տարածքի ընդամենը 10%-ը, իսկ դարավերջին նրա գաղութացումն արդեն ավարտվել էր:

Ամենամեծ գաղութային կայսրությունը Մեծ Բրիտանիան էր, որի տիրույթները սփռված էին աշխարհով մեկ: **«Բրիտանական կայսրությունում արևը երբեք մայր չի մտնում».** այս արտահայտությունն ամենադիպուկն է բնութագրում այդ տերության ընդարձակությունը:

Հակասությունների սրումը տերությունների միջև

Միջազգային ասպարեզում սկսեց գերակայել պետությունների սահմանները ընդլայնելու և նոր գաղութներ ձեռք բերելու միտումը: Տարածքային ընդարձակումը և հումքի նոր աղբյուրներին ու իրացման շուկաներին տիրանալը սուր մրցակցություն առաջացրին: Խոր

Անգլիացի գաղութարարը
Հնդկաստանում



**Անգլիացի հայտնի
գաղութարար Մեսիլ
Ռոդըր՝ Մեծ Բրիտանիայի
գաղութային քաղաքա-
կանության մասին**

Փողը և եռանդը պետք է ուղղել գաղտնի ընկերության ստեղծմանը, որի նպատակը պետք է լինի բրիտանական տիրապետության տարածումն աշխարհում, բրիտանական հպատակներով բոլոր երկրների գաղութարևակեցումը, հատկապես բրիտանական վերաբնակիչներով Աֆրիկա մայրցամաքի ներսի, Սուրբ հողի, Եփրատի հովիտների, Կիպրոս և Կանդիա կղզիների, ողջ Հարավային Ամերիկայի, Խաղաղ օվկիանոսի կղզիների, Մալայան կղզիների, Չինաստանի և Ճապոնիայի առափնյա գոտիների բնակեցումը, ի վերջո՝ Ամերիկայի Միացյալ Նահանգների միացումը՝ որպես Բրիտանական տերության մի մաս...

հակասություններ ծագեցին հատկապես մեծ տերությունների միջև:

Տարածքային գավթումները, գաղութացումը և այլ ազգերի նվաճումը հիմնավորելու համար մշակվեցին զանազան տեսություններ: Ուրիշ ազգերի տիրելու և դա իրենց ազգային գերազանցությամբ հիմնավորելու գաղափարախոսությունը ստացել է **ինպերիալիզմ** (կայսերապաշտություն) անունը: Նման գաղափարախոսություն մշակեցին և գավթողական քաղաքականություն էին վարում ժամանակի **տերությունները՝ Մեծ Բրիտանիան, Գերմանիան, ԱՄՆ-ը, Ռուսաստանը, Ֆրանսիան, Իտալիան, Ավստրո-Հունգարիան և Ճապոնիան**: Անգլիացիները, օրինակ, շեշտում էին իրենց կողմից քաղաքակրթություն տարածելու փաստը, իսկ գաղութներից ստացված ահռելի հարստությունների մասին նախընտրում էին չխոսել:

Խոշոր տերությունների միջև անհաշտ մրցակցություն ծավալվեց հատկապես հումքի հարուստ պաշարների, ինչպես նաև ռազմավարական նշանակություն ունեցող տարածքների համար: Նրանց պայքարը սրվեց նաև այն պատճառով, որ հին գաղութատեր երկրների կողքին հայտնվել էին նորերը՝ Գերմանիան, ԱՄՆ-ը, Ճապոնիան և Իտալիան:

**Միջազգային հարաբերությունների
կարգավորման նոր ձևերը**

XIX դ. վերջին և XX դ. սկզբին աշխարհի բոլոր մասերի միջև ստեղծվեցին տնտեսական զանազան կապեր, ձևա-

վորվեց համաշխարհային շուկան: Բացի տնտեսական գործոններից՝ միջազգային հարաբերությունների վրա սկսեցին ներազդել նաև տարբեր հասարակական շարժումներ և համաշխարհային կազմակերպություններ:

Գրանցից հատկապես առանձնանում էր խաղաղության կողմնակիցների շարժումը: Նրանց անվանում էին **պացիֆիստներ** (լատիներեն՝ խաղաղարար): Պացիֆիստները համոզված էին, որ խաղաղությունն այլընտրանք չունի, բոլոր հակամարտությունները պետք է լուծել բանակցությունների միջոցով: **1863 թ.** ստեղծվեց **Կարմիր խաչի միջազգային ընկերությունը**: Այն խնդիր ուներ օգնելու պատերազմների և բնական աղետների ժամանակ տուժածներին: Կազմակերպությունը գործում է առ այսօր:

Ժամանակի պետությունները նույնպես ճգտում էին իրենց հարաբերությունները կարգավորելու խաղաղության սկզբունքով: Սակայն փոխհամաձայնությունը և զիջումները միջազգային հարաբերություններում չդարձան գերակշռող:

Ավելի հաճախակիացան ռազմական բախումները: Պատերազմները մարդկային և նյութական մեծ վնասներ էին պատճառում: Անհրաժեշտություն առաջացավ մշակելու խաղաղության և պատերազմի հարցերի կարգավորման միջազգային նորմեր: Այդ նպատակով պետությունները **1889 թ.** և **1907 թ.** **Հաագայում** գումարեցին երկու համաժողովներ: Ընդունված որոշումներով սահմանվում էին պատերազմելու որոշակի կանոններ: Պատերազմող կողմերը պարտավոր էին մարդասիրաբար վերաբերվել վիրավորներին և գերիներին: Արգելվում էր թունավոր զենքերի օգտագործումը: Որոշվեցին թիկունքի խաղաղ բնակչության իրավունքները և պարտականությունները: Կարգավորվեցին նաև չեզոք երկրների իրավունքները և այլն: Այս նորմերից շատերը գործում են մինչ օրս:

Ռազմաքաղաքական դաշինքների առաջացումը

Ռազմական բախումներն ու միջազգային ճգնաժամերը սկսեցին հաջորդել միմյանց՝ ընդունելով սպառնա-



ԱՆՐԻ ԳՅՈՒՆԱՆ
(1828–1910)

Գործարար ժնև քաղաքից, Կարմիր խաչի միջազգային ընկերության հիմնադիրը: 1859 թ., երբ ընթանում էր ֆրանս-ավստրիական պատերազմը, ականատես է լինում մարդկանց տառապանքներին, հազարավոր անօգնական վիրավորների մահվան: Գրա ազդեցությամբ որոշում է տարբեր երկրներում ստեղծել վիրավորներին օգնող ընկերություններ: Նա ստեղծում է կոմիտե, որի ջանքերով 1863 թ. հրավիրվում է միջազգային համաժողով, ստորագրվում միջազգային Կարմիր խաչի առաջին փաստաթուղթը: Նրա գործունեության հիմքում ընկած է քաղաքական չեզոքության սկզբունքը:



Ռուսական պատարա. «Անտանտի ստեղծումը», 1914 թ.

լի չափեր: Արտաքին վտանգից հաջողությամբ պաշտպանվելու նպատակով պետությունները սկսեցին որոնել դաշնակիցներ: Ի վերջո կատարվեց ուժերի վերադասավորում, որի արդյունքում Եվրոպայում ձևավորվեց երկու հակադիր ռազմաքաղաքական դաշինք:

Առաջինը ստեղծվեց **Եռյակ դաշինքը**: Գերմանիայի նախաձեռնությամբ **1879 թ.** փոխօգնության պայմանագիր կնքվեց Ավստրո-Հունգարիայի հետ: Երեք տարի անց դրան միացավ Իտալիան: Այսպես ռազմատենչ երեք երկրները միավորվեցին: Նրանց դաշինքն ուղղված էր Ֆրանսիայի, Մեծ Բրիտանիայի և Ռուսաստանի դեմ:

Ի պատասխան՝ ստեղծվեց վերջին երեք տերությունների դաշինքը: Նրանք կարողացան հարթել իրենց միջև առկա շահերի յուրջ հակադրությունը: **1893 թ.** Ֆրանսիայի և Ռուսաստանի միջև կնքվեց դաշնագիր: Երկարատև բանակցություններից հետո Ֆրանսիայի և Մեծ Բրիտանիայի միջև **1904 թ.** կնքվեց համաձայնություն, որը հայտնի է **Անտանտ (սրտագին համաձայնություն)** անունով: Շուտով կարգավորվեցին նաև ռուս-անգլիա-

կան հարաբերությունները, և **1907 թ.** նրանց միջև նույնպես կնքվեց պայմանագիր: Այսպես առաջացավ մեծ տերությունների երկրորդ դաշինքը, որը կոչվեց **Եռյակ միություն** կամ **Անտանտ**:

Եռյակ դաշինքի և Անտանտի անդամ երկրները փորձում էին ռազմական ճանապարհով հասնել համաշխարհային գերիշխանության: Իրենց զավթողական նպատակները նրանք քողարկում էին արդարության, ազգերի ինքնորոշման և ինքնապաշտպանության կարգախոսների տակ:

Հարցեր և առաջադրանքներ

1. Երբ է ավարտվել աշխարհի գաղութային բաժանումը: Թվարկե՞ք խոշոր գաղութատեր երկրները: Ձեր կարծիքով՝ ինչո՞ւ Աֆրիկայի գաղութացումն ավելի ուշ ավարտվեց:
2. Որո՞նք էին մեծ տերությունների միջև հակասությունների սրման գլխավոր պատճառները:
3. Ի՞նչ է իմպերիալիզմը: Ո՞ր երկրներն էին վարում իմպերիալիստական քաղաքականություն:
4. Ձեր կարծիքով ի՞նչ ազդեցություն ունեին հասարակական շարժումները միջազգային հարաբերությունների վրա: Ովքե՞ր էին պացիֆիստները: Երբ է ստեղծվել Կարմիր խաչը:
5. Ի՞նչ կարևոր որոշումներ ընդունեցին Հաագայում կայացած երկու միջազգային համաժողովները:
6. Երբ և ո՞ր պետությունները ձևավորեցին երկու հակադիր ռազմաքաղաքական խմբավորումները:
7. Ի՞նչ անուններով են հայտնի այդ դաշինքները: Իրականում ի՞նչ նպատակներ էին հետապնդում դրանց անդամ պետությունները:

Քննարկման հարց

Միջազգային հարաբերություններում հնարավոր է ունենալ մշտական դաշնակիցներ:

Նոր հասկացություններ, անուններ, արտահայտություններ

Մետրոպոլիա, պացիֆիստ, Կարմիր խաչի միջազգային ընկերություն, իմպերիալիզմ (կայսերապաշտություն), Հաագայի միջազգային երկու համաժողովներ, Եռյակ դաշինք, Եռյակ միություն (Անտանտ), «Բրիտանական կայսրությունում արևը երբեք մայր չի մտնում»:

Պատերազմի պատճառները, մասնակիցների նպատակները

Մեծ տերությունների միջև հակասությունները ոչ միայն չլուծվեցին, այլև ավելի խորացան: Ի վերջո, դրանք հանգեցրին համընդհանուր պատերազմի երկու ռազմաքաղաքական դաշինքների միջև: Պատերազմի գլխավոր պատճառներն ըստ բնույթի չորսն էին՝ **տարածքային, տնտեսական, ռազմական և գաղափարական:**

Աշխարհի գաղութային բաժանման ավարտից հետո պայքար ծավալվեց տարածքների և ազդեցության ոլորտների **վերաբաժանման** համար: Այդ հարցում հատկապես աչքի էին ընկնում նոր գաղութատեր երկրները՝ Գերմանիան, Իտալիան և Ճապոնիան:

Արդյունաբերական զարգացած երկրները ձգտում էին ձեռք բերելու առևտրի համար նորանոր շուկաներ, տեր դառնալու հույսով հարուստ պաշարների: Առաջնային նպատակն էր ապահովել **տնտեսական և ֆինանսական** գերազանցություն իրենց հակառակորդների նկատմամբ:

Խոշոր տերությունները սկսեցին մեծ գումարներ ծախսել իրենց բանակները հզորացնելու համար: Նրանց միջև ծավալվեց սպառազինությունների մրցավազք: Նպատակն էր **ռազմական** առումով նույնպես հասնելու գերազանցության հակառակորդների հանդեպ և պատրաստ լինել պաշտպանելու իրենց պետությունն ու գաղութները:

Տերություններից յուրաքանչյուրը նախօրոք մշակել էր պատերազմի իր նպատակները և ծրագիրը: Այդ երկրներում մեծ տարածում գտավ **ազգայնամոլությունը**, որը քարոզում էր ատելություն ու թշնամանք այլ ազգերի նկատմամբ: Տեղի էր ունենում պատերազմի **գաղափարական** նախապատրաստում:

Այսպես՝ **Գերմանիայի** նպատակն էր հաստատել իր գերիշխանությունը Եվրոպայում: Նա ուզում էր զավթել

անգլիական և ֆրանսիական գաղութները, մասնատել Ռուսաստանը: **Ավստրո-Հունգարիան** նպատակ ուներ իր լիակատար ազդեցությունը հաստատելու Բալկաններում: **Օսմանյան կայսրության** ծրագիրն էր գրավել Կովկասը, Դրիմը, Իրանական Ատրպատականը և ծավալվել մինչև Ալթայ: Այսինքն՝ իրագործել իր պանթյուրքական նկրտումները:

Ատտանտի երկրներից **Մեծ Բրիտանիայի** հիմնական նպատակն էր պահպանել իր գաղութները և թուլացնել գլխավոր ախտյան Գերմանիային:

Ֆրանսիան հույս ուներ վերադարձնել ֆրանս-պրուսական պատերազմի ժամանակ կորցրած տարածքները, ինչպես նաև զավթել Հոենոսի ձախ ափը և գերմանական գաղութները:

Իր հերթին՝ **Ռուսաստանը** ծրագրել էր իրականացնել իր դարավոր նպատակը՝ գրավել Բոսֆոր ու Դարդանեղ նեղուցները և դուրս գալ Միջերկրական ծով, ինչպես նաև գրավել Արևմտյան Հայաստանը և ամուր հաստատվել Մերձավոր Արևելքում: Արդյունքում՝ Օսմանյան կայսրությունը պետք է մասնատվեր:

Ջավթողական նպատակներ էին հետապնդում նաև պատերազմի սյուս մասնակիցները՝ **Իտալիան, Ճապոնիան, Բուլղարիան** և ուրիշներ:

Առաջին համաշխարհային պատերազմի սկիզբը

Առաջին աշխարհամարտը ծագեց Եվրոպայում: Այն սկսվեց Բալկանյան թերակղզում: Այստեղ բախվում էին երկու հակադիր դաշինքների շահերը, և պատահական չէ, որ Բալկանները պատկերավոր անվանում էին «**վառողի տակառ՝ Եվրոպայի տակ**»:

Պատերազմի պատճառները առկա էին, տերությունները նախապատրաստվել էին դրան: Միայն առիթ էր պետք այն սկսելու համար:

1914 թ. հունիսի 28-ին սերբ ազգայնականները Սարաևոյում իրականացրին Ավստրո-Հունգարիայի թագաժառանգ Ֆրանց Ֆերդինանդի սպանությունը: Դա էլ եղավ առիթը: Ավստրո-Հունգարիան ուղիղ մեկ ամիս անց պատերազմ հայտարարեց Սերբիային: Ռուսաստա-

**ԱՌԱՋԻՆ
ԱՇԽԱՐՀԱՍՏԱՐՏՈՒՄ
ՀԱԿԱՍՏԱՐՏՈՂ ԿՈՂՄԵՐԻ
ՆՈՐԱԳՈՒՅՆ ՀՋՈՐ
ՋԻՆԱՏԵՍԱԿՆԵՐԸ**



Գերմանական մեծ տրամաչափի հրանոթ



Անգլիական սուզանավ



Ֆրանսիական գնդացի



Ռուսական հզոր զրահանավ



Ֆրանց Ֆերդինանդի վրա նահափորձ կատարած սերբուսանող Գավրիլո Գրինցիպի ձերբակալությունը մահափորձից հետո



Նր հանդես եկավ Սերբիայի պաշտպանությամբ և սկսեց ընդհանուր զորահավաք: Ի պատասխան՝ Գերմանիան **1914 թ. օգոստոսի 1-ին** (հին տոմարով՝ հուլիսի 19-ին) պատերազմ հայտարարեց Ռուսաստանին: Այդ օրն էլ ընդունված է անվանել **Առաջին աշխարհամարտի սկիզբը**:

Պատերազմի մեջ մտան նաև Ֆրանսիան ու Մեծ Բրիտանիան: Հետագայում պատերազմի մեջ ներքաշվեցին բազմաթիվ պետություններ Ամերիկայից, Ասիայից, որոնք առավելապես միացան Անտանտին: Այսինքն՝ համաեվրոպականից պատերազմը վերաճեց համաշխարհայինի: Այն պատմության մեջ հայտնի է **Առաջին աշխարհամարտ**, երբեմն՝ **Մեծ պատերազմ** անունով:

Պատերազմի սկսվելու հետ կապված դիպուկ է արտահայտվել ԱՄՆ-ի նախագահ Վուդրո Վիլսոնը.

«Բոլորը փնտրում և չեն գտնում այն պատճառը, որից սկիզբ առավ պատերազմը: Զուր են նրանց որոնումները, այդ պատճառը նրանք չեն գտնի: Պատերազմը սկիզբ է առել ոչ թե ինչ-որ մի պատճառից, այլ սկսվել է բոլոր պատճառներով միաժամանակ»:

Պատերազմի գլխավոր ճակատները

Առաջին աշխարհամարտը ծավալվեց տարբեր աշխարհամասերում: Ռազմական գործողություններ էին ընթանում մոտ մեկ տասնյակի հասնող ռազմաբեմերում: Սակայն գլխավոր ճակատները երկուսն էին: Առաջինը **Արևմտաեվրոպական (Ֆրանսիական) ճակատն** էր, որը ձգվում էր ֆրանս-գերմանական սահմանով և Բելգիայով: Երկրորդը՝ **Արևելաեվրոպական (Ռուսական) ճակատն** էր, որն անցնում էր ռուս-գերմանական



Անգլիական բանակը Առաջին աշխարհամարտում

Նոր զինատեսակից՝ հրասայլից (տանկ) բացի՝ լայնորեն կիրառվում էին նաև գնդացիներ, հզոր հրանոթներ, սուզանավեր և զենքի այլ տեսակներ, որոնք նպաստեցին մարտերում զոհերի թվի աննախադեպ աճին:

և ռուս-ավստրիական սահմանների երկայնքով՝ Բալթիկ ծովից մինչև Սև ծով:

Պատերազմի վճռական տեղամասերից էր նաև **Կովկասյան ճակատը**: Պատերազմի սկզբից երեք ամիս անց Օսմանյան կայսրությունը միացավ Եռյակ դաշինքին: Սկսվեց ռուս-թուրքական հերթական բախումը: Ռազմական գործողությունները տեղի էին ունենում գլխավորապես Հայաստանի տարածքում:

Պատերազմն ընթանում էր նաև Բալկաններում, Միջագետքում, Սիրիայում, Հեռավոր Արևելքում, Աֆրիկայում:

Ռազմական գործողությունները 1914–1916 թվականներին

Առաջին աշխարհամարտի ռազմական գործողությունները մղվում էին ցամաքում, ծովում և օդում: Մասնակից տերությունները ծրագրել էին շատ արագ ջախջախել հակառակորդներին ու տոնել հաղթանակ, սակայն նրանց սպասումները չարդարացան: Պատերազմը ձգձգվեց:

Առաջին տարվա իրադարձություններից առանձնանում է Արևմտաեվրոպական ճակատում **1914 թ. սեպտեմբերին** տեղի ունեցած **Մառնի** ճակատամարտը: Ֆրանս-անգլիական զորքերը կանգնեցրին գերմանացիների հարձակումը դեպի Փարիզ և ստիպեցին նահանջել: Երկու կողմերից զոհվեց և վիրավորվեց 600 հազար մարդ: Ֆրանսիայի արագ ջախջախման գերմանական

Երիտթուրքական իշխանությունը համարեց, որ պատերազմի պայմաններում ստեղծվել է նպաստավոր դրություն՝ նախօրոք նշակած հայաջինջ ծրագիրն իրականացնելու համար: Թուրքական պետության այդ ծանրագույն հանցագործությանը՝ **Մեծ եղեռնին**, գոհ գնացին 1,5 միլիոն հայեր: Ցեղասպանության ենթարկվեցին նաև Օսմանյան կայսրությունում ապրող հույները, ասորիները:

1915 թ. սեպտեմբերի 15-ին Հալեպի նահանգապետարանին հղված Թալեաթ փաշայի ծածկագիր-հեռագիրը

Հալեպի նահանգապետարանին

Ձեզ նախապես հաղորդվել էր, որ կառավարությունը որոշել է ընկերության (Միություն և առաջադիմություն կուսակցության) հրամանով ամբողջովին վերացնել Թուրքիայում բնակվող բոլոր հայերին: Այդ հրամանին և որոշմանը դեմ դուրս եկողները չեն կարող մնալ կայսրության պաշտոններում: Որքան էլ անսովոր թվան ձեռնարկված միջոցները, պետք է վերջ տրվի հայերի գոյությանը՝ առանց սեռ ու տարիք հաշվի առնելու: Չպետք է նաև սուրբ սալ խղճի լայթիլ:

Ներքին գործերի նախարար Թալեաթ

ծրագիրը ճախողվեց, Արևմտյան ճակատում ուժերը հավասարվեցին:


Օգոստոսի կեսին **Ճապոնիան** վերջնագիր ներկայացրեց, իսկ մի քանի օր անց պատերազմ հայտարարեց Գերմանիային: Նա ծրագրել էր զավթել Խաղաղ օվկիանոսի գերմանական տիրույթները և իրեն ենթարկել Չինաստանը:

Կովկասյան ճակատում 1914 թ. դեկտեմբերի 9-ից մինչև 1915 թ. հունվարի 5-ը Սարիղամիշի մոտ տեղի ունեցած ճակատամարտում թուրքական բանակը ծանր պարտություն կրեց (վերհիշեք Կովկասյան ճակատի մասին Հայոց պատմության համապատասխան դասը):

Իտալիան 1915 թ. անցավ Անտանտի, իսկ **Բուլղարիան**՝ Գերմանիայի կողմը: Եռյակ դաշինքը այդպիսով վերածվեց **Քառյակ դաշինքի**: Նույն տարում Ավստրո-Հունգարիան և Բուլղարիան նվաճեցին և ավերեցին Սերբիան:

Ռուսական զորքերը պատերազմի երկրորդ տարում ծանր վիճակի մեջ դրին Ավստրո-Հունգարիային: Մակայն Գերմանիան օգնության հասավ: Այս անգամ նա որոշել էր շարքից հանել Ռուսաստանին, և այդ նպատակով մեծ ուժեր տեղափոխեց Արևելաեվրոպական ճակատ: Ռուսաստանը ծանր կորուստներ ունեցավ, սակայն շարունակեց պատերազմը: Իսկ Կովկասյան ճակատում ռուսական բանակը (հայ կամավորների մասնակցությամբ) հաղթանակներ էր տանում:

Պատերազմի երրորդ տարում Արևմտաեվրոպական ճակատում խոշոր ճակատամարտ տեղի ունեցավ





Տեսարան Վերդենի
ճակատամարտից

Վերդենի մոտ: 1916 թ. փետրվարից մինչև դեկտեմբեր ընթացած կռիվներում կողմերից ոչ մեկը վճռական հաջողության չհասավ: Այսպես կոչված «**Վերդենյան մսադաջում**» ֆրանս-անգլիական կողմը կորցրեց 750 հազար, իսկ գերմանացիները՝ 450 հազար մարդ: Անգլո-ֆրանսիական զորքերը փորձեցին հակահարձակման անցնել **Սոմ գետի** մոտ: Ճակատամարտը տևեց **հունիսից մինչև նոյեմբեր**: Կողմերի կորուստները մեծ էին՝ միասին գերազանցեցին մեկ միլիոնը: Սակայն ուժերի հավասարակշռությունը Ֆրանսիական ճակատում պահպանվեց:

Արևելաեվրոպական ճակատում ռուսական բանակը ջախջախեց Ավստրո-Հունգարիային, որով փրկեց պարտված Իտալիային: Ռուսաստանը կարևոր հաղթանակներ տարավ նաև Կովկասյան ճակատում և գրավեց Արևմտյան Հայաստանի մեծագույն մասը՝ Տրապիզոնից մինչև Բիթլիս:

Այսպիսով՝ ի մի բերելով 1914-1916 թթ. ռազմական գործողությունների արդյունքները՝ կարող ենք նշել, որ ընդհանուր հաջողությունը Ատանտի երկրների կողմն էր: Քառյակ միության երկրները զգալիորեն թուլացան, սակայն դեռ չէին կորցրել հաղթանակի հասնելու հույսը:

Հարցեր և առաջադրանքներ

1. Որո՞նք էին համաշխարհային պատերազմի գլխավոր պատճառները: Ներկայացրե՞ք հակադիր խմբավորումների անդամ պետությունների ռազմաքաղաքական նպատակները:
2. Ինչո՞ւ է ասվում, որ անխուսափելի էր դարձել համընդհանուր պատերազմը:
3. Համաձայն էք պատերազմի սկսվելու վերաբերյալ Վ. Վիլսոնի տեսակետի հետ: Ո՞ր իրադարձությունը եղավ Առաջին աշխարհամարտի առիթը:
4. Ե՞րբ սկսվեց պատերազմը: Ինչո՞ւ է այն կոչվում համաշխարհային: Ուրիշ ինչ անուններով է հայտնի:
5. Նշե՞ք աշխարհամարտի գլխավոր ճակատները:
6. Թվարկե՞ք 1914–1916 թթ. ռազմական հիմնական իրադարձությունները և դրանց արդյունքները:
7. Հայաստանը ինչ ծանր փորձության ենթարկվեց Առաջին աշխարհամարտի տարիներին:

Գործնական աշխատանք

Աշխատանքային տետրում լրացրե՞ք Առաջին աշխարհամարտին վերաբերող աղյուսակը.

Պատճառները, առիթը	Մասնակիցները	Գլխավոր ճակատները	Ռազմական գործողությունները
			1914–1916 թթ.
			1917–1918 թթ.

Նոր հասկացություններ, անուններ, արտահայտություններ

Առաջին աշխարհամարտ (Մեծ պատերազմ), «վառողի տակաո՝ Եվրոպայի տակ», Արևմտաեվրոպական (Ֆրանսիական) ճակատ, Արևելաեվրոպական (Ռուսական) ճակատ, Կովկասյան ճակատ, Քառյակ դաշինք, Մառնի, Սարիղամիշի և Սոմի ճակատամարտեր, «Վերդենյան մսաղաց», Մեծ եղեռն:

26

ԱՌԱՋԻՆ ԱՇԽԱՐՀԱՄԱՐՏԻ ԱՎԱՐՏԸ ԵՎ
ՀԵՏԵՎԱՆՔՆԵՐԸ**Նոր ռազմաքաղաքական իրավիճակ
1917 թվականին**

Աշխարհամարտի շարունակումը 1917 թ. ստեղծեց նոր ռազմաքաղաքական իրավիճակ: Նախ՝ ավելացավ պատերազմող երկրների քանակը: ԱՄՆ-ը, Հունաստանը, Չինաստանն ու Բրազիլիան միացան Անտանտին և հզորացրին նրա՝ առանց այդ էլ մեծ ներուժը:

Հետաքրքրական է ԱՄՆ-ի դիրքորոշումը պատերազմի ընթացքում: Նա առևտուր էր անում երկու հակամարտող կողմերի հետ, ինչը հսկայական եկամուտներ էր բերում: Եվ պատահական չէ, որ աշխարհի ոսկու պաշարի կեսից ավելին հայտնվեց ամերիկյան դրամատներում: Մակայն ԱՄՆ-ը որոշեց միանալ Անտանտին, որովհետև վերջինիս հաղթանակը կասկած չէր հարուցում: Պատերազմին մասնակցելով՝ նա նպատակադրվել էր տարածել իր ազդեցությունը Լատինական Ամերիկայում, Իտալադ օվկիանոսի ավազանում և Հեռավոր Արևելքում:



Փետրվարյան հեղափոխությունը Ռուսաստանում



Գրվազ Բրեստ-Լիտովսկի բանակցություններից

Ժողովրդական կոմիսարների խորհուրդ՝ իրենց առաջնորդ **Վ. Լենինի** գլխավորությամբ: Համագումարն ընդունեց նաև օրենքներ՝ պատերազմից դուրս գալու, հաշտություն կնքելու և հողի մասին: Բոլշևիկները խնդիր էին դրել Ռուսաստանում կառուցելու **սոցիալիստական հասարակություն**: Բազմազգ Ռուսաստանում նրանք քայլեր կատարեցին՝ ազգերի ինքնորոշման սկզբունքի հիման վրա լուծելու ազգային հարցը:

Հոկտեմբերյան հեղափոխությունը կտրուկ փոխեց աշխարհաքաղաքական իրավիճակը: Բոլշևիկները ծրագրել էին հրահրել **համաշխարհային հեղափոխություն** և սոցիալիստական կարգեր հաստատել աշխարհի շատ երկրներում, առաջին հերթին՝ պատերազմող պետություններում: Այլապես բոլշևիկները հույս չունեին, թե կարող են միայնակ երկար պահել իրենց իշխանությունը Ռուսաստանում:

Գերմանիայի և նրա դաշնակիցների պարտությունը

Պատերազմը շարունակվում էր, իսկ բոլշևիկների նախատեսած համաշխարհային հեղափոխությունը տեղի չէր ունենում: Այդ պատճառով նրանք դիմեցին պատերազմող կողմերին՝ առաջարկելով կնքել արդարացի հաշտություն առանց բռնազավթումների և ռազմատուգանքների: Նրանց դիմումին արձագանքեցին միայն

**Քաղվածք Անտանտի և Թուրքիայի միջև 1918 թ.
հոկտեմբերի 30-ին Մուդրոսում կնքված զինադադարից**

- ՀՈԳՎԱԾ 1.** Բացել Դարդանեղ ու Բոսֆոր նեղուցները և ազատ մուտքը Սև ծով: Դաշնակիցների կողմից Դարդանեղ և Բոսֆոր նավահանգիստների ռազմական նվաճում:
- ՀՈԳՎԱԾ 4.** Դաշնային բոլոր ռազմագերիներին և ներկայված հայերին պետք է հավաքել Կ. Պոլսում, որպեսզի առանց որևէ պայմանի հանձնվեն դաշնակիցներին:
- ՀՈԳՎԱԾ 5.** Թուրքական բանակի անհապաղ զորացրում, բացի սահմանապահ և ներքին կարգը պահպանող զորքերից:
- ՀՈԳՎԱԾ 6.** Բոլոր ռազմանավերի հանձնում...
- ՀՈԳՎԱԾ 15.** Դաշնակիցներն առանձնացնելու են սպաներ, որոնք հսկելու են բոլոր երկաթուղիները, այդ թվում՝ Անդրկովկասի այն երկաթուղիները, որոնք այժմ Թուրքիայի վերահսկողության տակ են...
- ՀՈԳՎԱԾ 24.** Հայկական որևէ վիլայեթում անկարգությունների դեպքում դաշնակիցներն իրավունք ունեն գրավելու այն:

Քառյակ դաշինքի երկրները: Արևելանվորոպական և Կովկասյան ճակատներում հաստատվեց զինադադար: Սակայն բոլշևիկներն իրենց հաշվարկներում սխալվել էին: Երեք ամիս տևած բանակցություններից հետո նրանք ստիպված էին ստորացուցիչ պայմաններով, առանց Անտանտի դաշնակիցների՝ **առանձին (սեպարատ) պայմանագիր** կնքել Քառյակ դաշինքի հետ: **1918 թ. մարտի 3-ին Բրեստ-Լիտովսկում** ստորագրված հաշտության պայմանագրով Ռուսաստանը հրաժարվեց Լեհաստանից, Ուկրաինայից, Բելառուսի մեծ մասից, Մերձբալթիկայից: Բացի այդ՝ պետք է վճարեր խոշոր ռազմատուգանք:

Գերմանիայի աջակցությամբ պայմանագրում տեղ գտան նաև Թուրքիայի պահանջները: Խորհրդային Ռուսաստանը պարտավորվում էր իր զորքերն անհապաղ դուրս բերել Արևմտյան Հայաստանից: Ավելին՝ նա հանձն էր առնում նաև Թուրքիային վերադարձնել Կարսը, Արդահանը և Բաթումը:

Բրեստ-Լիտովսկի պայմանագիրը միաժամանակ փրկեց Քառյակ դաշինքի երկրներին: Գերմանիան, որ արդեն կանգնած էր պարտության եզրին, իր ուժերը կենտրոնացրեց Ֆրանսիական ճակատում և **1918 թ. գարնանը** անցավ հարձակման: Գերմանական զորքերը հուլիսին նույնիսկ հասան մինչև Փարիզի մատույցները:

Ռազմական գործողությունները վերսկսվեցին նաև Կովկասյան ճակատում: Թուրքական զորքերը գրավեցին Արևմտյան Հայաստանը և մտան Այսրկովկաս ու

ՓԱՍՏԱԹՈՒՂԹ
Հատված սուլթանական դատարանի
մեղադրական եզրակացությունից և դատավճռից
 Դատը կայացել է 1918 թ.

«Ներկա հետաքննության հիմնախնդիրը հետևյալն է. հայերի տեղահանության ընթացքում տարբեր ժամանակներում և զանազան վայրերում տեղի ունեցած հանցագործությունները... ցույց են տալիս, որ դրանք ոչ թե սահմանափակ կամ տեղական բնույթ են ունեցել, այլ կանխատեսված իրականացվել են վերոհիշյալ անձանցից բաղկացած «հատուկ կենտրոնի» բանավոր հրահանգներով և գաղտնի հրամաններով»:

«Օրենսգրքում առկա... հողվածների հիման վրա Թալեաթը, Էնվերը, Ջեմալը և դոկտոր Նազըմը դատապարտվում են մահվան, իսկ Ջավիդը, Մուստաֆա Շերեֆը, Մուսա Քյադիմը՝ 15-ական տարի ժամկետով աքաղի: Փախուստի մեջ գտնվողներին զրկել քաղաքացիական իրավունքներից, բռնագրավված ունեցվածքի հարցում գործել համաձայն օրենքի»:

Արևելյան Հայաստան: Ռուսական բանակին փոխարինած հայկական զորքը կարողացավ կանգնեցնել նրանց առաջխաղացումը, տանել կարևոր հաղթանակներ: **1918 թ. հունիսի 4-ին** Բաթումում կնքված հաշտությանը Կովկասյան ճակատում պատերազմն ավարտվեց:

Քառյակ դաշինքի հաջողությունները ձեռք բերվեցին գերագույն ջանքերի գնով, սակայն նրանց ներուժն արդեն սպառված էր: Անտանտը համալրեց իր ուժերը, միացան նաև ամերիկյան թարմ զորքեր, և **1918 թ. սեպտեմբերին** հակահարձակում սկսեց բոլոր ճակատներում: Նախ պարտվեցին և պատերազմից դուրս եկան Գերմանիայի դաշնակիցներ Բուլղարիան, Օսմանյան կայսրությունը և Ավստրո-Հունգարիան: Գրանից հետո Գերմանիան ի վիճակի չէր շարունակելու պատերազմը: Բացի այդ՝ նոյեմբերի սկզբին երկրում հեղափոխություն սկսվեց, որի արդյունքում տապալվեց միապետությունը:

Գերմանիան ընդունեց իր անվերապահ պարտությունը և **1918 թ. նոյեմբերի 11-ին** ստորագրեց զինադադարի պայմանագիրը: Այսպես ավարտվեց ավելի քան չորս տարի տևած Մեծ պատերազմը:

Առաջին աշխարհամարտի գլխավոր հետևանքները

Պատերազմն ահռելի կորուստներ պատճառեց մարդկությանը, ծանր հետևանքներ ունեցավ արդյունաբերական հասարակության համար: Մեծ էր մարդկային զո-

Փաստաթղթի պարզաբանում

Անտանտի ճնշման տակ պարտված Օսմանյան տերությունն սկսեց դատավարություն Հայոց ցեղասպանության կապակցությամբ: Սակայն դատարանը փորձում էր Հայոց ցեղասպանությունը բարդել ոչ թե պետության, այլ կառավարության գլուխ կանգնած անձանց վրա: Փաստաթուղթը վկայում է, որ այն ժամանակ թուրքական պետությունն ընդունել է ցեղասպանության փաստը: Փախուստի մեջ գտնվողների դատավճիռն իրագործեցին հայ վրիժառուները:

Հայոց մեծ եղեռնի բազմաթիվ վավերագրերից մեկը



ների թիվը: Միայն մասնակից երկրների զինված ուժերը տվեցին **մոտ 10 միլիոն սպանված, 20 միլիոն էլ վիրավորվեց և խեղանդամ դարձավ**: Սովի և համաճարակների զոհ դարձան թիկունքի միլիոնավոր խաղաղ բնակիչներ:

Պատերազմող երկրներն ունեցան նաև հսկայական **նյութական կորուստներ**: Պատերազմական ծախսերը միջին հաշվով կազմեցին մեծ տերությունների ազգային հարստության 1/3-ը: Ավերվեցին բազմաթիվ քաղաքներ, գյուղեր, արդյունաբերական ձեռնարկություններ, երկաթուղիներ, ճանապարհներ, կամուրջներ և այլն:

Պատերազմը, սակայն, խթանեց **ռազմական արդյունաբերության** զարգացումը: Կատարելագործվեց պատերազմ վարելու գիտությունը՝ ռազմարվեստը: Մարտական գործողությունների ժամանակ օգտագործվեցին ռազմական տեխնիկայի և զենքի նոր տեսակներ՝ հրասայլեր, կրականետներ, օդանավեր, սուզանավեր և այլն: Կիրառվեց նաև քիմիական զենք: **Այսպիսով՝ պատերազմը դարձավ ավելի ավերիչ և մահաբեր**:

Պատերազմի գլխավոր հետևանքներից մեկը երիտթուրքերի կողմից իրագործված **ցեղասպանության** միջոցով հայերին իրենց հայրենիքի մեծ մասից զրկելն էր: Պատերազմից հետո **Մեծ եղեռնը** իրավական և քաղաքական գնահատական չստացավ, ինչը ճանապարհ հարթեց աշխարհում հետագա ցեղասպանական բազմաթիվ հանցագործությունների համար:

Առաջին աշխարհամարտն ունեցավ նաև դրական հետևանքներ: Պատմության թատերաբեմից հեռացան **Ավստրոհունգարական, Ռուսաստանյան, Օսմանյան և Գերմանական կայսրությունները**: Չորս նախկին տերությունների տարածքում առաջացան նոր բազմաթիվ ազգային պետություններ՝ Չեխոսլովակիա, Լեհաստան, Ֆինլանդիա, Ուկրաինա, Հայաստան և այլն: Տեղի ունեցան նաև ժողովրդավարական հեղափոխություններ, որոնց արդյունքում տապալվեց կառավարման միապետական ձևը, տարածվեց ժողովրդավարությունը: Իսկ Ռուսաստանում՝ առաջինը աշխարհում, սկսվեց նոր՝ սոցիալիստական հասարակության կառուցման գործընթացը:

Հարցեր և առաջադրանքներ

1. Ընդհանուր կողմերով ներկայացրե՞ք ռազմաքաղաքական իրավիճակը 1917 թվականին: Ձեր կարծիքով ինչո՞ւ ԱՄՆ-ը միացավ Անտանտին:
2. Ե՞րբ է տապալվել միապետությունը Ռուսաստանում, ո՞ւմ անցավ գործադիր իշխանությունը: Ի՞նչ էին խորհուրդները և ի՞նչ դեր էին խաղում:
3. Ե՞րբ բոլշևիկները եկան իշխանության: Ի՞նչպե՞ս էր կոչվում և ո՞վ գլխավորեց գործադիր իշխանության նոր մարմինը: Ի՞նչ որոշումներ ընդունեց Խորհուրդների համառուսաստանյան երկրորդ համագումարը: Ի՞նչ նպատակներ ունեին բոլշևիկները:
4. Ի՞նչո՞ւ բոլշևիկները համաձայնվեցին առանձին հաշտության պայմանագիր կնքելու Քառյակ դաշինքի հետ: Ի՞նչ հետևանքներ ունեցավ այդ պայմանագիրը:
5. Ե՞րբ և ի՞նչ իրադարձություններով ավարտվեց Առաջին աշխարհամարտը:
6. Ներկայացրե՞ք Առաջին աշխարհամարտի գլխավոր հետևանքները:

Գործնական աշխատանք

Շարունակե՛ք լրացնել Առաջին աշխարհամարտին վերաբերող աղյուսակը՝ կատարելով ավելացումներ առաջին և վերջին սյունակներում:

Նոր հասկացություններ, անուններ

Փետրվարյան հեղափոխություն, Ժամանակավոր կառավարություն, Հոկտեմբերյան հեղափոխություն, խորհուրդներ, Խորհրդային հանրապետություն, համաշխարհային հեղափոխություն, առանձին (սեպարատ) պայմանագիր, Բրեստ-Լիտովսկի պայմանագիր:

27

ԿՐԹՈՒԹՅՈՒՆԸ ԵՎ ԳԻՏՈՒԹՅՈՒՆԸ XIX ԴԱՐԻ ԵՐԿՐՈՐԴ ԿԵՍԻՆ ԵՎ XX ԴԱՐԻ ՍԿԶԲԻՆ



**Նոբելյան մրցանակի
մեդալը**

Շվեդ գործարար և գյուտարար Ա. Նոբելը (1833–1896), հայտնագործել է ուժանակը (դինամիտ): Համաձայն կտակի՝ նրա հարստության հիման վրա ստեղծվել է հիմնադրամ, որից Շվեդիայի արքայական ակադեմիան 1901 թ. ի վեր մրցանակներ է շնորհում առավել աչքի ընկած գիտնականներին, ավելի ուշ՝ նաև գրողներին և լսադաշտության գործիչներին:

Կրթության և գիտության զարգացման ընդհանուր միտումները

Արդյունաբերական հասարակության երկրորդ շրջափուլում Եվրոպայի և Ամերիկայի երկրներում մշակույթը բարձրացավ որակական նոր մակարդակի: Նրա արդյունքները սկսեցին հաստի դառնալ հասարակության լայն խավերին: Գա էր պահանջում արդյունաբերության բուռն զարգացումը: Անհրաժեշտ էին նոր տեխնիկային տիրապետող բանվորներ: Բարձրագույն կրթություն ստացած ճարտարագետները դարձան տնտեսության ղեկավարման հիմնական օղակը:

Ասվածը հնարավոր դարձավ դպրոցական համակարգի կատարելագործման հետևանքով: 1870–ական թթ. զարգացած բոլոր երկրներում **տարրական կրթությունը դարձավ պարտադիր**: Ընդլայնվեց միջնակարգ կրթության համակարգը, որի ծրագրերում մեծ տեղ էին զբաղեցնում բնագիտական առարկաները: Ավանդական համալսարանների կողքին **տարածում ստացան տեխնիկական բուհերը**, որոնք պատրաստում էին **ճարտարագետներ**:


Գիտությունն սկսեց ընկալվել որպես հասարակության առաջընթացի կարևորագույն նախապայման: Գետությունները և առանձին ձեռներեցները հովանավորում էին հետազոտական հիմնարկների գործունեությունը՝ ինստիտուտներ, կենտրոններ, ակադեմիաներ: Սերտացավ տարբեր երկրների գիտնականների համագործակցությունը: Ստեղծվեցին միջազգային գիտական հիմնադրամներ, որոնք պարզևներ էին սահմանում հետազոտական լավագույն արդյունքների համար: Դրանցից ամենահայտնին **Շվեդական ակադեմիայի Նոբելյան հիմնադրամն էր**, որը գործում է առ այսօր:

Հիմնարար գիտությունները

Նոր արդյունքներ արձանագրվեցին հիմնարար գիտությունների բնագավառում: Դրանց հեղինակները տարբեր երկրների ականավոր գիտնականներ էին՝ անգլիացիներ, ֆրանսիացիներ, գերմանացիներ, ռուսներ, ամերիկացիներ և այլք:

Տեսական նոր հետազոտությունների արդյունքում արմատապես փոխվեցին աշխարհի վերաբերյալ մարդկության պատկերացումները: Անգլիացի **Չ. Գարվին** ստեղծեց մի կուռ տեսություն, որը բացատրում է կենդանական տեսակների միլիոնավոր տարիներ տևած աստիճանական զարգացումը՝ պարզից դեպի բարդը: Ռուս **Գ. Մենդելեևը** հայտնաբերեց քիմիական տարրերի պարբերականության օրենքը, որի շնորհիվ որոշարկվում է բոլոր տարրերի ճշգրիտ տեղը համակարգում: Կանխագուշակվում են անգամ այն տարրերը, որոնք գիտությանը դեռ հայտնի չեն: Գերմանացի **Ա. Այնշթայնը** մշակեց տիեզերական ժամանակի, տարածության, նյութի զանգվածի, էներգիայի, շարժման նոր տեսություն: Դա արմատապես փոխեց տիեզերքի վերաբերյալ պատկերացումները, որոնք ձևավորվել էին Ռ. Գեկարտի և Ի. Նյուտոնի ժամանակներից ի վեր:

Հատկապես տպավորիչ էին փորձարարական գիտությունների ձեռքբերումները: Ստեղծվեցին **գենետիկական (Գ. Մենդել)**, **մանրէաբանությունը (Լ. Պաստյոր)**, **էլեկտրադինամիկան (Ջ. Մաքսվել)**, **ատոմային ֆիզիկան (Է. Ռեզերֆորդ, Ն. Բոր)** և այլն: Բիմիկոսներին հաջողվեց ստանալ նոր արհեստական նյութեր, որոնք



ՉԱՐԼԶ ԳԱՐՎԻՆ
(1809–1882)

Անգլիացի մեծ բնագետ, էվոլյուցիոն (տևափոխական) տեսության հեղինակը: Իր «Տեսակների ծագումը» և «Մարդու ծագումը» գրքերում ցույց է տվել, որ բույսերի և կենդանիների տեսակները տևական ժամանակի ընթացքում փոփոխվում են: Համոզված էր, որ մարդը ևս միլիոնավոր տարիների զարգացման ուղի է անցել:




«Մերսեդես»
մակնիշի ավտոմեքենայի
առաջին՝ 1901 թ. մոդելը



ԳԱԼԻՏՐԻ ՄԵՆԳԵԼԵՇԿ
(1834-1907)

Ռուս նշանավոր քիմիկոս: Անչափ աշխատասեր և գիտությանը նվիրված էր: Բոլորի կողմից սիրված էր և հարգված: Նրա՝ քիմիական տարրերի պարբերական օրենքը և աղյուսակը աննահագրին մեծ գիտնականի անունը:



ԱԼԲԵՐՏ ԱՅՆԵԹԱՅՆ
(1879-1955)

Հարաբերականության տեսության ստեղծողը: Իր հիմնարար աշխատություններով լայնել է արդիական ֆիզիկայի շատ բնագավառների հետազա գարգացմանը:

ներդրվեցին արդյունաբերության տարբեր բնագավառներում:

Խոշոր ճարտարագետ-գյուտարարների ջանքերով գիտության նվաճումներն ստացան կիրառական նշանակություն: Հայտնաբերվեցին **ռադիոն (Գ. Մարկոնի)**, **հեռախոսը (Ա. Բելլ)**, **ներքին այրման շարժիչը (Գ. Գայմլեր)**, **էլեկտրական լամպը (Թ. Էդիսոն)**: Դրանք և այլ գյուտեր էականորեն փոխեցին մարդկանց կյանքն ու կենցաղը:

- ◆ *Քննարկվող ժամանակաշրջանում հիմնարար գիտությունները հայոց միջավայրում պարզաճ գարգացում չստացան: Պատճառը համալսարանների, գիտական ընկերակցությունների բացակայությունն էր: Դա, իր հերթին, պայմանավորված էր ազգային պետականության բացակայությամբ:*

Այնուամենայնիվ, աշխարհի տարբեր գիտական հիմնարկներում երևացին հայ խոշոր գիտնականներ՝ հանքաբան Ա. Արծրունի (Ռուսաստան), քիմիկոս Ջ. Չանչյան (Իտալիա), ճարտարագետ Հ. Արամյան (Ռուսաստան, Գերմանիա) և այլք:


Հումանիտար գիտություններ

Արդյունաբերական հասարակության զարգացումը նոր խնդիրներ առաջադրեց հումանիտար գիտություններին: Դա սերտորեն կապված էր հասարակական հարաբերությունների, մարդու և նրա կենսագործունեության միջավայրի փոփոխությունների հետ: Դրանց գիտական բացահայտումը վերապահված էր ինչպես ավանդական, այնպես էլ նոր ձևավորվող հասարակական գիտություններին: Դրանցից էին **իմաստասիրությունը (փիլիսոփայություն)**, **պատմագիտությունը, տնտեսագիտությունը, լեզվաբանությունը, իրավագիտությունը**: Բազում հետազոտություններ, հանրամատչելի գրքեր նպաստեցին հումանիտար գիտությունների զարգացմանն ու տարածմանը:

Հույժ կարևոր էր նոր գիտության՝ **հոգեբանության** ի հայտ գալը: Այն խնդիր ուներ ուսումնասիրելու մար-

դու ներաշխարհը, նրա զգայությունները, հույզերը, ապրումները, մտավոր գործողությունները:

- ◆ *Հումանիտար գիտություններից հայոց միջավայրում հասրկապես զարգացում ապրեց հայագիտությունը: Ասպարեզ իջավ Ռուսաստանի և Եվրոպայի համալսարաններում կրթություն ստացած գիտնականների մի բույլ, որն իր ուսումնասիրության խնդիրը դարձրեց հայ գրականությունը, լեզուն, պատմությունը: Գրա խոշորագույն ներկայացուցիչներից էին Ղ. Ալիշանը, Մ. Աբեղյանը, Հ. Աճառյանը, Ն. Ադունցը և ուրիշները:*



ՋԻԳՄՈՒՆԳ ՖՐՈՅԳ
(1856-1939)

Ավստրիացի անվանի հոգեբույժ: Մարդու հոգեբանության նորովի մոտեցման՝ հոգեվերլուծության հիմնադիրը: Հետագայում այդ մեթոդը խորացվեց և լայն տարածում գտավ:

Հարցեր և առաջադրանքներ

1. Ներկայացրե՛ք կրթության և գիտության զարգացման գլխավոր միտումները XIX դարի երկրորդ կեսին և XX դարի սկզբին:
2. Ինչո՞վ կարելի է բացատրել գիտության աննախադեպ զարգացումը:
3. Ձեր կարծիքով ո՞րն է հիմնարար գիտությունների գլխավոր նվաճումը:
4. Թ՛վարկե՛ք գիտական նվաճումները:
5. Ինչո՞ւ հետ էր կապված հումանիտար գիտությունների զարգացումը: Ի՞նչ նոր ուղղություններ առաջացան:

Նոր հասկացություններ, անուններ

Միջնակարգ կրթություն, տեխնիկական բուհ, Նորբեյան միջազգային մրցանակ, ճարտարագետ, գենետիկա, մանրէաբանություն, էլեկտրադինամիկա, ատոմային ֆիզիկա, աստղաֆիզիկա, հեռախոս, ռադիո, էլեկտրական լամպ, հոգեբանություն, Չ. Գարվին, Գ. Մենդելեև, Ա. Այնշթայն:

28

ԳՐԱԿԱՆՈՒԹՅՈՒՆԸ ԵՎ ԱՐՎԵՍՏԸ XIX ԴԱՐԻ ԵՐԿՐՈՐԴ ԿԵՍԻՆ ԵՎ XX ԴԱՐԻ ՍԿԶԲԻՆ



ԳԻ ԳԸ ՄՈՊԱՍՏԸ
(1850–1893)

Ֆրանսիացի գրող, իրապաշտական (ռեալիստական) ուղղության հետևորդ, մանրապատումի մեծ վարպետ:



ԲԵՐՆԱՐԴ ՇՈՈՒ
(1856–1950)

Անգլիացի մեծ երգիծաբան, թատերագիր: Բացառիկ արվեստով ծաղրել է մարդկանց արասները: Բազում ճշգրիտ կարճ դատողությունների հեղինակ է:

Գրականությունը և թատրոնը

Կյանքի ճշմարտացի պատկերումը դարձավ XIX դ. երկրորդ կեսի և XX դ. սկզբի գրողների ստեղծագործության նպատակը: Արդյունաբերական հասարակության մարդու ներաշխարհը՝ բարու և չարի, ստորի և հերոսականի, նեղ անձնականի և հասարակականի բախումներով, կազմեց դրա բովանդակությունը: «Կյանքը՝ ինչպես որ կա». ահա գրական նոր սերնդի հավատամքը:

Այս դիտանկյունից հատկապես առանձնանում էին խոսքի ֆրանսիացի վարպետները՝ **Է. Ջոյան** և **Գի դը Մոպասանը**: Ռուս գրականության մեջ մարդու, հասարակության, պատմության հիմնախնդիրները գեղարվեստական կերպավորում են ստացել **Ֆ. Դոստոևսկու** և **Լ. Տոլստոյի** ստեղծագործություններում:

Նշանակալից էին անգլիական, ամերիկյան, գերմանական գրականությունների նվաճումները: Դրանք տարբեր դիտանկյուններից բացահայտում էին կյանքի լուսաստվերները՝ հումոր և երգիծանք (**Բ. Շոու**), գոյության պայքար և հերոսացում (**Ջ. Լոնդոն**), կենսական ինքնահաստատում և իմաստություն (**Թ. Ման**) և այլն:

Հասարակական կյանքում մեծ կարևորություն ուներ թատրոնը: Մեծ ու փոքր քաղաքներում գործում էին տասնյակ թատրոններ:

Ի հայտ եկան բազում նոր թատերագիրներ՝ ռուս **Ա. Չեխովը**, ֆրանսիացի **Է. Ռոստանը**, նորվեգացի **Հ. Իբսենը** և այլք: Համաշխարհային հռչակ էին վայելում մեծատաղանդ այնպիսի դերասաններ, ինչպիսիք էին **Է. Գուգեն**, **Ս. Բեռնարը**:

- ◆ 1860–1870–ական թթ. ձևավորվող հայ արհեստավարժ թատրոնը համաքայլ էր թատերական այս նվաճումների: Թիֆլիսի և Կ. Պոլսի բեմերում ներկայացվում էին Վ. Շերապիրի, Հ. Իբսենի և այլոց

արեղծագործությունները: Ապարեզ իջան հայ խոշոր թատերագիրներ Ա. Շիրվանզադեն և Լ. Շանթը: Ի հայր եկան ասկանավոր դերասաններ Պ. Ադամյանը և Սիրանուշը: Երիտասարդ Վ. Փափազյանն իր դերասանական մկրտությունն ստացել էր Ս. Բեռնարի թատրոնում:

Խոշորագույն նվաճումներից մեկն էլ կինոարվեստի (կինեմատոգրաֆիա) ստեղծումն էր: **1895 թ. Լուի և Օգյուստ Լյումիեր եղբայրները Փարիզում առաջին անգամ ցուցադրեցին իրենց «շարժուն լուսանկարը»:** Քչերն էին գիտակցում, որ կատարվել է դարակազմիկ հայտնագործություն:

Կերպարվեստը և ճարտարապետությունը

Կերպարվեստի խոշորագույն առաջնթաց արձանագրվեց Ֆրանսիայում: Մի խումբ երիտասարդ նկարիչներ հեռացան ավանդական գեղանկարչությունից: Իրենց կտավներում նրանք սկսեցին կարևորել իրերից ստացած **անմիջական տպավորությունը** (ֆրանսերեն՝ *իմպրեսիոն*): Տպավորություն, որն արդյունք էր բնական լույսի և մարդկային հույզերի համադրության: Այդ նկարիչները կոչվեցին իմպրեսիոնիստներ՝ **Կ. Պիսարո, Կ. Մոնե, Է. Դեգա, Օ. Բենուար** և այլք:

Նույնատիպ որոնումներ ստեղծեցին նաև քանդակագործության մեջ: Դրանց խոշորագույն արտահայտիչը



Կինեմատոգրաֆի գյուտարարներ ֆրանսիացի Լյումիեր եղբայրները և նրանց ստեղծած՝ աշխարհում առաջին կինոխցիկը



Իմպրեսիոնիզմի խոշոր ներկայացուցիչ, ֆրանսիացի նկարիչ Կլոդ Մոնեի «Առագաստներ Արժանտիերում» (1872) կտավը: Գեղարվեստի այս ուղղությունն իր անունը ստացավ Կ. Մոնեի «Տպավորություն: Ծագող արև» (1872) գործի անունից:

- ◆ Երաժշտության ասպարեզում ևս հայկական միջավայրը համարալ էր եվրոպական նվաճումներին: Տ. Չոխասճյանի «Արշակ Բ» օպերայով (1868 թ.) սկզբնավորվեց ազգային օպերային արվեստը: Ա. Սյենդիաբյանը արեղծեց հայկական սիմֆոնիկ երաժշտության առաջին նմուշները: Իսկ մեծն Կոմիտասը հայ ազգային երգը մշակեց՝ օգրագործելով եվրոպական երաժշտական արվեստի նվաճումները:

Հարցեր և առաջադրանքներ

1. Ինչն էր բնորոշ XIX դ. երկրորդ կեսի և XX դ. սկզբի գեղարվեստական գրականությանը:
2. Նշեք այս ժամանակաշրջանի գեղարվեստական խոսքի վարպետներին:
3. Արվեստի ինչ նոր ճյուղ ձևավորվեց XIX դ. վերջին:
4. Ինչ է իմպրեսիոնիզմը: Նշեք ականավոր նկարիչ իմպրեսիոնիստների:
5. Ինչ զարգացում ունեցավ հայկական մշակույթը XIX դ. երկրորդ կեսին և XX դ. սկզբին:
6. Ներկայացրեք արվեստի և տեխնիկայի բնագավառում կատարված նորությունները:
7. Երաժշտության մի ճյուղերն էին զարգացած XIX դ. երկրորդ կեսին և XX դ. սկզբին:

Գործնական աշխատանք

Լրացրեք աղյուսակը: Նշված բնագավառների ինչ գործիչների գիտեք՝ ըստ երկրների.

	Գրականություն	Թատրոն	Կերպարվեստ	Երաժշտություն
Ֆրանսիա				
Անգլիա				
Ռուսաստան				
Գերմանիա				
Իտալիա				
Հայաստան				

Նոր հասկացություններ, անուններ, արտահայտություններ

Իրապաշտություն, «Կյանքը՝ ինչպես որ կա», Է. Ջոլա, Գի դը Մոպասան, Ֆ. Դոստոևսկի, Լ. Տոլստոյ, Ա. Չեխով, Է. Ռոստան, Հ. Իբսեն, Է. Դուգե, Ս. Բեռնար, կինոարվեստ, Լ. և Օ. Լյումիեր եղբայրներ, իմպրեսիոնիզմ, Կ. Պիսարո, Կ. Մոնե, Է. Դեգա, Օ. Ռոդեն, Էյֆելյան աշտարակ, Ջ. Վերդի, Ժ. Բիզե, Ջ. Պուչինի, Պ. Չայկովսկի:

ԵՐԿՐՈՐԴ ԲԱԺՆԻ ԱՄՓՈՓՈՒՄ

1. Նոր դարերի երկրորդ փուլում Արևմուտքի երկրների մեծ մասում հաստատվեց արդյունաբերական հասարակությունը: Համաշխարհային պատմական առաջընթացում տիրապետող դիրքի հասավ Եվրոպան: Մյուս աշխարհամասերի երկրները և ժողովուրդները դանդաղորեն էին ընթանում արդյունաբերական հասարակության ուղիով. բացառություն էին ԱՄՆ-ն ու Ճապոնիան:
 - *Ո՞ր ժամանակաշրջանն է ընդգրկում արդյունաբերական հասարակության երկրորդ շրջափուլը: Իրենց զարգացման մակարդակով ո՞ր երկրներն առաջ անցան Անգլիայից և ինչո՞ւ: Բնչ է նշանակում երկրների և մայրցամաքների անհավասարաչափ զարգացում, որո՞նք էին այդ երևույթի պատճառները:*
2. XIX դարի երկրորդ կեսին և XX դարի սկզբին գիտությունը դարձավ արտադրողական հզոր ուժ: Գիտության և տեխնիկայի նվաճումների ներդրումը տնտեսության մեջ կարևոր փոփոխություններ առաջացրեց ամբողջ հասարակության կյանքում:
 - *Գիտության և տեխնիկայի ներդրումը ի՞նչ փոփոխություններ առաջացրեց տնտեսության մեջ: Բնչ է մենաշնորհը: Բնչ հետևանքների հանգեցրեց մենապոլիտոնների առաջացումը: Ներկայացրե՞ք հասարակության ընկերային (սոցիալական) կառուցվածքը, որո՞նք էին գլխավոր դասակարգերը, ի՞նչ դեր էր խաղում միջին խավը:*
3. Արդյունաբերական առաջավոր երկրներում XIX դարի երկրորդ կեսին և XX դարի սկզբին ձևավորվում է ժողովրդավարական հասարակություն: Քաղաքական ասպարեգում կային երեք հիմնական հասարակական հոսանքներ՝ պահպանողականներ, ազատականներ և սոցիալիստներ:
 - *Բնորոշե՞ք երեք հիմնական հասարակական հոսանքները, նշե՞ք այդ ուղղությունների հայրնի գործիչների: Բնչ է կուսակցությունը, թվարկե՞ք ձեզ հայրնի մի քանի կուսակցություններ, այդ թվում՝ հայկական: Ներկայացրե՞ք ժողովրդավարական հիմնական ձեռքբերումներն այս շրջափուլում:*

4. XIX դարի երկրորդ կեսին և XX դարի սկզբին Ֆրանսիայում, Ռուսաստանում և ԱՄՆ-ում առաջացան հեղափոխական ճգնաժամեր, որոնք տարբեր արդյունքներ ունեցան:

- *Որո՞նք էին ԱՄՆ քաղաքացիական պատերազմի պատճառները և գլխավոր արդյունքները: Ո՞ր իրատարժություններից հետո և երբ է ընդունվել Ֆրանսիայի Երրորդ հանրապետության Սահմանադրությունը, ի՞նչ նշանակություն ունեցավ այն: Ե՞րբ է տեղի ունեցել և ի՞նչ հետևանքներ է ունեցել Ռուսաստանյան առաջին հեղափոխությունը:*

5. Ազգային պետությունների առաջացումը նոր դարաշրջանի կարևոր գործընթացներից էր: Գերմանիայում դա տեղի ունեցավ «երկաթով և արյամբ»: Իտալիայի վերամիավորումն ընթացավ համազգային պայքարի ուղիով: Երկու երկրներում էլ հռչակվեցին ժողովրդավարական ազատություններ: Բուռն զարգացում ապրեց տնտեսությունը: XX դարի սկզբին նրանք դարձան զարգացած երկրներ:

- *Պարզաբանե՞ք Գերմանիայի միավորման նախադրյալները և նշանակությունը: Ո՞վ էր Օ. Բիսմարկը և ի՞նչ դեր է խաղացել այդ գործում: Ի՞նչ է Վերածնունդը: Ե՞րբ սկսվեց և ավարտվեց Իտալիայի միավորումը: Քաղաքական ի՞նչ կարգեր հաստատվեցին Գերմանիայում և Իտալիայում միավորումից հետո:*

6. Օսմանյան տիրապետությունը մի քանի հարյուր տարի կասեցրեց Բալկանյան երկրների զարգացումը: XVIII–XIX դարերում սկսեց ձևավորվել տեղի ժողովուրդների ազգային ինքնագիտակցությունը: Անկախության համար տևական պայքարն ավարտվեց միայն XX դարի սկզբին: Աշխարհի քաղաքական քարտեզի վրա երևացին նոր ինքնիշխան պետություններ:

- *Ի՞նչ պայմաններ նպաստեցին Բալկանյան երկրների ազատագրական պայքարի վերելքին: Ժամանակագրական սանդղակի միջոցով ներկայացրե՞ք նրանց անկախացման գործընթացը:*

7. Նոր դարերում ազգային պետությունների կողքին շարունակում էին գոյություն ունենալ բազմազգ տերությունները, որտեղ տիրող ազգի գերիշխանության ներքո ապրում էին նվաճված ազգերը: Եվրոպայում ասվածի վառ դրսևորումը Ավստրիան և Ռուսաստանն էին: Նրանք նույնպես զարգանում էին արդյունաբերական ուղիով, բայց ունեին չլուծված ազգային հիմնախնդիրներ:

- *Բացառությամբ «բազմազգ տերություն» և «երկրամասնական տերություն» հասկացությունների խնամարար: Թվարկեր Ավարտո-Հունգարիայում և Ռուսաստանում սպորտ ժողովուրդների: Բնչ դրսևորումներ ուներ սզզային ճնշումն սյր տերություններում:*

8. XIX դարի երկրորդ կեսին Օսմանյան կայսրության բարենորոգման փորձերը ձախողվեցին: Ձևավորվեց երիտթուրքական շարժումը: Երիտթուրքերի իրականացրած 1908 թ. պետական հեղաշրջման արդյունքում համիդյան բռնապետությունը տապալվեց: Իրանում այս ժամանակաշրջանում տարածվեցին լուսավորական գաղափարներ, 1905-1911 թթ. տեղի ունեցավ հեղափոխություն:

- *Բնչն Օսմանյան կայսրությունում բարենորոգումների նոր փորձերը XIX դարի երկրորդ կեսին ձախողվեցին: Բացառությամբ «պանիսլամիզմ» և «պանթուրքիզմ» հասկացությունների խնամարար: Բնչ կարգ հաստատվեց տերությունում 1908 թ. հեղաշրջումից հետո: Բնչն երիտթուրքերը որդեգրեցին սզզայնամոլական քաղաքականություն: Բնչ վիճակում էր Իրանը XIX դարի երկրորդ կեսին և XX դարի սկզբին: Ներկայացրեք իրանական հեղափոխության արդյունքները:*

9. Արևելքի երկու մեծ երկրները՝ Ճապոնիան և Չինաստանը, XIX դարի երկրորդ կեսին և XX դարի սկզբին հասան զարգացման նոր հանգրվանի:

- *Ո՞ր իրատարձությունների արդյունքում Ճապոնիայում հաստատվեց սահմանադրական միապետություն: Վերհանեք նրա զարգացման հիմնական արդյունքները: Ո՞ր տերությունների միջև սզզեցության գոյիների բաժանվեց Չինաստանը: Բնչ նշանակություն ունեցավ Չինաստանի 1911-1912 թթ. հեղափոխությունը:*

10. XIX դարի վերջին ավարտվեց աշխարհի գաղութային բաժանումը, հետամնաց երկրները համաշխարհային տնտեսության մաս կազմեցին, ինչպես նաև հաղորդակից դարձան արդյունաբերական առաջադիմությանը: Մեծ տերությունների միջև սրվեց պայքարը բաժանված աշխարհի վերաբաժանման համար:

- *Ո՞ր երկրները պայքար սկսեցին բաժանված աշխարհի վերաբաժանման համար: Գնահատեք Հասագայում կայացած երկու միջազգային համաժողովների որոշումները: Երբ և ո՞ր երկրներից ձևավորվեցին Եռյակ դաշինքը և Անտանտը: Ներկայացրեք հակամարտ խմբավորումների անդամ տերությունների գլխավոր նպատակները:*

11. Տերությունների միջև եղած արմատական հակասությունները, տիրող սզզայնամոլությունը և ծավալապաշտությունը հանգեցրին համընդհանուր պատե-

րագմի: Միմյանց բախվեցին երկու ռազմաքաղաքական միավորում՝ Եռյակ դաշինքը և Անտանտը, որոնց պատերազմի ընթացքում հարեցին բազմաթիվ պետություններ:

- *Երբ է սկսվել և ավարտվել Առաջին աշխարհամարտը: Թվարկե՞ք պատերազմի գլխավոր ճակատները, ներկայացրե՞ք 1914–1916 թթ. կարևոր ռազմական իրադարձությունները: Հայոց և համաշխարհային պատմությունից սովորածը համադրելով՝ ներկայացրե՞ք հայ ժողովրդի կորուստներն ու ձեռքբերումները աշխարհամարտի փարիներին:*

12. Առաջին աշխարհամարտի ավարտական փուլում՝ 1917–1918 թվականներին, ստեղծվեց նոր ռազմաքաղաքական իրավիճակ: Փոխվեց և ընդլայնվեց պատերազմի աշխարհաքաղաքական ընդգրկումը:

- *Ո՞ր երկրները միացան Անտանտին 1917 թ.: Պարզաբանե՞ք 1917 թ. ռուսաստանյան երկու հեղափոխությունների պատճառները և արդյունքները: Ներկայացրե՞ք աշխարհամարտի գլխավոր արդյունքները:*

13. Արդյունաբերական հասարակության երկրորդ շրջափուլում մշակույթը հասավ զարգացման նոր մակարդակի: Գիտական հայտնագործությունները էականորեն փոխեցին աշխարհի մասին պատկերացումները:

- *Վերհասնե՞ք կրթության և գիտության զարգացման պատճառները և արդյունքները այս շրջափուլում:*

14. Մեծ առաջընթաց ապրեց գեղարվեստական մշակույթը: Արվեստի և գրականության ասպարեզներում ստեղծվեցին մնայուն արժեքներ: Դրանք մարդկության հոգևոր ժառանգության անբաժանելի մասն են:

- *Ցնյց փվե՞ք գրականության և արվեստի բնորոշ կողմերը XIX դ. երկրորդ կեսին և XX դ. սկզբին, բացատրե՞ք դասանյութում եղած նոր հասկացությունները: Թվարկե՞ք գրականության և արվեստի նշանավոր գործիչներին: Նրանց ո՞ր արեղծագործություններն են ձեզ հայրնի:*

ԵԶՐԵՐԻ (ՏԵՐՄԻՆՆԵՐԻ) ԲԱՌԱՐԱՆ

Աբսոլյուտիզմ (միահեծանություն) — Ծագում է լատիներեն «բացարձակ» բառից: Հաճախ անվանում են նաև բացարձակ միապետություն: Միապետի իշխանությունը ոչնչով սահմանափակված չէ, արքայի կամքը օրենք է: Չկա սահմանադրություն: Այս առումով հատկանշական են Լուի XIV–ի խոսքերը. «Պետությունը ե՛ս եմ»:

Ազատական (լիբերալ) — Ծագում է լատիներեն «ազատ» բառից: Հասարակական շարժում, որ ձևավորվել է XIX դ. սկզբին, սակայն ծաղկել է նույն դարի երկրորդ կեսին: Դեմ էր հասարակական ցնցումներին և հեղափոխություններին: Կողմ էր աստիճանական և նպատակալից բարենորոգումներին: Նպատակն էր սահմանադրական կարգի և ժողովրդավարության ստեղծումը:

Ազգայնականություն (նացիոնալիզմ) — Ծագում է լատիներեն «ազգ» բառից: Գաղափարախոսություն և շարժում, որը ազգի բարգավաճումը և բարեկեցությունը համարում է առաջնային: Փոքր ազգերի համար ազգայնականությունը պաշտպանության միջոց է՝ ընդդեմ մեծ ազգերի ճնշումների: Ազգայնականությանը հակադիր դրսևորումն **ազգայնամոլությունն** է, որը սեփական ազգից բացի՝ չի հանդուրժում այլ ազգերի:

Ահաբեկչություն (տեռորիզմ) — Ծագում է լատիներեն «վախ», «սարսափ» բառից: Մարդկանց ահաբեկումը (սպանություն, հետապնդում, բանտարկում և այլն) քաղաքական համոզմունքների և գաղափարների համար: Այն ավելի մեծ չափեր է ընդունում հեղափոխությունների ժամանակ:

ԱՄՆ–ի Անկախության հռչակագիր — Ընդունվել է 1776 թ. հուլիսի 4–ին Ֆիլադելֆիա քաղաքում հրավիրված Համաժողովի (Կոնգրես) կողմից: Այն հռչակեց ամերիկյան ազգի իրավունքը՝ ստեղծելու իր ինքնուրույն կյանքը, ազատությունը և երջանկությունն ապահովող պետություն: Ի լուր աշխարհի հայտարարեց Ամերիկայի Միացյալ Նահանգների կազմավորման մասին:

Անձի անձեռնմխելիություն — Լուսավորականների հռչակած՝ մարդու բնական իրավունքներից մեկը: Մարդու նկատմամբ չպետք է կիրառել որևէ բռնություն, եթե օրենքով ու դատարանով ապացուցված չէ նրա մեղքը:

Աշխարհի անհավասարաչափ զարգացում — XIX դ. երկրորդ կեսից արդյունաբերական որոշ երկրներ սկսեցին արագ զարգանալ՝ առաջ անցնելով նախկին առաջատարներից (Անգլիա, Ֆրանսիա, Հոլանդիա): Այդ նոր զարգացող երկրները՝ ԱՄՆ–ը, Գերմանիան, Ճապոնիան, պայքար ծավալեցին ազդեցության ոլորտների և գաղութների վերաբաժանման համար: Այս նույն ժամանակաշրջանում է՛լ ավելի խորացավ տարբերությունը Արևմուտքի (Եվրոպա, ԱՄՆ) և Արևելքի (Օսմանյան կայսրություն, Իրան, Հնդկաստան, Չինաստան) զարգացման մակարդակների միջև:

Աշխարհի արհեստանոց — XVIII դ. մինչև XIX դ. երկրորդ կեսը այս համարումն ուներ Անգլիան: Նրա արդյունաբերությունն ամենազարգացածն էր, ապրանքները՝ ամենաարդիականն ու որակյալը: Դրանք ամենաէժանն էին և ողողել էին բոլոր շուկաները:

Առաջին կայսրություն — 1804 թ. Ֆրանսիայում անցկացվեց հանրաքվե, որի արդյունքում Նապոլեոնը հռչակվեց «Բոլոր ֆրանսիացիների կայսր»: Այսպես հիմնվեց Առաջին կայսրությունը, որը գոյություն ունեցավ մինչև 1814 թ.:

Արդյունաբերական հասարակության երկրորդ շրջափուլ — Ընդգրկում է XIX դ. երկրորդ կեսից մինչև 1918 թ.՝ Առաջին աշխարհամարտի ավարտը: Կարևորագույն հատկանիշներն են արտադրության վերագինումը գիտության և տեխնիկայի նորագույն նվաճումներով, բաժնետիրական ընկերությունների և մոնոպոլիաների (մենատիրություններ) առաջացումը, համաշխարհային շուկայի և գաղութային համակարգի ձևավորումը, զարգացած երկրներում ժողովրդավարության խորացումը, գանգվածային կրթության համակարգի արմատավորումը և այլն:

Արդյունաբերական հեղաշրջում — Արտադրության մեքենայացման գործընթաց, որն սկսվեց XVIII դ. 60-ական թթ.: Մանուֆակտուրային փոխարինելու եկավ մեքենագործարանային արտադրությունը: Գիտության և տեխնիկայի նվաճումներն սկսեցին լայնորեն ներդրվել արտադրության մեջ:

Արևելյան հարց — Միջազգային դիվանագիտության հիմնախնդիր՝ կապված Օսմանյան կայսրության հետագա ճակատագրի հետ: Վերջինիս թուլացման և քայքայման պայմաններում արդիական դարձավ հպատակ ազգերի ազատագրության և սեփական պետությունների ստեղծման հեռանկարը: Դրանից օգտվելով՝ մեծ տերություններն աշխատում էին օսմանյան Թուրքիան վերածել կիսագաղութի: Հարցն առաջացել է XVIII դ. վերջին: Դրա բաղկացուցիչ մասն էր նաև Հայկական հարցը:

Արհեստակցական միություններ — Հասարակական կազմակերպություններ, որոնք ստեղծել են բանվորները՝ իրենց իրավունքները պաշտպանելու համար: Առաջինը դրանք երևացին Անգլիայում XVIII դ. վերջին: XIX դ. երկրորդ կեսից արհմիութենական շարժումը մեծ թափ ստացավ: Ի հայտ եկան խոշոր արհմիություններ, որոնց անդամների թիվը հասնում էր միլիոնների: Ասվածի վառ օրինակներ կային ԱՄՆ-ում, Ֆրանսիայում, Գերմանիայում, մյուս զարգացած երկրներում:

Բազմազգ տերություն — Տերություն, ուր տիրապետող ազգի գերիշխանության ներքո իրենց պատմական հայրենիքում ապրում են բազում ազգեր՝ ենթարկվելով տնտեսական, քաղաքական, ազգային, կրոնական և մշակութային խտրականության ու բռնաճնշումների:

Բաժնետիրական ընկերություն — Արտադրական կամ այլ բնույթի ձեռնարկություն (կամ դրանց ցանց), որի հիմնական կապիտալը պատկանում է մարդկանց մի խմբի: Յուրաքանչյուրն ունի իր մասնաբաժինը և ըստ դրա էլ ստանում է եկամուտ:

Բանվորներ — Վարձու աշխատանքով ապրող մարդիկ: Նրանց վարձում են ձեռներեցները և վճարում ըստ կատարված աշխատանքի որակի և քանակի: Մովորաբար ձեռներեցների և բանվորների միջև ծագում են հակասություններ: Դրանց կարգավորման նպատակով զարգացած երկրներում XIX դ. ընդունվեցին բազմաթիվ օրենքներ, որոնք սահմանափակում էին աշխատաժամանակը, բանվորներին տալիս ապահովագրություն հիվանդության ու ծերության դեպքերում և այլն:

Բոլշևիկներ — Ռուսական մարքսիստների մեծամասնությունը կազմող թևը: Կողմ էին ծայրահեղ գործողությունների: Իրենց առաջնորդ Վ. Լենինի գլխավորությամբ Ռուսաստանում ուժով գրավեցին իշխանությունը: Երագում էին ամբողջ աշխարհում կառուցել կոմունիզմ (համայնավարական կարգ):

Բոքսա — Արդյունաբերական տնտեսության կարևոր հիմնարկություն, որտեղ ձեռներեցները հանդիպում էին, քննարկում միմյանց առաջարկները և կնքում տնտեսական տարաբնույթ գործարքներ:

Գաղութ — Այստեղ՝ արդյունաբերական որևէ տերության իշխանության ներքո գտնվող երկիր, որը զրկված էր ինքնուրույն տնտեսական, քաղաքական, հասարակական զարգացման հնարավորությունից: Մայր երկրի (մետրոպոլիա) տնտեսական կցորդն էր: Այստեղից արտահանում էին բնական հարստություններ՝ շահագործելով տեղաբնիկների էժան աշխատուժը: Գաղութացումն սկսվել է դեռ XV դ., սակայն իր ծաղկմանն է հասել XIX դ. երկրորդ կեսին: Բացի բացասական հետևանքներից, այն հանգեցրել է նաև դրական արդյունքների: Ասիայի, Աֆրիկայի, Լատինական Ամերիկայի ժողովուրդները ծանոթացել են արդյունաբերական հասարակության նվաճումներին:

Դաշնություն (ֆեդերացիա) — Ծագում է լատիներեն բառից: Առանձին պետությունների և պետական կազմավորումների միություն է: Դաշնության անդամները պահպանում են իրենց իրավունքների մի մասը: Ունեն տեղական սահմանադրություն, խորհրդարան, կառավարություն և դատական համակարգ: Սակայն դրանք ենթակա են դաշնային սահմանադրությանը և կառավարման մարմիններին: Առկա է ընդհանուր քաղաքացիություն: Դաշնային պետության օրինակ են ԱՄՆ-ը, Ռուսաստանը, Գերմանիան, Բրազիլիան և այլն:

Դոմինիոն — Լատիներեն «տիրույթ» բառից է: Բրիտանական գաղութային համակարգում երկիր, որն ուներ ներքին լրիվ ինքնավարություն, սակայն ենթարկվում էր անգլիական թագին:

Դրամատուն (բանկ) — Ծագում է լատիներեն «դրամավոխարան» բառից: Ձեռնարկություն, որտեղ իրացվում է դրամական կապիտալի առուծախ, ընդունվում են ավանդներ և տրամադրվում վարկեր: Դրամատներն արդյունաբերական արտադրության անբաժանելի մասն են: Նրանց միջոցով ազատ կապիտալը ներդրվում է տնտեսության զանազան ճյուղեր և նպաստում դրանց զարգացմանը:

Ենիչերի — Թուրքերեն՝ «նոր գորք»: Օսմանյան հետևակային զորամասեր: Դրանք ստեղծվում էին մանկահավաքների միջոցով: Այսինքն՝ մանուկ հասակում ծնողներից (հիմնականում քրիստոնյա) խլում էին զավակներին, դարձնում իսլամի մոլեռանդ զինվոր:

Եռյակ դաշինք — 1879-1882 թթ. Գերմանիայի, Ավստրո-Հունգարիայի և Իտալիայի միջև կնքված պայմանագրերի արդյունքում ստեղծված դաշինք՝ ուղղված Մեծ Բրիտանիայի, Ֆրանսիայի և Ռուսաստանի դեմ:

Եռյակ միություն (Անտանտ) — Անգլիայի և Ֆրանսիայի միջև 1904 թ. կնքված ռազմաքաղաքական դաշինք, որին 1907 թ. միացավ Ռուսաստանը:

Երիտթուրքեր — Թուրքական բուրժուազիայի ազգայնական շարժման ներկայացուցիչներ: 1889 թ. ստեղծել են «Միություն և առաջադիմություն» կուսակցությունը: Իրենց շուրջ հա-

մախմբել են հայկական, արաբական, հրեական, հունական ընդդիմադիր ուժերը և 1908 թ. կատարել պետական հեղաշրջում: Հռչակել են ժողովրդավարական ազատություններ, սակայն շուտով հրաժարվել դրանցից՝ ներկայանալով իբրև ազգայնամուլներ: Երագում էին ստեղծել պանթուրքական (համաթուրքական) տերություն՝ Բոսֆորից մինչև Միջին Ասիա: Այդ ճանապարհին կանգնած բոլոր ազգերը ենթակա էին ոչնչացման, առաջին հերթին՝ հայությունը: Առաջին աշխարհամարտի տարիներին երիտթուրքական կառավարությունն իրագործեց Հայոց մեծ եղեռնը:

Երկնիասնական տերություն — Տերություն, որտեղ ապրող բազմաթիվ ազգերից տիրապետող են երկուսը: Նրանց միջև կնքվում է դաշինք՝ իշխանության հստակ բաժանումով: Ասվածի լավագույն օրինակը 1867 թ. ձևավորված Ավստրո-Հունգարիան էր:

Երրորդ հանրապետություն — Հիմնվել է Ֆրանսիայում 1870 թ. սեպտեմբերին՝ Նապոլեոն III կայսեր խայտառակ պարտությունից հետո: 1875 թ. սուր պայքարի պայմաններում ընդունվել է նրա Մահմանադրությունը: Երրորդ հանրապետությունը գոյատևել է մինչև 1940 թ.:

Ընկերային (սոցիալական) ապահովագրություն — Պետության, ձեռնարկատերերի և աշխատավորների մուծումների հաշվին ստեղծվում է հիմնադրամ, որից աշխատավորներին նյութական օժանդակություն (թոշակ) է հատկացվում հիվանդության և ծերության դեպքում: Այս համակարգը զարգացած երկրներում տարածում է գտել XIX դ. երկրորդ կեսից:

Թանկիմաթ — Ծագում է արաբերեն «բարենորոգում» բառից: Օսմանյան կայսրության այս բարենորոգումներն ընդգրկում էին 1839-1870-ական թթ.: Դրանք ձեռնարկեցին եվրոպական կրթություն ստացած և լուսավորական գաղափարներով տոգորված որոշ պետական գործիչներ: Նպատակն էր տերության բոլոր ազգերին տալ իրավահավասարություն, անձի, գույքի անձեռնմխելիություն, խղճի (կրոն) ազատություն, հավասար հարկեր: Այդ ճանապարհով բարենորոգիչները հույս ունեին կանգնեցնելու տերության անկումը: Սակայն պահպանողականների ճնշման ներքո այս փորձերը ձախողվեցին:

Թորի — Քաղաքական կուսակցություն Անգլիայում, որն առաջացել է XVII դ. վերջին: XIX դ. երկրորդ կեսին ստացավ «Պահպանողական» անունը:

Ժողովրդավարություն (դեմոկրատիա) — Ծագում է հունարեն «ժողովուրդ» և «իշխանություն» բառերից: Կառավարման մի համակարգ, որտեղ գերագույն իշխանությունը պատկանում է ժողովրդին: Ժողովրդավարության հիմքը իրավահավասար քաղաքացիներն են: Օգտվում են համընդհանուր ընտրական իրավունքից, ունեն անձի և սեփականության անձեռնմխելիություն, խոսքի, խղճի (կրոնի) ազատություն: Այս ամենն ամրագրված է երկրի հիմնական օրենքով՝ սահմանադրությամբ: Ժողովուրդն իր իշխանությունն իրագործում է ընտրովի խորհրդարանի և կառավարության միջոցով:

Իշխանության տարանջատման սկզբունք — Մշակել է անգլիացի լուսավորական Ջ. Լոկը, զարգացրել է ֆրանսիացի Մոնտեսքյոն: Համաձայն դրա՝ արդյունավետ գործառելու համար պետական իշխանությունը պետք է տարանջատվի երեք ճյուղի: *Օրենսդրական*, որը պետք է ներկայացնի ժողովրդի կողմից ընտրված խորհրդարանը: Այն պետք է օրենքներ մշակի՝ պարտադիր բոլոր քաղաքացիների համար: *Գործադիր*, որը կոչված է ի կատար ածելու օրենքները և կառավարելու երկիրը: Այս նպատակով ստեղծվում է կառավարու-

թյուն: *Գաղափարական*, որը կոչված է հետևելու օրենքների ճշգրիտ կատարմանը և օրինակա-
նության պահպանմանը:

Լուսավորական շարժում — Գաղափարական, կրթական և քաղաքական շարժում, որ ծա-
վալվեց Եվրոպայում XVII–XVIII դդ.: Նպատակն էր հաղթահարել միջնադարյան ավան-
դական պատկերացումները մարդու, հասարակության, բնության վերաբերյալ: Ստեղծել
է պատկերացումների մի նոր համակարգ՝ կառուցված բանական արժեքների վրա: Շար-
ժումն սկսվել է Անգլիայում, բայց իր գագաթնակետին է հասել շնորհիվ ֆրանսիական
լուսավորականների: Նրա գաղափարները կենսական են առ այսօր:

Լուսավորչալ միապետ — Միապետների այս տեսակը պատմական ասպարեզ է իջել XVII–
XVIII դդ.՝ Ֆրանսիայում, Ռուսաստանում, Պրուսիայում, Ավստրիայում: Լուսավորական
գաղափարների ոգով կատարել են բազմաթիվ բարենորոգումներ: Ձգտում էին հին ավա-
տատիրական կարգերը հաշտեցնելու արդյունաբերական զարգացման հետ, որն անհնար
էր, և XVIII դ. վերջերին լուսավորչալ միապետները հեռացան պատմական ասպարեզից:

Խաղաղության կողմնակիցների միջազգային շարժում — Այլ խոսքով՝ պացիֆիստական
շարժում: Բառը ծագում է լատիներեն «խաղաղություն» բառից: Նրա մասնակիցները հա-
մոզված են, որ խաղաղությունն այլընտրանք չունի, բոլոր հակամարտությունները կարե-
լի է լուծել խաղաղ բանակցությունների ճանապարհով:

Խղճի ազատություն — Մարդու իրավունքը դավանելու ցանկացած կրոն կամ չդավանելու
որևէ մեկը:

Ծանր արդյունաբերություն — Արդյունաբերության այն ճյուղերի ընդհանուր անվանումը,
որոնք իրականացնում են մետաղների, աշխատանքային գործիքների, մեքենաների,
սարքավորումների, փոխադրամիջոցների, էներգիայի տարբեր տեսակների արտադրու-
թյուն:

Կայսերապաշտություն (ինպերիալիզմ) — Գաղափարախոսություն և քաղաքականություն,
հատկանշական է արդյունաբերական հասարակություններին: Հումբի, էժան աշխատու-
ժի համար զարգացած երկրներն սկսում են ծավալվել և նոր տարածքներ գրավել կամ
ազդեցության գոտիներ ձեռք բերել ինչպես Եվրոպայում, այնպես էլ աշխարհի բոլոր ծա-
զերում՝ Ասիա, Աֆրիկա, Ամերիկա: Գործընթացն ավելի ծավալվեց XIX դ. երկրորդ կեսին:
Այս նպատակով օգտագործվում էին ամենատարբեր միջոցներ՝ ռազմական ուժ, դիվա-
նագիտություն, տնտեսական ճնշում և այլն:

Կանցլեր — Գերմաներեն «դիվանապետ», «քարտուղար» բառերից: Նախապես համարվում
էր գերմանական (մասնավորապես՝ Պրուսիայի) արքաների գրասենյակի ղեկավար: Նա
կազմում էր արքայական հրամանները և հետևում դրանց կատարմանը: Հետագայում
սկսեց կատարել վարչապետի գործառնությունները՝ ղեկավարում էր գործադիր իշխանության
բոլոր օղակները: Կանցլերի դերն առավել կարևորվեց միացյալ Գերմանիայում: Օ. Բիս-
մարկը հայտնի է որպես Գերմանիայի ամենաականավոր կանցլերներից մեկը:

Կապիտալ — Ունեցվածք, որը ներդնելով արտադրության մեջ՝ ձեռներեցը նոր շահույթ է ստա-
նում: Ժամանակի ընթացքում կապիտալը դառնում է սեփականության հիմնական ձևը և
կազմում կապիտալիստական հասարակության հիմքը:

Կիսագաղութ — Ավանդական հասարակական կյանքով ապրող երկիր, որը գաղութի չի վերածվել և անմիջականորեն չի կառավարվում գաղութարարների կողմից, սակայն վերջիններս, տարբեր լծակներով (տնտեսական, դիվանագիտական, ռազմական) ճնշումներ գործադրելով, նրա կառավարությունից զիջումներ են կորզում: Այսպիսի երկրներից էին Օսմանյան կայսրությունը, Իրանը, Չինաստանը: Գաղութարարները երբեմն դրանք բաժանում էին ազդեցության գոտիների:

Կոմունիզմ (համայնավարություն) — Ուտոպիական տեսություն, որը ծագում է լատիներեն «ընդհանուր» բառից: Համաձայն դրա գաղափարախոսների (Կ. Մարքս, Ֆ. Էնգելս, Վ. Լենին)՝ հեղափոխության միջոցով ստեղծված բանվորների պետությունը պետք է վերացնի մասնավոր սեփականությունը և ստեղծի համապետական սեփականություն: Ամեն ոք, անկախ իր աշխատանքից, պետք է օգտվի բոլոր բարիքներից: Կոմունիզմի զարգացած շրջափուլում պետությունը, կատարելով իր դերը, պետք է վերանա:

Կոնսուլություն — 1799–1804 թթ. կառավարման ձև Ֆրանսիայում: Իշխանությունն անվանապես պատկանում էր տասը տարով ընտրված երեք կոնսուլներին, իսկ իրականում՝ առաջին կոնսուլ Ե. Բոնապարտին:

Կուսակցություն — Համախոհ մարդկանց քաղաքական կազմակերպություն, որի խնդիրը հասարակության բարենորոգումն է՝ ըստ իր որդեգրած գաղափարների և գործողության ծրագրերի: Այդ նպատակով կուսակցությունները ձգտում են հասնելու իշխանության՝ իրենց ծրագրերը իրականացնելու համար:

Համազգային շուկա — Արդյունաբերական հասարակության զարգացմանը համընթաց՝ տվյալ երկրի տարբեր շրջաններ մասնագիտանում են արտադրության մեկ կամ մի քանի բնագավառներում՝ գյուղատնտեսական ապրանքներ, տեքստիլ արտադրություն, սարքաշինություն և այլն: Ուստի անհրաժեշտություն է ծագում համազգային շուկայի մակարդակով կազմակերպելու նրանց միջև առևտուրն ու փոխանակությունը: Այս հենքի վրա երկիրը միավորվում է որպես միասնական տնտեսական միավոր:

Համընդհանուր ընտրական իրավունք — Բոլոր չափահաս բնակիչները (տղամարդիկ և կանայք) քաղաքացի են և իրավունք ունեն մասնակցելու ինչպես տեղական, այնպես էլ համապետական մարմինների ընտրություններին:

Հայդուկ — Հունգարերեն՝ հետևակ: Դրանք մարդիկ էին, որոնք ոչ մեծ զինված խմբերով պայքարում էին օսմանյան նվաճողների դեմ: Հայկական միջավայրում տարածված էր դրա նաև արաբերեն համարժեքը՝ ֆիդայի:

Հեղափոխություն — Հասարակական-քաղաքական գործընթաց, որի դեպքում պատմական կարճ ժամանակահատվածում ուժային եղանակով կատարվում են արմատական փոփոխություններ: Հեղափոխությունները սովորաբար դրսևորվում են երկու ձևով: Մի դեպքում՝ գերակայում են զուտ հասարակական հիմնախնդիրները, մյուս դեպքում՝ դրանց գումարվում են նաև ազգային խնդիրները՝ ազատագրության, վերամիավորման, ինքնիշխան պետության ստեղծման:

Հիմնարար գիտություններ — Նպատակ ունեն ուսումնասիրելու բնության կարևորագույն օրենքներն ու օրինաչափությունները՝ մաթեմատիկա, ֆիզիկա, քիմիա, կենսաբանություն և այլն:

Հումանիտար գիտություններ — Հետազոտում են մարդու և նրա հասարակական կյանքի այլազան խնդիրները՝ տնտեսություն, քաղաքական կառույց, պատմություն և այլն:

Ձեռներեց — Կոչվում է նաև բուրժուա, կապիտալիստ: Ունի ունեցվածք, որը ներդնելով արտադրության, տրանսպորտի, դրամական գործարքների և այլ բնագավառներում՝ ստանում է եկամուտ: Ձեռներեցների դասն սկսվել է ձևավորվել արդյունաբերական հասարակության կայացմանը զուգընթաց:

Մանուֆակտուրա — Ծագում է լատիներեն «ձեռքի գործ», «ձեռքի աշխատանք» բառերից: Արտադրական ձեռնարկություն, որն սկսել է ձևավորվել XVI դ. վերջից: Այնտեղ աշխատանքը հիմնականում ձեռքով էր կատարվում, սակայն կային աշխատանքի բաժանում և մասնագիտացում: Յուրաքանչյուր բանվոր մասնագիտանում էր մեկ կամ մի քանի գործողության մեջ: Դա շեշտակի ավելացնում էր աշխատանքի որակը և արտադրողականությունը:

Մարդու և քաղաքացու իրավունքների հռչակագիր — Ընդունվել է 1789 թ. օգոստոսի 26-ին Ֆրանսիայում: Հաստատում էր քաղաքացիների իրավահավասարությունը: Իշխանության աղբյուր էր ճանաչում ազգի հավաքական կամքը: Շեշտում էր մարդկանց բնական իրավունքը՝ լինելու ազատ, ունենալու մասնավոր սեփականություն, դիմակայելու ցանկացած բռնաճնշման, ազատորեն արտահայտելու իր կարծիքը, անձամբ կամ ներկայացուցիչների միջոցով մասնակցելու պետության կառավարմանը: Մա նոր դարաշրջանի կարևորագույն իրավական փաստաթղթերից է:

Մեծ հեղափոխություն — Այսպես է կոչվում 1789–1799 թթ. Ֆրանսիայում ծավալված հեղափոխությունը: Իր գաղափարներով, առաջադրած և իրագործած նպատակներով այն հսկայական ազդեցություն է ունեցել համաշխարհային պատմության վրա:

Մենատիրություն (մոնոպոլիա) — Ձեռներեցների միավորում, որն իր ձեռքն է առնում տնտեսության այս կամ այն բնագավառը: Իրենք են որոշում արտադրության պայմանները և ապրանքի շուկայական գները: Մոնոպոլիաների ի հայտ գալով խախտվեց ազատ մրցակցությունը՝ արդյունաբերական հասարակության հիմնական սկզբունքներից մեկը: Շատ պետություններ, աշխատելով պաշտպանել մանր և միջին արտադրողների շահերը, մտցնում են հակամենատիրական օրենքներ:

Մերկանտիլիզմ (առևտրայնություն) — Ծագում է լատիներեն «շուկա», «առևտուր» բառերից: Նպատակն է ավելի շատ ապրանք արտահանել և ստանալ մեծ շահույթ: Այսօր էլ առևտրայնությունը համարվում է տնտեսվարության հիմնական սկզբունքներից մեկը:

Միջազգային կարմիր խաչի ընկերություն — Ձևավորվել է 1863 թ. Շվեյցարիայում Ա. Դյունանի ջանքերով: Խնդիր ունի օգնելու ռազմական հակամարտություններից և բնական աղետներից տուժածներին: Կազմակերպությունն իր առաքելությունը շարունակում է առ այսօր:

Միջին խավ — Արդյունաբերական երկրներում հասարակական հիմնական խավը: Ձևավորվել է XIX դ.: Ընդգրկում էր միջին և մանր ձեռներեցներին, մտավորականությամբ: Նրա շարքերը համարեցին նաև որակյալ բանվորները: Բոլորն ապրում էին միջին

բարեկեցությամբ: Այս խավը մեղմեց հարուստների և աղքատների միջև սոցիալական հակասությունները, կայունություն հաղորդեց հասարակական կյանքին:

Յակոբիներ — Մեծ հեղափոխության ծայրահեղական թևի ներկայացուցիչներ: Նրանց ակումբը Ս. Հակոբ եկեղեցում էր (այստեղից էլ՝ անվանումը): Ղեկավարներից էին Մ. Ռոբեսպիերը, Ժ. Գանտոնը և այլք: Երագում էին ընդհանուր հավասարության և համաշխարհային հեղափոխության մասին: Օգտվելով երկրում ստեղծված ծանր պայմաններից՝ 1793 թ. գրավեցին իշխանությունը և հաստատեցին իրենց բռնատիրությունը: Հազարավոր մարդկանց մահվան դատապարտեցին առանց դատ ու դատաստանի: 1794 թ. նրանց բռնատիրությունը տապալվեց: Ղեկավարները մահապատժի ենթարկվեցին:

Չարտիզմ — Ծագում է անգլերեն «չարտեր» (գիր, հրովարտակ) բառից: Զանգվածային հասարակական-քաղաքական շարժում Անգլիայում 1830-1850-ական թթ.: Հիմնական պահանջներն էին համընդհանուր ընտրական իրավունքը և պետական կյանքի ժողովրդավարացումը: Ճիշտ է, կառավարությունը մերժեց չարտիստների պահանջագրերը և ճնշեց նրանց շարժումը, բայց հետագա տարիներին կատարեց նրանց պահանջները:

Պահպանողականություն (կոնսերվատիզմ) — Ծագում է լատիներեն «պահպանել», «խնայել» բառերից, հասարակական-քաղաքական հոսանք: Պահպանողական են անվանում ավանդապահ և չափավոր հայացքներ ունեցող անձանց, նաև կուսակցություններին:

Պլանտացիա — Ծագում է լատիներեն «տնկարան» բառից: Խոշոր հողատիրական տնտեսություն է: ԱՄՆ-ում դրանք տարածված էին հարավային նահանգներում: Աճեցնում էին բրինձ, շաքարեղեգ, թեյ, կակաո, սուրճ, արմավ, ծխախոտ և այլն: Հիմնական աշխատողները սևամորթ ստրուկներն էին:

Ռայխստագ — Գերմաներեն «տերություն» (կայսրություն) և «խորհուրդ» բառերից: Միացյալ Գերմանիայի գերագույն օրենսդիր մարմնի՝ խորհրդարանի անվանումը: Այստեղ ընդունվում էին համագերմանական բոլոր օրենքները:

Սյոգուն — Ճապոնիայում այսպես էին անվանում գլխավոր զորավարին, հետագայում՝ այն իշխանին, որը կայսեր անունից կառավարում էր երկիրը: Վերացվել է հեղափոխության ժամանակ (1867 թ.):

Սոցիալիզմ (ընկերվարություն) — Ձևավորվել է լուսավորականների հասարակական դաշինքի տեսության հիման վրա: Ծագում է լատիներեն «ընկեր», «դաշնակից» բառերից: Սոցիալիզմի ժամանակ մարդիկ միավորվում են ընդհանուր շահերով: Պետությունը կարգավորում է արտադրությունը և հոգ տանում, որպեսզի քաղաքացիներն օգտվեն նյութական և հոգևոր բարիքներից:

Վիզ — Քաղաքական կուսակցություն Անգլիայում, որն առաջացել է XVII դ. վերջին: XIX դ. երկրորդ կեսին ստացել է Լիբերալ անվանումը:

Վիեննայի վեհաժողով — Նապոլեոնին հաղթած պետությունների ղեկավարների համաժողովը 1814-1815 թթ.: Նպատակն էր Եվրոպայում վերականգնել Նապոլիոն կարգերը: Վերահաստատվեցին տապալված արքայատոհմերը: Վերաձևվեցին Եվրոպայի պետական սահմանները, և շատ ազգեր զրկվեցին պետություն ունենալու իրավունքից: Սա հե-

տաղիմության ժամանակավոր հաղթանակն էր: Դրանում տոն էին տալիս Ավստրիան, Ռուսաստանը, Անգլիան և Պրուսիան:

Տեղական ինքնակառավարում — Զարգացած երկրներում առանձին վարչական միավորները (գյուղական, քաղաքային բնակավայրեր) իրավունք ունեն ընտրությունների միջոցով ստեղծելու իրենց կառավարման տեղական մարմինները: Դրանք սովորաբար տնօրինում են տեղական առողջապահության, կրթության, բնապահպանության, շինարարության և այլ խնդիրներ:

Ցեղասպանություն (գենոցիդ) — Մի ազգի կողմից մեկ այլ ազգի, ընկերային կամ կրոնական խմբի լրիվ (կամ մասնակի) ֆիզիկական ոչնչացումը: Համաձայն Միավորված ազգերի կազմակերպության 1948 թ. բանաձևի՝ ցեղասպանությունը մարդկության դեմ ծանրագույն հանցագործություն է: Երիտթուրքական կառավարության 1914-1916 թթ. իրականացրած հայոց զանգվածային կոտորածները գնահատվել են որպես XX դ. առաջին ցեղասպանություն, որը աշխարհին հայտնի է Մեծ եղեռն անունով:

Փակ պետություն — Պետություն, որի «դռները փակ են օտարների առջև»: Նրանց առևտրի և ձեռներեցության հնարավորությունն չի տրամադրվում: Այս կերպ պետությունն աշխատում է պահպանել դարերով արմատացած իր քաղաքական, տնտեսական և մշակութային առանձնահատկությունները: Ասվածի լավագույն օրինակը Չինաստանն ու Ճապոնիան էին: Միայն XIX դ. երկրորդ կեսին եվրոպական երկրների ճնշման ներքո նրանք ստիպված եղան բացել իրենց սահմանները:

Փառահեղ հեղափոխություն — Անգլիացիներն այսպես էին անվանում իրենց պատմության 1688-1689 թթ. իրադարձությունները: Երկրում հաստատվեց սահմանադրական միապետություն: Ընդունվեց «Իրավունքների մասին օրենքը», որն իշխանության միակ աղբյուր ճանաչեց ազգի հավաքական կամքը:

Փարիզի կոնուևա — 1871 թ. մարտի 18-ին պրուսական զորքերի կողմից պաշարված Փարիզում սկսվեց ապստամբություն: Ժողովուրդն ստեղծեց իր իշխանությունը, որը պատմությանը հայտնի է Փարիզի կոնուևա անվամբ: Գոյություն է ունեցել ընդամենը 72 օր: Կառավարական ուժերը դաժանությամբ ճնշել են այն:

Օսմանիզմ — Թուրք ազգայնական շարժում 1860-1870-ական թթ.: Մասնակիցներն իրենց անվանում էին նոր օսմանցիներ: Հիմնական նպատակն էր թուրքացնելու Օսմանյան կայսրության հպատակ ազգերին և ստեղծելու միասնական օսմանյան ազգ: Կարողացան մշակել և ընդունել Սահմանադրություն (1876 թ.): Սակայն նոր գահ բարձրացած Աբդուլ Համիդ II սուլթանը այն չեղյալ հայտարարեց, հալածեց և արտրեց նոր օսմաններին:

ԿԱՐԵՎՈՐ ԻՐԱԴԱՐՁՈՒԹՅՈՒՆՆԵՐԻ ԺԱՄԱՆԱԿԱԳՐՈՒԹՅՈՒՆ

- XVII – XIX դ. առաջին կես** — Արդյունաբերական հասարակության առաջին շրջափուլը
1600 թ. — Արևելահնդկական ընկերության ստեղծումը Անգլիայում
1640–1660 թթ. — Հեղափոխությունն Անգլիայում
1653–1658 թթ. — Կրոնվեյի պրոտեկտորատը
XVII դ. երկրորդ կես — Բնական իրավունքի տեսության ստեղծումը Ջոն Լոկի կողմից
1688–1689 թթ. — «Փառահեղ հեղափոխությունը» Անգլիայում
XVIII դ. — Լուսավորության դարը Եվրոպայում և Ամերիկայում
1722 թ. — Սեֆյան արքայատոհմի անկումն Իրանում
1751–1776 թթ. — Աշխարհում առաջին հանրագիտարանի հրատարակումը Գ. Գիդրոյի խմբագրությամբ
1760–ական թթ. — Արդյունաբերական հեղաշրջման սկիզբը Անգլիայում
1768 թ. — Առաջին շոգեշարժիչի ստեղծումը Ջ. Ուատտի կողմից
1775–1783 թթ. — Անկախության պատերազմը և ԱՄՆ–ի կազմավորումը
1776 թ. հունիսի 4 — Անկախության հռչակագրի ընդունումը Ֆիլադելֆիայում
1784 թ. — Շոգեմեքենայի ստեղծումը Ջեյմս Ուատտի կողմից
1787 թ. — ԱՄՆ–ի Սահմանադրության ընդունումը
XVIII դ. վերջ – XIX դ. կես — Վերածնության (Ռիսորջիմենտո) մշակույթի ծաղկումն Իտալիայում
XVIII դ. վերջ – XIX դ. սկիզբ — Աֆրիկայի գաղութացման սկիզբը
1789 թ. հունիսի 14 — Հին կարգերի խորհրդանիշ՝ Բաստիլ ամրոցի գրավումը
1789 թ. օգոստոսի 26 — «Մարդու և քաղաքացու իրավունքների հռչակագրի» ընդունումը
1791 թ. — Առաջին սահմանադրության ընդունումը Ֆրանսիայում
1792–1799 թթ. — Առաջին հանրապետությունը Ֆրանսիայում
1793–1794 թթ. — Յակոբինյան դիկտատուրան
1796 թթ. — Ղաջարների հարստության հաստատումը Իրանում
1799 թ. նոյեմբերի 9 — Կոնսուլության հաստատումը Ֆրանսիայում
1804–1814 թթ. — Նապոլեոն I. Առաջին կայսրությունը Ֆրանսիայում
1807 թ. — Շոգենավի ստեղծումը
1810–1820–ական թթ. — Անկախության պատերազմները Լատինական Ամերիկայում
1812 թ. — Նապոլեոն I–ի արշավանքը Ռուսաստան
1812 թ. օգոստոս — Բորոդինոյի ճակատամարտը
1813 թ. հոկտեմբեր — Լայպցիգի ճակատամարտը
1814–1815 թթ. — Վիեննայի վեհաժողովը
1821–1830 թթ. — Հույն ժողովրդի ազատագրական պատերազմը օսմանյան տիրապետության դեմ և Հունաստանի անկախացումը

- 1830–1850 –ական թթ. — Չարտիստական շարժումը Անգլիայում
- 1839–1876 թթ. — Թանգինաթի դարաշրջանը Օսմանյան կայսրությունում
- 1839–1842 թթ. — Ափիոնի առաջին պատերազմը
- XIX դ. երկրորդ կես – XX դ. սկիզբ — Արդյունաբերական հասարակության երկրորդ շրջափուլը
- 1848–1849 թթ. — Հեղափոխությունները Եվրոպայում
- 1848–1852 թթ. — Երկրորդ հանրապետությունը Ֆրանսիայում
- 1851 թ. — Լոնդոնի համաշխարհային ցուցահանդեսը
- 1852–1870 թթ. — Երկրորդ կայսրությունը Ֆրանսիայում
- 1854 թ. — Ամերիկա–ճապոնական անհրավահավասար պայմանագրի կնքումը
- 1859–1861 թթ. — Ռումինական պետության առաջացումը
- 1861 թ. — Ճորտատիրության վերացումը Ռուսաստանում
- 1861–1865 թթ. — Քաղաքացիական պատերազմը ԱՄՆ-ում
- 1866 թ. — Հյուսիսգերմանական միության ստեղծումը, ավստրո–պրուսական պատերազմը
- 1867 թ. — Ավստրիական տերության վերածվելը Ավստրո–Հունգարիա տերության
- 1867–1868 թթ. — Հեղափոխությունը և կայսերական իշխանության վերականգնումը Ճապոնիայում
- 1870–1871 թթ. — Ֆրանս–պրուսական պատերազմը
- 1870 թ. սեպտեմբեր — Երրորդ հանրապետության հռչակումը Ֆրանսիայում
- 1871 թ. հունվար — Գերմանական կայսրության հռչակումը
- 1871 թ. մարտ–մայիս — Փարիզի կոմունան
- 1875 թ. — Երրորդ հանրապետության Սահմանադրության ընդունումը Ֆրանսիայում
- 1876–1909 թթ. — Աբդուլ Համիդ II-ը՝ օսմանյան սուլթան
- 1877–1878 թթ. — Ռուս–թուրքական պատերազմը
- 1878 թ. հունիս–հուլիս — Բեռլինի վեհաժողովը՝ Սերբիայի, Ռումինիայի, Բուլղարիայի և Չեռնոգորիայի անկախության ճանաչումը, Հայկական հարցի միջազգայնացումը
- 1879–1882 թթ. — Եռյակ դաշինքի ստեղծումը
- 1886 թ. մայիսի 1 — Չիկագոյի բանվորների ելույթը, որը դաժանորեն ճնշվեց: Մայիսի 1-ը հետագայում դարձավ աշխատավորների համերաշխության միջազգային օր
- 1889 թ. — Ճապոնիան՝ սահմանադրական միապետություն
- 1895 թ. — Առաջին կինոսարքի գյուտը
- 1896–1897 թթ. — Առաջին դիզելային շարժիչի ստեղծումը
- 1904 թ. — Միության համաձայնագրի (Անտանտ) կնքումն Անգլիայի և Ֆրանսիայի միջև
- 1904–1905 թթ. — Ռուս–ճապոնական պատերազմը
- 1905–1907 թթ. — Ռուսաստանյան առաջին հեղափոխությունը
- 1905–1911 թթ. — Հեղափոխությունն Իրանում
- 1907 թ. — Ռուսաստանի միանպևն Անտանտին
- 1908 թ. — Երիտթուրքական հեղաշրջումը
- 1911–1912 թթ. — Հեղափոխությունը Չինաստանում: Միապետության անկումը

-
- 1912 թ.** — Օսմանյան Թուրքիայի դեմ Բալկանյան առաջին պատերազմը
- 1914 թ. օգոստոսի 1** — Առաջին աշխարհամարտի սկիզբը
- 1914 թ.** — Ճակատամարտ Մանն գետի շրջանում
- 1914-1916 թթ.** — Հայոց մեծ եղեռնը
- 1915 թ. հունվար** — Օսմանյան զորքի պարտությունը Սարիղամիշում
- 1915 թ.** — Եռյակ դաշինքի վերածունը Բառյակ դաշինքի
- 1916 թ.** — Վերդենի ճակատամարտը
- 1917 թ. փետրվարի 27** — Փետրվարյան հեղափոխության հաղթանակը Ռուսաստանում
- 1917 թ. ապրիլ** — ԱՄՆ-ի՝ պատերազմի մեջ մտնելը
- 1917 թ. հոկտեմբերի 24-25** — Հոկտեմբերյան հեղաշրջումը Ռուսաստանում
- 1918 թ. մարտի 3** — Բրեստ-Լիտովսկի հաշտության պայմանագրի կնքումը, Խորհրդային Ռուսաստանի միակողմանի դուրս գալը պատերազմից
- 1918 թ. հունիսի 4** — Բաթումի հաշտության պայմանագրի կնքումը, պատերազմի ավարտը Կովկասյան ճակատում
- 1918 թ. հոկտեմբերի 30** — Մուղրոսի զինադադարի կնքումը, Օսմանյան կայսրության պարտությունը աշխարհամարտում
- 1918 թ. նոյեմբերի 11** — Գերմանիայի անձնատուր լինելը. Առաջին աշխարհամարտի ավարտը

ԲՈՎԱՆԴԱԿՈՒԹՅՈՒՆ

ՆԵՐԱԾՈՒԹՅՈՒՆ.....3

ԲԱԺԻՆ ԱՌԱՋԻՆ

ԱՐԴՅՈՒՆԱԲԵՐԱԿԱՆ ՀԱՍԱՐԱԿՈՒԹՅԱՆ ԱՌԱՋԻՆ ՇՐՋԱՓՈՒԼԸ (XVII ԴԱՐ – XIX ԴԱՐԻ ԱՌԱՋԻՆ ԿԵՍ)

1. ԱՐՄԱՏԱԿԱՆ ՏԵՂԱՇԱՐԺԵՐ ՏՆՏԵՍՈՒԹՅԱՆ ՄԵՋ	6
2. ԱՐԴՅՈՒՆԱԲԵՐԱԿԱՆ ԶԱՐԳԱՑՄԱՆ ԱՐԴՅՈՒՆՔՆԵՐԸ	11
3. ԼՈՒՍԱՎՈՐՈՒԹՅԱՆ ԴԱՐԱՇՐՋԱՆԸ	16
4. ՀԱՍԱՐԱԿՈՒԹՅԱՆ ՎԵՐԱԿԱՌՈՒՑՄԱՆ ՀԵՂԱՓՈԽԱԿԱՆ ՈՒՂԻՆ	20
5. ՖՐԱՆՍԻԱԿԱՆ ՄԵԾ ՀԵՂԱՓՈԽՈՒԹՅՈՒՆԸ	26
6. ՆԱՊՈԼԵՈՆԻ ԴԱՐԱՇՐՋԱՆԸ (1799–1815).....	32
7. ԵՎՐՈՊԱՆ 1815–1850–ԱԿԱՆ ԹՎԱԿԱՆՆԵՐԻՆ (ՀԵՏԱԴԻՄՈՒԹՅՈՒՆ, ՓՈԽՀԱՄԱՁԱՅՆՈՒԹՅՈՒՆ)	38
8. ՀԵՂԱՓՈԽՈՒԹՅՈՒՆՆԵՐԸ ԵՎՐՈՊԱՅՈՒՄ 1830–1840–ԱԿԱՆ ԹՎԱԿԱՆՆԵՐԻՆ	43
9. ԱՐԵՎԵԼՔԻ ԱՎԱՆԴԱԿԱՆ ՀԱՍԱՐԱԿՈՒԹՅՈՒՆՆԵՐԸ (ՕՍՄԱՆՅԱՆ ԿԱՅՄՐՈՒԹՅՈՒՆ ԵՎ ԻՐԱՆ).....	48
10. ԱՐԵՎԵԼՔԻ ԱՎԱՆԴԱԿԱՆ ՀԱՍԱՐԱԿՈՒԹՅՈՒՆՆԵՐԸ (ՀՆԴԿԱՍՏԱՆ ԵՎ ՉԻՆԱՍՏԱՆ)	54
11. ՄԻՋԱՋԳԱՅԻՆ ՀԱՐԱԲԵՐՈՒԹՅՈՒՆՆԵՐԸ (XVII ԴԱՐ – XIX ԴԱՐԻ ԱՌԱՋԻՆ ԿԵՍ).....	60
12. ԿՐԹՈՒԹՅՈՒՆԸ ԵՎ ՀԻՄՆԱՐԱՐ ԳԻՏՈՒԹՅՈՒՆՆԵՐԸ (XVII ԴԱՐ – XIX ԴԱՐԻ ԱՌԱՋԻՆ ԿԵՍ).....	65
13. ՀՈՒՄԱՆԻՏԱՐ ԳԻՏՈՒԹՅՈՒՆՆԵՐԸ, ԳՐԱԿԱՆՈՒԹՅՈՒՆԸ ԵՎ ԱՐՎԵՍՏԸ (XVII ԴԱՐ – XIX ԴԱՐԻ ԱՌԱՋԻՆ ԿԵՍ).....	70
ԱՌԱՋԻՆ ԲԱԺՆԻ ԱՄՓՈՓՈՒՄ	76

ԲԱԺԻՆ ԵՐԿՐՈՐԴ

ԶԱՐԳԱՑԱԾ ԱՐԴՅՈՒՆԱԲԵՐԱԿԱՆ ԵՐԿՐՆԵՐԸ ԵՎ ԱՇԽԱՐՀԸ (XIX ԴԱՐԻ ԵՐԿՐՈՐԴ ԿԵՍ – XX ԴԱՐԻ ՍԿԻԶԲ)

14. ԱՐԴՅՈՒՆԱԲԵՐԱԿԱՆ ՀԱՍԱՐԱԿՈՒԹՅԱՆ ԵՐԿՐՈՐԴ ՇՐՋԱՓՈՒԼԸ	78
15. ՓՈՓՈԽՈՒԹՅՈՒՆՆԵՐ ՏՆՏԵՍՈՒԹՅԱՆ ՄԵՋ ԵՎ ՍՈՑԻԱԼԱԿԱՆ ԿՅԱՆՔՈՒՄ ..	83
16. ՔԱՂԱՔԱԿԱՆ ԿՅԱՆՔԻ ԶԱՐԳԱՑՈՒՄԸ ԵՎՐՈՊԱՅՈՒՄ ԵՎ ԱՄՆ–ՈՒՄ	88
17. ԲԱՆՎՈՐԱԿԱՆ ՇԱՐԺՈՒՄՆԵՐԸ	92
18. ՀԱՍԱՐԱԿԱԿԱՆ–ՔԱՂԱՔԱԿԱՆ ՇԱՐԺՈՒՄՆԵՐԸ ԱՄՆ–ՈՒՄ ԵՎ ԵՎՐՈՊԱՅՈՒՄ	96
19. ԳԵՐՄԱՆԻԱՅԻ ԵՎ ԻՏԱԼԻԱՅԻ ՎԵՐԱՄԻԱՎՈՐՈՒՄՆԵՐԸ	102

20. ԱԶԳԱՅԻՆ ՊԵՏՈՒԹՅՈՒՆՆԵՐԻ ԱՌԱՋԱՑՈՒՄԸ ԲԱԼԿԱՆՅԱՆ ԹԵՐԱԿՂԶՈՒՄ	107
21. ԱԶԳԱՅԻՆ ՀԻՄՆԱԽՆԴԻՐԸ ԲԱԶՄԱԶԳ ՏԵՐՈՒԹՅՈՒՆՆԵՐՈՒՄ	113
22. ՕՍՄԱՆՅԱՆ ԿԱՅՍՐՈՒԹՅԱՆ ԵՎ ԻՐԱՆԻ ԱՐԴԻԱԿԱՆԱՑՄԱՆ ՓՈՐՁԵՐԸ . . .	119
23. ՃԱՊՈՆԻԱՅԻ ԵՎ ՉԻՆԱՍՏԱՆԻ ԱՐԴԻԱԿԱՆԱՑՄԱՆ ԳՈՐԾԸՆԹԱՅԸ	125
24. ՄԻՋԱԶԳԱՅԻՆ ՀԱՐԱԲԵՐՈՒԹՅՈՒՆՆԵՐԸ (XIX ԴԱՐԻ ՎԵՐՋ – XX ԴԱՐԻ ՍԿԻԶԲ)	131
25. ԱՌԱՋԻՆ ԱՇԽԱՐՀԱՄԱՐՏԻ ՍԿԻԶԲԸ ԵՎ ԸՆԹԱՑՔԸ (1914–1916 ԹՎԱԿԱՆՆԵՐ)	136
26. ԱՌԱՋԻՆ ԱՇԽԱՐՀԱՄԱՐՏԻ ԱՎԱՐՏԸ ԵՎ ՀԵՏԵՎԱՆՔՆԵՐԸ	143
27. ԿՐԹՈՒԹՅՈՒՆԸ ԵՎ ԳԻՏՈՒԹՅՈՒՆԸ XIX ԴԱՐԻ ԵՐԿՐՈՐԴ ԿԵՍԻՆ ԵՎ XX ԴԱՐԻ ՍԿԻԶԻՆ	150
28. ԳՐԱԿԱՆՈՒԹՅՈՒՆԸ ԵՎ ԱՐՎԵՍՏԸ XIX ԴԱՐԻ ԵՐԿՐՈՐԴ ԿԵՍԻՆ ԵՎ XX ԴԱՐԻ ՍԿԻԶԻՆ	154
 ԵՐԿՐՈՐԴ ԲԱԺՆԻ ԱՄՓՈՓՈՒՄ	158
 ԵԶՐԵՐԻ (ՏԵՐՄԻՆՆԵՐԻ) ԲԱՌԱՐԱՆ	162
ԿԱՐԵՎՈՐ ԻՐԱԴԱՐՁՈՒԹՅՈՒՆՆԵՐԻ ԺԱՄԱՆԱԿԱԳՐՈՒԹՅՈՒՆ	171

Ալբերտ Անդրանիկի Ստեփանյան
Ռուբեն Արամի Սաֆրաստյան
Արամ Սրապիոնի Նազարյան

ՀԱՄԱՇԽԱՐՀԱՅԻՆ ՊԱՏՄՈՒԹՅՈՒՆ. ՆՈՐ ԴԱՐԵՐ

Դասագիրք հանրակրթական հիմնական
դպրոցի 8-րդ դասարանի համար

Երևան, 2013

Альберт Андраникович Степанян
Рубен Арамович Сафрастян
Арам Срапионович Назарян

ВСЕМИРНАЯ ИСТОРИЯ. НОВОЕ ВРЕМЯ

Учебник для 8-го класса
общеобразовательной основной школы
(на армянском языке)

Издательство «Зангак», Ереван, 2013

ԴԱՍԱԳՐՔՈՒՄ ՕԳՏԱԳՈՐԾՎԱԾ ՆՎԱՐՆԵՐԻ ՀԵՂԻՆԱԿՆԵՐՆ ՈՒ ԱՂԲՅՈՒՐՆԵՐԸ

ՇԱՊԻԿԻՆՆՆԻ XVIII դարի Ֆրանսիայի «Մարդու և քաղաքացու իրավունքների հռչակագիրը», XIX դարի Ռուսաստանյան կայսրության Պերմի գավառի Չորմոզի գործարանի մեխանիկական արտադրամասը:

Էջ 5՝ Jean-Jacques-François Le Barbier, էջ 6(1)՝ զծապատկեր 1556 թ. գիտնական Ազրիկոլայի գրքից, էջ 7՝ Henry Howard, էջ 8(1)՝ Robert Henry Thurston, էջ 8(2)՝ Duyckinick, Evert A. Portrait Gallery of Eminent Men and Women in Europe and America, էջ 9(1)՝ Duyckinick, Evert A. Portrait Gallery of Eminent Men and Women in Europe and America, էջ 16՝ Sir Godfrey Kneller, էջ 19՝ Էստեն Ֆալկոնե, էջ 21՝ Anthony Van Dyck, էջ 22՝ Samuel Cooper, էջ 23՝ John Trumbull, էջ 24՝ Gilbert Stuart, էջ 26՝ Ժոզեֆ Դյուպլեյսի, էջ 27՝ Jean-Pierre Houel, էջ 30՝ Louis-Léopold Boilly, էջ 32՝ Jacques-Louis David, էջ 33՝ Jacques-Louis David, էջ 36՝ Ալեքսանդր Զառեղվեյր, էջ 38՝ Jean-Baptiste Isabey, էջ 41՝ William Edward Kilburn, էջ 46՝ Thomas Philipps, էջ 51՝ Flavius Belsarius, էջ 52(1)՝ Evknight13, էջ 52(2)՝ Վլադիմիր Սոչկով, էջ 55՝ Thomas Rowlandson, Augustus Charles Pugin, John Bluck, Joseph Constantine Stadler, Thomas Sutherland, J. Hill, Harraden, էջ 58՝ Edward Duncan, էջ 61(1)՝ Ալեքսանդր Պոպով, էջ 62՝ Juan Lovera, էջ 66՝ Frans Hals, էջ 67(1)՝ Gottfried Kneller, էջ 67(2)՝ Աֆոնսու Ժիրու, էջ 68(1)՝ Jacques-Louis David, էջ 70՝ Cadell and Davies, John Horsburgh or R.C. Bell, էջ 71(1)՝ Louis Auguste Bisson, էջ 71(2)՝ Jacques Louis David, էջ 72(1)՝ Barbara Kraft, էջ 72(2)՝ Vincenzo Camuccini, էջ 77՝ Norbert Kaiser, էջ 79՝ Chicago Architectural Photographing Company, էջ 83՝ Hartsook, էջ 84(2)՝ William J. Hammer, էջ 85՝ Wright Brothers, էջ 86՝ Giacomo Brogi, էջ 92՝ Gottfried Engelmann, էջ 93՝ H.F. Helmolt, էջ 96՝ Alexander Gardner, էջ 100՝ A. A. Pasetti, էջ 102՝ Franz von Lenbach, էջ 108՝ Աստոն ֆոն Վերներ, էջ 114՝ Julius von Blaas, էջ 115(1)՝ Hugo Gerhard Strohl, էջ 115(2)՝ Պ. Տրոպեցկոյ, էջ 119՝ W.&D. Downey photographers, էջ 122՝ Behnam Farid, էջ 133՝ Time Life Pictures, էջ 150՝ Erik Lindberg, Jonathunder, էջ 151(1)՝ Leonard Darwin, էջ 152(2)՝ Oren Jack Turner, էջ 153՝ Max Halberstadt, էջ 154(1)՝ Nadar (Gaspard-Félix Tournachon), էջ 154(2)՝ Davart Company, էջ 156(1)՝ Nadar (Gaspard-Félix Tournachon), էջ 156(2)՝ Giacomo Brogi

Հրատարակչության տնօրեն՝
Գեղարվեստական խմբագիր՝
Խմբագիր և սրբագրիչ՝
Ձևավորումը և շապիկը՝

Է. Ս. Մկրտչյան
Ա. Ա. Բաղդասարյան
Ն. Ն. Փարսադանյան
Գ. Ա. Հարությունյանի

Տպագրությունը՝ օֆսեթ: Չափսը՝ 70x100 1/16: Թուղթը՝ օֆսեթ:
Ծավալը՝ 11 տպ. մամուլ, 14,19 պայմ. մամուլ: Տառատեսակը՝ «Ասպետ»:
Տպաքանակը՝ 23300: Պայմանագիր՝

«ԶԱՆԳԱԿ» ՀՐԱՏԱՐԱԿՉՈՒԹՅՈՒՆ

ՀՀ, 0051, Երևան, Կոմիտասի պող. 49/2, հեռ.՝ (+37410) 23-25-28

Ֆաքս՝ (+37410) 23-25-95, էլ. փոստ՝ info@zangak.am

Էլ. կայքեր՝ www.zangak.am, www.book.am, www.dasagirq.am